

• M. VAL. MARTIALIS
EPIGRAMMATA.

I N

Usum Scholæ *Westmonasteriensis.*

G. 9. 9



L O N D I N I,

Ex Officinâ ELIZ. REDMAYNE.
MDCLXXXIX.

52

Henk Bo. 1877/41 T. B. 1877

V I T A

M. VAL. MARTIALIS
EX PETRO CRINITO.

M Arc. Valerius Martialis genere Hispanus fuit, Bilbili natus haud ignobili oppido Celtiberia, ut veteres autores tradunt, & ipse Martialis cum pluribus locis demonstrat, tum maxime his versibus ad Licinianum municipem suum :

Vir Celtiberis non tacende gentibus,
Nostræque laus Hispaniæ,
Videbis altam, Liciniane, Bilbilim,
Equis & armis nobilem.

Sub primam ætatem profectus est ad urbem Romam, quo facilius in literarum studio versari posset, suumque ingenium erudire: sed cum agendis causis minime se idoneum videret, omnem operam atque diligentiam retulit ad scribenda Epigrammata: in quibus magnopere excelluit iudicio veterum. Maxime autem valuit in promerendis sibi atque conciliandis hominum studiis, adeo urbanitate & salibus prestitit. Relata sunt à C. Plinio permulta de ingenio & eruditione Val. Martialis; quibus satis colligere possumus, quanti fecerit hunc ipsum poetam, quantumque illius versibus oblectari consueverit. Itaque minime mirari oportet, si
Ælius Verus Imperator (qui Cæsari Hadri-

4 VITA M. VAL. MARTIALIS.

ano gratissimus fuit) solitus est singulari affe-
 ctu prosequi lepores atque jocos poeta Martia-
 lis, suumque Virgilium vocare. Neque dubium
 est illam Romæ publicis honoribus ornatum at-
 que honestatum fuisse. Nam equestri dignitate
 donatus est, & prætura, & jure trium libero-
 rum; ut ipse de se testatur. Lib. XII. Epigram-
 matôn composuit miro ingenio & singulari ur-
 banitate: quibus adjecit Xenia & Apophoreta
 libellis duobus absoluta. In his secutus est Mar-
 sum poetam, Pedonem, atque Getulicum: Vale-
 rium quoque Catullum, & Licinium Calvum
 plurimi fecit. In duodecimo libro Nervæ atq;
 Trajano Imperatoribus blanditus est, damnatis
 temporibus Domitiani Caesaris. Ad eundem
 refertur Spectaculorum liber: qui extra ordi-
 nem aliorum habetur à nostris grammaticis, ut
 vetusti codices probant. Inter amicos præcipuè
 habuit Stellam Patavinum, Decianum, Sili-
 um Italicum, V. Flaccum, Parthenium, aliosq;
 complures: ad quos sæpenumero scribit. Ster-
 tinus vir clarissimus (quem Martialis muta-
 to nomine Avitum appellat) tantum concessit
 ipsius ingenio atq; doctrinæ, ut viventi adhuc
 imaginem more veterum in sua bibliotheca po-
 suerit. Postremo cū Martialis foret proVectior,
 tadio rerum urbanarum affectus in patriam
 rediit, atq; in natali solo paulo post interiit, non
 sine lacrymis ac magno morore C. Plinii; ut in-
 genue testatus est, scripta epistola ad Cornelium
 Priscum.

C. Plinius

C. Plinius Cæcilius Secundus, Epistola
lib. III ultima.

CORNELIO PRISCO SUO S.

Audio Valerium Martialem decessisse; & molestè fero. Erat homo ingeniosus, acutus, acer, & qui plurimum in scribendo & salis haberet, & felix; nec candoris minus. Prosequutus eram viatico secedentem. Dederam hoc amicitiae; dederam etiam versiculis, quos de me composuit. Fuit moris antiqui, eos qui vel singulorum laudes, vel urbium scripserant, aut honoribus, aut pecuniâ ornare: Nostris verò temporibus, aut alia speciosa & egregia, ita hoc imprimis exolevit. Nam postquam desivimus facere laudanda, laudari quoque ineptum putamus. Quæris qui sint versiculi, quibus gratiam retulerim? Remitterem te ad ipsum Volumen, nisi quosdam tenerem: Tu, si placuerint hi, cæteros in libro requires. *Libr. X. Epigr. XIX*) Alloquitur Musam, mandat ut domum meam in Esquiliis quærat, adeat reverenter.

*Sed ne tempore non tuo disertam
Pulses ebria januam, videto.*

*Totos dat tetrica dies Minerva,
 Dum centum studet auribus virorum
 Hoc, quod secula posterique possint
 Arpinis quoque comparare chartis.
 Seras tutior ibis ad lucernas.
 Hac hora est tua, cum furit Lyaus,
 Cum regnat rosa, cum madent capilli :
 Tunc me vel rigidi legant Catones.*

Meritōne eum, qui hoc de me scripsit,
 & tunc dimisi amicissimè, & nunc, ut a-
 micissimum, defunctum esse doleo? De-
 dit enim mihi quantum maximè potuit ;
 daturus amplius , si potuisset. Tametsi
 quid homini potest dari majus, quàm glo-
 ria, laus & æternitas? At non erunt æter-
 na, quæ scripsit? Non erunt fortasse :
 ille tamen scripsit, tanquam futura. Vale.

M. VAL.

M. VAL. MARTIALIS
EPIGRAMMATUM

LIBER PRIMUS.

AD LECTOREM EPISTOLA.

S Pero me secutum in libellis meis tale tempera-
mentum, ut de illis queri non possit, quisquis de
se bene senserit, cum salvâ infimarum quoque
personarum reverentiâ ludant; quæ adeo antiquis aucto-
ribus defuit, ut nominibus non tantum veris abusi sint,
sed & magnis. Mihi fama vilius constet, & probetur
in me nunc novissimum ingenium. Absit à jocorum no-
strorum simplicitate malignus interpret, nec epigram-
mata mea scribat. Improbè facit, qui in alieno libro
ingeniosus est. Videor mihi meo jure facturus, si Epi-
stolam versibus clausero.

Ad Eundem. I.

Hic est, quem legis, ille, quem requiris;
Toto notus in orbe Martialis,
Argutis Epigrammatôn libellis:
Cui, Lector studiose, quod dedisti
Viventi decus atque sentienti,
Rari post cineres habent Poetæ.

A 4

Ad

Ad eundem. II.

Qui tecum cupis esse meos ubicunque libellos,
Et comites longæ quæris habere viæ;
Hos eme, quos arctat brevibus membrana tabellis:
Scrinia da magnis, me manus una capit.
Nec tamen ignores ubi sim venalis, & erres
Urba vagus totâ: me duce certus eris.
Libertum docti Lucensis quære Secundum,
Limina post Pacis, Palladiumque forum.

Ad librum suum. III.

Argiletanas mavis habitare tabernas,
Cum tibi, parve liber, scrinia nostra vacent.
Nescis, heu! nescis dominæ fastidia Romæ:
Crede mihi, nimium Martia turba sapit.
Majores nusquam ronchi: juvenesque senesque,
— Et pueri nasum rhinocerotis habent.
Audieris cum grande sophos, dum basia captas,
Ibis ab excusso missus in astra sago.
Sed tu, ne toties domini patiare lituras,
Neve notet lusus tristis arundo tuos,
Ætherias, lascive, cupis volitare per auras:
I, fuge; sed poteras tutior esse domi.

Ad Cæsarem. IV.

Contigeris nostros, Cæsar, si fortè libellos,
Terrarum dominum pone supercilium.
Consuevere jocos vestri quoque ferre triumphi,
Materiam doctis nec pudet esse ducem.
Quâ Thymelen spectas, derisoremque latinum,
Illâ fronte, precor, carmina nostra legas.

Ad seipsum sub persona Cæsaris. V.

Do tibi Naumachiam, tu das Epigrammata nobis:
Vis, puto, cum libro, Marce, natare tuo.

De leone Cæsaris. VI.

Ætherias aquillâ puerum portante per auras,
Illæsum timidis unguibus hæsit onus:
Nunc sua Cæsarios exorat præda leones,
Tutus & ingenti ludit in ore lepus.

Quæ

EPIGRAMMAT. LIB. I.

9

Quæ majora putas miracula ; summus utrisque
Auctor adest : hæc sunt Cæsaris, illa Jovis.

Ad Catonem. VII.

Cur in theatrum, Cato severe, venisti ?
An ideo tantum veneras, ut ex re ?

Ad Maximum de columba Stella. VIII.

Stellæ delictum mei columba,
Veronâ licet audiente dicam,
Vicit, Maxime, passerem Catulli :
Tantò Stella meus tuo Catullo,
Quantò passere major est columba.

Ad Decianum. IX.

Quod magni Thræseæ, consummatique Catonis,
Dogmata sic sequeris, salvus ut esse velis ;
Pectore nec nudo strictos incurris in enses :
Quod fecisse velim te, Deciane, facis.
Nolo virum, facili redimit qui sanguine famam :
Hunc volo, laudari qui sine morte potest.

In Cottam. X.

Bellus homo & magnus vis idem, Cotta, videri :
Sed qui bellus homo est, Cotta, pusillus homo est.

De Gemello & Maronilla. XI.

Petit Gemellus nuptias Maronillæ,
Et cupit, & instat, & precatur, & donat.
Adeone pulchra est ? immo foedius nil est :
Quid ergo in illa petitur & placet ? tussis.

In Sextilianum. XII.

Cum data sint equiti bis quina numismata, quare
Bis decies solus, Sextiliane, bibis ?
Jam defecisset portantes calda ministros,
Si non potares, Sextiliane, merum.

De Regulo. XIII.

Itur ad Herculei gelidas quæ Tiburis arces,
Canaque sulphureis Albula fumat aquis ;
Rura, nemusque sacrum, delectaque jugera Musis
Signat vicina quartus ab urbe lapis ;

Hic

Hic rudis æstivas præstabat porticus umbras ;

Heu quam penè novum porticus ausa nefas !

Nam subito collapsa ruit, cum mole sub illa

Gestatus bijugis Regulus esset equis.

Nimirum timuit nostras Fortuna querelas,

Quæ par tam magnæ non erat invidiæ.

Nunc & damna juvant : sunt ipsa pericula tanti :

Stantia non poterant testa probare Deos.

De Arria & Pæto. XIV.

Casta suo gladium cum traderet Arria Pæto,

Quem de visceribus traxerat ipsa suis :

Siqua fides, vulnus, quod feci, non dolet, inquit ;

Sed quod tu facies, hoc mihi, Pæte, dolet.

De leone Cæsaris. XV.

Delicias, Cæsar, lususque, jocosque leonum.

Vidimus : hoc etiam præstat arena tibi.

Cum pressus blando toties à dente rediret,

Et per aperta vagus curreret ora lepus ;

Unde potest avidus captæ leo parcere prædæ ?

Sed tamen esse tuus dicitur, ergo potest.

Ad Julium. XVI.

O mihi post nullos Juli memorande sodales,

Si quid longa fides, canaque jura valent.

Bis jam penè tibi consul trigessimus instat,

Et numerat paucos vix tua vita dies.

Non bene distuleris, videas quæ posse negari ;

Et solum hoc ducas, quod fuit, esse tuum.

Expectant curæque catenatique labores :

Gaudia non remanent, sed fugitiva volant.

Hæc utrâque manu, complexuque asserere toto :

Sæpe fluunt imo sic quoque lapsa sinu.

Non est, crede mihi, sapientis dicere, vivam :

Sera nimis vita est crastina ; vive hodie.

Ad Avitum de Libro. XVII.

Sunt bona, sunt quædam mediocria, sunt mala
plura.

Quæ legis hæc : aliter non fit, Avite, liber.

Ad

Ad Titum. XVIII.

COgit me Titus actitare causas,
Et dicit mihi sæpe, magna res est.
Res magna est, Tite, quam facit colonus.

Ad Tuccam. XIX.

Quid te, Tucca, juvat vetulo miscere Falerno
In Vaticanis condita musta cadis?
Quid tantum fecere boni tibi pessima vina?
Aut quid fecerunt optima vina mali?
De nobis facile est: scelus est jugulare Falernum,
Et dare Campano toxica sæva mero.
Convivæ meruere tui fortasse perire:
Amphora non meruit tam pretiosa mori.

Ad Æliam. XX.

Si memini, fuerant tibi quatuor, Ælia, dentes:
Expuit una duos tussis, & una duos.
Jam secura potes totis tussire diebus;
Nil istic, quod agat, tertia tussis habet.

Ad Cæcilianum. XXI.

Dic mihi, quis furor est? turbâ spectante vocatâ,
Solutus boletos, Cæciliane, voras.
Quid dignum tanto tibi ventre gulâque precabor?
Boletum, qualem Claudius edit, edas.

De Mucio Scævola. XXII.

Cum peteret regem decepta satellite dextra,
Injecit sacris se peritura focis.
Sed tam sæva pius miracula non tulit hostis,
Et raptum flammis iussit abire virum.
Urere quam potuit contempto Mucius igne,
Hanc spectare manum Porsena non potuit.
Major deceptæ fama est & gloria dextræ:
Si non errâset, fecerat illa minus.

De Leone Casaris. XXIII.

Quid nunc sæva fugis placidi, lepus, ora Leonis?
Frangere tam parvas non didicere feras.
Servantur magnis isti cervicibus ungues,
Nec gaudet tenui sanguine tanta sitis.

Præda:

Præda eanum lepus est, vastos non implet hiatus:
Non timeat Dacus Cæsaris arma puer.

Ad Faustinum. XXIV.

E De tuos tandem populo, Faustine, libellos,
Et cultum docto pectore profer opus:
Quod nec Cecropiæ damnent Pandionis arces,
Nec fileant nostri prætereantque senes.
Ante fores stantem dubitas admittere famam?
Teque piget curæ præmia ferre tuæ?
Post te, victuræ per te quoque vivere chartæ
Incipiant: cineri gloria sera venit.

In Sextilianum. XXV.

Sextiliane, bibis quantum subsellia quinque
Solus, aquâ toties ebrius esse potes.
Nec confessorum vicina numismata tantum,
Æra sed à cuneis ulteriora petis.
Non hæc Pelignis agitur vindemia prælis,
Uva nec in Tuscis nascitur ista jugis.
Testa sed antiqui felix siccatur Opimi,
Egerit & nigros Massica cella cados.
A caupone tibi fæx Laetana petatur,
Sì plus quam decies, Sextiliane, bibis.

Ad Procillum. XXVI.

Hesternâ tibi nocte dixeramus,
Quincunces, puto, post decem peractos,
Coenares hodie, Procille, mecum.
Tu factam tibi rem statim putâsti,
Et non sobria verba subnotâsti;
Exemplo nimium periculoso.

Μισὼ μνήμωνα Συμπότῳ, Procille.

De Acerra. XXVII.

Hesterno foetere mero qui credit Acerram,
Fallitur, in lucem semper Acerra bibit.

Ad Fidentinum plagiarium. XXVIII.

Fama refert nostros te, Fidentine, libellos
Non aliter populo quam recitare tuos.
Si mea vis dici, gratis tibi carmina mittam:
Si dici tua yis; hæc eme, ne mea sint.

In

In Diaulum. XXIX.

Chirurgus fuerat, nunc est vespillo Diaulus :
 Cœpit quo poterat clinicus esse modo.

Ad Sabidium. XXX.

Non amo te, Sabidi ; nec possum dicere, quare :
 Hoc tantum possum dicere ; non amo te.

De Gellia. XXXI.

Amissum non flet, cum sola est, Gellia patrem :
 Si quis adest ; iussæ profiliunt lacrymæ.
 Non luget, quisquis laudari, Gellia, quærit :
 Ille dolet verè, qui sine teste dolet.

Ad Lucanum & Tullum fratres. XXXII.

Si Lucane, tibi, vel si tibi, Tulle, darentur
 Qualia Ledæi fata Lacones habent :
 Nobilis hæc esset pietatis rixa duobus,
 Quod præ fratre mori vellet uterque prior.
 Diceret infernas & qui prior isset ad umbras ;
 Vive tuo, frater, tempore, vive meo.

Ad Fidentinum. XXXIII.

Quem recitas, meus est, ô Fidentine, libellus :
 Sed male cum recitas, incipit esse tuus.

Ad Decianum. XXXIV.

Si quis erit raros inter numerandus amicos,
 Quales prisca fides, fama que novit anus :
 Si quis Cecropiæ madidus Latæque Minervæ
 Artibus, & verâ simplicitate bonus :
 Si quis erit recti custos, imitator honesti ;
 Et nihil arcano qui roget ore deos :
 Si quis erit magnæ subnixus robore mentis ;
 Dispeream, si non hic Decianus erit.

Ad Livium. XXXV.

Qui ducis vultus, & non legis ista libenter ;
 Omnibus inideas, Livide ; nemo tibi.

In Cæcilium. XXXVI.

Urbanus tibi, Cæcili, videris :
 Non es, crede mihi : quid ergo ? verna es.
 Hoc quod Transiberinus ambulator,

Qui

Qui pallentia sulphurata fractis
 Permutat vitreis : quod otiosæ
 Vendit qui madidum cicer coronæ :
 Quod custos dominusque viperarum :
 Quod viles pueri salariorum :
 Quod fumantia qui tomacula raucus
 Circumfert tepidis cocus popinis :
 Quod non optimus Urbicus Poëta.
 Quare desine jam tibi videri,
 Quod soli tibi, Cæcili, videris ;
 Qui Galbam salibus tuis, & ipsum
 Possis vincere Sestium Caballum.
 Non cuicunque datum est habere nasum,
 Ludit qui stolidi procacitate,
 Non est Sestius ille, sed caballus.

De Porcia. XXXVII.

Conjugis audisset fatum cum Porcia Bruti,
 Et subtrahita sibi quæreret arma dolor :
 Nondum scitis, ait, mortem non posse negari ?
 Credideram satis hoc vos docuisse patrem.
 Dixit, & ardentes avido bibit ore favillas :
 I nunc, & ferrum, turba molesta, nega.

In Mancinum. XXXVIII.

Bis tibi triceni fuimus, Mancine, vocati ;
 Et positum est nobis nil herè præter aprum.
 Non quæ de tardis servantur vitibus uvæ ;
 Dulcibus aut certant quæ melimela tavis :
 Non pyra quæ lentâ pendent religata genistâ ;
 Aut imitata breves Punica mala rosas :
 Rustica lactentes nec misit fiscina metas ;
 Nec de Picens venit oliva cadis.
 Nudus aper, sed & hic minimus, qualisque necari
 A non armato pumilione potest.
 Et nihil inde datum est : tantum spectavimus omnes,
 Ponere aprum nobis sic & arena solet.
 Ponatur tibi nullus aper post talia facta :
 Sed tu ponaris, cui Charidemus, apro.

Ad Stellam. XXXIX.

L Ascivos leporum cursus, lususque leonum,
 Quod major nobis charta minorque gerit.
 Et bis idem facimus, nimium si, Stella, videtur
 Hoc tibi; bis leporem tu quoque pone mihi.

De libro suo. XL.

E Dita ne brevibus pereat mihi charta libellis,
 Dicatur potius *τὸ δ' ἀπαμειβόμενον*.

De Diaulo. XLI.

N Uper erat medicus, nunc est vespillo Diaulus,
 Quod vespillo facit, fecerat & medicus.
De leonum & leporum spectaculo. XLII.

R Ictibus his tauros non eripuerunt magistri,
 Per quos præda fugax itque reditque lepus.
 Quodque magis mirum, velocior exit ab hoste,
 Cum nil à tantâ nobilitate refert.

Tutior in sola non est cum currit arena,
 Nec caveæ tantâ conditur ille fide.

Si vitare canum morsus, lepus improbe, quæris,
 Ad quæ confugas ora leonis habes.

Ad Licinianum. XLIII.

V Ir Celtiberis non tacende gentibus,
 Nostræque laus Hispaniæ,
 Videbis altam, Liciniane, Bilbilim,
 Equis & armis nobilem,
 Sterilemque Caunum nivibus, & fractis sacrum.

Vadaveronem montibus,
 Et delicati dulce Botrodi nemus,
 Pomona quod felix amat,
 Tepidi natabis lene Congedi vadum,
 Mollesque nympharum lacus;

Quibus remissum corpus adstringas brevi
 Salone, qui ferrum gelat.

Præstabit illic ipsa figendas propè
 Voberta prandenti feras.

Æstus serenos aureos franges Tago,
 Obscurus umbris arborum.

Avidana.

Avidam rigens Dircenna placabit sitim,
 Et Nemea, quæ vincit nives.
 At cum December canus, & bruma impotens
 Aquilone rauco mugiet ;
 Aprica repetes Tarraconis littora,
 Tuamque Laletaniam.
 Ibi illigatas mollibus damas plagis
 Mactabis, & vernas apros ;
 Leporemque forti callidum rumpens equo,
 Cervos relinques villico.
 Vicina in ipsum silva descendet focum
 Infante cinctum fordido.
 Vocabitur venator, & veniet tibi
 Conviva clamatus prope.
 Lunata nusquam pellis, & nusquam toga,
 Olidæque vestes murice :
 Procul horridus Liburnus, & querulus cllens;
 Imperia viduarum procul.
 Non rumpet altum pallidus somnum reus,
 Sed mane totum dormies.
 Mercetur alius grande & insanum sophos :
 Miserere tu feliciū ;
 Veroque frui non superbus gaudio,
 Dum Sura laudatur tuus :
 Non impudenter vita, quod reliquum est, petit,
 Cum fama, quod fatis est, habet.

In Æmilianum. XLIV.

SI tibi Mistyllus cocus, Æmiliane, vocatur ;
 Dicetur quare non Taratalla mihi ?

Ad Leporem. XLV.

Non facit ad sævos cervix nisi prima leones,
 Quid fugis hos dentes, ambitiose lepus ?
 Scilicet à magnis ad te descendere tauris,
 Et, quæ non cernunt, frangere colla velint :
 Desperanda tibi est ingentis gloria fati,
 Non potes hoc tenuis præda sub hoste mori.

Ad Quinctianum. XLVI.

Commendo tibi, Quinctiane, nostros,
 (Nostros dicere si tamen libellos
 Possim, quos recitat tuus Poëta :)
 Si de servitio gravi queruntur,
 Assertor venias, satisque præstes ;
 Et, cum se dominum vocabit ille,
 Dicas esse meos, manuque missos.
 Hoc si terque quaterque clamitâris,
 Impones plagiaro pudorem.

In Fidentinum plagiarium. XLVII.

UNa est in nostris tua, Fidentine, libellis
 Pagina, sed certâ domini signata figurâ ;
 Quæ tua traducit manifesto carmina furto.
 Sic interpositus vitio contaminat uncto
 Urbica Lingonicus Tyrianthina bardocucullus :
 Sic Aretinæ violant crystallina testæ :
 Sic niger, in ripis errat cum fortè Caystri,
 Inter Lædæos ridetur corvus olores :
 Sic, ubi multifonâ fervet sacer Atthide lucus,
 Improba Cecropias offendit pica querelas.
 Indice non opus est nostris, nec vindice, libris :
 Stat contrâ, dicitque tibi tua pagina, Fur es.

Ad Fuscum. XLVIII.

SI quid, Fusce, vacas adhuc amari,
 (Nam sunt hinc tibi, sunt & hinc amici)
 Unum, si superest, locum rogamus :
 Nec me, quod tibi sim novus, recuses ;
 Omnes hoc veteres tui fuerunt.
 Tu tantum inspice, qui novus paratur,
 An possit fieri vetus sodalis.

Votum Martialis ad Frontonem. XLIX.

VOta tui breviter si vis cognoscere Marci,
 Clarum militiæ, Fronto, togæque decus ;
 Hoc petit : esse sui, nec magni ruris arator,
 Sordidaque in parvis otia rebus amat.
 Quisquam picta colit Spartani frigora saxi,
 Et matutinum portat ineptus ave ;

Cui

Cui licet, exigui nemoris rurisque beati,
 Ante focum plenas explicuisse plagas;
 Et piscem tremulâ salientem ducere setâ,
 Flavaque de rubro promere mella cado:
 Pinguis inæquales onerat cui villica mensas,
 Et sua non emptus præparat ova cinis?
 Non amet hanc vitam, quisquis me non amat, opto:
 Vivat & urbanis albus in officiis.

Ad Cauponem. L.

Continuis vexata madet vindemia nimbis:
 Non potes, ut cupias, vendere, caupo, merum.

Ad Flaccum. LI.

Qualem, Flacce, velim quæris, nolimve libellum?
 Nolo nimis facilem, difficilemve nimis.
 Illud quod medium est, atque inter utrumque probamus:

Nec volo quod cruciat: nec volo quod satiat.

Ad Eundem. LII.

Dat Bajana mihi quadrantes sportula centum:
 Inter delicias quid facit ista fames?
 Redde Lupi nobis, tenebrosa que balnea Grylli:
 Tam malè cum coenem; cur bene, Flacce, labor?

De Leone Caesaris. LIII.

Intres ampla licet torvi, lepus, ora leonis,
 Esse tamen vacuo se leo dente putat.
 Quod ruet in tergum, vel quos procumbet in armos?
 Alta juvencorum vulnera figet ubi?
 Quid frustra nemorum dominum regemque fatigas?
 Non nisi delectâ pascitur ille ferâ.

Ad Licinianum. LIV.

Verona docti syllabas amat Vatis,
 Marone felix Mantua est:
 Censetur Apona Livio suo tellus,
 Stellaque nec Flacco minùs:
 Apollodoro plaudit imbrifer Nilus,
 Nasone Peligni sonant:
 Duosque Senecas, unicumque Lucanum,
 Facunda loquitur Corduba:

Gau-

Gaudent jocosæ Canio suo Gades,
Emerita Deciano meo.

Te, Liciniane, gloriabitur nostra,
Nec me tacebit, Bilbilis.

De Lævina. LV.

Casta, nec antiquis cedens Lævina Sabinis,
Et quamvis tetrico tristior ipsa viro,
Dum modò Lucrino, modò se permittit Averno,
Et dum Bajanis sæpe fovetur aquis,
Incidit in flammæ, juvenemque secuta, relicto
Conjuge, Penelope venit, abit Helene.

Ad Celerem. LVI.

UT recitem tibi nostra rogas Epigrammata: nolo.
Non audire, Celer, sed recitare cupis.

Ad Fabullam. LVII.

Bella es; novimus: & puella; verum est:
Et dives; quis enim potest negare?
Sed dum te nimium, Fabulla, laudas,
Nec dives, neque bella, nec puella es.

Ad Cæcilianum. LVIII.

Cum dixi ficus, rides quasi barbara verba;
Et dici ficos, Cæciliane, jubes,
Dicemus ficos, quas scimus in arbore nasci,
Dicemus ficos, Cæciliane, tuos.

Ad Plagiarium. LIX.

ERras, meorum fur avare librorum,
Fieri poetam posse qui putas tanti,
Scriptura quanti constet, & tomus vilis:
Non sex paratur aut decem sophos nummis.
Secreta quære carmina, & rudes curas,
Quas novit unus, scrinioque signatas
Custodit ipse virginis pater chartæ,
Quæ trita duro non inhorruit mento.
Mutare dominum non potest liber notus:
Sed pumicatâ fronte si quis est nondum,
Nec umbilicis cultus atque membrana,

Mercare tales adeò, nec sciet quisquam.
Aliena quisquis recitat, & petit famam;
Non emere librum, sed silentium debet.

Ad Chærilum. LX.

L Iber homo es nimium, dicis mihi, Choerile,
semper:
In te qui dicit, Choerile, liber homo est.

De Rufo. LXI.

Quicquid agit Rufus, nihil est nisi Nævia Rufo:
Si gaudet, si flet, si tacet, hanc loquitur.
Coenat, propinat, poscit, negat, innuit, una est
Nævia: si non sit Nævia, mutus erit.
Scriberet hesternâ patri cum luce salutem,
Nævia lux inquit, Nævia lumen, ave.

Ad Maximum De Canio Rufo. LXII.

Cœpit, Maxime, Pana quæ solebat,
Nunc ostendere Canium Terentos.

Ad Librum. LXIII.

Vade salutatum; pro me, liber, ire juberis
Ad Proculi nitidos, officiose, Lares.
Quæris iter? dicam: vicinum Castora canæ
Transibis Vestæ, virgineamque domum.
Inde sacro veneranda petes pallatia clivo,
Plurima quæ summi fulget imago ducis.
Nec te detineat miri radiata colossi
Quæ Rhodium moles vincere gaudet opus.
Flecte vias hæc quæ madidi sunt tecta Lyæi,
Et Cybelæ picto stat Corybante tholus.
Protinus à læva clari tibi fronte Penates,
Atriaque excelsæ sunt adeunda domus.
Hanc pete, nec metuas fastus, limenque superbum:
Nulla magis toto janua poste patet:
Nec propior quàm Phœbus amet, doctæque sorores.
Si dicet, quare non tamen ipse venit?
Sic, licet, excuses: Quia qualiacunque leguntur
Ista, saluator scribere non potuit.

In Fidentinum plagiarium. LXIV.

Nostris versibus esse te poetam,
 Fidentine, putas, cupisque credi?
 Sic dentata sibi videtur Ægle,
 Emptis ossibus, Indicoque cornu:
 Sic, quæ nigrior est cadente moro,
 Ceruffata sibi placet Lycoris.
 Hæc & tu ratione, quâ poeta es,
 Calvus cum fueris, eris comatus.

De Lino. LXV.

Dimidium donare Lino, quàm credere totum
 Qui mavult, mavult perdere dimidium.

Ad Flaccum. LXVI.

O Mihi curarum pretium non vile mearum,
 Flacce, Antenorei spes & alumne Laris:
 Pierios differ cantusque chorosque sororum:
 Æs dabit ex istis nulla puella tibi.
 Quid petis à Phœbo? nummos habet arca Minervæ;
 Hæc sapit, hæc omnes foenerat una deos.
 Quid possent ederæ Bacchi dare? Palladis arbor
 Inclinat varias pondere nigra comas.
 Præter aquas Helicon, & ferta, lyrasque Dearum
 Nil habet, & magnum, semper inane, sophos.
 Quid tibi cum Cirrha? quid cum Permessidos unda?
 Romanum propius, divitiisque forum est.
 Illic æra sonant: at circum pulpita nostra,
 Et steriles cathedras basia sola crepant.

De Festo. LXVII.

Indignas premeret pestis cum rabida fauces,
 Inque ipsos vultus serperet atra lues;
 Siccis ipse genis flentes hortatus amicos,
 Decrevit Stygios Festus adire lacus.
 Nec tamen obscuro pia polluit ora Veneno,
 Aut torfit lentâ tristitia fata fame.
 Sanctam Romanâ vitam sed morte peregit,
 Dimisitque animam nobiliore viâ.

Hanc

Hanc mortem fati magni præferre Catonis
Fama potest ; hujus Cæsar amicus erat.

Ad Attalum. LXVIII.

Semper agis causas, & res agis, Attale, semper ;
Est, non est, quod agas, Attale, semper agis.
Si res, & causæ defunt, agis, Attale, mulas.
Attale, ne quod agas desit, agas animam.

Ad Canum. LXIX.

Sportula, Cane, tibi supremâ nocte petita est ;
Occidit, puto, te, Cane, quod una fuit.

Ad Sosibianum. LXX.

E servo scis te genitum, blandèque fateris ;
Cum dicis dominum, Sosibiane, patrem.

De Regulo. LXXI.

Hæc quæ pulvere dissipata multo
Longas porticus explicat ruinas,
En quanto jacet absoluta casu !
Tectis nam modo Regulus sub illis
Gestatus fuerat, recesseratque :
Victa est pondere cum suo repente ;
Et postquam domino nihil timebat,
Securo ruit incruenta damno.
Tantæ, Regule, post metum querelæ,
Quis curam neget esse te deorum,
Propter quem fuit innocens ruina ?

De Mario. LXXII.

Venderet excultos colles cum præco facetus,
Atque suburbani jugera pulchra soli :
Errat, ait, si quis Mario putet esse necesse
Vendere : nil debet ; foenerat immo magis.
Quæ ratio est igitur ? servos ubi perdidit omnes,
Et pecus, & fructus, non amat inde locum.
Quis faceret pretium, nisi qui sua perdere vellet
Omnia ? sic Mario noxius hæret ager.

De Novio. LXXIII.

Vicinus meus est, manuque tangi
De nostris Novius potest fenestris.

Quis non invidet mihi, putetque
 Horis omnibus esse me beatum,
 Juncto cui liceat frui sodale?
 Tam longè est mihi, quàm Terentianus,
 Qui nunc Niliacam regit Syenen.
 Non convivere, nec videre saltem,
 Non audire licet; nec urbe totà
 Quisquam est tam propè, tam proculque nobis:
 Migrandum est mihi longiùs, vel illi.
 Vicinus Novio, vel inquilinus
 Sit, si quis Novium videre non vult.

Ad Fescenniam. LXXIV.

NE gravis hesterno fragres, Fescennia, vino,
 Pastillos Cosmi luxuriosa voras.
 Ista linunt dentes jentacula: sed nihil obstat,
 Extremo ructus cum venit à barathro.
 Quid? quòd olet graviùs mistum diapaſmate virus,
 Atque duplex animæ longiùs exit odor.
 Notas ergo nimis fraudes, deprensæque furta
 Jam tollas, & sis ebria simpliciter.

De Alcimo. LXXV.

ALcime, quem raptum domino crescentibus annis
 Labicana levi cespite velat humus;
 Accipe non Pario nutantia pondera saxo,
 Quæ cineri vanus dat ruitura labor:
 Sed fragiles buxos, & opacæ palmitis umbras,
 Quæque virent lachrymis roscida prata meis.
 Accipe, care puer, nostri monumenta doloris:
 Hic tibi perpetuo tempore vivit honor.
 Cum mihi supremos Lachesis pervenerit annos,
 Non aliter cineres mando jacere meos.

In Cinna. LXXVI.

GARRIS in aurem semper omnibus, Cinna:
 Garris & illud, teste quod licet turbâ.
 Rides in aurem, quereris, arguis, ploras:
 Cantas in aurem, judicas, taces, clamâs.

Adeone penitus sedit hic tibi morbus,
Ut sæpe in aurem, Cinna, Cæsarem laudes ?

Ad Lælium. LXXVII.

Cum tua non edas, carpis mea carmina, Læli :
Carpere vel noli nostra, vel ede tua.

De Aquino & Fabricio. LXXVIII.

Fabricio junctus fido requiescit Aquinus,
Qui prior Elysias gaudet abesse domos.
Ara duplex primi testatur munera pili :
Plus tamen est, titulo quod brevioris legis :
Junctus uterque sacro laudatæ foedere vitæ,
Famaque quod rarò novit, amicus erat.

Ad Ælium. LXXIX.

Quòd clamas semper, quòd agentibus obstrepis,
Æli,
Non facis hoc gratis : accipis, ut taceas.

Ad Maternum. LXXX.

Si non molestum est, teque non piget, Scæzon,
Nostro (rogamus) pauca verba Materno
Dicas in aurem, sic, ut audiat solus.
Amator ille tristium lacernarum,
Et Bæticatus atque leucophæatus,
Qui coccinatos non putat viros esse,
Amethystinasque mulierum vocat vestes ;
Nativa laudet, habeat & licet semper
Fuscos colores ; Galbanos habet mores.
Quæris, quis hic sit ? excidit mihi nomen.

Ad Nævolem. LXXXI.

Cùm clamant omnes, loqueris tu, Nævole, tantum,
Et te patronum, causidicumque putas.
Hæc ratione potest nemo non esse disertus :
Ecce, tacent omnes, Nævole ; dic aliquid.

In Diodorum, Ad Flaccum. LXXXII.

Litigat, & podagrâ Diodorus, Flacce, laborat :
Sed nil patrono porrigit : hæc chiragra est.

Ad

Ad Calenum avarum. LXXXIII.

Non plenum modò vices habebas :
 Sed tam prodigus, atque liberalis,
 Et tam lautus eras, Calene, ut omnes
 Optarent tibi centies amici.
 Audit vota Deus, precesque nostras ;
 Atque intra, puto, septimas Calendas,
 Mortes hoc tibi quatuor dederunt.
 At tu sic, quasi non foret relictum,
 Sed raptum tibi centies, abisti
 In tantum miser esuritionem,
 Ut convivia sumptuosiora,
 Toto quæ semel apparas in anno,
 Nigræ sordidus explices monetæ :
 Et septem veteres tui sodales
 Constemus tibi plumbeâ felibrâ.
 Quid dignum meritis precemur istis ?
 Optemus tibi millies, Calene :
 Hoc si contigerit, fame peribis.

De Afra vetula. LXXXIV.

Mammas atq; tatas habet Afra, sed ipsa tatarum
 Dici & mammarum maxima mamma potest.

De Demetrio. LXXXV.

Illa manus quondam studiorum fida meorum,
 Et felix domino, notaque Cæsaribus.
 Destituit primos viridis Demetrius annos :
 Quarta tribus lustris addita messis erat.
 Ne tamen ad Stygias famulus descenderet umbras,
 Ureret implicitum cùm scelerata lues,
 Cavimus ; & domini jus omne remisimus agro :
 Munere dignus erat convaluisse meo.
 Sensit deficiens sua præmia, meque patronum
 Dixit, ad infernas liber iturus aquas.

Ad Lycorim. LXXXVI.

Qui pinxit Venerem tuam, Lycori,
 Blanditus, puto, pictor est Minervæ.

SI dederint superi decies mihi millia centum,
 Dicebas, nondum, Scævola, factus eques :
 Qualiter, ô vivam, quàm large, quàmque beate !
 Riserunt faciles, & tribuere Dei.
 Sordidior multò post hoc toga ; penula pejor ;
 Calceus est facta terque quaterque cute.
 Deque decem plures semper servantur olivæ ;
 Explicat & coenas unica mensa duas.
 Et Veientani bibitur fæx crassa rubelli ;
 Asse cicer tepidum constat, & asse caro.
 In jus, ô fallax atque inficiator, eamus :
 Aut vive, aut decies, Scævola, redde deis.

De leonibus Caesaris. LXXXVIII.

PICTO quòd juga delicata collo
 Pardus sustinet ; improbæque tigres
 Indulgent patientiam flagello ;
 Mordent aurea quòd lupata cervi ;
 Quòd fræno Libyci domantur urfi ;
 Et quantum Calidon tulisse fertur,
 Paret purpureis aper capistris ;
 Turpes effeda quòd trahunt bisontes ;
 Et molles dare jussû quòd choreas
 Nigro bellua nil negat Magistro ;
 Quis spectacula non putet Deorum ?
 Hæc transit tamen, ut minora, quisquis
 Venatus humiles videt leonum,
 Quos velox leporum timor fatigat.
 Dimittunt, repetunt, amantque captos,
 Et securior est in ore præda ;
 Laxos cui dare perviosque rictus
 Gaudent, & timidos tenere dentes ;
 Mollem frangere dum pudet rapinam,
 Stratis cum modò venerint juvenis.
 Hæc clementia non paratur arte,
 Sed nôrunt cui serviant leones.

Ad Ovidium. LXXXIX.

IN Nomentanis, Ovidi, quod nascitur agris,
 Accepit quoties tempora longa merum;
 Exiit annosa mores nomenque senecta,
 Et, quidquid voluit, testa vocatur anus.

Ad Lucium Julium. XC.

SÆpe mihi dicis, Luci charissime Juli,
 Scribe aliquid magnum: desidiosus homo es.
 Otia da nobis; sed qualia fecerat olim
 Mecœnas Flacco, Virgilioque suo:
 Condere victuras tentem per secula chartas,
 Et nomen flammis eripuisse meum.
 In steriles campos nolunt juga ferre iuveni:
 Pingue solum lassat; sed iuvat ipse labor.

Ad Gallum. XCI.

ESt tibi (sitque precor, multos crescatq; per annos)
 Pulchra quidem, verum Transiberina domus.
 At mea Vipsanas spectant coenacula laurus:
 Factus in hac ego sum jam regione senex.
 Migrandum est, ut manè domi te, Galle, salutem:
 Est tanti, vel si longius illa foret.
 Sed tibi non multum est, unum si præsto togatum;
 Multum est, hunc unum si mihi, Galle, nego.
 Ipse salutabo decima vel seriùs hora:
 Manè tibi pro me dicat avere liber.

De Issa, Catella Publii. XCII.

Issa est passere nequior Catulli.
 Issa est purior osculo columbæ.
 Issa est blandior omnibus puellis.
 Issa est carior Indicis lapillis.
 Issa est deliciæ catella Publi.
 Hanc tu, si queritur, loqui putabis.
 Sentit tristitiamque, gaudiumque.
 Collo nixa cubat, capitque somnos,
 Ut suspiria nulla sentiantur:
 Et desiderio coacta ventris,
 Gutta pallia non sefellit ulla;

Sed blando pede fuscitat, toroque
 Deponi monet, & rogat levare;
 Castæ tantus inest pudor catellæ.
 Hanc ne lux rapiat suprema totam,
 Picta Publius exprimit tabella;
 In qua tam similem videbis Iffam,
 Ut sit tam similis sibi nec Iffa.
 Iffam denique pone cum tabella,
 Aut utramque putabis esse veram,
 Aut utramque putabis esse pictam.

Ad Velocem. XCIII.

Scribere me quereris, Velox, epigrammata longa.
 Ipse nihil scribis: tu breviora facis.

Ad Regulum. XCIV.

Cum tibi sit Sophiæ par fama & cura deorum,
 Ingenio pietas nec minor ipsa tuo:
 Ignorat meritis dare munera, qui tibi librum,
 Et qui miratur, Regule, thura dari.

In Priscum. XCV.

Cum te non nôssem, dominum, regemque vocabam:
 Cum bene te novi, jam mihi Priscus eris.

Ad Lectorem. XCVI.

Quæcunque lusi juvenis & puer quondam,
 Apinalque nostras, quas nec ipse jam novi;
 Male collocare si bonas voles horas,
 Et invidebis otio tuo, lector;
 A Valeriano Pollio petes Quinto,
 Per quem perire non licet meis nugis.

De Antulla, ad Faustinum. XCVII.

Hos tibi vicinos, Faustine, Telesphorus hortos
 Fænius, & breve rus, udaq̃ue prata tenet.
 Condidit hîc natæ cineres, nomenque sacravit
 Quod legis Antullæ, dignior ipse legi;
 Et Stygias æquum fuerat pater îsset ad umbras:
 Quod quia non licuit; vivit, ut ossa colat.

De Eadem. XCVIII.

HOc nemus æterno cinerum sacravit honori
Fænius, & culti jugera pauca soli.
Hoc tegitur citò rapta suis Antulla sepulchro;
Hoc erit Antullæ mistus uterque parens.
Si cupit hunc aliquis, moneo, ne speret agellum:
Perpetuò dominis serviet iste suis.

Ad Luperum. XCIX.

OCcurris quoties, Luperce, nobis,
Vis mittam puerum, subinde dicis,
Cui tradas Epigrammatôn libellum,
Lectum quem tibi protinus remittam?
Non est, quòd puerum, Luperce, vexes:
Longum est si velit ad Pyrum venire,
Et scalis habito tribus, sed altis.
Quod quæris, propiùs petas licebit;
Argi nempe soles subire letum:
Contra Cæsaris est forum taberna
Scriptis postibus hinc & inde totis,
Omnes ut cito perlegas Poëtas:
Illinc me pete; nec roges Atrectum,
(Hoc nomen dominus gerit tabernæ:)
De primo dabit alterove nido
Rasum pumice, purpurâque cultum
Denariis tibi quinque Martialem.
Tanti non es, ais? sapias Luperce.

Ad Cæcilianum. C.

Cui legisse satis non est epigrammata centum,
Nil illi satis est, Cæciliane, mali.

M. VAL. MARTIALIS
EPIGRAMMATUM
LIBER II.

Ad Decianum.

Quid nobis, inquis, cum epistola ? Parumne tibi praestamus, si legimus epigrammata ? Quid hic porro dicturus es, quod non possis versibus dicere ? Video, quare Tragædi epistolam accipiant, quibus pro se loqui non licet. Epigrammata Curione non egent, & contenta sunt suâ, id est, malâ linguâ. In quacunque pagina visum est, epistolam faciunt. Noli, rogo, si tibi videtur rem facere ridiculam, & rogam saltanti induere personam. Denique videris, an te delectet contra retiarium ferula. Ego inter illos sedeo qui protinus reclamant. Puto, mehercule, Deciane, verum dicis. Quid si scias, cum qua & quâ longâ epistola negotium fueris habiturus ? itaque quod exigis, fiat. Debebunt tibi, si qui in hunc librum inciderint, quod ad primam paginam non lassî pervenient.

Ad librum suum. I.

Tercentena quidem poteras epigrammata ferre ; Sed quis te ferret, perlegeretve, liber ? At nunc succincti quæ sint bona disce libelli : Hoc primum est, brevior quod mihi charta perit. Deinde, quod hæc unâ peraget librarius horâ, Nec tantum nugis serviet iste meis. Tertia res hæc est, quod si cui fortè legeris, Sis licet usque malus, non odiosus eris. Te conviva leget misto quincunce ; sed antè Incipiat positus quàm tepuisse calix. Esse tibi tantâ cautus brevitate videris ? Hei mihi ! quàm multis sic quoque longus eris !

Ad Domitianum. II.

Creta dedit magnum, majus dedit Africa nomen, Scipio quod victor, quodque Metellus habet. No-

Nobilius domito tribuit Germania Rheno,
 Et puer hoc dignus nomine, Cæsar, eras.
 Frater Idumæos meruit cum patre triumphos :
 Quæ datur ex Cattis laurea, tota tua est.

Ad Sextum. III.

Sexte, nihil debes ; nil debes, Sexte, fatemur :
 Debet enim, si quis solvere, Sexte, potest.

Ad Decianum. IV.

NE valeam, si non totis, Deciane, diebus,
 Et tecum totis noctibus esse velim.
 Sed duo sunt, quæ nos distinguunt, millia passum :
 Quatuor hæc fiunt, cum rediturus eam.
 Sæpe domi non es : cum sis quoque sæpe, negaris :
 Vel tantum causis, vel tibi sæpe vacas.
 Te tamen ut videam, duo millia non piget ire ;
 Ut te non videam, quatuor ire piget.

Ad Severum. V.

I Nunc, edere me jube libellos ;
 Lectis vix tibi paginis duabus,
 Spectas ἑρπύλλιον, Severe,
 Et longas trahis oscitationes.
 Hæc sunt, quæ relegente me solebas
 Raptim scribere, sed Vitellianis.
 Hæc sunt singula, quæ sinu ferebas
 Per convivia cuncta, per theatra :
 Hæc sunt, aut meliora, si qua nescis.
 Quid prodest mihi tam macer libellus,
 Nullo crassior ut sit umbilico,
 Si totus triduo tibi legatur ?
 Nusquam deliciæ supiniore.
 Lassus tam citò deficiis viator ?
 Et cum currere debeas Bovillas,
 Interjungere quæris ad Camœnas ?
 I nunc, edere me jube libellos.

In Attalum. VI.

D Eclamas bellè, causas agis, Attale, bellè :
 Historias bellas, carmina bella facis.

Componis bellè mimos, epigrammata bellè :
 Bellus Grammaticus, bellus es Astrologus.
 Et bellè cantas, & saltas, Attale, bellé :
 Bellus es arte lyræ, bellus es arte pilæ.
 Nil benè cùm facias ; facis attamen omnia bellé :
 Vis dicam quid sis ? magnus es ardelio.

Ad Lectorem. VII.

SI qua videbuntur chartis tibi, lector, in istis,
 Sive obscura nimis, sive Latina parùm ;
 Non meus est error : nocuit librarius illis,
 Dum properat versus annumerare tibi.
 Quòd si non illum, sed me peccasse putabis ;
 Tunc ego te credam cordis habere nihil.
 Ista tamen mala sunt, quasi nos manifesta negemus :
 Hæc mala sunt ; sed tu non meliora facis.

In Posthumum. VIII.

BAsia dimidio quòd das mihi, Posthume, labro,
 Laudo : licet demas hinc quoque dimidium.
 Vis dare majus adhuc, & inenarrabile munus ?
 Hoc tibi habe totum, Posthume, dimidium.

Ad Rufum, de Selio. IX.

Quòd fronte Selium nubilâ vides, Rufe,
 Quòd ambulator porticum terit serus,
 Lugubre quiddam quòd tacet piger vultus,
 Quòd penè terram tangit indecens nasus,
 Et dextra pectus pulsât, & comam vellit ;
 Non ille amici fata luget, aut fratris :
 Uterque natus vivit, & precor vivat :
 Salva est & uxor, sarcinæque, servique :
 Nihil colonus, villicusque decoxit.
 Moeroris igitur causa quæ ? domi coenat.

In Posthumum. X.

Esse quid hoc dicam, quòd olent tua basia myrrhâ,
 Quòdque tibi est nunquam non alienus odor ?
 Hoc mihi suspectum est, quòd oles bene, Posthume,
 semper :

Posthume, non bene olet, qui bene semper olet.

Ad

Ad Sextum. XI.

ET Judex petit, & petit patronus.
Solvas cenſeo, Sexte, creditori.

De Selio, ad Paulinum. XII.

NIl intentatum Selius, nil linquit inauſum;
Coenandum quoties jam videt eſſe domi.
Currit ad Europen, & te, Pauline, tuosque
Laudat Achilleos, ſed ſine fine, pedes.
Si nihil Europe fecit, tum Septa petuntur,
Si quid Phyllirides præſtet, & Æſonides.
Hic quoque deceptus Memphytica templa frequentat,
Affidet & cathedris mœſta iuuenta tuis.
Inde petit centum pendentia teſta columnis;
Illinc Pompeii dona, nemusque duplex.
Nec Fortunati ſpernit, nec balnea Fauſti;
Nec Grylli tenebras, Æoliamque Lupi:
Nam thermis iterum cunctis iterumque lavatur.
Omnia cum fecit, ſed renuente deo,
Lotus ad Europes tepidæ buxeta recurrit;
Si quis ibi ſerum carpat amicus iter.
Per te, perque tuam, vector laſcive, puellam,
Ad coenam Selium tu, rogo, Taure, voca.

In Hermum. XIII.

Quod nulli calicem tuum propinas,
Humanè facis, Herme, non ſuperbè.

In Zoilum. XIV.

Zoilus ægrotat, faciunt hanc ſtragula febrem:
Si fuerit ſanus, coccina quid facient?
Quid torus à Nilo, quid ſindone cinctus olenti?
Oſtendit ſtultas quid niſi morbus opes?
Quid tibi cum medicis? dimitte Machaonas omneis:
Vis fieri ſanus? ſtragula ſume mea.

In Maximum. XV.

Capto tuam, pudet, heu! ſed capto, Maxime coenam:
Tu captas aliam, jam ſumus ergo pares.
Manè ſalutatum venio: tu diceris iſſe
Antè ſalutatum, jam ſumus ergo pares.

Sum comes ipse tuus, tumidique anteambulo regis :

Tu comes alterius ; jam sumus ergo pares.

Esse sat est servum : jam nolo vicarius esse.

Qui rex est, regem, Maxime, non habeat.

Ad Zoilum. XVI.

Felicem fieri credis me, Zoile, coenâ :

Felicem coenâ Zoile ? deinde tuâ ?

Debet Aricino conviva recumbere clivo,

Quem tua felicem, Zoile, coena facit.

De Paullo. XVII.

Carmina Paullus emit, recitat sua carmina Paullus :

Nam quod emas, possis dicere jure tuum.

In Posthumum. XVIII.

Basia das aliis ; aliis das, Posthume, dextram :

Dicis, utrum mavis ? elige : malo manum.

De eodem. XIX.

Quid mihi vobiscum est, ô Phœbe, novemque so-

Ecce nocet vati Musa jocosa suo. (rores ?)

Dimidio nobis dare Posthumus antè solebat.

Basia ; nunc labro coepit utroque dare.

De eodem. XX.

Non dicam, licet usque me rogetis,

Quis sit Posthumus in meo libello :

Non dicam ; quid enim mihi necesse est

Has offendere basiationes,

Quæ se tam bene vindicare possunt ?

In Candidum. XXI.

Si det iniqua tibi tristem fortuna reatum ;

Squallidus hærebo, pallidiorque reo.

Si jubeat patriâ damnatum excedere terrâ ;

Per freta, per scopulos exulis ibo comes.

Dat tibi divitias, ecquid sunt ista duorum ?

Das partem ? multum est ; Candide, das aliquid ?

Mecum eris ergo miser : quod si Deus ore sereno

Annuerit, felix, Candide, solus eris.

Ad Gallam. XXII.

DAs nunquam, semper promittis, Galla, roganti:
Si semper fallis, jam rogo; Galla, nega.

De Nævia, ad Bythinicum. XXIII.

Quòd querulum spirat, quòd acerbum Nævia tussit,
Inque tuos mittit spura subinde sinus:
Jam te rem factam, Bythinice, credis habere?
Erras: blanditur Nævia, non moritur.

De Selio. XXIV.

LAudantem Selium, coenæ cum retia tendit,
Accipe, sive legas, sive patronus agas.
Effecte! graviter! cito! nequiter! euge! beate!
Hoc volui: facta est jam tibi coena, tace.

Ad Rufum. XXV.

Rufe, vides illum subsellia prima tenentem,
Cujus & hinc lucet sardonychata manus:
Quæque Tyron toties epotavere lacernæ,
Et toga non tactas vincere iussa nives:
Cujus olet toto pinguis coma Marcellano,
Et splendent vulso brachia trita pilo.
Non hesternæ sedet lunatâ lingula plantâ;
Coccina non læsum pingit aluta pedem;
Et numerosa linunt stellantem splenia frontem.
Ignoras quis sit? splenia tolle, leges.

In Cajum. XXVI.

MUtua viginti sestertia fortè rogabam;
Quæ vel donanti non grave munus erat:
Quippe rogabatur felixque, vetusque sodalis,
Et cujus laxas arca flagellat opes.
Is mihi, dives eris, si causas egeris, inquit.
Quod peto, da Cai; non peto consilium.

In Ponticum. XXVII.

LIs mihi cum Balbo est; tu Balbum offendere
non vis,
Pontice: cum Licino est; hic quoque magnus
homo est.

Vexat sæpe meum Patrobas confinis agellum :

Contra libertum Cæsaris ire times.

Abnegat, & retinet nostrum Laronia servum :

Respondes ; orba est, dives, anus, vidua.

Non bene, crede mihi, servo servitur amico :

Sit liber, dominus qui volet esse meus.

Ad Phæbum. XXVIII.

Cum sint crura tibi, simulent quæ cornua lunæ ;
In rhytio poteras, Phœbe, lavare pedes.

Ad Pannicum. XXIX.

Pectere te nolim, sed nec turbare capillos :
Splendida sit nolo, fordida nolo cutis.

Nec tibi mitrarum, nec sit tibi barba reorum.

Nolo virum nimium, Pannice ; nolo parum.

Sunt tibi crura pilis, & sunt tibi pectora setis

Horrida ; sed mens est, Pannice, vulsa tibi.

In Cæcilianum. XXX.

Quicquid ponitur hinc & inde, verris ;
Mammæ suminis, imbricemque porci,

Communemque duobus attagenam,

Mullum dimidium, lupumque totum,

Murenæque latus, femurque pulli,

Stillantemque alicâ suâ palumbum.

Hæc cum condita sunt madente mappâ,

Traduntur puero domum ferenda :

Nos accumbimus otiosa turba.

Ullus si pudor est, repone cœnam :

Cras te, Cæciliane, non vocavi.

In Linum. XXXI.

Quid mihi reddat ager quæris, Line, Nomentanus ?
Hoc mihi reddit ager : te, Line, non video.

De Mœchæ veste. XXXII.

Coccina famosæ donas & Janthina moechæ.

Vis dare, quæ meruit, munera ? mitte togam.

In Tongilium. XXXIII.

Uri Tongilius, male dicitur hemitritæo.

Novi hominis mores, esurit atque sitit.

Subdola.

Subdola tenduntur crassis modò retia turdis:

Hamus & in mullum mittitur, atque lupum.

Cæcuba faccentur, quæque annus coxit Opimi:

Condantur parco fusca Falerna vitro.

Omnes Tongilium medici jussere lavari.

O stulti, febrem creditis esse? gula est.

Ad Maximinam, puellam edentulam. XXXIV.

Ride, si sapias, ô puella, ride,
Pelignus, puto, dixerat Poëta :
Sed non dixerat omnibus puellis.

Verùm ut dixerit omnibus puellis,

Non dixit tibi, tu puella non es:

Nam tres sunt tibi, Maximina, dentes,

Sed planè piceique, buxeique.

Quare si speculo, mihi que credis,

Debes non aliter timere risum,

Quàm ventum Spanius, manumve Priscus;

Quàm cretata timet Fabulla nimbum,

Ceruffata timet Sabella solem.

Vultus induito magis severos,

Quàm conjux Priami, nurusque major.

Mimos ridiculi Philistionis,

Et convivâ nequiora vita;

Et quicquid lepidâ procacitate,

Laxat perspicuo labella risu.

Te mœstæ decet affidere matri,

Lugentique virum, piumque fratrem;

Et tantùm tragicis vacare Musis.

At tu, judicium secuta nostrum,

Plora, si sapias, ô puella, plora.

In Zeilum. XXXV.

Zoile, quid solium sublato podice perdis?
Spurcius ut fiat, Zoile, merge caput.

In Candidum. XXXVI.

Candide κοινὰ φίλων, hæc sunt tua, Candide, πύργος,
Quæ tu magniloquus nocte dieque sonas?

Te Lacedæmonio velat toga lota Galeso,

Vel quam seposito de grege Parma dedit:

At:

At me, quæ passa est furiosi cornua tauri ;
 Noluerit dici quam pila prima suam.
 Misit Agenoreas Cadmi tibi terra lacernas :
 Non vendes nummis coccina nostra tribus.
 Tu Lybicos Indis suspendis dentibus orbes :
 Fulcitur testâ fagina mensa mihi.
 Immodici tibi flava tegunt chrysendeta nulli :
 Concolor in nostra, cammare, lance rubes.
 Ex opibus tantis veteri fidoque sodali
 Das nihil, & dicis, Candide, κοινὰ φίλων.
In Sextum sceneratorem. XXXVII.

E Mi seu puerum, togamve pexam,
 Seu tres, ut puto, quatuorve libras :
 Sextus protinus ille scenerator,
 Quem nôstis veterem meum sodalem,
 Ne quid fortè petam, timet, cavetque ;
 Et secum, sed ut audiam, susurrat :
 Septem millia debeo Secundo ;
 Phoebo quatuor ; undecim Phileto ;
 Et quadrans mihi nullus est in arca.
 O grande ingenium mei sodalis !
 Durum est, Sexte, negare, cum rogaris :
 Quantò durius, antequam rogeris ?

In Nævolum. XXXVIII.

Florida per varios ut pingitur Hybla colores,
 Cùm breve Sicania ver populantur apes :
 Sic tua suppositis pellucent præla lacernis ;
 Sic micat innumeris arcula synthefibus.
 Atque unam vestire tribum tua vellera possunt,
 Appula non uno quæ grege terra tulit.
 Tu spectas hyemem succincti lentus amici,
 (Pro scelus !) & lateris frigora trita mei.
 Quantum erat, infelix, pannis fraudare duobus,
 (Quid renuis ?) non te, Nævole, sed tineas ?

Ad Rufum. XXXIX.

C Auponem, laniumque, balneumque,
 Tonsorem, tabulamque, calculosque,

Et

Et paucos, sed ut eligam, libellos;
Unum non nimium rudem sodalem;
Hæc præsta mihi Rufe, vel Bitonti,
Et thermas tibi habe Neronianas.

Ad Maximum. XL.

VIs fieri liber? mentiris, Maxime, non vis:
Sed fieri si vis, hac ratione potes.
Liber eris, coenare foris si, Maxime, nolis:
Veientana tuam si domat uva sitim:
Si ridere potes miseri chrysendeta Cinnæ:
Contentus nostrâ si potes esse togâ.
Hæc tibi si vis est, si mentis tanta potestas,
Liberior Partho vivere rege potes.

Ad Sextum. XLI.

VIs te, Sexte, coli: volebam amare.
Parendum est tibi; quod jubes, coleris.
Sed si te colo, Sexte, non amabo.

In fîctum divitem. XLII.

Hic, quem videtis gressibus vagis lentum;
Amethystinatus media qui secat septa;
Quem non lacernis Publius meus vincit;
Non ipse Codrus alpha penulatorum;
Quem grex togatus sequitur, & capillatus,
Recensque sella linteisque lorisque;
Oppigneravit Claudii modò ad mensam.
Vix octo nummis annulum, unde coenaret.

In Zoilum. XLIII.

PExatus pulchrè rides mea, Zoile, trita:
Sunt hæc trita quidem, Zoile; sed mea sunt.

De coenatione Caesaris, quæ appellatur

Mica. XLIV.

Mica vocor: quid sim, cernis: coenatio parva.
Ex me Cæsareum prospicis, ecce, tholum.
Frange toros; pete vina; rosas cape, tingere nardo.
Ipse jubet mortis te meminisse Deus.

In:

In Laurum. XLV.

Dum modò causidicum, dum te modò rhetora
fingis,

Et non decernis, Laure, quid esse velis ;
Peleos, & Priami transit, vel Nestoris ætas ;

Et fuerat serum jam tibi desinere :

Incipe, tres uno perierunt rhetores anno,

Si quid habes animi, si quid in arte vales.

Si schola damnatur ; fora litibus omnia fervent :

Ipse potest fieri Marsya causidicus.

Eja age, rumpe moras ; quò te spectabimus usque ?

Dum, quid sis, dubitas, jam potes esse nihil.

In Saletanum. XLVI.

Cur tristiores cernimus Saletanum ?

An causa levis est ? extuli, inquis, uxorem.

O grande fati crimen ! o gravem casum !

Illa, illa dives mortua est Secundilla,

Centena decies quæ tibi dedit dotis ?

Nollem accidisset hoc tibi, Saletane.

In Lalagen. XLVII.

Unus de toto peccaverat orbe comarum

Annulus, incertâ non bene fixus acu.

Hoc facinus Lalage speculo, quo viderat, ulta est ;

Et cecidit sectis icta Pleculâ comis.

Desine jam, Lalage, tristes ornare capillos,

Tangat & insanum nulla puella caput.

Hoc salamandra notet, vel sæva novacula nudet,

Ut digna speculo fiat imago tuo.

In Posthumum. XLVIII.

Occurris quocunq; loco mihi, Posthume, clamas

Protinus, & prima est hæc tua vox. Quid agis ?

Hoc, si me decies unâ conveneris horâ,

Dicis : habes, puto, tu, Posthume, nil quod agas.

Ad Olum. XLIX.

Quòd te nomine jam tuo saluto,

Quem regem & dominum prius vocabam,

Ne :

Ne me dixeris esse contumacem :
 Totis pilea sarcinis redemi.
 Reges & dominos habere debet,
 Qui se non habet, atque concupiscit
 Quod reges dominique concupiscunt.
 Servum si potes, Ole, non habere ;
 Et regem potes, Ole, non habere.

In Classicum. L.

In vitum coenare foris te, Classice, dicis.
 Si non mentiris, Classice, dispeream.
 Ipse quoque ad coenam gaudebat Apicius ire ;
 Cum coenaret, erat tristior ille, domi.
 Si tamen invitus vadis, cur, Classice, vadis ?
 Cogor, ais: verum est ; cogitur & Selius.
 En ! rogat ad coenam Melior te, Classice, rectam.
 Grandia verba ubi sunt ? si vir es, ecce, nega.

Ad Cæcilianum. LI.

Candidius nihil est te, Cæciliane, (notavi,)
 Si quando ex nostris disticha pauca legis.
 Protinus aut Marfi recitas, aut scripta Catulli :
 Hæc mihi das, tanquam deteriora legas.
 Ut collata magis placeant mea ? credimus illud,
 Malo tamen recites, Cæciliane, tua.

De Saufello, ad Maternum. LII.

Cinctum togatis post & antè Saufellum,
 Quantâ reduci Regulus solet turbâ,
 Ad alta tonsum templa cum reum misit,
 Materne, cernis ? invidere nolito ;
 Comitatus iste sit, precor, tuus nunquam.
 Hos illi amicos & greges togatorum
 Fusciculus præstat, & Faventinus.

De Leone. LIII.

Verbera securi solitus leo ferre magistri,
 Insertamque pati blandus in ora manum,
 Dedidicit pacem subito feritate reversâ,
 Quanta nec in Libycis debuit esse jugis.

Nam

Nam duo de tenerâ puerilia corpora turbâ,
Sanguineam rastris quæ renovabat humum,
Sævus & infelix furiali dente peremit.

Martia non vidit majus arena nefas.
Exclamare libet, crudelis, perfide, prædo,
A nostrâ pueris parcere disce lupâ.

De Mario. LIV.

Argenti libras Marius tibi quinque reliquit,
Cui nihil ipse dabas, is tibi verba dedit.

Ad Cosconium. LV.

Cosconi, qui longa putas epigrammata nostra,
Utilis ungendis axibus esse potes.
Hâc tu credideris longum ratione colossum,
Et puerum Bruti dixeris esse brevem.
Disce, quod ignoras: Marfi, doctique Pedonis
Sæpe duplex unum pagina tractat opus.
Non sunt longa, quibus nihil est quod demere possis:
Sed tu, Cosconi, disticha longa facis.

Ad Cecilianum. LVI.

Æstivo serves ubi piscem tempore, quæris?
In thermis serva, Cæciliane, tuis.

Ad Nasicam. LVII.

Inventas tunc me, cum scis, Nasica, vocatum:
Excusatum habeas me, rogo: coeno domi.

De Fannio. LVIII.

Hostem cum fugeret, se Fannius ipse peremit:
Hic (iogo) non furor est, ne moriari, mori?

Ad Zoilum. LIX.

Laxior hexaphoris tua sit lectica, licebit;
Dum tamen hæc tua sit, Zoile, sandapila.

Ad Ponticum. LX.

Abscissa servum quid fingis, Pontice, lingua?
Nescis tu populum, quod tacet ille, loqui?

Ad Amicum. LXI.

Vimine clausa levi niveæ custodia coctæ,
Hæc tibi Saturni tempore munus erit.

Dona

Dona quòd æstatis mihi tibi mense Decembri,
Si quereris, rasam tu mihi mitte togam.

Ad Classicum. LXII.

Quòd nec carmine glorior supino,
Nec retro lego Sotaden cinædum;
Nusquam Græcula quòd recantat Echo;
Nec dictat mihi luculentus Attis
Mollem debilitare Galliambon;
Non sum, Classice, tam malus poëta:
Quid si per graciles vias patauri
Invitum jubeas subire Ladam?
Turpe est difficiles habere nugas,
Et stultus labor est ineptiarum.
Scribat carmina circulis Palæmon;
Me raris juvat auribus placere.

In Mamercum. LXIII.

Nil recitas, & vis, Mamerce, poëta videri:
Quicquid vis, esto, dummodo nil recites.

In Gaurum. LXIV.

Quòd nimio gaudes noctem producere vino,
Ignosco; vitium, Gaure, Catonis habes.
Carmina quòd scribis Musis & Apolline nullo,
Laudari debes; hoc Ciceronis habes.
Quòd vomis, Antoni; quòd luxuriaris, Apici:
Quòd foetes; vitium, dic mihi, cujus habes?

Ad Quinctilianum. LXV.

Quinctiliane, vagæ moderator summe juventæ,
Gloria Romanæ, Quinctiliane, togæ;
Vivere quòd propero pauper, nec inutilis annis,
Da veniam: properat vivere nemo satis.
Differat hoc, patrios optat qui vincere census,
Atriaque immodicis arctat imaginibus.
Me focus, & nigros non indignantia fumos
Tecta juvant, & fons vivus, & herba rudis.
Sit mihi verna satur, sit non doctissima conjux;
Sit non cum somno, sit sine lite dies.

Petit.

Petit poeta à Cesare jus trium liberorum. LXVI.

Rerum certa salus, terrarum gloria, Cæsar,
 Sospite quo magnos credimus esse Deos ;
 Si festinatis toties tibi lecta libellis
 Detinuere oculos carmina nostra tuos ;
 Quod fortuna vetat fieri, permitte videri ;
 Natorum genitor credar ut esse trium.
 Hæc, si displicui, fuerint solatia nobis :
 Hæc fuerint nobis præmia, si placui.

De eodem ad uxorem. LXVII.

Natorum mihi jus trium roganti,
 Musarum pretium dedit mearum,
 Solus qui poterat: valebis uxor.
 Non debet domini perire munus.

Ad Regulum. LXVIII.

Primus ubi est, inquis, cum sit liber iste secundus ?
 Quid faciam, si plus ille pudoris habet ?
 Tu tamen hunc fieri si mavis, Regule, primum ;
 Unum de titulo tollere jota potes.

M. VAL. MARTIALIS
EPIGRAMMATUM
LIBER III.

Ad Lectorem. I.

Hoc tibi, quicquid id est, longinquis mittit ab oris
Gallia Romanæ nomine dicta togæ.
Hunc legis, & laudas librum fortasse priorem.
Illa, vel hæc mea sunt; quæ meliora putas?
Plus sanè placeat, domina qui natus in urbe est;
Debet enim Gallum vincere verna liber.

Ad librum suum. II.

Cujus vis fieri, libelle, munus?
Festina tibi vindicem parare,
Ne nigram cito raptus in culinam
Cordyllas madidâ tegas papyro,
Vel thuris, piperisque sis cucullus.
Faustini fugis in sinum? sapisti.
Cedro, nunc licet, ambules perunctus,
Et frontis gemino decens honore
Pictis luxurieris umbilicis;
Et te purpura delicata velet,
Et cocco rubeat superbus index.
Illo vindice nec Probum timeto.

Ad eundem. III.

Romam vade liber: si, veneris unde, requiret:
Æmiliæ dices de regione viæ.
Si quibus in terris, qua sumus in urbe, rogabit:
Corneli referas me, licet, esse foro.
Cur absim, quæret: breviter tu multa fatere;
Non poterat vanæ tædiâ ferre togæ.
Si, quando veniet, dicet: responde, Poëta
Exierat, veniet cùm citharædus erit.

Ad Eundem. IV.

Vis commendari sine me cursurus in Urbem,
 Parve liber, multis? an satis unus erit?
 Unus erit (mihi crede) satis, cui non eris hospes,
 Julius, assiduum nomen in ore meo:
 Protinus hunc primi quæres in limine tecti;
 Quos tenuit Daphnis, nunc tenet ille, Lares.
 Est illi conjux, quæ te manibusque, sinuque
 Excipiet, vel si pulverulentus eas.
 Hos tu seu pariter, sive hanc, illumve priorem
 Videris, hoc dices; Marcus avere jubet.
 Hoc satis est, alios commendet epistola; peccat,
 Qui commendandum se putat esse suis.

In mulierem deformem. V.

Formosam faciem nigro velamine celas:
 Sed non formoso corpore lædis aquas.
 Ipsam crede deam verbis tibi dicere nostris:
 Aut aperi faciem, vel tunicata lava.

Ad Marcellinum. VI.

Lux tibi post Idus numeratur tertia Maias,
 Marcelline, tuis bis celebranda sacris.
 Imputat ætherios ortus hæc prima parenti:
 Libat florentes hæc tibi prima genas.
 Magna licet dederit jucundæ munera vitæ,
 Plus nunquam patri præstitit illa dies.

De sportula. VII.

Centum miselli jam valete quadrantes,
 Anteambulonis congiarium lassæ,
 Quos dividebat balneator elixus:
 Quid cogitatis, ô fames amicorum?
 Regis superbi sportulæ recesserunt,
 Nihil stropharum est: jam salarium dandum est.

In Quinctum. VIII.

Thaida Quinctus amat; quam Thaida? Thaida
 luscam:
 Unum oculum Thais non habet, ille duos,

In Cinna. IX.

Versiculos in me narratur scribere Cinna:
Non scribit, cujus carmina nemo legit.

In Philomusum. X.

Constituit, Philomuse, pater tibi millia bina
Mensura, perque omnes præstitit illa dies,
Luxuriam premeret cum crastina semper egestas,
Et vitiis essent danda diurna tuis.
Idem te moriens hæredem ex æsse reliquit:
Exhæredavit te, Philomuse, pater.

In Fabullum. XI.

Unguentum (fateor) bonum dedisti
Conyivis, herè; sed nihil scidisti:
Res falsa est bene olere, & esurire.
Qui non coenat & ungitur, Fabulle,
Hic verè mihi mortuus videtur.

In Næviam. XII.

Dum non vis leporem, dum non vis carpere
mullum,
Et plusquam patri, Næviam, parcis apro;
Accusas, rumpisque coquum, tanquam omnia cruda
Attulerit: nunquam sic ego crudus ero.

In Tuccium, de sportula. XIII.

Romam petebat esuritor Tuccius,
Profectus ex Hispania.
Occurrit illi sportularum fabula:
A ponte rediit Milvio.

De Codro. XIV.

Plus credit nemo, quam totâ Codrus in urbe,
Cum sit tam pauper: quomodo? cæcus amat.

In cerdonem munerarium. XV.

Das gladiatores, sutorum regule, cerdo:
Quodque tibi tribuit subula, sica rapit.
Ebrius es: nec enim faceres id sobrius unquam,
Ut velles corio ludere, Cerdo, tuo.

Lusisti, satis est; sed te, mihi crede, memento,
Nunc in pelliculâ, cerdo, tenere tuâ.

In Sabidium. XVI.

Circumlata diu mensis scriblita secundis,
Urebat nimio sæva calore manus :
Sed magis ardebat Sabidi gula : protinus ergo
Sufflavit buccis terque quaterque suis.
Illa quidem tepuit, digitosque admittere visa est;
Sed nemo potuit tangere : merda fuit.

In Maximum. XVII.

Perfrixisse tuas quæsta est præfatio fauces.
Cum te excusâris, Maxime, quid recitas ?

De vipera in ore ursæ. XVIII.

Proxima centenis ostenditur Ursa columnis,
Exornant fictæ quæ Platanona feræ.
Hujus dum patulos alludens tentat hiatus
Pulcher Hylas, teneram merfit in ore manum.
Vipera sed cæco scelerata latebat in ore,
Vivebatque animâ deteriore fera.

Non sentit puer esse dolos, nisi dente recepto
Dum perit, ô facinus, falsa quod ursa fuit.

De Canio. XIX.

Dic Musa, quid agat Canius meus Rufus,
Utrûmne chartis tradit ille victuris
Legenda temporum acta Claudianorum ?
An quæ Neroni falsus adstruit scriptor ?
An æmulatur improbi jocos Phædri ?
Lascivus elegis, an severus herôis ?
An in cothurnis horridus Sophocleis ?
An otiosus in schola poëtarum
Lepore tinctos Attico tales narrat ?
Hinc si recessit, porticum terit templi ?
An spatia carpit lentus Argonautarum ?
An delicatæ sole rursus Europæ
Inter tepentes post meridiem buxos
Sedet, ambulatque liber acribus curis ?
Titine thermis, an lavatur Agrippæ ?

An

An impudici balneo Tigillini ?
 An rure Tulli fruitur, atque Lucani ?
 An Pollionis dulce currit ad Quartum ?
 An æstuentes jam profectus ad Baias
 Piger Lucrino naviculatur in stagno ?
 Vis scire, quid agat Canius tuus ? ridet.

In crudelem dominum. XX.

Proscriptionum famulus servavit fronte notatus :
 Non fuit hæc domini vita, sed invidia.

De Apicio. XXI.

Dederas, Apici, bis trecenties ventri,
 Sed adhuc supererat centies tibi laxum :
 Hoc tu gravatus, ne famem & sitim ferres,
 Summa venenum potione duxisti.
 Nil est, Apici, te gulosius factum.

In Invitatorem. XXII.

Omnia cùm retro pueris obsonia tradas :
 Cur non mensa tibi ponitur à pedibus ?

Ad Faustinum. XXIII.

Si temperari balneum cupis fervens,
 Faustine, quod vix Julianus intraret :
 Roga, lavet uti rhetorem Sabineum.
 Neronianas is refrigerat thermas.

In Candidum. XXIV.

Prædia solus habes, & solus, Candide, nummos :
 Aurea solus habes, myrrhina solus habes :
 Massica solus habes, & Opimi Cæcuba solus :
 Et cor solus habes, solus & ingenium :
 Omnia solus habes : hoc me puta velle negare :
 Uxorem sed habes, Candide, cum populo.

In Gallum. XXV.

Nunquam me revocas, venias cùm sæpe vocatus :
 Ignosco, nullum si modò, Galle, vocas.
 Invitas alios : vitium est utriusque. quod ? inquis.
 Et mihi cor non est, nec tibi, Galle, puto.

In Nestorem. XXVI.

AUriculam Mario graviter miraris olere ?
Tu facis hoc : garris, Nestor, in auriculam.

In Zoilum. XXVII.

HAs, cum geminâ compede, dedicat catenas,
Saturne, tibi Zoilus, annulos priores.

Ad Gargilianum. XXVIII.

SPortula nulla datur ; gratis conviva recumbis :
Dilectum mihi quid Romæ, Gargiliane, facis ?
Cum ratione licet dicas te vivere summâ :
Quod vivis, nullâ cum ratione facis.

Ad Rufinum. XXIX.

Sunt tibi, confiteor, diffusi jugera campi,
Urbanique tenent prædia multa Lares :
Et servit dominæ numerosus debitor arcæ,
Sustentatque tuas aurea mensa dapes.
Fastidire tamen noli, Rufine, minores :
Plus habuit Didymus, plus Philomelus habet.

De piscibus sculptis. XXX.

Artis Phidiacæ toreuma clarum,
Pisces aspicias : adde aquam, natabunt.

In Fabianum. XXXI.

Quod novus & nuper factus tibi præstat amicus,
Hoc præstare jubes me, Fabiane, tibi :
Horridus ut primo semper te mane salutem,
Per mediumque trahat me tua sella lutum :
Lassus ut in thermas decimâ, vel serius, horâ
Te sequar Agrippæ, cum laver ipse Titi.
Hoc per triginta merui, Fabiane, Decembres,
Ut sim tiro tuæ semper amicitiae ?
Hoc merui, Fabiane, togâ tritaque meâque,
Ut nondum credas me meruisse rudem ?

In irascentes amicos. XXXII.

Irasci tantum felices nostris amici.
Non bellè facitis : sed juvat hoc facere.

Ad Sextum. XXXIII.

Quæ te causa trahit, vel quæ fiducia Romam,
 Sexte? quid aut speras, aut petis, inde? refer.
 Causas, inquis, agam Cicerone disertius ipso,
 Atque erit in triplici par mihi nemo foro.
 Egit Atestinus causas, & Caius: utrumque
 Noras: sed neutri pensio tota fuit.
 Si nihil hinc veniet; pangentur carmina nobis:
 Audieris, dices esse Maronis opus.
 Infans: omnes gelidis quicunque lacernis
 Sunt ibi; Nalones, Virgiliosque vides.
 Atria magna colam; vix tres, aut quatuor ista
 Res aluit: pallet cætera turba fame.
 Quid faciam? suade: nam certum est vivere Romæ.
 Si bonus es, casu vivere, Sexte, potes.

In Thelesinum. XXXIV.

Mutua quòd nobis ter quinquagena dedisti
 Ex opibus tantis, quas gravis arca premit;
 Esse tibi magnus, Thelesine, videris amicus:
 Tu magnus, quòd das? immo ego, quòd recipis.

De lacerta cœlata. XXXV.

Inserta phialæ Mentoris manu ducta
 Lacerta vivit, & timetur argentum.

In Pollam. XXXVI.

Simpliciter pateat vitium fortass: pusillum:
 Quod tegitur, majus creditur esse malum.

In Lentinum. XXXVII.

Mentiris juvenem tinctis, Lentine, capillis;
 Tam subito corvus, qui modò cygnus eras.
 Non omnes fallis, scit te Proserpina canum:
 Personam capiti detrahet illa tuo.

Ad Ligurinum. XXXVII.

Occurrit tibi nemo quòd libenter;
 Quòd, quacunque venis, fuga est, & ingens
 Circa te, Ligurine, solitudo;
 Quid sit, scire cupis? nimis Poeta es.

Hoc valde vitium periculosum est.
 Non tigris catulis citata raptis,
 Non dispas medio perusta Sole,
 Nec sic scorpius improbus timetur :
 Nam tantos, rogo, quis ferat labores ?
 Et stanti legis, & legis sedenti :
 Currenti legis, & legis student.
 In thermas fugio ; sonas ad aurem.
 Piscinam peto ; non licet natare.
 Ad coenam propero ; tenes euntem.
 Ad coenam venio ; fugas sedentem.
 Lassus dormio ; suscitās jacentem.
 Vis, quantum facias mali, videre ?
 Vir justus, probus, innocens timeris.

De eodem XXXIX.

Fugerit an mensas Phoebus coenamque Thyestæ,
 Ignoro : fugimus nos, Ligurine, tuam.
 Illa quidem lauta est, dapibusque instructa superbis :
 Sed nihil omnino, te recitante, placet.
 Nolo mihi ponas rhombum, nullumve bilibrem :
 Nec volo boletos, ostrea nolo : tace.

Ad Candidum. XL.

Exigis à nobis operam sine fine togatam.
 Non eo, libertum sed tibi mitto meum.
 Non est, inquis, idem ; multò plus esse probabo :
 Vix ego lecticam subsequor ; ille feret.
 In turbam incidēris ; cunctos umbone repellet :
 Invalidum est nobis, ingenuumque latus.
 Quidlibet in causis narraveris ; ipse tacebo :
 At tibi tergeminum mugiet ille sophos.
 Lis erit ; ingenti faciet convicia voce :
 Esse pudor vetuit fortia verba mihi.
 Ergo nihil nobis, inquis, præstabis amicus ?
 Quicquid libertus, Candide, non poterit.

De Basso. XLI.

CApēna grandi porta quā pluit guttā,
 Phrygiæque matris Almo quā lavat ferrum,
 Ho-

Horatiorum quâ viret sacer campus,
 Et quâ pusilli fervet Herculis fanum,
 Faustine, plenâ Bassus ibat in rhedâ,
 Omnes beati copias trahens ruris.
 Illic videres frutice nobili caules,
 Et utrumque porrum, sessileisque lactucas,
 Pigroque ventri non inutiles betas :
 Illic coronam pinguibus gravem turdis,
 Leporemque læsum Gallici canis dente,
 Nondumque victâ lacteum fabâ porcum :
 Nec feriatus ibat ante carrueam,
 Sed tuta foeno cursor ova portabat.
 Urbem petebat Bassus ? imò rus ibat.

De Ollis. XLII.

Pauperis exstruxit cellam ; sed vendidit Ollus
 Prædia : nunc cellam pauperis Ollus habet.

In Invitatorem. XLIII.

Veientana mihi misces, tu Massica potas :
 Olfacere hæc malo pocula, quàm bibere.

In Ligurinum. XLIV.

Hæc tibi, non alia est ad coenam causa vocandi,
 Versiculos recites ut, Ligurine, tuos.
 Deposui soleas ; affertur protinus Ingens
 Inter lactucas, oxygarumque liber.
 Alter perlegitur, dum fercula prima morantur :
 Tertius est, nec adhuc mensa secunda venit.
 Et quartum recitas, & quintum denique librum ;
 Putidus est, toties si mihi ponis aprum.
 Quod si non scombris scelerata poemata donas ;
 Coenabis solus jam, Ligurine, domi.

Ad Tongilianum. XLV.

Empta domus fuerat tibi, Tongilliane, ducenis :
 Abstulit hanc nimium casus in urbe frequens.
 Collatum est decies ; rogo, non potes ipse videri
 Incendisse tuam, Tongilliane, domum ?

In Gelliam. XLVI.

Quòd, quacumq; venis, Cosmum migrare putamus,
 Et fluere excusso cinnama fusa vitro :
 Nolo peregrinis placeas tibi, Gellia, nugis :
 Scis, puto, posse meum sic bene olere canem.

De cisterna Ravennate. XLVII:

Sit cisterna mihi, quàm vinea, malo, Ravennæ :
 Cùm possim multo vendere pluris aquam.

De caupone. XLVIII.

Callidus imposuit nuper mihi caupo Ravennæ :
 Cùm peterem mixtum, vendidit ille merum.

De villa Faustini, ad Bassum. XLIX.

Bajana nostri villa, Bassè, Faustini,
 Non otiosis ordinata myrtetis,
 Viduaque plarano, consilique buxeto
 Ingrata lati spatia detinet campi :
 Sed rure vero, barbaroque lætatur.
 Hic facta premitur angulo Ceres omni,
 Et multa frāgrat testa senibus autumnis.
 Hic post Novembres, imminente jam bruma,
 Seras putator horridus refert uvas.
 Truces in alta valle mugiant tauri,
 Vitulusque inermi fronte prurit in pugnam.
 Vagatur omnis turba sordidæ cortis,
 Argutus Anser, gemmeique pavones,
 Nomenque debet quæ rubentibus pennis,
 Et picta perdix, Numidicæque guttatæ,
 Et impiorum phasiana Colchorum ;
 Rhodias superbi foeminas premunt galli ;
 Sonantque turres plaufibus columbarum ;
 Gemit hinc palumbus, inde cereus turtur.
 Avidi sequuntur villicæ sinum porci,
 Matremque plenam mollis agnus expectat.
 Cingunt serenum lactel focum vernæ,
 Et larga festos lucet ad Lares sylva.
 Non fegnis albo pallet otio caupo ;
 Nec perdit oleum lubricus palæstrita :

Sed

Sed tendit avidis rete subdolum turdis,
 Tremulave captum linea trahit piscem,
 Aut impeditam cassibus refert damam.
 Exercet hilares facilis hortus urbanos,
 Et pædago non jubente lascivi
 Parere gaudent villico capillati ;
 Et delicatus opere fruitur eusuchus.
 Nec venit inanis rusticus saluator ;
 Fert ille ceris cana cum suis mella,
 Metamque lactis Sassinate de sylva:
 Somniculosos ille porrigit glires ;
 Hic vagientem matris hispidaæ foetum ;
 Alius coactos non amare capones.
 Et dona matrum vimine offerunt texto
 Grandes proborum virgines colonorum.
 Facto vocatur lætus opere vicinus ;
 Nec avara servat crastinas dapes mensa :
 Vescuntur omnes, ebrioque non novit
 Satur minister invidere convivæ.
 At tu sub urbe possides famem mundam,
 Et turre ab alta prospicis meras laurus,
 Furem Priapo non timente securus ;
 Et vinitorem farre pascis urbano,
 Pictamque portas otiosus ad villam
 Olus, ova, pullos, poma, caseum, mustum.
 Rus hoc vocari debet, an domus longè ?

De muneribus gladiatoris. L.

Sutor, credo, dedit tibi, culta Bononia, munus,
 Fullo dedit Mutinæ : nunc ubi caupo dabit ?

In Ponticum. LI.

Cum vocor ad coenam, non jam venalis, ut antè,
 Cur mihi non eadem, quæ tibi, coena datur ?
 Ostrea tu sumis stagno saturata Lucrino ;
 Sumitur inciso mytilus ore mihi.
 Sunt tibi boleti ; fungos ego sumo suillos.
 Res tibi cum rhombo est ; at mihi cum sparulo.
 Cereus immodicis turtur te clunibus implet ;
 Ponitur in cavea mortua pica mihi.

Cur

Cur sine te coeno, cùm tecum, Pontice, coenem?

Sportula quòd non est, profit: edamus idem.

In Cinnam. LII.

E Sse nihil dicis, quicquid petis, improbe Cinna:
Si nil Cinna petis; nil tibi, Cinna, nego.

In Quinctum. LIII.

C Entenis quòd emis pueros, & sæpe ducenis:
Quòd sub rege Numa condita vina bibis:
Quòd constat decies tibi non speciosa supellex:
Libra quòd argenti millia quinque rapit:
Aurea quòd fundi pretio carruca paratur:
Quòd puris mula est, quàm domus empta tibi:
Hæc animo credis magno te, Quincte, parare?
Falleris: hæc animus, Quincte, pusillus emit.

In Cotilum. LIV.

C Otile, bellus homo es: dicunt hoc, Cotile, multi.
Audio: sed quid sit, dic mihi, bellus homo.
Bellus homo est, flexos qui digerit ordine crines:
Balsama qui semper, cinnama semper olet:
Cantica qui Nili, qui Gaditana susurrat:
Qui movet in varios brachia vulsa modos:
Inter foemineas totâ qui luce cathedras
Desidet, atque aliqua semper in aure sonat:
Qui legit hinc illinc missas, scribitque tabellas:
Pallia vicini qui refugit cubiti:
Qui scit, quam quis amet: qui per convivia currit:
Hirpini veteres qui bene novit avos:
Quid narras? hoc est, hoc est homo, Cotile, bellus:
Res prætricrosa est, Cotile, bellus homo.

Ad Cassianum. LV.

S Irenas, hilarem navigantium poenam,
Blandasque mortes, gaudiumque crudele,
Quas nemo quondam deserebat auditas,
Fallax Ulysses dicitur reliquisse.
Non miror: illud, Cassiane, mirarer,
Si fabulantem Canium reliquisset.

Ad Diadumenum. LVI.

Quod spirat tenerâ malum mordente puellâ :
 Quod de Corycio quæ venit aura croco :
 Vineâ quod primis floret cum cana racemis :
 Gramina quod redolent, quæ modò carpsit ovis :
 Quod myrtus, quod messor Arabs, quod succina trita :
 Pallidus Eoo thure quod ignis olet :
 Gleba quod æstivo levitèr cum spargitur imbre :
 Quod madidas nardo sparsa corona comas :
 Hoc deprompta tuis oculis munuscula fragrant.
 Quid si donâ dares magna, sine invidiâ ?

In M. Antonium. LVII.

Par scelus admisit Phariis Antonius armis :
 Abscidit vultus ensis uterque sacros.
 Illud, laurigeros ageres cum læta triumphos :
 Hoc tibi, Roma, caput, cum loquereris, erat.
 Antonii tamen est pejor, quàm causa Pothini :
 Hic facinus domino præstitit ; ille sibi.

De pigris nautis. LVIII.

Ceffatis pueri, nihilque môstis,
 Vatreño, Eridanoque, pigriores :
 Quorum per vada tarda navigantes,
 Lentos figitis ad celeusma remos.
 Jam prono Phaëthonte sudat Æthon,
 Exarsitque dies, & hora lassos
 Interjungit equos meridiana.
 At vos tam placidas vagi per undas
 Tutæ luditis otium carinæ.
 Non nautas puto vos, sed Argonautas.

In Gargilianum. LIX.

Psilothro faciem lævam, & dropace calvam.
 Nunquid tonsorem, Gargiliane, times ?
 Quid facient ungues ? nam certè non potes illos
 Refinâ, Veneto nec refecare luto.
 Desine, si pudor est, miseram traducere calvam :
 Hoc fieri porco, Gargiliane, solet.

In Baticum. LX.

Nec mullus, nec te delectat, Bætice, turdus ;
 Nec lepus est unquam, nec tibi gratus aper.
 Nec te liba juvant, nec sectæ quadra placentæ ;
 Nec Libye mittit, nec tibi Phasis aves.
 Capparin, & putri cepas alece natantes,
 Et pulpam dubio de petasone voras.
 Teque juvant gerres, & pelle melandrya canâ :
 Resinata binis vina, Falerna fugis.
 Nescio, quod stomachi vitium secretius esse
 Suspicer ; ut quid enim, Bætice, saprofagis ?

Ad Paullinum. LXI.

Minxisti currente semel, Paulline, carinâ :
 Meiere vis iterum ? jam Palinurus eris.

In Zoilum. LXII.

Conviva quisquis Zoili potest esse,
 Summoenianas cœnet inter uxores,
 Curtâque Ledæ sobrius bibat restâ.
 Hoc esse levius, puriusque contendo.
 Jacet occupato galbanatus in lecto,
 Cubitisque trudit hinc & inde convivas,
 Effultus ostro, sericisque pulvinis.
 Propè stat minister, suggeritque ructanti
 Pinnas rubentes, cuspidisque lentisci ;
 Et æstuantî tenue ventilat frigus,
 Fugatque muscas myrtea puer virga.
 At ipse retro flexus ad pedum turbam,
 Inter catellas anserum exta lambentes,
 Partitur apri glandulas palæstritis :
 Ligurumque nobis saxa cùm ministrantur,
 Vel cocta fumis musta Massilitanis,
 Opimianum morionibus nectar
 Chrysellinisque myrrhinisque propinat.
 Et Cosmianis ipse fusus ampullis,
 Non erubescit murice aureo nobis
 Dividere mœchæ pauperis capillare.
 Septunce multo deinde perditus stertit :
 Nos accubamus, & silentium ronchis

Præstare jussi, nutibus propinamus.
Hos Malchionis patimur improbi fastus.

Ad Phabum. LXIII.

UTere lactucis, & mollibus utere malvis:
Nam faciem, durum, Phoebe, cacantis habes.

In Vetustillam. LXIV.

CUm tibi trecenti consules, Vetustilla,
Et tres capilli, quatuorque sint dentes,
Pectus cicadæ, crusculumque formicæ:
Rugosiorum cum geras stolâ frontem;
Et araneorum cassibus pares mammas:
Cum comparata rictibus tuis ora
Niliacus habeat crocodilus angusta,
Meliùsque ranæ garriant Ravennates,
Et Adrianus dulciùs culex canter,
Videasque quantum noctuæ vident manè,
Et illud oleas, quod viri capellarum:
Cum bruma mensem sit tibi per Augustum,
Regelare nec te pestilentia possit,
Audes ducentas nuptum ire post mortes,
Virumque demens cineribus tuis quæris.
Quis conjugem, quis te vocabit uxorem,
Philomelus aviam quam vocaverat nuper?
Sternatur à Coricle clinico lectus,
Thalassionem qui tuum decet solus;
Ustorque tedas præferat novæ nuptæ.

In Rufum. LXV.

ESse negas coctum leporem, poscisque flagella:
Mavis, Rufe, coquum scindere, quàm leporem.

In Nævolum. LXVI.

NUnquam dicis ave, sed reddis, Nævole, semper:
Quod prior & corvus dicere sæpe solet.
Cur hoc exspectas à me, rogo, Nævole, dicas:
Nam puto nec melior, Nævole, nec prior es.
Præmia laudato tribuit mihi Cæsar uterque,
Natorumque dedit jura paterna trium.

Ore

Ore legor multo, notumque per oppida nomen,
Non exspectato dat mihi fama rogo.
Est & in hoc aliquid: vidit me Roma tribunum;
Et sedeo quâ te suscitât Oceanus.
Quot mihi Cæsareo facti sunt munere cives,
Nec famulos totidem suspicor esse tibi.

Ad cerdonem. LXVII.

IRasci nostro non debes, cerdo, libello:
Ars tua, non vita, est carmine læsa meo.
Innocuos permitte sales: cur ludere nobis
Non liceat, licuit si jugulare tibi?

Ad Rufum. LXVIII.

Curforem sextâ tibi, Rufe, remisimus horâ,
Carmina quem madidum nostra tulisse reor:
Imbribus immôdicis cœlum nam fortè ruebat.
Non aliter mitti debuit iste liber.

M. VAL. MARTIALIS EPIGRAMMATUM

LIBER IV.

De natali Domitiani. I.

Cæsaris alma dies, & luce sacratior illâ,
Conscia Dictæum qua tulit Ida Jovem,
Longa, precor, Pylloque veni numerosior ævo,
Semper & hoc vultu, vel meliore nite.
Hic colat Albano Tritonida multus in arvo,
Perque manus tantas plurima quercus eat.
Hic colat ingenti redeuntia secula lustro,
Et quæ Romuleus sacra Terentus habet.
Magna quidem, superi, petimus, sed debita terris.
Pro tanto quæ sunt improba vota deo?

De Horatio. II.

Spectabat modò solus inter omnes
Nigris munus Horatius lacernis,
Cum plebs, & minor ordo, maximusque
Sancto cum Duce candidus federet.
Toto nix cecidit repentè cœlo:
Albis spectat Horatius lacernis.

De nivibus. III.

Adspice, quàm densum tacitarum vellus aquarum
Defluat in vultus Cæsaris, inque sinus.
Indulget tamen ille Jovi, nec vertice moto
Concretas pigro frigore ridet aquas,
Sidus Hyperborei solitus lassare Bootæ,
Et madidis Helicen dissimulare comis.
Qui siccis lascivit aquis, & ab æthere ludit,
Suspisor has pueri Cæsaris esse nives.

In Bassam. IV.

Quod siccæ redolet palus lacunæ,
Crudarum nebula quod Albularum,
Piscinæ vetus aura quod marinæ,

Lassi Bardiacus quod evocati,
 Quod bis murice vellus inquinatum,
 Quod jejunia sabbatariorum,
 Mœstorum quod anhelitus reorum,
 Quod spurcæ moriens lucerna tedæ,
 Quod ceromata fæce de Sabina,
 Quod vulpis fuga, viperæ cubile,
 Mallem, quàm quod oles, olere Bassa.

Ad Fabianum. V.

Vir bonus & pauper, linguaque & pectore verus:
 Quid tibi vis? urbem qui, Fabiane, petis?
 Qui nec leno potes, nec commessator haberi,
 Nec pavidos tristi voce citare reos;
 Vendere nec vanos circa pallatia fumos;
 Plaudere nec Cano, plaudere nec Glaphyro.
 Unde miser vires? homo fidus, certus amicus:
 Hoc nihil est; nunquam sic Philomelus eris.

In Masilianum. VI.

Credi virgine castior pudicâ,
 Et frontis teneræ cupis videri;
 Cùm sis improbior, Masiliane,
 Quàm qui compositos metro Tibulli
 In Stellæ recitat domo libellos.

Ad Euphemum. VII.

Prima salutantes, atque altera continet hora;
 Exercet raucos tertia caustidicos.
 In quintam varios extendit Roma labores;
 Sexta quies lassis, septima finis erit.
 Sufficit in nonam nitidis octava palæstris;
 Imperat exstructos frangere nona toros.
 Hora libellorum decima est, Eupheme, meorum,
 Temperat ambrosias cùm tua cura dapes;
 Et bonus æthereo laxatur nectare Cæsar,
 Ingentique tenet pocula parca manu.
 Tunc admitte jocos: gressu timet ire licenti
 Ad matutinum nostra Thalia Jovem.

Ad.

Ad Faustinum. VIII.

Dum novus est, neque adhuc rasâ mihi fronte libellus,

Pagina dum tangi non bene sicca timet ;

I, puer, & charo perfer leve munus amico,

Qui meruit nugas primus habere meas.

Curre ; sed instructum comitetur pumice librum :

Spongia : muneribus convenit illa meis.

Non possunt nostros multæ, Faustine, lituræ

Emendare jocos : una litura potest.

In Ant. Saturnium. IX.

Dum nimium vano tumefactus nomine gaudes,
Et Saturninum te, miser, esse pudet :

Impia Parrhasiâ movisti bella sub ursâ,

Qualia qui Phariæ conjugis arma tulit.

Excideratne adeò fatum tibi nominis hujus,

Obruit Actiaci quod gravis ira freti ?

An tibi promisit Rhénus, quod non dedit illi

Nilus, & Arctoïs plus licuisset aquis ?

Ille etiam nostris Antonius occidit armis ;

Qui tibi collatus, perfide, Cæsar erat.

*Ad Rufum, de nuptiis Pudentis, & Claudie
Peregrina. X.*

Claudia, Rufe, meo nubit Peregrina Pudenti :

Macte esto tedis, & Hymenæe, tuis.

Tam bene rara suo miscentur cinnama nardo,

Massica Theseis tam bene vina favis.

Nec melius teneris junguntur vitibus ulmi,

Nec plus lotos aquas, littora myrtus amat.

Candida perpetuo residet Concordia lecto :

Tamque pari semper sit Venus æqua jugo.

Diligat illa senem quondam : sed & ipsa marito,

Tunc quoque cum fuerit, non videatur anus,

Ad Silium. XI.

Sili, Castalidum decus sororum,

Qui perjurio barbari furoris.

Ingenti premis ore, perfidosque
 Astus Hannibalis, levesque Poenos
 Magnis cedere cogis Africanis :
 Paulum sepositâ severitate,
 Dum blandâ vagus aleâ December
 Incertis sonat hinc & hinc fritillis,
 Et ludit rota nequiore talo,
 Nostris otia commoda Camœnis
 Nec torvâ lege fronte, sed remissâ.
 Sic forsan tener ausus est Catullus
 Magno mittere passerem Maroni.

Ad Cæcilianum. XII.

M Ille tibi nummos hesternâ nocte roganti,
 In sex aut septem, Cæciliane, dies ;
 Non habeo, dixi : sed tu causatus amici
 Adventum, lancem paucaque vasa rogas.
 Stultus es? an stultum me credis, amice? negavi
 Mille tibi nummos : millia quinque dabo?

De puero stiria jugulato. XIII.

Quâ vicina pluit Vipsanis porta columnis,
 Et madet assiduo lubricus imbre lapis,
 In jugulum pueri, qui roscida templa subibat,
 Decidit hiberno prægravis unda gelu :
 Cùmque peregisset miseri crudelia fata,
 Tabuit in calido vulnere mucro tener.
 Quid non sæva sibi voluit fortuna licere?
 Aut ubi mors non est, si jugulatis aquæ?

De endromide. XIV.

Hanc tibi Sequanicæ pinguem textricis alumnâ,
 Quæ Lacedæmonium barbarâ nomen habet,
 Sordida, sed gelido non adspernenda Decembri
 Dona, peregrinam mittimus endromidem.
 Seu lentum ceroma teris, tepidumve trigona ;
 Sive harpasta manu pulverulenta rapis ;
 Plumea seu laxi partiris pondera follis ;
 Sive levem cursu vincere quæris Atham :
 Ne madidos intret penetrabile frigus in artus,
 Neve gravis subita te premat Iris aqua.

Ri.

Ridebis ventos hoc munere tectus, & imbres.

Non sic in Tyria sindone tutus eris.

De Cærelia & Gallia. XV.

Dicit se vetulam, cùm sit Cærelia puppa :
Puppam se dicit Gellia, cùm sit anus.
Ferre nec hanc possis, possis, Coline, nec illam :
Altera ridicula est, altera putidula.

De Selio. XVI.

Nullos esse deos, inane coelum
Affirmat Selius, probatque ; quòd se
Factum, dum negat hoc, videt beatum.

Ad Thalam de Brutiano. XVII.

Dum tu lenta nimis, diuque quæris,
Quis primus tibi, quisve sit secundus ;
Graium quisve epigramma comparabit :
Palmam Callimachus, Thalia, de se
Facundo dedit ipse Brutiano.

Qui si Cecropio satur lepore,
Romanæ sale luserit Minervæ ;
Illi me facias, precor, secundum.

Ad Fabianum. XVIII.

Omnes quas habuit, Fabiane, Lycoris amicas,
Extulit : uxori fiat amica meæ.

De littoribus Altini. XIX.

Æmula Bajanis Altini littora villis,
Et Phaëthontei conscia sylva rogi ;
Quæque Antenoreo Dryadum pulcherrima Fauno
Nupsit ad Euganeos sola puella lacus ;
Et tu Ledæo felix Aquileia Timavo,
Hic ubi septenas Cyllarus hausit aquas ;
Vos eritis nostræ portus, requiesque senectæ,
Si juris fuerint otia nostra sui.

Ad Posthumum. XX.

Quòd te manè domi toto non vidimus anno,
Vis dicam, quantum, Posthume, perdiderim ?
Tricenos, puto, bis ; vicanos ter, puto, nummos.
Ignosces ; togulam, Posthume, pluris emo.

Ad

Ad Domitianum. XXI.

Sæpe meos laudare soles, Auguste, libellos.
 Invidus ecce negat : non minùs ergo soles.
 Quid, quòd honorato non solâ voce dedisti,
 Non alius poterat quæ dare dona mihi ?
 Ecce iterum nigros corrodit lividus unguis.
 Da, Cæsar, tantò tu magis, ut doleat.

Ad Chloen. XXII.

Donâsti tenero, Chloë, Luperco
 Hispanas, Tyriasque, coccinasque,
 Et lotam tepido togam Galeso,
 Indos sardonychas, Scythas sinaragdos,
 Et centum dominos novæ monetæ ;
 Et quicquid petit usque & usque, donas :
 Væ glabraria, væ tibi misella !
 Nudam te statuet tuus Lupercus.

Ad Pudencium. XXIII.

Obstat, care Pudens, nostris sua turba libellis :
 Lectoremque frequens lassat, & implet opus.
 Rara juvant. Primis sic major gratia pomis :
 Hybernæ pretium sic meruere rosæ.
 Sæpius in libro memoratur Persius uno,
 Quàm levis in totâ Marsus Amazonide.
 Tu quoque de nostris releges quemcunque libellis,
 Esse puta solum : sic tibi pluris erit.

De piscibus Baianis. XXIV.

Balano procul à lacu, monemus,
 Piscator, fuge, ne nocens recedas.
 Sacris piscibus hæ natantur undæ,
 Qui nôrunt Dominum, manumque lambunt.
 Illam, quâ nihil est in orbe majus.
 Quid, quòd nomen habent, & ad magistri
 Vocem quisque sui venit citatus ?
 Hoc quondam Lybis improbus profundo,
 Dum prædam calamo tremente ducit,
 Raptis luminibus repentè cæcus
 Captum non potuit videre piscem :

Et nunc sacrilegos perosus hamos,
 Baianos sedet ad lacus rogator :
 At tu, dum potes, innocens recede,
 Jactis simplicibus cibus in undas,
 Et pisces venerare dedicatos.

Ad Hippodamum. XXV.

QUOD cupis in nostris dicique, legique libellis,
 Et nonnullus honor creditur esse tibi :
 Ne valeam, si non res est gratissima nobis,
 Et volo te chartis inseruisse meis.
 Sed tu nomen habes averſa fronte ſororum
 Impoſitum, mater quod tibi dura dedit :
 Quod nec Melpomene, quod nec Polyhymnia poſſit,
 Nec pia cum Phœbo dicere Calliôpe.
 Ergo aliquod gratum Muſis tibi nomen adopta:
 Non ſemper bellè dicitur Hippodamus.

De Ape electro incluſa. XXVI.

ET latet, & lucet Phaërontide condita gutta,
 Ut videatur apis neſtare clauſa ſuo.
 Dignum tantorum pretium tulit illa laborum.
 Credibile eſt ipſam ſic voluiſſe mori.

Ad Soſibianum. XXVII.

PLENA laboratis habeas cùm ſcrinia libris,
 Emittis quare, Soſibiane, nihil ?
 Edent hæredes, inquis, mea carmina : quando ?
 Tempus erat jam te, Soſibiane, legi.

Ad Attalum. XXVIII.

SORDIDA cùm tibi ſit, verum tamen, Attale, dixit.
 Quisquis te niveam dixit habere togam,

De pugna damarum. XXIX.

FRONTIBUS adverſis molles concurrere damas
 Vidimus, & fati forte jacere pari.
 Spectavere canes prædam : ſtupuitque ſuperbus
 Venator, cultro nil ſupereſſe ſuo.
 Unde leves animi tanto caluere furore ?
 Sic pugnant tauri, ſic cecidere viri.

Ad

Ad Olum. XXX.

CAna est barba tibi, nigra est coma: tingere barbam
Non potes, hæc causa est: sed potes, Ole, comam.

Ad Afrum. XXXI.

Centum Coranus, & ducenta Mancinus,
Trecenta debet Titius, hoc bis Albinus,
Decies Sabinus, alterumque Serranus;
Ex insulis, fundisque tricies soldum,
Ex pecore redeunt ter ducena Parmensi:
Totis diebus, Afer, hoc mihi narras;
Et teneo melius ista quàm meum nomen.
Numeres oportet aliquid, ut pati possim;
Quotidianam refice nauseam nummis.
Audire gratis, Afer, ista non possum.

Ad Charinum. XXXII.

Argenti genus omne comparasti,
Et solus veteres Myronis Artes,
Solutus Praxitelis manus, Scopæque,
Solutus Phidiaci toreuma cœli,
Solutus Mentoreos habes labores.
Nec defunt tibi vera Glaniana,
Nec quæ Callaico linuntur auro,
Nec mensis anaglypta de paternis.
Argentum tamen inter omne, miror,
Quare non habeas, Charine, purum.

Ad Posthumum. XXXIII.

Atria Pisonum stabant cùm stemmate toto,
Et docti Senecæ ter numeranda domus,
Prætullimus tantis solum te, Posthume, regnis:
Pauper eras, & eques, sed mihi consul eras.
Tecum ter denas numeravi, Posthume, brumas:
Communis nobis lectus & unus erat.
Jam donare potes, jam perdere, plenus honorum,
Largus opum: exspecto, Posthume, quid facias.
Nil facis: & serum est alium mihi querere regem.
Hoc, Fortuna, placet? Posthumus imposuit.

In male recitantem. XXXIV.

Quid recitaturus circumdas vellera collo?
Conveniunt nostris auribus illa magis.

De Vesuvio monte. XXXV.

Hic est pampineis viridis modò Vesuvius umbris:
Presserat hîc madidos nobilis uva lacus.

Hæc juga quàm Nyfæ colles plûs Bacchus amavit:
Hoc nuper satyri monte dedêre choros.

Hæc Veneris sedes, Lacedæmone gratior illi:
Hic locus Herculeo nomine clarus erat.

Cuncta jacent flammis, & tristi mersa favillâ:
Nec Superi vellent hoc licuisse sibi.

Votum Parthenii, ad Phœbum. XXXVI.

Hæc tibi pro nato plenâ dat lætus acerrâ,
Phoebe, Palatinus munera Parthenius.

Ut qui prima novo signat quinquennia lustro,
Impleat ianumeras Burrus Olympiadas.

Fac rata vota patris, sic te tua diligat arbor,
Gaudeat & certâ virginitate foror.

Perpetuo sic flore mices: sic denique non sint

Tam longæ Bromio, quàm tibi, Phoebe, comæ.

De Sabello. XXXVII.

Saturnalia divitem Sabellam

Fecerunt: meritò tumet Sabellus:

Nec quemquam putat esse, prædicatque

Inter causidicos beatiorum.

Hos fastus, animosque dat Sabello

Farris semodius, fabæque fressæ,

Et thuris, piperisque tres selibræ,

Et Lucanica ventre cum Falisco,

Et nigri Syra defruti lagenæ,

Et ficus Libycâ gelata testâ,

Cum bulbis, cochleisque, caseoque:

Piceno quoque venit à cliente

Parcæ cistula non capax olivæ,

Et crasso figuli polita coelo

Septenaria synthesis Sagunti,

Hispa-

Hispanæ luteum rotæ toreuma,

Et lato variata mappa clavo.

Saturnalia fructuosiora

Annis non habuit decem Sabellus.

De Phaethonte encaustico. XXXVIII.

ENcaustus Phaëthon tabulâ depictus in hæc est.
Quid tibi vis, dipylon qui Phaëthonta facis?

Ad Flaccum. XXXIX.

Nescis, crede mihi, quid sint epigrammata, Flacce,

Qui tantum lusus illa, jocosque putas :

Ille magis ludit, qui scribit prandia sævi

Tereos ; aut coenam, crude Thyesta, tuam.

Aut puero liquidas aptantem Dædalon alas,

Pascentem Siculas aut Polyphemon oves.

A nostris procul est omnis vesica libellis,

Musa nec infano syrmitæ nostra tumet.

Illa tamen laudant omnes, mirantur, adorant,

Confiteor : laudant illa, sed ista legunt.

Ad Cæcilianum. XL.

Cum tibi non essent sex millia, Cæciliane,

Ingenti * latè vectus es hexaphoro ? *laxe

Postquam bis decies tribuit Dea cæca, sinumque

Ruperunt nummi, factus es, ecce, pedes.

Quid tibi pro meritis, & tantis laudibus optem ?

Dî reddant sellam, Cæciliane, tibi.

In Hedylum. XLI.

Gestari junctis nisi desinis, Hedyle, capris :

Qui modo ficus eras, jam caprificus eris.

Ad Cosmum. XLII.

Hunc, quem sæpe vides inter penetralia nostræ

Pallados, & templi limina, Cosme, novi,

Cum baculo, peraque senem : cui cana, putrisque

Stat coma, & in pectus sordida barba cadit :

Cerea quem nudi tegit uxor abolla grabati :

Cui dat latratos obvia turba cibos :

Esse putas Cynicum, deceptus imagine falsa.

Non est hic Cynicus, Cosme : quid ergo ? canis.

Ad

Ad Colinum. XLIII.

O Cui Tarpeias licuit contingere quercus,
 Et meritas primâ cingere fronde comas;
 Si sapias, utaris totis, Coline, diebus,
 Extrémumque tibi semper adesse putes.
 Lanificas nulli tres exorare puellas
 Contigit: observant quem statuere diem.
 Divitior Crispo, Thraseâ constantior ipso,
 Lautior & nitido sis Meliore licet,
 Nil adicit penso Lachæsis, fusosque sororum
 Explicat, & semper de tribus una secat.

Ad Lucium. XLIV.

L Uci, gloria temporum tuorum,
 Qui *Gaurum veterem, Tagumque nostrum
 Arpis cedere non finis disertis;
 Argivas generatus inter urbes
 Thebas carmine cantet, aut Mycenas,
 Aut claram Rhodon, aut libidinosa
 Ledæas Lacedæmonis palæstras.
 Nos Celtis genitos & ex Iberis
 Nostræ nomina duriora terræ
 Grato non pudeat referre versu:
 Sævo Bilbilin optimam metallo,
 Quæ vincit Chalybasque, Noricosque:
 Et ferro Plateam suo sonantem,
 Quam fluctu tenui, sed inquieto.
 Armorum Salo temperator ambit:
 Tutelamque, chorosque Rixamarum;
 Et convivis festa Carduarum,
 Et textis Peteron rosis rubentem,
 Atque antiqua patrum theatra Rigas,
 Et certos jaculo levi Silaos:
 Turgentisque lacus, Petusiæque,
 Et parvæ vada pura Vetonissæ:
 Et sanctum Baradonis ilicetum,
 Per quod vel piger ambulat viator:
 Et quæ fortibus excolit juvenicis
 Curvæ Manlius arva Matineffæ.

* *Grainum*

Hæc

Hæc tam rustica, delicate lector,
Rides nomina? rideas licebit;
Hæc tam rustica malo, quàm Bituntos.

In Gargilianum. XLV.

M Unera quòd senibus, viduisque ingentia mittis,
Vis te munificum, Gargiliane, vocem.
Sordidius nihil est, nihil est te spurcius uno,
Qui potes insidias dona vocare tuas.
Sic avidis fallax indulget piscibus hamus:
Callida sic stultas decipit esca feras.
Quid sit largiri, quid sit donare, docebo,
Si nescis: dona, Gargiliane, mihi.

Ad Faustinum. XLVI.

D Um nos blanda tenent lascivi stagna Lucrini,
Et quæ pumiceis fontibus antra calent:
Tu colis Argivi regnum, Faustine, coloni,
Quò te bis decimus ducit ab urbe lapis.
Horrida sed fervent Nemeæi pectora monstri:
Nec satis est, Baias igne calere suo.
Ergo sacri fontes, & littora grata valete;
Nympharum pariter, Nereidumque domus.
Herculeos colles gelidâ vos vincite brumâ;
Nunc Tiburtinis cedite frigoribus.

In Gallam. XLVII.

I N tenebris lugens amissum, Galla, maritum:
Non plorare pudet te, puto, Galla, virum.

De vipera electro inclusa. XLVIII.

F Lentibus Heliadum ramis dum vipera serpit,
Fluxit in obstantem succina gutta feram:
Quæ dum miratur pingui se rore teneri,
Concreto riguit vincta repentè gelu.
Ne tibi regali placeas, Cleopatra, sepulchro,
Vipera si tumulo nobiliore jacet.

De obitu Curiazii. XLIX.

A Rdea solstitio, Præstanaque rura petantur,
Quique Cleonæo fidere fervet ager:

Cùm

Cùm Tiburtinas damnet Curiatius auras,
Inter laudatas ad Styga missus aquas.
Nullo fata loco possis excludere : cùm mors
Venerit, in medio Tibure Sardinia est.

In Mancinum. L.

D Onâsse amicum tibi ducenta, Mancine,
Nuper superbo lætus ore jactasti.
Quartus dies est, in schola poetarum
Dum fabulamur, millibus decem dixti
Emptas lacernas munus esse Pompillæ :
Sardonycha verum, lineisque ter cinctum,
Duasque similes fluctibus maris gemmas
Dedisse Bassam, Cæliamque jurasti.
Herè de Theatro, Pollione cantante,
Cùm subito abires, dum fugis, loquebaris,
Hæreditatis tibi trecenta venisse,
Et manè centum, & post meridiem centum.
Quid tibi sodales fecimus mali tantum ?
Miserere jam crudelis, & sile tandem:
Aut, si tacere lingua non potest ista,
Aliquando narra, quod velimus audire.

De Lycori. LI.

T ibur in Herculeum migravit nigra Lycoris,
Omnia dum fieri candida credit ibi.

De Cærellia. LII.

D Um petit à Baulis mater Cærellia Baias,
Occidit insani crimine merfa freti.
Gloria quanta perit vobis ! hæc monstra Neroni
Nec quondam jussæ præstiteratis aquæ.

De hortis Julii Martialis. LIII.

J uli jugera pauca Martialis,
Hortis Hesperidum beatiora,
Longo Janiculi jugo recumbunt.
Lati collibus imminent recessus ;
Et planus modico tumore vertex
Cœlo perfruitur serenior ;
Et curvas nebula tegente valles
Solut luce nitet peculiari :

D

Pu-

Puris leniter admoventur astris
 Celsæ culmina delicata villæ.
 Hinc septem dominos videre montes,
 Et totam licet æstimare Romam :
 Albanos quoque Tusculosque colles,
 Et quodcunque jacet sub urbe frigus ;
 Fidenas veteres, brevesque Rubras ;
 Et, quod virgineo cruore gaudet,
 Annæ pomiferum nemus Parennæ.
 Illic Flaminia, Salariaque
 Gestator patet, effedo tacente,
 Ne blando rota sit molesta somno ;
 Quem nec rumpere nauticum celeusma,
 Nec clamor valet helciariorum :
 Cum sit tam propè Mulvius, sacrumque
 Lapsæ per Tiberim volent carinæ.
 Hoc rus (seu potiùs domus vocanda est)
 Commendat dominus : tuam putabis ;
 Tam non invida, tamque liberalis,
 Tam comi patet hospitalitate.
 Credas Alcinoi pios Penates,
 Aut facti modò divitis Molorchi.
 Vos nunc omnia parva qui putatis,
 Centeno gelidum ligone Tibur,
 Vel Præneste domate, pendulamque
 Uni dedite Setiam colono :
 Dum, me iudice, præferantur istis
 Juli jugera pauca Martialis.

De Philænide. LIV.

O Culo Philænis semper altero plorat.
 Quo fiat istud quæritis modo ? lusca est.

Ad Linum. LV.

E Gisti vitam semper, Line, municipalem ;
 Quâ nihil omnino vilius esse potest.
 Idibus, & raris togula est excussa Kalendis :
 Duxit & æstates synthesis una decem.
 Saltus aprum, campus leporem tibi misit inemptum :
 Sylva graves turdos exagitata dedit.

Rap-

Raptus flumineo venit de gurgite piscis :
 Vina rubens fudit non peregrina cadus.
 Nec tener Argolica missus de gente minister,
 Sed stetit inculti rustica turba foci.
 Nec nocuit tectis ignis, nec Sirius agris :
 Nec mersa est pelago, nec fluit ulla ratis.
 Supposita est blando nunquam tibi tessera talo :
 Alea sed parca sola fuere nuces.
 Dic, ubi sit decies, mater quod avara reliquit?
 Nusquam est : fecisti rem, Line, difficilem.

In Prætorem. LVI.

Prætorem pauper centum sestertia Gaurus
 Orabat canâ notus amicitia :
 Dicebatque suis hæc tantum deesse trecentis,
 Ut posset domino plaudere justus eques.
 Prætor ait ; scis me Scorpo, Thalloque daturum :
 Atque utinam centum millia sola darem !
 Ah! pudet ingrata, pudet, ah! malè divitis arcæ.
 Quod non vis equiti, vis dare, Prætor, equo?

Ad Sextum. LVII.

Invitas centum quadrantibus, & bene coenas.
 Ut coenem invitator, Sexte, an ut invideam?

Ad Papilum. LVIII.

Tu Setina quidem semper, vel Massica ponis,
 Papile : sed rumor tam bona vina negat.
 Diceris hac factus coelebs quater esse lagena :
 Nec puto, nec credo, Papile ; nec fitio.

De Ammiano ad Maronillum. LIX.

Nihil Ammiano præter aridam restem
 Moriens reliquit ultimis pater ceris.
 Fieri putaret posse quis, Maronille,
 Ut Ammianus mortuum patrem nolle?

Ad Quintum. LX.

Exigis, ut donem nostros tibi, Quinte, libellos:
 Non habeo, sed habet bibliopola Tryphon.
 Es dabo pro nugis, & emam tua carmina sanus?
 Non, inquis, faciam tam fatuè ; nec ego.

De Vestino. LXI.

Cum gravis extremas Vestinus duceret horas,
 Et jam per Stygias esset iturus aquas,
 Ultima volventes orabat pensa sorores,
 Ut traherent parva stamina pulla mora ;
 Jam sibi defunctus, caris dum vivit amicis.
 Moverunt tetricas tam pia vota deas.
 Tum largas partitus opes à luce recessit :
 Seque mori posthac credidit ille senem.

De damis. LXII.

Adspicis, imbelles tentent quàm fortia damæ
 Proelia ? tam timidis quanta sit ira feris ?
 In mortem parvis concurrere frontibus audent.
 Vis, Cæsar, damis parcere ? mitte canes.

De Nigrina. LXIII.

O Felix animo, felix, Nigrina, marito,
 Atque inter Latias gloria prima nurus !
 Te patrios miscere juvat cum conjuge census,
 Gaudentem socio, participique viro.
 Arserit Evadne flammis injecta mariti,
 Nec minor Alcestim fama sub astra ferat.
 Tu melius : certo meruisti pignore vitæ,
 Ut tibi non esset morte probandus amor.

In avarum amicum. LXIV.

Millia misisti mihi sex, bis sena petenti.
 Ut bis sena feram, bis duodena petam.

In Zoilum. LXV.

Nunquam divitias deos rogavi,
 Contentus modicis, meoque latus :
 Paupertas, veniam dabis, recede.
 Causa est quæ subiti, novique voti ?
 Pendentem volo Zoilum videre.

In Varum. LXVI.

Ad coenam nuper Varus me fortè vocavit :
 Ornatus dives, parvula coena fuit.
 Auro, non dapibus oneratur mensa : ministri
 Apponunt oculis plurima ; pauca gulæ.

Tunc

Tunc ego. Non oculos, sed ventrem pascere veni:
Aut appone dapes, Vare, vel aufer opes.

In Afrum. LXVII.

Condita cùm tibi sit jam sexagesima messis,
Et facies multo splendeat alba pilo,
Discurre totâ vagus urbe: nec ulla cathedra est,
Cui non mane feras irrequietus, ave.
Et sine te nulli fas est prodire tribuno,
Nec caret officio consul uterque tuo.
Et sacro decies repetis Pallatia clivo,
Sigeriosque meros, Partheniosque sonas.
Hæc faciant sanè juvenes: deformius, Afer,
Omnino nihil est ardelione sine.

Ad Mathonem. LXVIII.

Hospes eras nostri semper, Matho, Tiburtini.
Hoc emis. imposui: rus tibi vendo tuum.

Ad Mathonem. LXIX.

Declamas in febre, Mathon: hanc esse phrenesin
Si nescis, non es sanus, amice Mathon.
Declamas æger, declamas hemitritæus.
Si suadere aliter non potes, est ratio.
Magna tamen res est: erras; cùm viscera febris
Exurit, res est magna tacere, Mathon.

Ad Rufum. LXX.

Hos quoque commenda Venuleio, Rufe, libellos;
Imputet & nobis otia parva, roga:
Immemor & paulum curarum, operumque suorum,
Non tetricâ nugas exigit aure meas.
Sed nec post primum legat hæc, summumve trientem:
Sed sua cùm medius proelia Bacchus amat.
Si nimis est legisse duos; tibi charta plicetur
Altera: divisum sic breve fiet opus.

In Nævolum. LXXI.

Securo nihil est te, Nævole, pejus: eodem
Sollicito nihil est, Nævole, te melius.
Securus; nullum resalutas, despicias omnes;
Nec quisquam liber, nec tibi gratus homo est.

Sollicitus, donas; dominum, regemque salutas;
Invitas; esto, Nævole, sollicitus.

In Ponticum. LXXII.

NOs bibimus vitro, tu myrrhâ, Pontice; quare?
Prodat perspicuus ne duo vina calix.

Ad librum de Apollinari. LXXIII.

SI vis auribus Atticis probari,
Exhortor, moneoque te, libelle,
Ut docto placeas Apollinari:
Nil exactius, eruditiusque est;
Sed nec candidius, benigniusque.
Si te pectore, si tenebit ore,
Nec ronchos metues maligniorum,
Nec scombris tunicas dabis molestas.
Si damnaverit, ad salariorum
Curras scrinia protinus licebit,
Inversa pueris arande charta.

De Bassa. LXXIV.

INfantem secum semper tua Bassa, Fabulle,
I Collocat, & lusus, deliciasque vocat.
Et quod mireris magis, infantaria non est.
Ergo quid in caula est? pedere Bassa solet.

In dissimulatorem. LXXV.

NUlla remisisti parvo pro munere dona;
Et jam Saturni quinque fuere dies.
Ergo nec argenti sex scriptula Septitiani,
Missa nec à querulo mappa cliente fuit:
Antipolitani nec quæ de sanguine thynni
Testa rubet, nec quæ coctana parva gerit:
Nec rugosarum vimen breve Picenarum:
Dicere te posses ut meminisse mei.
Decipies alios verbis, vultuque benigno:
Nam mihi jam notus dissimulator eris.

De rusticatione. LXXVI.

RUre morans, quid agam? respondeo pauca, rogatus:
Luce deos oro; famulos post arva reviso,

Par-

Partibus atque meis justos indico labores :
Inde lego, Phœbumque cio, Musamque laceſſo:
Hinc oleo corpusque frico, mollique palæſtrâ
Stringo libens, animo gaudens, ac ſcœnore liber :
Prandeo, potō, cano, ludo, lavo, cœno, quieſco,
Dum parvus lychnus modicum conſumat olivæ :
Hæc dat nocturnis nox lucubrata Camœnis.

Ad Librum. LXXVII.

O He, jam, ſatis eſt, ohe, libelle ;
Jam pervenimus uſque ad umbilicos :
Tu procedere adhuc, & ire quæris ;
Nec ſumma potes in ſcheda teneri :
Sic tanquam tibi res peracta non ſit,
Quæ prima quoque pagina peracta eſt.
Jam lector queriturque, deficitque ;
Jam librarius hoc & ipſe dicit,
Ohe, jam, ſatis eſt, ohe, libelle.

M. VAL. MARTIALIS
EPIGRAMMATUM
LIBER V.

Ad Cæsarem. I.

HOc tibi, Palladiæ seu collibus uteris Albæ,
Cæsar, & hinc Triviam prospicis, inde Thetis:
Seu tua veridicæ discunt responsa sorores,
Plana suburbani quæ cubat unda freti:
Seu placet Æneæ nutrix, seu filia Solis,
Sive salutiferis candidus Anxur aquis;
Mittimus, ô rerum felix tutela, salusque,
Sospite quo gratum credimus esse Jovem.
Tu tantùm accipias; ego te legisse putabo:
Et tumidus Galla credulitate fruar.

Ad lectores. II.

MAtronz, puerique, virginesque,
Vobis pagina nostra dedicatur.
Hic, quem nequitiz procaciores
Delectant nimium, salesque nudi,
Turpes, Marse, tuos legat libellos:
Noster cum Domino liber jocetur,
Quem Germanicus ore non rubenti
Coram Cecropia legat puella.

Ad Domitianum. III.

ACcola jam nostræ degis, Germanice, ripæ:
A famulis Istri qui tibi venit aquis,
Latus & attonitus, vlsò modò præfide mundi,
Affatus comites dicitur esse suos;
Sors mea quàm fratris melior! cui tam prope fas est
Cernere, tam longè quem colit ille, Deum.

Ad Paullum, de Myrtale. IV.

FOetere multo Myrtale solet vino:
Sed fallat ut nos, folia devorat lauri,

Me-

Merumque cauta fronde, non aquâ miscet.
 Hanc tu rubentem prominentibus venis
 Quoties venire, Paulle, videris contrâ,
 Dicas licebit; Myrtale bibit laurum.

Ad Sextum. V.

Sexte, Palatinæ cultor facunde Minervæ,
 Ingenio frueris qui propiore dei;
 Nam tibi nascentes domini cognoscere curas,
 Et secreta ducis pectora nosse licet;
 Sit locus & nostris aliqua tibi parte libellis,
 Qua Pedito, qua Marfius, quaque Catullus erit.
 Ad Capitolini cœlestia carmina belli
 Grande cothurnati pone Maronis opus.

Ad Parthenium. VI.

SI non est grave, nec nimis molestum,
 Musæ, Parthenium rogate vestrum:
 Sic te ferior, & beata quondam
 Salvo Cæsare finiat senectus,
 Et sis invidia favente felix;
 Sic Burrus citò sentiat parentem;
 Admittas timidam, brevemque chartam
 Intra limina sanctioris aulae.
 Nôsti tempora tu Jovis sereni,
 Cum fulget placidus, suoque vultu,
 Quo nil supplicibus solet negare.
 Non est, quòd metuas preces iniquas:
 Nunquam grandia, nec molesta poscit,
 Quæ cedro decorata, purpuraque
 Nigris pagina crevit umbilicis.
 Nec porrexeris ista, sed teneto
 Sic, tanquam nihil offeras, agasque.
 Si novi dominum novem sororum,
 Ultro purpureum petet libellum.

Ad Vulcanum. VII.

Qualiter Assyrios renovant incendia nidos,
 Una decem quoties secula vixit avis:

Taliter exuta est veterem nova Roma senectam,

Et sumpsit vultus præsidis ipsa sui.

Jam precor oblitus nostræ, Vulcane, querelæ

Parce : sumus Martis turba, sed & Veneris.

De Phaside. VIII.

E Dictum Domini Deique nostri,

Quo subsellia certiora fiunt,

Et puros eques ordines recepit ;

Dum laudat modò Phasis in Theatro,

Phasis purpureis rubens lacernis,

Et jactat tumido superbus ore ;

Tandem commodiùs licet sedere,

Nunc est reddita dignitas equestris ;

Turba non premimur, nec inquinamur :

Hæc, & talia dum refert supinus,

Illas purpureas & arrogantes

Jussit surgere Lectius lacernas.

In Symmachum. IX.

L Anguebam : sed tu comitatus protinus ad me

Venisti centum, Symmache, discipulis.

Centum me tetigere manus Aquilone gelatæ :

Non habui febrem, Symmache ; nunc habeo.

Ad Regulum, de fama Poetarum. X.

E Sse quid hoc dicam, vivis quòd fama negatur,

Et sua quòd rarus tempora lector amat ?

Hì sunt invidiæ nimirum, Regule, mores,

Præferat antiquos semper ut illa novis.

Sic veterem ingrati Pompeii quærimus umbram ;

Et laudant Catuli Julia templa fenes.

Ennius est lectus salvo tibi, Roma, Marone ;

Et sua riserunt secula Mœonidem.

Rara coronato plaufere theatra Menandro :

Nôrat Nasonem sola Corinna suum.

Vos tamen, ô nostri, ne festinate, libelli :

Si post fata venit gloria, non propero.

Ad Severum, de Stella. XI.

S Ardonychas, smaragdos, adamantas, iaspidas uno

Versat in articulo Stella, Severe, meus.

Mul-

Multas in digitis, plures in carmine gemmas
Invenies : inde est hæc, puto, culta manus.

De eodem. XII.

Quod nutantia fronte perticata
Gestat pondera Mæschion superbus ;
Aut grandis Linus omnibus lacertis
Septem quod pueros levat, vel octo ;
Res non difficilis mihi videtur :
Uno cum digito, vel hoc, vel illo,
Portet Stella meus decem puellas.

In Callistratum. XIII.

Sum fateor, semperque fui, Callistrate, pauper,
Sed non obscurus, nec malè notus eques :
Sed toto legor orbe frequens, & dicitur, hic est.
Quodque cinis paucis, hoc mihi vita dedit.

At tua centenis incumbunt tecta columnis,
Et libertinas arca flagellat opes :
Magnaque Niliacæ servit tibi gleba Syenes ;
Tondet & innumeros Gallica Parma greges.
Hoc ego, tuque sumus ; sed quod sum, non potes esse.
Tu quod es, è populo quilibet esse potest.

De Manneio. XIV.

Sedere primo solitus in gradu semper,
Tunc cum liceret occupare, Manneius ;
Bis excitatus terque transtulit castra,
Et inter ipsas penè tertius fellas
Post Caiumque Luciumque confedit.
Illinc cucullo prospicit caput tectus,
Oculoque ludos spectat indecens uno.
Et hinc miser dejectus in viam transit ;
Subsellioque semifultus extremo,
Et malè receptus altero genu jactat,
Equiti, sedere ; Lectioque, se stare.

Ad Domitianum. XV.

Quintus nostrorum liber est, Auguste, jocorum,
Et queritur læsus carmine nemo meo.
Gaudet honorato sed multus nomine lector,
Cui victura meo munere fama datur.

Quid

Quid tamen hæc profunt quamvis venerantia multos
Non profint : sane me tamen ista juvant.

Ad Lectorem. XVI.

Seria cùm possim, quòd delectantia malim
Scribere, tu causâ es, lector amice, mihi,
Qui legis, & totâ cantas mea carmina Româ :
Sed nescis, quanti stet mihi talis amor.
Nam si falciferi defendere templa Tonantis,
Sollicitisque velim vendere verba reis ;
Plurimus Hispanas mittet mihi nauta metretas.
Et fiet vario sordidus ære sinus.
At nunc conviva est, commestatorque libellus,
Et tantùm gratis pagina nostra placet.
Bellè, inquis, dixi : satis est : laudabimur usque.
Dissimulas ? facies me, puto, caufidicum.

In Gellium. XVII.

Dum proavos, atavosq; refers, & nomina magna;
Dum tibi noster eques fordida conditio est:
Dum te posse negas nisi lato, Gellia, clavo
Nubere : nupisti, Gellia, cistifero.

Ad Quintianum. XVIII.

Quod tibi Decembri mense, quo volant mappæ,
Gracilesque ligulæ, cereique, chartæque,
Et acuta senibus testa cum damascenis,
Præter libellos vernulas nihil misi :
Fortasse avarus videar, aut inhumanus.
Odi dolosas munerum & malas artes.
Imitantur hamos dona : namque quis nescit
Avidum voratâ decipi scarum muscâ ?
Quoties amico diviti nihil donat,
O Quintiane, liberalis est pauper.

Ad Domitianum. XIX.

Si qua fides veri, præferri, maxime Cæsar,
Temporibus possunt secula nulla tuis.
Quando magis dignos licuit spectare triumphos ?
Quando Palatini plus meruere dei ?

Pulchrior & major quo sub duce Martia Roma?
 Sub quo libertas Principe tanta fuit?
 Est tamen hoc vitium, sed non leve, sit licet unum,
 Quod colit ingratas pauper amicitias.
 Quis largitur opes veteri, fidoque sodali?
 Aut quem prosequitur non alienus eques?

Ad eundem. XX.

Saturnalitiæ ligulam misisse selibræ,
 Flammataæve togæ scriptula tota decem,
 Luxuria est, tumi lique vocant hæc munera reges:
 Qui crepet aureolos, forsitan unus erit.
 Quatenus hi non sunt, esto tu, Cæsar, amicus,
 Nulla ducis virtus dulcior esse potest.
 Jamdudum tacito rides, Germanice, naso:
 Utile, quod non vis, do tibi consilium.

Ad Julium Martialem. XXI.

Si tecum mihi, chare Martialis,
 Securis liceat frui diebus;
 Si disponere tempus otiosum,
 Et veræ pariter vacare vitæ:
 Nec nos atria, nec domus potentum;
 Nec lites tetricas, forumque triste
 Nôstemus, nec imagines superbas:
 Sed gestatio, fabulæ, libelli,
 Campus, porticus, umbra, villa, thermæ;
 Hæc essent loca semper, hi labores.
 Nunc vivit sibi neuter, heu! bonosque
 Soles effugere, atque abire sentit;
 Qui nobis pereunt, & imputantur.
 Quisquam vivere cum sciat, moratur?

De Apollonio. XXII.

Quintum pro Decimo, pro Crasso, Regule, Macrum
 Antè salutabat rhetor Apollonius.
 Nunc utrumque suo resalutat nomine, quantum
 Cura, laborque potest! scripsit, & edidicit.

In Paullum. XXIII.

M Anè domi si te merui, voluique videre,
 Sint mihi, Paulle, tuæ longiùs Exquiliz.
 Sed Tiburtinæ sum proximus accola pilæ ;
 Quò videt antiquum rustica Flora Jovem.
 Alta suburbani viacenda est semita clivi,
 Et nunquam sicco sordida saxa gradur :
 Vixque datur longas mulorum vincere mandras :
 Quæque trahi multo marmora fune vides.
 Illud adhuc gravius, quòd te post mille labores,
 Paulle, negat lasso janitor esse domi.
 Exitus hic operis vani, togulæque madentis :
 Vix tanti Paullum manè videre fuit.
 Semper inhumanos habet officiosus amicos :
 Rex, nisi dormieris, non potes esse meus.

Ad Bassum. XXIV.

H Erbarum fueras indutus, Bassè, colores,
 Jura theatralis dum filuere loci.
 Quæ postquam placidi censoris cura ranaſci
 Jussit, & Oceanum certior audit eques ;
 Non nisi vel cocco madidâ, vel murice tinctâ
 Veste nites, & te sic dare verba putas.
 Quadringentorum nullæ sunt, Bassè, lacernæ :
 Aut meus ante omnes Codrus haberet equum.

De Hermete. XXV.

H ermes Martia seculi voluptas :
 Hermes omnibus eruditus armis :
 Hermes & gladiator, & Magister :
 Hermes turba sui tremorque ludi :
 Hermes quem timet Helius, sed unum :
 Hermes cui cadit Advolans, sed uni :
 Hermes vincere, nec ferire doctus :
 Hermes supposititius sibi ipsi :
 Hermes divitiæ locariorum :
 Hermes cura, laborque ludiarum :
 Hermes belligera superbus hasta :
 Hermes æquoreo minax tridente :
 Hermes casside languida timendus :

Her-

Hermes gloria Martis universi;
Hermes omnia solus, & ter unus.

De Chærestrato. XXVI.

Quadringenta tibi non sunt, Chærestrate; surge,
Lectius ecce venit: sta, fuge, curre, late.
Ecquis, id, revocat, discedentemque reducit?
Ecquis, id, largas pandit amicus opes?
Quem chartis famæque damus, populisq; loquendum?
Quis Stygios non vult totus adire lacus?
Hoc, rogo, non melius, quàm rubro pulpita nimbo
Spargere, & effuso permaduisse croco?
Quàm non sensuro dare quadringenta caballo,
Aureus ut Scorpi nasus ubique micet?
O frustra locuples, & dissimulator amice,
Hæc legis & laudas? quæ tibi fama perit?

Ad Codrum. XXVII.

Quòd alpha dixi, Codre, penulatorum
Te nuper, aliqua cum jocarer in charta:
Si fortè bilem movit hic tibi versus,
Dicas licebit beta me togatorum.

In filium equitem. XXVII.

Ingenium, studiumque tibi, moresque, genusque
Sunt equitis, fateor: cætera plebis habes.
Bis septena tibi non sunt subsellia tanti,
Ut sedeas viso pallidus Oceano.

In Mamercum. XXIX.

Ut bene loquatur, sentiatque Mamercus,
Efficere nullis, Aule, moribus possis:
Pietate fratres Curtios licèt vincas,
Quiete Nervas, comitate Rufones,
Probitate Marcos, æquitate Mauricos,
Oratione Regulos, jocis Paullos:
Rubiginosis cuncta dentibus rodit.
Hominem malignum forsan esse tu credas:
Ego esse miserum credo, cui placet nemo.

Ad Gelliam. XXX.

Si quando leporem mittis mihi, Gellia, dicis:
 Formosus septem, Marce, diebus eris.
 Si non derides, si verum, lux mea, narras:
 Edisti nunquam, Gellia, tu leporem.

Ad Varronem. XXXI.

Varro Sophoclæo non inficiande cothurno,
 Nec minùs in Calabria suspiciende lyra;
 Differ opus: nec te facundi scena Catulli
 Detineat, cultis aut elegia comis.
 Sed lege fumoso non adspernanda Decembri
 Carmina, mittuntur quæ tibi mense suo.
 Commodius nisi fortè tibi, potiusque videtur,
 Saturnalitias perdere, Varro, nuces.

De ludo puerorum cum iuvençis. XXXII.

Adspice, quàm placidis insultet turba iuvençis,
 Et sua quàm facilis pondera taurus amet.
 Cornibus hic pendet summis: vagus ille per armos
 Currit, & in toto ventilat arma bove.
 At feritas immota riget: non esset arena
 Tutior, & possent fallere plana magis.
 Nec trepidant gressus: sed de discrimine palmæ
 Securus puer est, sollicitumque pecus.

Ad Faustinum, de Crispo. XXXIII.

Quadrantem Crispus tabulis, Faustine, supremis
 Non dedit uxori: cui dedit ergo? sibi.

In Causidicum. XXXIV.

Carpere causidicus fertur mea carmina; qui sit
 Nescio: si sciero, væ tibi, causidice.

De Erotio. XXXV.

Hanc tibi, Fronto pater, genitrix Flaccilla puellam
 Oscula commendo deliciasque meas:
 Pallida ne nigras horrescat Erotion umbras,
 Oraque Tartarei prodigiosa canis.
 Impletura fuit sextæ modò frigora brumæ,
 Vixisset totidem ni minùs illa dies.

Inter

Inter tam veteres ludat lasciva patronos,
 Et nomen blæso garriat ore meum.
 Molliâ nec rigidus cespes tegat ossa, nec illi,
 Terra, gravis fueris : non fuit illa tibi.

Ad Fabullum, de Euclide. XXXVI.

Dum sibi redire de Patrensibus fundis
 Ducenta clamat coccinatus Euclides ;
 Corinthioque plura de suburbano,
 Longumque pulchra stemma repetit à Leda,
 Et fuscitanti Lectio reluctatur ;
 Equiti superbo, nobili, locupleti,
 Cecidit repenti magna de sinu clavis.
 Nunquam, Fabulle, nequior fuit clavis.

Ad Faustinum. XXXVII.

Laudatus nostro quidam, Faustine, libello,
 Dissimulat, quasi nil debeat : imposuit.

De Erotio puella. XXXVIII.

Puella senibus dulcior mihi cyncis,
 Agna Galeffi mollior Phalantini,
 Concha Lucrini delicatior stagni ;
 Cui nec lapillos præferas Erythræos,
 Nec modo politum pecudis Indicæ dentem,
 Nivesque primas, liliumque non tactum :
 Quæ crine vincit Bæticæ gregis vellus,
 Rhenique nodos, aureamque nitellam :
 Fragravit ore, quod rosarium Pæsti ;
 Quod Atticarum prima mella cerarum ;
 Quod succinorum rapta de manu gleba :
 Cui comparatus indecens erat pavo,
 Inamabilis sciurus, & frequens Phoenix :
 Adhuc recenti tepet Erotion busto,
 Quam pessimorum lex avara fatorum
 Sexta peregit hieme, nec tamen tota,
 Nostros amores, gaudiumque, lususque.
 Et esse tristem me meus vetat Pætus :
 Pectusque pulsans, pariter & comam vellens,
 Deslere non te vernulæ pudet mortem ?

Ego.

Ego conjugem, inquit, extuli, & tamen vivo;
 Notam, superbam, nobilem, locupletem.
 Quid esse nostro fortius potest Pæto?
 Ducenties accepit, & tamen vivit.

Ad Sextum, in Calliodorum. XXXIX.

Calliodorus habet censum (quis nescit?) eque-
 strem,
 Sexte; sed & fratrem Calliodorus habet.
 Quadringenta secas, quid dicit *Cyda uicē*?
 Uno credis equo posse sedere duos?
 Quid cum fratre tibi? quid cum Polluce molesto?
 Non esset Pollux si tibi, Castor eras.
 Unus cum sitis; duo, Calliodore, sedetis.
 Surge: soloecismum, Calliodore, facis.
 Aut imitare genus Leda; aut cum fratre sedere
 Non potes; alternis, Calliodore, sede.

In Carinum. XL.

Supremas tibi tricies in anno
 Signanti tabulas, Carine, misi
 Hypocras madidas thymis placentas.
 Defeci: miserere jam, Carine.
 Signa rariùs, aut semel fac illud,
 Mentitur tua quod subinde tussis.
 Excussi loculosque sacculumque.
 Cræso divitior licet fuisset,
 Iro pauperior forem, Carine,
 Si conchen toties meam comesses.

Ad Artemidorem. XLI.

Pinxisti Venerem; colis, Artemidore, Minervam:
 Et miraris, opus displicuisse tuum?

In Didymum spadonem. XLII.

Theatra loqueris, & gradus, & edicta;
 Trabeasque, & Idus, fibulasque, censusque:
 Et pumicata pauperes manu monstras.
 Sedere in equitum liceat an tibi scamnis,
 Videbo, Didyme: non licet maritorum.

Amicis donandum. XLIII.

C Allidus effractâ nummos fur auferet arcâ :
 Profternet patrios impia flamma Lares :
 Debitor ufuram pariter, sortemque negabit :
 Non reddet sterilis semina jacta seges :
 Dispensatorem fallax spoliabit amica :
 Mercibus extructas obruet unda rates.
 Extrâ fortunam est, quicquid donatur amicis :
 Quas dederis, solas semper habebis opes.

De Thaide & Lecania. XLIV.

T Hais habet nigros, niveos Lecania dentes.
 Quæ ratio est? emptos hæc habet; illa suos.

In Dentonem. XLV.

Quid factum est, rogo, quid repentè factum,
 Ad coenam mihi, Dento, quòd vocanti
 (Quis credat?) quater ausus es negare?
 Sed nec respicis, & fugis sequentem,
 Quem thermis modò quærere, & theatris,
 Et conclavibus omnibus solebas.
 Sic eût: captus es unctiore coenâ,
 Et major rapuit canem culina
 Jam te: sed citò cognitum & relictum
 Cùm fastidierit popina dives,
 Antiquæ venies ad ossa coenæ.

In Bassam. XLVI.

D icis formosam, dicis te, Bassa, puellam.
 Istud quod non est, dicere Bassa solet.

De Philone. XLVII.

N unquam se coenâsse domi Philo jurat: & hoc est,
 Non coenat, quoties nemo vocavit eum.

Ad Labienum. XLVIII.

V idissem modò fortè cùm sedentem
 Solum te, Labiene: tres putavi.
 Calvæ me numerus tuæ fefellit.
 Sunt illinc tibi, sunt & hinc capilli,

Qua-

Quales nec puerum decere possint.
 Nudum est in medio caput, nec ullus
 In longa pilus area notatur.
 Hic error tibi profuit Decembri,
 Tunc cùm prandia misit Imperator,
 Cum panariolis tribus redisti;
 Talem Geryonem fuisse credo.
 Vites censeo porticum Philippi :
 Si te viderit Hercules, peristi :

In Charopinum. XLIX.

COeno domi quoties, nisi te, Charopine, vocavi,
 Protinus ingentes sunt inimicitiae :
 Meque petis stricto medium transfigere ferro,
 Si nostrum sine te scis caluisse focum.
 Nec semel ergo mihi furtum fecisse licebit ?
 Improbius nihil est hac, Charopine, gula.
 Desine jam nostram, precor, observare culinam ;
 Atque aliquando meus det tibi verba coquus.

Ad Rufum. L.

Hic qui libellis prægravem gerit lævam,
 Notariorum quem premit chorus lævis,
 Qui codicillis hinc & inde prolatis,
 Epistolisque commodat gravem vultum,
 Similis Catoni, Tullioque, Brutoque ;
 Exprimere, Rufe, fidiculæ licet cogant,
 Ave Latinum, ~~χάρη~~ non potest Græcum.
 Si fingere me istud putas, salutemus.

In Posthumum. LI.

Quæ mihi præstiteris memini, semperque tenebo :
 Cur igitur taceo, Posthume ? tu loqueris.
 Incipio quoties alicui tua dona referre,
 Protinus exclamat ; dixerat ipse mihi.
 Non bellè quædam faciunt duo : sufficit unus
 Huic operi : si vis ut loquar, ipse tace.
 Crede mihi, quamvis ingentia, Posthume, dones,
 Auctoris pereunt garrulitate sui.

Ad Bassum. LII.

Colchida quid scribis? quid scribis, amice,
Thyestem?

Quid tibi vel Niobe, Basse, vel Andromache?
Materia est, mihi crede, tuis aptissima chartis
Deucalion; vel, si non placet hic, Phaëthon.

De rhetore Apollonio. LIII.

Extemporalis factus est meus rhetor:
Calpurnium non scripsit, & salutavit.

Ad Lupum. LIV.

Cui tradas, Lupe, filium magistro,
Quæris sollicitus diu, rogasque.
Omnes grammaticosque, rhetorasque
Devites, moneo: nihil sit illi
Cum libris Ciceronis, aut Maronis.
Famæ Tutilium suæ relinquat.
Si versus facit, abdicet Poëtam.
Artes dicere vult pecuniosas?
Fac, discat citharoædus, aut choraules.
Si duri puer ingeni videtur,
Præconem facias, vel architectum.

Ad Cinnam. LV.

Cum voco te dominum, noli tibi, Cinna, placere:
Sæpe etiam servum sic resaluto meum.

Ad Posthumum. LVI.

Cras te victurum, cras dicis, Posthume, semper.
Dic mihi cras istud, Posthume, quando venit?
Quam longè est cras istud? ubi est? aut unde petendū?
Numquid apud Parthos, Armeniosque latet?
Jam cras istud habet Priami vel Nestoris annos.
Cras istud quanti, dic mihi, possit emi?
Cras vives: hodie jam vivere, Posthume, serum est.
Ille sapit, quisquis, Posthume, vixit heri.

Ad Stellam. LVII.

Quod non argentum, quod non tibi mittimus aurū,
Hoc facimus causa, Stella diserte, tua.

Quis-

Quisquis magna dedit, voluit sibi magna remitti :
Fictilibus nostris exoneratus eris.

Ad detractorem. LVIII.

A Dlatres licet usque nos & usque,
Et gannitibus improbis lacestas :
Certum est hanc tibi pernegare famam,
Olim quam petis in meis libellis,
Qualiscunque legaris ut per orbem.
Nam te cur aliquis sciat fuisse ?
Ignotus pereas, miser, necesse est.
Non deerunt tamen hac in urbe forsan
Unus, vel duo, tresve, quatuorve,
Pellem rodere qui velint caninam.
Nos hac à scabie tenemus unguis.

Ad hospites. LIX.

J Ure tuo nostris maneat licet, hospes, in hortis,
Si potes in nudo ponere membra solo :
Aut si portatur tecum tibi magna supellex ;
Nam mea jam digitum sustulit hospitibus.
Nulla tegit fractos nec inanis culcitra lectos :
Putris & abruptâ fascia recte jacet.
Sit tamen hospitium nobis commune duobus.
Emi hortos ; plus est ; instrue tu ; minus est.

Ad Ponticum. LX.

Q Uid sentis, inquis, de nostris, Marce, libellis ?
Sic me sollicitus, Pontice, sæpe rogas.
Admiror ; stupeo ; nihil est perfectius illis :
Ipse tuo cedit Regulus ingenio.
Hoc sentis ? inquis ; faciat tibi sic bene Cæsar,
Sic Capitolinus Jupiter, immò tibi.

*Ad Callistum & Alcimum, suos mi-
nistros. LXI.*

S Extantes, Calliste, duos infunde Falerni ;
Tu super æstivas, Alcime, funde nives.
Pinguescat nimio madidus mihi crinis amomo,
Lassenturque rosis tempora sutilibus.

Jam vicina jubent nos vivere Mausolea :

Cum doceant, ipsos posse perire deos.

Ad Cæsarem. LXII.

Astra polumq; dedit, quamvis obstante novercâ,
 Alcidx, Nemeæ terror, & Arcas aper ;
 Et castigatum Libycæ ceroma palæstræ ;
 Et gravis in Siculo pulvere fusus Eryx ;
 Salvarumque tremor, tacitâ qui fraude solebat
 Ducere nec rectas, Cacus, in antra boves.
 Ista tuæ, Cæsar, quota pars spectatur arenæ ?
 Dat majora novus proelia manè dies.
 Quot graviora cadunt Nemeæo pondera monstro ?
 Quot tua Mænalios collocat hasta sues ?
 Reddatur si pugna triplex pastoris Iberi ;
 Est tibi, qui possit vincere Geryonem.
 Sæpe licet Graiæ numeretur bellua Lernæ,
 Improbâ Niliacis quid facit Hydra feris ?
 Pro meritis coelum tantis, Auguste, dederunt
 Alcidx citò Dî; sed tibi serò dabunt.

In Pontilianum. LXIII.

Sæpe salutatus, nanquam prior ipse salutas :
 Sic erit æternum, Pontiliane, vale.

De hirundine. LXIV.

Hybernos peterent solito cùm more recessus
 Atthides, in nidis una remansit avis.
 Deprendere nefas ad tempora verna reversæ,
 Et profugam volucres diripueræ suæ.
 Serò dedit poenas, discerpi noxia mater
 Dbuerat : sed tunc, cùm laceravit Itym.

Ad Lesbiam. LXV.

Arectoa de gente comam tibi, Lesbia, misi ;
 Ut scires quantò sit tua flava magis.

In M. Antonium. LXV.

Antoni, Phario nil obiecture Pothino,
 Et levius tabulâ, quàm Cicerone nocens :
 Quid gladium demens Romana stringis in ora ?
 Hoc admisisset nec Catilina nefas.

Im-

Impius infando miles corrumpitur auro :
 Et tantis opibus vox tacet una tibi.
 Quid profunt sacræ pretiosa silentia linguæ ?
 Incipient omnes pro Cicerone loqui.

De Syrisco. LXVII.

INfusum sibi nuper à Patrono
 Plenum, Maxime, centies Syrisco
 In sellariolis vagus popinis
 Circa balnea quatuor peregit.
 O quanta est gula, centies comêsse !
 Quanto major adhuc, nec accubare !

Ad Faustinum. LXVIII.

Humida quâ gelidas summittit Trebula valles,
 Et viridis Cancris mensibus alget ager ;
 Rura Cleonæo nunquam temerata leone,
 Et domus Æolio semper amica Noto,
 Te, Faustine, vocant : longas his exige messes
 Collibus ; hibernum jam tibi Tibur erit.

De origine Bacchi. LXIX.

Qui potuit Bacchi matrem dixisse Tonantem,
 Ille potest Semelem dicere, Rufe, patrem.

Ad Theodorum. LXX.

Non donem tibi cur meos libellos
 Oranti toties, & exigenti,
 Miraris, Theodore ? magna causa est ;
 Dones tu mihi ne tuos libellos.

De Pompeio & filiis. LXXI.

Pompeios juvenes Asia, atque Europa : sed ipsum
 Terra tegit Libyes ; si tamen ulla tegit.
 Quid mirum, toto si spargitur orbe ? jacere
 Uno non poterat tanta ruina loco.

Ad Quintum. LXXII.

Quæ legis causâ nupsit tibi Lælia, Quinte,
 Uxorem potes hanc dicere legitimam.

Ad Cinnam. LXXIII.

Profecit potō Mithridates sæpe veneno,
Toxica ne possent sæva nocere sibi.
Tu quoque cavisti coenando tam malè semper,
Ne posses unquam, Cinna, perire fame.

Ad Marullum. LXXIV.

Narratur bellè quidam dixisse, Marulle,
Qui te ferre oleum dixit in auricula.

Ad Turanium. LXXV.

Si tristi domicoenio laboras,
Turani; potes esurire mecum.
Non deerunt tibi, si soles ~~de niveam~~,
Viles Cappadocæ, gravesque porri.
Divisis cybium latebit ovis.
Ponetur digitis tenendus unctis
Nigra coliculus virens patella,
Argentem modò qui reliquit hortum:
Et pulstem niveam premens botellus,
Et pallens faba cum rubente lardo.
Mensæ munera si voles secundæ,
Marcentes tibi porrigentur uvæ,
Et nomen pyra quæ ferunt Syrorum:
Et, quas docta Neapolis creavit,
Lento castaneæ vapore tostæ.
Vinum tu facies bonum bibendo.
Post hæc omnia fortè si movebit
Bacchus, quam solet, esuritionem,
Succurrent tibi nobiles olivæ,
Piceni modò quas tulere rami;
Et fervens cicer, & tepens lupinus.
Parva est coenula, (quis potest negare?)
Sed finges nihil, audiesve fictum,
Et vultu placidus tuo recumbes;
Nec crassum dominus leget volumen.
Sed, quod non grave sit, nec infacetum,
Parvi tibia condyli sonabit.

In Zoilum. LXXVI.

UNdecies unâ surrexti, Zoile, coenâ ;
 Et mutata tibi est synthesis undecies :
 Sudor inhæreret madidâ ne veste retentus,
 Et laxam tenuis læderet aura cutem.
 Quare ego non sudo, qui tecum, Zoile, cano?
 Frigus enim magnum synthesis una facit.

Ad Severum. LXXVII.

Non totam mihi, si vacabis, horam,
 Dones, & licet imputes, Severe,
 Dum nostras legis exigisque nugas.
 Durum est perdere ferias; rogamus,
 Jacturam patiaris hanc, ferasque.
 Quod si legeris ipse cum deserto
 (Sed numquid fumus improbi ?) Secundo ;
 Plus multò tibi debiturus hic est,
 Quàm debet domino suo, libellus.
 Nam securus erit, nec inquieta
 Lassi marmora Sisyphi videbit,
 Quem censoria cum meo Severo
 Docti lima momorderit Secundi.

Ad Æmilianum. LXXVIII.

Semper eris pauper, si pauper es, Æmiliane :
 Dantur opes nulli nunc, nisi divitibus.

In Gaurum. LXXIX.

Quid promittebas mihi millia, Gaure, ducenta,
 Si dare non poteras millia, Gaure, decem ?
 An potes, & non vis ? rogo, non est turpius istud ?
 I, tibi disperdas, Gaure : pusillus homo es.

Ad Dyndimum. LXXX.

Insequeris, fugio ; fugis, insequor : hæc mihi mens
 est :
 Velle tuum nolo, Dindymæ, nolle volo.

Ad Gallam. LXXXI.

JAm tristis nucibus puer relictis
Clamose revocatur à Magistro:
Et blando malè proditus fritillo,
Arcana modò raptus è popina,
Ædilem rogat udus aleator.
Saturnalia transiere tota:
Nec munuscula parva, nec minora
Misti mihi, Galla, quæ solebas.
Sanè sic abeat meus December.
Scis certè, puto, vestra jam venire
Saturnalia, Martias Kalendas.
Tunc reddam tibi, Galla, quod dedisti.

M. VAL. MARTIALIS EPIGRAMMATUM

LIBER VI.

Ad Julium Martialem. I.

Sextus mittitur hic tibi libellus,
Imprimis mihi care Martialis:
Quem si terferis aure diligenti,
Audebit, minùs anxius trementisque,
Magnas Cæsaris in manus venire.

De filio Domitiani. II.

Nascere, Dardanio promissum nomen Iulo,
Vera deùm soboles: nascere, magne puer,
Cui pater æternas post secula tradat habenas,
Quique regas orbem cum seniore senex.
Ipsa tibi niveo trahet aurea pollice fila,
Et totam Phryxi Julia nebit ovem.

Ad Domitianum. III.

Censor maxime, principumque princeps,
Cum tot jam tibi debeat triumphos,
Tot nascentia templa, tot renata,
Tot spectacula, tot deos, tot urbes;
Plus debet tibi Roma, quòd pudica est.

Ad Cæcilianum. IV.

Rustica mercatus multis sum prædia nummis:
Mutua des centum, Cæciliane, rogo.
Nil mihi respondes? tacitum te dicere credo,
Non reddes: ideò, Cæciliane, rogo.

De Thelesina. V.

Julia lex populis ex quo, Faustine, renata est
Atque intrare domos iussa Pudicitia est;
Aut minùs, aut certè non plus, tricesima lux est,
Et nubit decimo jam Thelesina viro.
Quæ nubit toties, non nubit: adultera lege est.
Offendor mœchâ simpliciore minùs.

Ad Severum. VII.

Praetores duo, quatuor tribuni,
 Septem caufidici, decem Poetae,
 Cujusdam modò nuptias petebant
 A quodam sene; non moratus ille
 Praconi dedit Eulogo puellam.
 Dignum quid fatuo, Severe, fecit?

Ad Lavinum. VIII.

IN Pompeiano dormis, Lævine, theatro?
 Et quereris, si te suscitât Oceanus?

Petitorium. IX.

PAUCA Jovem nuper cùm millia fortè rogarem:
 Ille dabit, dixit, qui mihi templa dedit.
 Templa quidem dedit ille Jovi; sed millia nobis
 Nulla dedit: pudeat pauca rogasse Jovem.
 At quàm non tetricus, quàm nullâ nubilus irâ,
 Quàm placido nostras legerat ore preces!
 Talis supplicibus tribuit diademata Dacis:
 Et Capitolas itque reditque vias.
 Dic, precor, ô nostri dic conscia virgo Tonantis;
 Si negat hoc vultu, quo solet ergo dare?
 Sic ego: sic breviter, posita mihi Gorgone Pallas;
 Quæ nondum data sunt, stulte, negata putas?

In Marcum. X.

QUOD non sit Pylades hoc tempore, non sit Orestes,
 Miraris? Pylades, Marce, bibebat idem.
 Nec melior panis, turdusve dabatur Oresti:
 Sed par, atque eadem coena duobus erat.
 Tu Lucrina voras; me pascit aquosa Peloris:
 Non minùs ingenua est & mihi, Marce, gula.
 Te Cadmea Tyros, me pinguis Gallia vestit:
 Viste purpureum, Marce, sagatus amem?
 Ut præstem Pyladen, aliquis mihi præstet Oresten.
 Hoc non fit verbis, Marce: ut ameris, ama.

De Fabulla. XI.

JURAT capillos esse, quos emit, suos
 Fabulla; numquid, Paulle, pejora? nego.

De statua Juliae. XII.

Quis te Phidiaco formatum, Julia, coelo,
 Vel quis Palladiæ non putet artis opus?
 Candida non tacitâ respondet imagine Lygdes,
 Et placido fulget vivus in ore decor.
 Ludit Acidalio, sed non manus aspera, nodo,
 Quem rapuit collo, parve Cupido, tuo.
 Ut Martis revocetur amor, summique Tonantis;
 A te Juno petat ceston, & ipsa Venus.

In Laberium. XIII.

Versus scribere posse te disertos
 Affirmas, Laberi; quid ergo non vis?
 Versus scribere qui potest disertos,
 Non scribat, Laberi; virum putabo.

De formica succino inclusa. XIV.

Dum Phaëthontea formica vagatur in umbra,
 Implicuit tenuem succina gutta feram.
 Sic modò quæ fuerat vitâ contempta manente,
 Funeribus facta est nunc pretiosa suis.

In Cinnamum. XV.

Cinnam, Cinname, te jubes vocari.
 Non est hic, rogo, Cinna barbarissimus?
 Tu si Furius antè dictus esses,
 Fur istâ ratione dicereris.

Ad Priscum, de Salonino. XVI.

Sancta Salonini terris requiescit Iberis,
 Quâ melior Stygias non videt umbra domos.
 Sed lugere nefas: nam qui te, Prisce, reliquit,
 Vivit, quâ voluit vivere parte magis.

In Posthumum causfididum. XVII.

Non de vi, neque cæde, nec veneno,
 Sed lis est mihi de tribus capellis:
 Vicini queror has abesse furto.
 Hoc judex sibi postulat probari.
 Tu Cannas, Mithridaticumque bellum,
 Et perjuria Punici furoris,

Et Syllas, Mariosque, Mutiosque
 Magnâ voce sonas, manuque totâ.
 Jam dic, Posthume, de tribus capellis.

In Phœbum. XVIII.

Mutua te centum sestertia, Phœbe, rogavi :
 Cùm mihi dixisses, exigis ergo nihil ?
 Inquiris, dubitas, cunctaris, meque diebus
 Teque decem crucias : jam rogo, Phœbe, nega.

De Stella & Janthide. XIX.

Perpetuam Stellæ dum jungit Janthida vati
 Læta Venus, dixit : plus dare non potui.
 Hæc coram domina : sed nequius illud in aurem :
 Tu ne quid pecces, extiose, vide.
 Sæpe ego lascivum Martem furibunda cecidi,
 Legitimos îffet cùm vagus ante toros.
 Sed postquam meus est, nullâ me pellice læsit :
 Tam frugi Juno vellet habere Jovem.
 Dixit, & arcano percussit pectora loro,
 Plaga juvat : sed tu jam dea cæde duos.

In Proculinam. XX.

Quod nubis, Proculina, concubino,
 Et moechum modò, nunc facis maritum,
 Ne lex Julia te notare possit :
 Non nubis, Proculina; sed fateris.

In deformem Candidatum. XXI.

Tu licet & manibus blandis, & vocibus îstes :
 Contra te facies imperiosa tua est.

De Carisiano. XXII.

Nil lascivius est Carisiano ;
 Saturnalibus ambulat togatus.

Ad Marcellinum. XXIII.

Marcelline, boni soboles sincera parentis,
 Horrida Parrhasio quem tegit ursa iugo ;
 Ille vetus pro te patriusque quod optet amicus,
 Accipe, & hæc memori pectore vota tene :
 Cauta sit ut virtus, nec te temerarius ardor
 In medios enses, sævaque tela ferat.

Bella velint, Martemque ferum, rationis egentes :
 Tu potes & patriæ miles, & esse decus.

Ad Nepotem. XXIV.

BIs vicine Nepos (nam tu quoque proxima Floræ
 Incolis, & veteres tu quoque Ficelias)
 Est tibi, quæ patrii signatur imagine vultus,
 Testis maternæ nata pudicitiae.
 Tu tamen annoso nimium ne parce Falerno :
 Et potiùs plenos ære relinque cados.
 Sit pia, sit locuples, sed potet filia mustum ;
 Amphora cum domina nunc nova fiat anus.
 Cæcuba non solos vindemia nutriet orbos :
 Possunt & patres vivere, crede mihi.

Epitaphium Glaucia. XXV.

Libertus Melioris ille notus,
 Tota qui cecidit dolente Româ,
 Chari deliciae breves patroni,
 Hoc sub marmore Glaucias humatus
 Juncto Flaminiae jacet sepulchro :
 Castus moribus, integer pudore,
 Velox ingenio, decore felix.
 Bis senis modo messibus peractis
 Vix unum puer applicabat annum.
 Qui fles talia, nil fleas viator.

De eodem. XXVI.

Non de plebe domus, nec avaræ verna catastæ,
 Sed domini sancto dignus amore puer ;
 Munera cum posset nondum sentire patroni,
 Glaucia libertus jam Melioris erat.
 Moribus hoc formæque datum : quis blandior illo ?
 Aut quis Apollineo pulchrior ore fuit ?
 Immodicis brevis est ætas, & rara senectus.
 Quicquid amas, cupias non placuisse nimis.

In Patrum. XXVII.

Sex sestertia si statim dedisses,
 Cum dixi mihi ; fume, tolle, dono :

Deberem tibi, Pæte, pro ducentis.
 At nunc cum dederis diu moratus,
 Post septem, puto, vel novem Kalendas,
 Vis dicam tibi veriora veris ?
 Sex sestertia, Pæte, perdidisti.

De morte Othonis. XXVIII.

CUm dubitaret adhuc belli civilis Enyo,
 Forsitan & posset vincere mollis Otho :
 Damnavit multo staturum sanguine Martem,
 Et fodit certâ pectora nuda manu.
 Sit Cato, dum vivit, sane vel Cæsare major :
 Dum moritur, numquid major Othone fuit ?

Ad Diadumenum. XXIX.

MUnera da nobis, Diadumene, larga: quot, inquis?
 Oceani fluctus me numerare jubes :
 Et maris Ægæi sparsas per littora conchas;
 Et quæ Cecropio monte vagantur apes :
 Quæque sonant pleno vocesque, manusque theatro,
 Cum populus subiti Cæsaris ora videt.
 Nolo quot gemmas dedit exorata Catullo
 Lesbia : pauca cupit, qui numerare potest.

Ad Cæcilianum. XXX.

Septem clepsydras magnâ tibi voce petenti
 Arbiter invitus, Cæciliane, dedit.
 At tu muka diu dicis : vitreisque tepentem
 Ampullis potas semisupinus aquam.
 Ut tandem saties vocemque sitimque, rogamus
 Jam de clepsydra, Cæciliane, bibas.

De filio Reguli. XXXI.

Aspicis ut parvus, nec adhuc trieteride plena
 Regulus auditum laudat & ipse patrem ?
 Maternosque sinus viso genitore relinquat,
 Et patrias laudes sentiat esse suas ?
 Jam clamor, centumque viri, densumque coronâ
 Vulgus, & infanti Julia tecta placent.
 Aeris equi soboles magno sic pulvere gaudet ;
 Sic vitulus molli proelia fronte cupit.

Dî servate, precor, matri sua vota, patrique :
Audiat ut natum Regulus; illa duos.

In Cinnam. XXXII.

Pater ex Marulla, Cinna, factus es septem,
Non liberorum : namque nec tuus quisquam,
Nec est amici, filiusve vicini :

Sed in grabatis tegetibusque concepti
Materna produnt capitibus suis furta.
Hic qui retorto crine Maurus incedit,
Sobolem fatetur esse se coci Santræ.
At ille simâ nare, turgidis labris,
Ipsa est imago Pannici palæstritæ.
Pistoris esse tertium quis ignorat,
Quicumque lippum novit & videt Damam ?
Hunc vero acuto capite, & auribus longis,
Quæ sic moventur ut solent asellorum,
Quis morionis filium neget Cyrrhæ ?
Duæ sorores, illa nigra, & hæc rufa,
Croti choraulæ, villicique sunt Carpi.
Jamque hybridarum grex tibi foret plenus,
Si spado Corefus, Dindymusque non esset.

In raucum Poetam. XXXIII.

Qui recitat lanâ fauces & colla revinctus,
Hic se posse loqui, posse tacere negat.

De Etrusci thermis. XXXIV.

Etrusci nisi thermulis lavis,
Illotus morieris, Oppiane.
Nullæ sic tibi blandientur undæ :
Nec fontes Aponi rudes puellis,
Non mollis Sinuessæ, fervidique
Fluctus Passeris, aut superbus Anxur,
Non Phœbi vada, principesque Baïæ.
Nusquam tam nitidum micat serenum :
Lux ipsa est tibi longior, diesque
Nullo tardius à loco recedit.
Illic Taygeti virent metalla,
Et certant vario decore saxa,
Quæ Phryx & Libys altius cecidit.

Siccos

Siccos pinguis ohyx anhelat æstus,
 Et flammâ tenui calent ophitæ.
 Ritus si placeant tibi Laconum,
 Contentus potes arido vapore,
 Crudâ Virgine, Martiâve mergi;
 Quæ tam candida, tam serena lucet,
 Ut nullas ibi suspiceris undas,
 Et credas vacuam nitere Lygdon.
 Non attendis, & aure me supinâ
 Jamdudum quasi negligenter audis.
 Illotus morieris, Oppiane.

Ad Castricum. XXXV.

Dum tibi felices indulgent, Castrice, Baia,
 Canaque sulphureis nympha natatur aquis;
 Me Nomentani confirmant otia ruris,
 Et casa jugeribus non onerosa suis.
 Hic mihi Baiani soles, mollisque Lucrinus;
 Hic vestra mihi sunt, Castrice, divitiæ.
 Quondam laudatas quocunque libebat ad undas
 Currere, nec longas pertinuisse vias;
 Nunc urbi vicina juvant, facilesque recessus:
 Et satis est, pigro si licet esse mihi.

In Calliodorum. XXXVI.

Festivè credis te, Calliodore, jocari;
 Et solum multo permaduiffe sale.
 Omnibus arrides, dicteria dicis in omnes:
 Sic te convivam posse placere putas.
 At si ego non bellè, sed verè dixero quiddam;
 Nemo propinabit, Calliodore, tibi.

Ad Catianum. XXXVII.

Vapulat assiduo Veneti quadriga flagello,
 Nec currit: magnam rem, Catiane, facit.

Ad Ianthida nympham. XXXVIII.

Nympha, mei Stellæ quæ fonte domestica puro
 Laberis, & domini gemmea tecta subis;
 Sive Numæ conjux Triviæ te misit ab antro;
 Sive Camœnarum de grege nona venis:

Exfol-

Exolvit votis hâc se tibi virgine potca
 Marcus, furtivam quòd bibit æger aquam :
 Tu contenta meo jam crimine, gaudia fontis
 Da secura tui : sit mihi sana sitis.

In Pomponium. XXXIX.

QUòd tam grande sophos clamat tibi turba togata :
 Non tu, Pomponi ; coena diserta tua est.

Ad Luperum. XL.

QUòd convivaris sine me tam sæpe, Luperce,
 Inveni, noceam quâ ratione tibi.
 Iraſcar licet usque voces, mittasque, rogesque.
 Quid facies ? inquit, quid faciam ? veniam.

Epitaphium Pantagathi. XLI.

HOC jacet in tumulo raptus puerilibus annis
 Pantagathus, domini cura, dolorque sui ;
 Vix tangente vagos ferro refecare capillos
 Doctus, & hirsutas excoluisse genas.
 Sis illi quamvis, Tellus, placata levisque ;
 Artificis levior non potes esse manu.

De Andragora. XLII.

LOTUS nobiscum est, hilaris cœnavit ; & idem
 Inventus manè est mortuus Andragoras.
 Tam subitæ mortis causam, Faustine, requiris ?
 In somnis medicum viderat Hermocratem.

In Coracinum. XLIII.

QUòd semper casiaque, cinnamoque,
 Et nido niger alitis superbæ
 Fragras plumbeâ Nicerotianâ ;
 Rides nos, Coracine, nil olentes.
 Malo, quàm bene olere, nil olere.

In Phœbum. XLIV.

MENTIRIS fictos unguento, Phœbe, capillos,
 Et tegitur pictis fordida calva comis.
 Tonforem capiti non est adhibere necessum :
 Radere te meliùs spongia, Phœbe, potest.

Ad Aulum Pudentem. XLV.

Cernere Parrhasios dum te juvat, Aule, Triones
Comminus, & Scythici sidera ferre poli;
O quàm penè tibi Stygias ego raptus ad undas
Elysiæ vidi nubila fusca plagæ!
Quamvis lassæ tuos quærebant lumina vultus,
Atque erat in gelido plurimus ore Pudens.
Si mihi lanificæ ducunt non pulla sorores
Stamina, nec surdos vox habet ista deos:
Sospite me sospes Latias revehèris ad urbes,
Et referes pili præmia clarus eques.

In Baccaram. XLVI.

ET dolet, & queritur sibi non contingere frigus.
Propter sexcentas Baccara gausapinas;
Optat & obscuras luces, ventosque, nivesque:
Odit & hybernos, si tepuere, dies.
Quid fecere mali nostræ tibi, sæva, lacernæ,
Tollere de scapulis quas levis astra potest?
Quantò simplicius, quantò est humanius istud;
Mense vel Augusto sumere gausapinas?

De Pompilio. XLVII.

Rem factam Pompillus habet, Faustine: legetur,
Et nomen toto sparget in orbe suum.
Sic leve flavorum valeat genus Uspiorum,
Quisquis & Ausonium non amat imperium.
Ingeniosa tamen Pompilli scripta feruntur:
Sed famæ non est hoc, mihi crede, satis.
Quam multi tineas pascunt blattasque disertæ!
Et redimunt soli carmina docta coqui?
Nescio quid plus est, quod donat secula chartis:
Victurus genium debet habere liber.

In Invidum. XLVIII.

Laudat, amat, cantat nostros mea Roma libellos:
Meque sinus omnes, me manus omnis habet.
Ecce! rubet quidam, pallet, stupet, oscitat, odit:
Hoc volo, nunc nobis carmina nostra placent.

Ad Oppianum heridipetam. XLIX.

A Misit pater unicum Silanus :
 Cessas mittere munera, Oppiane ?
 Heu crudele nefas, malæque Parcæ !
 Cujus vulturis hoc erit cadaver ?

Ad Marianum. L

S Cis te captari : scis hunc, qui captat, avarum :
 Et scis, qui captat, quid, Mariane, velit :
 Tu tamen hunc tabulis hæredem, stulte, supremis
 Scribis, & esse tuo vis, furiose, loco.
 Munera magna quidem misit, sed misit in hamo :
 Et piscatorem piscis amare porest ?
 Hiccinne deslebit vero tua fata dolore ?
 Si cupis, ut ploret ; des, Mariane, nihil.

In detractorem. LI.

C Um sis nec rigidâ Fabiorum gente creatus,
 Nec qualem Curio, dum prandia portat aranti,
 Hirsutâ peperit rubicunda sub ilice conjux ;
 Sed patris ad speculum tonsi, matrisque togatæ
 Filius, & sponsam possit te sponsa vocare :
 Emendare meos, quos novit fama, libellos,
 Et tibi permittis felices carpere nugas :
 Has, inquam, nugas, quibus aurem advertere totam
 Non adspernantur procures urbisque, forique ;
 Quas & perpetui dignantur scrinia Silî,
 Et repetit toties facundo Regulus ore ;
 Quique videt propius magni certamina Circi,
 Laudat Aventinæ vicinus Sura Dianæ :
 Ipse etiam tanto dominus sub pondere rerum
 Non dedignatur bis terque revolvere Cæsar.
 Sed tibi plus mentis, tibi cor limante Minervâ
 Acrius & tenues finxerunt pectus Athenæ.
 Ne valeam, si non multo sapit altius istud,
 Quod cum panticibus laxis, & cum pede grandi,
 Et rubro pulmone vetus, nasisque timendum,
 Omnia crudelis lanius per compita portat.
 Audes præterea, quos nullus noverit, in me
 Scribere versiculos, miseras & perdere chartas. At

At si quid nostræ tibi bilis inusserit ardor,
 Vivet, & hærebit, totoque legetur in orbe :
 Stigmata nec vafra delebit Cinnamus arte.
 Sed miserere tui, rabido nec perditus ore
 Fumantem nasum vivi tentaveris urfi,
 Sit placidus licet, & lambat digitosque, manusque :
 Si dolor & bilis, si iusta coëgerit ira,
 Ursus erit; vacua dentes in pelle fatiges,
 Et tacitus quæras, quam possis rodere carnem.

Ad Tuccam. LII.

Hexametris epigramma facis, scio dicere Tuccam:
 Tucca, solet fieri; denique, Tucca, licet.
 Sed tamen hoc longum est, solet hoc quoque, Tucca,
 Si breviora probas, disticha sola legas. (licetque;
 Conveniat nobis: ut fas, epigrammata longa
 Sit transire tibi: scribere, Tucca, mihi.

De morte Eutychi Pueri. LIII.

Flete nefas vestrum, sed toto flete Lucrino
 Naiades, & luctus sentiat ipsa Thetis.
 Inter Baianas raptus puer occidit undas
 Eutyclus, ille tuum, Castrice, dulce decus.
 Quicquid id est, subitæ quæcunque est causa rapinæ;
 Sit, precor, & tellus mitis, & unda tibi.

Ad Martianum. LIV.

Sexagesima, Martiane, messis
 Acta est, &, puto, jam secunda Cottæ;
 Nec se tædia lectuli calentis
 Expertum meminit die vel uno.
 Ostendit digitum, sed impudicum,
 Alconti, Dasioque, Symmachoque.
 At nostri bene computentur anni,
 Et, quantum tetricæ tulere febres,
 Aut languor gravis, aut mali dolores
 A vita meliore separentur;
 Infantes sumus, & senes videmur.
 Ætatem Priamique, Nestorisque
 Longam qui putat esse, Martiane,

Multùm decipiturque falliturque :
Non est vivere, sed valere, vita.

De Cilice fure. LV.

Fur notæ nimium rapacitatis
Compilare Cilix volebat hortum :
Ingenti sed erat, Fabulle, in horto
Præter marmoreum nihil Priapum.
Dum non vult vacua manu redire ;
Ipsum surripuit Cilix Priapum.

Ad Esculanum. LVI.

Medio recumbit imus ille qui lecto,
Calvam trifilem semitactus unguento,
Foditque tonsis ora laxa lentiscis ;
Mentitur, Esculane : non habet dentes.

In Pontiam. LVII.

Cum mittis turdumve mihi, quadramve placentæ,
Sive femur leporis, sive quid his simile ;
Buccellas misisse tuas te, Pontia, dicis.
Has ego nec mittam, Pontia ; sed nec edam.

Epitaphium Fusci. LVIII.

Ille sacri lateris custos, Martisque togati,
Credita cui summi castra fuere ducis,
Hic situs est Fuscus ; licet hoc, fortuna, fateri :
Non timet hostiles jam lapis iste minas.
Grande jugum domita Dacus cervice recepit,
Et famulum victrix possidet umbra nemus.

In Afrum. LIX.

Cum sis tam pauper, quàm nec miserabilis Irus ;
Tam juvenis, quàm nec Parthenopæus erat ;
Tam fortis, quàm nec, cùm vinceret, Artemidorus ;
Quid te Cappadocum fex onus esse juvat ?
Rideris, multoque magis traduceris, Afer,
Quàm nudus medio si spatiere foro.
Non aliter monstratur Atlas cum compare ginno,
Quæque vehit similem bellua nigra Libyn.
Invidiosa tibi quàm sit lectica, requiris ?
Non debes ferri mortuus hexaphoro.

Ad Aulum, de Phryge lusco. LX.

POtor nobilis, Aule, lumine uno
 Luscus Phryx erat, alteroque lippus :
 Huic Heras medicus ; bibas caveto
 Vinum : si biberis, nihil videbis.
 Ridens Phryx, oculo, valebis, inquit.
 Misceri sibi protinus deunces,
 Sed crebos jubet : exitum requiris ?
 Vinum Phryx, oculus bibit venenum.

Ad Lupum. LXI.

TRistis es, & felix : sciat hoc fortuna caveto :
 Ingratum dicet te, Lupe, si scierit.

Ad Cæsarem, de rosis hybernæ. LXII.

UT nova dona tibi, Cæsar, Nilotica tellus
 Miserat hybernas ambitiosa rosas :
 Navita derisit Pharios Memphiticus hortos,
 Urbis ut intravit limina prima tuæ.
 Tantus veris honos, & odoræ gratia Floræ,
 Tantaque Pestani gloria ruris erat.
 Sic quacunque vagus, gressumque oculosque ferebas,
 Textilibus fertis omne rubebat iter.
 At tu Romanæ jussus jam cedere brumæ,
 Mitte tuas messes ; accipe, Nile, rosas.

Ad Rufum. LXIII.

Quidam me modò, Rufe, diligenter
 Inspectum, velut emptor, aut lanista,
 Cùm vultu digitoque subnotasset,
 Tune es, tune, ait, ille Martialis,
 Cujus nequitiæ jocosque novit
 Aurem qui modò non habet Batavam ?
 Subrissi modicè ; levique nutu
 Me, quem dixerat esse, non negavi.
 Cur ergo, inquit, habes malas lacernas ?
 Respondi : quia sum malus Poëta.
 Hoc ne sæpius accidat Poëtæ,
 Mittas, Rufe, mihi bonas lacernas.

Ad Domitianum. LXIV.

Quam sollicito fortuna parentis Etrusco,
 Tantum, summe ducum, debet uterque tibi.
 Nam tu missa tuâ revocâsti fulmina dextrâ :
 Hos cuperem mores ignibus esse Jovis.
 Si tua sit summo, Cæsar, natura Tonanti,
 Utetur toto fulmine rara manus.
 Muneris hoc utrumque tui testatur Etruscus,
 Esse quod & comiti contigit, & reduci.

De Philippo. LXV.

O Ctaphoro sanus portatur, Avite, Philippus :
 Hunc tu si sanum credis, Avite; furis.

In mortuum Rufum Camonium. LXVI.

Editus est sextus sine te mihi, Rufe Camoni,
 Nec te lectorem sperat, amice, liber.
 Impia Cappadocum tellus, & numine lævo
 Visa tibi, cineres reddit, & ossa patri.
 Funde tuo lacrymas, orbata Bononia, Ruse :
 Et resonet tota planctus in Æmilia.
 Heu qualis pietas ! heu quàm brevis occidit &
 Viderat Alphei præmia quinque modò.
 Pectore tu memori nostros evolvere lusus,
 Tu solitus nostros, Rufe, tenere jocos ;
 Accipe cum fletu mœsti breve carmen amici :
 Atque hæc absentis thura fuisse puta.

Pro vino gelide temperato. LXVII.

Serium, dominæque nives, densique trientes,
 Quando ego vos, medico non prohibente, bibam ?
 Stultus, & ingratus, nec tanto munere dignus,
 Qui mavult hæres divitis esse Midæ.
 Possideat Libycas messes, Hermumque, Tagumque,
 Et potet calidam, qui mihi laudat, aquam.

Ad Cæsarem. LXVIII.

Di tibi dent, & tu, Cæsar, quæcunque mereris :
 Di mihi dent, & tu, quæ volo, si merui.

Ad Cacilianum. LXIX.

MAne salutavi vero te nomine casu :
 Nec dixi dominum, Cæcilliane, meum.
 Quanti libertas constet mihi tanta, requiris ?
 Centum quadrantes abstulit illa mihi.

Ad Rufum de Panareto potore. LXX.

CUm peteret seram mediâ jam nocte matellam
 Arguto madidus pollice Panaretus ;
 Spoletina data est, sed quam siccaverat ipse :
 (Nec fuerat soli tanta lagena satis.)
 Ille fide summâ testæ sua vina remensus,
 Reddidit cœnophori pondera plena sui.
 Miraris, quantum biberat, cepisse lagenam ?
 Desine mirari, Rufe, merum biberat.

In Ammianum. LXXI.

COelatus tibi cùm sit, Ammiane,
 Serpens in patera Myronis arte,
 Vaticana bibis; bibis venenum.

De Thaide. LXXII.

TAm malè Thais olet, quàm non fullonis avari.
 Testa vetus, mediâ sed modò fracta via :
 Non ab amore recens hircus, non ora leonis ;
 Non detracta cani Transiberina cutis :
 Pullus abortivo nec cùm putrescit in ovo ;
 Amphora corrupto nec vitata garo.
 Virus ut hoc alio fallax permutet odore,
 Depositâ quoties balnea veste petit :
 Pfilotro nitet, aut acidâ latet oblita cretâ ;
 Aut tegitur pingui terque quaterque sabâ.
 Cùm bene se tutam per fraudes mille putavit,
 Omnia cùm fecit, Thaida Thais olet.

De Calpetiano. LXXIII.

POnuntur semper chrysendeta Calpetiano,
 Sive foris, seu cùm cœnat in urbe domi.
 Sic etiam in stabulo semper, sic cœnat in agro.
 Non habet ergo allud ? non habet immò suum.

M. VAL. MARTIALIS
EPIGRAMMATUM
LIBER VII.

Ad Domitianum de lorica. I.

Accipe belligeræ crudum thoraca Minervæ,
Ipsa Medusæ quem timet ira comæ.
Dum vacat hæc, Cæsar, poterat lorica vocari :
Pectore cum sacro federit, ægis erit.

De eadem.

INvia Sarmaticis domini lorica sagittis,
Et Martis Getico tergo fida magis :
Quam vel ad Ætolæ securam cuspidis ictus
Texuit innumeri lubricus unguis apri :
Felix sorte tuâ ! sacrum cui tangere pectus
Fas erit, & nostri mente calere Dei.
Icomes, & magnos illæsa merere triumphos,
Palmatæque ducem, sed citò, redde togæ.

Ad Pontilianum. II.

Cur non mitto meos tibi, Pontiliane, libellos ?
Ne mihi tu mittas, Pontiliane, tuos.

De Oppiano. III.

Esset, Castrice, cum mali coloris,
Versus scribere coepit Oppianus.

Ad Cæsarem, de reditu. IV.

Si desiderium, Cæsar, populique, Patrumque
Respicias, & Latæ gaudia vera togæ ;
Redde deum votis poscentibus : invidet hosti
Roma suo, veniat laurea multa licet.
Terrarum dominum propius videt ille, tuoque
Terretur vultu barbarus, & fruitur.

De eodem. V.

Ecquid hyperboreis ad nos conversus ab oris
Aufonias Cæsar jam parat ire vias ?

Certus.

Certus abest auctor, sed vox hunc nunciat omnis:

Credo tibi; verum dicere, Fama, soles.

Publica victrices testantur gaudia chartæ:

Martis laurigerâ cuspide pila virent.

Rursus, id, magnos clamat tibi Roma triumphos,

Inviâctusque tuâ, Cæsar, in urbe sonas.

Sed jam lætitiæ quo sit fiducia major,

Sarmaticæ laurus nuncius ipse veni.

De eodem. VI.

HYberna quamvis Arctos, & rudis Peuce,

Et ungularum pulvis calens Ister,

Fractusque cornu jam ter improbo Rhenus,

Teneat domantem regna perfidæ gentis,

Te, summe mundi rector, & parens orbis,

Absesse nostris non tamen potes votis.

Illic & oculis & animis sumus, Cæsar;

Adeoque mentes omnium tenes unus;

Ut ipsa magni turba nesciat Cirti

Utrumne currat Passerinus, an Tigris.

De eodem. VII.

Nunc hilares, si quando mihi, nunc ludite, Musæ:

Victor ab Othrysiō redditur orbe Deus.

Certa facis populi tu primus vota, December;

Jam licet ingenti dicere voce; Venit.

Felix forte tuâ! poteras non cedere Jano,

Gaudia si nobis, quæ dabit ille, dares.

Festa coronatus ludet convicia miles,

Inter laurigeros cûm comes ibit equos.

Fas audire jocos, levioraque carmina, Cæsar,

Sit tibi: si lusus ipse triumphus amat.

De Casselio. VIII.

Cum sexaginta numeret Casselius annos,

Ingeniosus homo est: quando disertus erit?

In Olum. IX.

In lucem coenat Sertorius: Ole, quid ad te,

Cûm liceat totâ stertere nocte tibi?

Septin-

Septingenta Tito debet Lupus : Ole, quid ad te ?
 Assen ne dederis, crediderisve Lupo.
 Illud dissimulas, ad te quod pertinet, Ole,
 Quodque magis curæ convenit esse tuæ.
 Pro togula debes : hoc ad te pertinet, Ole.
 Quadrantem nemo jam tibi credet : & hoc.
 Uxor moecha tibi est : hoc ad te pertinet, Ole.
 Poscit jam dotem filia grandis : & hoc.
 Dicere quindecies poteram, quod pertinet ad te :
 Sed quid agas, ad me pertinet, Ole, nihil.

Ad Aulum Pudentem. X.

COgis me calamo, manuque nostrâ
 Emendare meos, Pudens, libellos.
 O quàm me nimium probas, amasque,
 Qui vis archetypas habere nugas !

Ad Faustinum. XI.

Sic me fronte legat dominus, Faustine, serena,
 Excipiatque meos quâ solet aure iocos :
 Ut mea nec justè quos odit pagina lædit,
 Et mihi de nullo fama rubore placet.
 Quid prodest, cupiant cum quidam nostra videri,
 Siqua Lycamtheo sanguine tela madent ?
 Vipereumque vomant nostro sub nomine vlrus,
 Qui Phoebi radios ferre diemque negant ?
 Ludimus innocui : scis hoc bene : juro potentis
 Per genium famæ, Castalidumque gregem ;
 Perque tuas aures, magni mihi numinis instar,
 Lector, inhumana liber ab invidia.

De Lycoride. XII.

Dum Tiburtinis albescere collibus audit
 Antiqui dentis fusca Lycoris ebur,
 Venit in Herculeos colles : quid Tiburis alti
 Aura valet ? parvo tempore nigra redit.

Ad Regulum. XIII.

Ra domi non sunt : superest hoc, Regule, tantum ;
 Ut tua vendamus munera : nunquid emis ?

Ad

Ad Bibliothecam Julii Martialis. XIV.

Ruris bibliotheca delicati,
Vicinam videt unde lector urbem :

Inter carmina sanctiora siquis
Lascivæ fuerit locus Thaliæ,
Hos nido licet inferas vel imo,
Septem quos tibi misimus libellos
Auctoris calamo sui notatos :
Hæc illis pretium facit litura.
At tu munere dedicata parvo,
Quæ cantaberis orbe nota toto,
Pignus pectoris hoc mei tuere,
Julii bibliotheca Martialis.

De fragmento Argus. XV.

Fragmentum, quod vile putas & inutile lignum,
Hæc fuit ignoti prima carina maris.
Quam nec Cyaneæ quondam potuere ruinæ
Frangere, nec Scythici tristior ira freti,
Secula vicerunt : sed quamvis cesserit annis,
Sanctior est salvâ parva tabella rate.

In Sanctam. XVI.

Nihil est miserius, nec gulosius Sanctrâ,
Rectam vocatus cum recurrit ad coenam,
Quam tot diebus, noctibusque captavit ;
Ter poscit apri glandulas, quater lumbum,
Et utramque coxam leporis, & duos armos :
Nec erubescit pejerare de turdo ;
Et ostreorum rapere lividos cirros.
Buccis placentæ sordidam linit mappam.
Illic & uvæ collocantur ollares,
Et Punicorum pauca grana malorum,
Et lippa ficus, debillisque boletus.
Sed mappa cum jam mille rumpitur furtis,
Rosos tepenti spondylos sinu condit,
Et devorato capite turturem truncum.
Colligere longâ turpe nec putat dextrâ
Analesta, quicquid & canes reliquerunt.

Nec

Nec esculenta sufficit gulæ præda.
 Misto lagenam replet ad pedes vino.
 Hæc per ducentas dum domum tulit scalas,
 Seque obseratâ clausit anxius cellâ,
 Gulosus ille postero die vendit.

Ad Pollam, de natali Lucani. XVII.

Hæc est illa dies, quæ, magni conscia partûs,
 Lucanum populis, & tibi, Polla, dedit.
 Heu! Nero crudelis, nullâque invisor umbrâ:
 Debuit hoc saltem non licuisse tibi.

De eodem. XVIII.

Vatis Apollinei magno memorabilis ortu
 Lux redit: Aonidum turba favete sacris.
 Hæc meruit; cùm te terris, Lucane, dedisset,
 Mixtus Castaliæ Bætis ut esset aquæ.

Ad Phœbum, de eodem. XIX.

Phoëbe, veni; sed quantus eras, cùm bella canenti
 Ipse dares Latiae plectra secunda lyræ.
 Quid tanta pro luce precer? tu, Polla, maritum
 Sæpe colas, & se sentiat ipse coli.

In maledicum, amicitiae pestem. XX.

Cum Juvenale meo quæ me committere tentas,
 Quid non audebis, perfida lingua, loqui?
 Te fingente nefas, Pyladen odisset Orestes:
 Thesea Perithoi destituisset amor.
 Tu Siculos fratres, & majus nomen Arridas,
 Et Ledæ poteras diffociare genus.
 Hoc tibi pro meritis, & talibus imprecor ausis;
 Sic tecum mihi, quod cum Juvenale velis.

In blandum poetam. XXI.

Dulcia cùm tantum scribas epigrammata semper,
 Et cerussatâ candidiora cute;
 Nullaque mica salis, nec amari fellis in illis
 Gutta sit; ô demens, vis tamén illa legi.
 Nec cibus ipse juvat morsu fraudatus aceti:
 Nec grata est facies, cui gelasinus abest.
 Infanti melimela dato, fatuasque mariscas:
 Nam mihi, quæ novit pungere, Chia sapit.

Ad

Ad Apollinarem. XXII.

A Pollinarem conveni meum, Scazon,
 Et si vacabit (ne molestus accedas)
 Hoc quaecunque, cujus aliqua pars ipse est,
 Dabis: hoc facetum carmen imbuant aures.
 Si te receptum fronte videris totâ,
 Noto rogabis ut favore sustentet.
 Quanto mearum, scis, amore nugarum
 Flagret: nec ipse plus amare te possum.
 Contra malignos esse si cupis tutus,
 Apollinarem conveni meum, Scazon.

De apro sibi misso à Dextro. XXIII.

Tuscæ glandis aper populator, & ilice multâ
 Jam plger, Ætolæ fama secunda feræ,
 Quem meus intravit splendenti cuspide Dexter,
 Præda jaces nostris invidiosa focis.
 Pinguescant madidi læto nidore Penates,
 Flagret & exciso festa culina jugo.
 Sed coquus ingentem piperis consumet acervum,
 Addet & arcano mista Falerna garo.
 Ad dominum redeas; noster te non capit ignis,
 Conturbator aper: vilius esurio.

Ad Fuscum. XXIV.

Sic Tiburtinæ crescat tibi sylva Dianæ,
 Et properet cæsum sæpe redire nemus:
 Nec Tartessiacis Pallas tua, Fusce, trapetis
 Cedat, & immodici dent bona multa lacus:
 Sic fora mirentur, sic te pallatia laudent,
 Excolat & geminas plurima palma fores:
 Otia dum medius præstat tibi parva December,
 Excipe, sed certâ, quos legis, aure jocos.
 Scire libet verum: res est hæc ardua: sed tu
 Quod tibi vis dici, dicere, Fusce, potes.

Ad Regulum. XXV.

Raucæ cortis aves, & ova matrum,
 Et flavas medio vapore Chias,

Et foetum querulæ rudem capellæ,
 Nec jam frigoribus pares olivas,
 Et canum gelidis olus pruinis
 De nostro tibi rure missa credis ?
 O quàm, Regule, diligenter erras !
 Nil nostri, nisi me, ferunt agelli.
 Quicquid villicus Umber, aut colonus,
 Aut rus marmore tertio notatum,
 Aut Tusci tibi, Tusculive mittunt ;
 Id totâ mihi nascitur Suburrâ.

Ad Atticum. XXVI.

Attice, facundæ renovas qui nomina gentis,
 Nec finis ingentem conticuisse domum :
 Te pia Cecropiæ comitatur turba Minervæ,
 Te secreta quies, te sophos omnis amat.
 At juvenes alios fractâ colit aure magister,
 Et rapit immeritas sordibus unctor opes.
 Non pila, non follis, non te paganica thermis
 Præparat, aut nudi stipitis ictus hebes :
 Vara nec injecto ceromate brachia tendis :
 Non harpasta vagus pulverulenta rapis :
 Sed curris niveas tantum prope virginis undas ;
 Aut ubi Sidonio taurus amore calet.
 Per varias artes, omnis quibus area servit,
 Ludere, cum liceat currere, pigritia est.

In Cinna. XXVII.

Sordidior cœno cum sit toga, calceus autem
 Candidior primâ fit tibi, Cinna, nive ;
 Dejecto quid, inepte, pedes perfundis amictu ?
 Collige, Cinna, togam ; calceus ecce perit.

Ad Severum, de balneis Charini. XXVIII.

Quo possit fieri modo, Severe,
 Ut vir pessimus omnium Charinus
 Udam rem bene fecerit, requiris ?
 Dicam, sed cito. quid Nerone pejus ?
 Quid thermis melius Neronianis ?
 Non deest protinus ecce de malignis,
 Qui sic rancidulo loquatur ore :

Ut

Ut quid tu domini deque nostri
Præfers muneribus Neronianas?
Thermas præfero balneis Charini.

Ad Stellam. XXIX.

Cum pluvias madidumq; Jovem perferre negaret,
Et rudis hybernis villa nataret aquis:
Plurima, quæ posset subitos effundere nimbos,
Muneribus venit tegula missa tuis.
Horridus ecce sonat Boreæ stridore December:
Stella, tegis villam, non tegis agricolam.

Ad Castricum, de quæstoris nota damnatoria. XXX.

Nosti mortiferum quæstoris, Castrice, signum?
Est operæ pretium discere theta novum.
Exprimeret quoties rorantem frigore nasum,
Lethalem juguli jusserat esse notam.
Turpis ab inviso pendebat stiria naso,
Cum flaret madidâ fauce December atrox.
Collegæ tenuere manus: quid plura requiris?
Emungi misero, Castrice, non licuit.

De Polyphemi & Scyllæ imaginibus. XXXI.

Tantus es, & talis, nostri Polyphemæ Severi,
Ut te mirari possit & ipse Cyclops.
Sed nec Scylla minus, quod si fera monstra duorum
Junxeris, alterius fiet uterque timor.

De Calio. XXXII.

Discursus varios, vagumque manè,
Et fastus, & Ave potentiorum,
Cum perferre patique jam negaret,
Coepit fingere Cælius podagram;
Quam dum vult nimis approbare veram,
Et sanas linit obligatque plantas,
Inceditque gradu laborioso,
(Quantum cura potest, & ars doloris!)
Desit fingere Cælius podagram.

Epitaphium patris Etrusci. XXXIII.

Hic jacet ille senex, Augusta notus in aula,
Pectore non humili passus utrumque deum:

Natorum pietas sanctis quem conjugis umbris

Miscuit: Elysiū possidet ambo nemus.

Occidit illa prior viridi fraudata iuuentā:

Hic prope ter senas vixit Olympiadas.

Sed festinatis raptum tibi credidit annis,

Adspexit lacrymas quisquis, Etrusce, tuas.

Ad Sempronium Tuccam. XXXIV.

Cosmicus esse tibi, Semproni Tucca, videris,
Cosmica, Semproni, tam mala, quàm bona sunt.

Ad Castricum. XXXV.

Muneribus cupiat si quis contendere tecum,
Audeat hic etiam, Castrice, carminibus.

Nos tenues in utroque sumus, vincique parati:

Inde sopor nobis, & placet alta quies.

Tam mala cur igitur dederim tibi carmina, quæris?

Alcinoo nullum poma dedisse putas?

In Cinna. XXXVI.

Primum est, ut præstes, si quid te, Cinna, rogabo:

Illud deinde sequens, ut citò, Cinna, neges.

Diligo præstantem; non odi, Cinna, negantem:

Sed tu nec præstas, nec citò, Cinna, negas.

Ad Ovidium, Cæsonii exsulantis comitem. XXXVII.

Maximus ille tuus, Ovidi, Cæsonius hic est;

Cujus adhuc vultum vivida cera tenet.

Hunc Nero damnavit: sed tu damnare Neronem

Ausus es, & profugi, non tua, fata sequi.

Æquora per Scyllæ magnus comes exsulis isti;

Qui modò nolueras consulis ire comes.

Si victura meis mandantur nomina chartis,

Et fas est cineri me superesse meo:

Audiet hoc præsens, venturaque turba; fuisse

Illi te, Senecæ quod fuit ille suo.

Ad eundem. XXXVIII.

Facundi Senecæ potens amicus,

Caro proximus, aut prior Sereno,

Hic est Maximus ille, quem frequenti

Felix litera paginâ salutat.

Hunc tu per Siculas secutus undas,
 O nullis, Ovidi, tacende linguis,
 Sprevisisti domini furentis iras.
 Miretur Pyladem suum vetustas,
 Hæsit qui comes exsuli parentis.
 Quis discrimina comparet duorum?
 Hæsisti comes exsuli Néronis.

Ad Priscum. XXXIX.

Commendare tuum dum vis mihi carmine munus,
 Mæonioque cupis doctius ore loqui;
 Excrucias multis pariter me teque diebus:
 Et tua de nostro, Prisce, Thalia placet.
 Divitibus poteris musas, elegosque sonantes
 Mittere: pauperibus munera pexa dato.

Ad Licinium Suram. XL.

Doctorum Licini celeberrime Sura virorum,
 Cujus prisca graves lingua reduxit avos;
 Redderis, heu quanto fatorum munere, nobis,
 Gustatâ Lethes penè remissus aquâ!
 Perdiderant jam vota metum, securaque flebat
 Tristitia; & lacrymis usque peractus eras.
 Non tulit invidiam taciti regnator Averni,
 Et raptas fatis reddidit ipse colos.
 Scis igitur, quantas hominum mors falsa querelas
 Moverit: & frueris posteritate tuâ.
 Vive velut raptō, fugitivaque gaudia carpe:
 Perdiderit nullum vita reversa diem.

De Annio. XLI.

Cum mensas habeat ferè ducentas,
 Pro mensis habet Annius ministros:
 Transcurrunt gabatæ, volantque lances.
 Has vobis epulas habete lauti:
 Nos offendimur ambulante cœnâ.

Ad Severum. XLII.

Parva suburbani munuscula mittimus horti:
 Faucibus ova tuis; poma, Severe, gulæ.

Ad Urbicum, de Aucto. XLIII.

Mercari nostras si te piget, Urbice, nugas;
 Et jucunda tamen carmina nōsse libet:
 Pompeium quæras (& nōsti forsitan) Auctum,
 Ultoris prima Martis in æde sedet.
 Jure madens, varioque togæ limatus in usu,
 Non lector meus hic, Urbice, sed liber est.
 Sic tenet absentis nostros cantatque libellos,
 Ut pereat chartis litera nulla meis.
 Denique, si vellet, poterat scripsisse videri:
 Sed famæ mavult ille favere meæ.
 Hunc licet à decima (nec enim sat̃s antè vacabit)
 Sollicitus, capiet coenula parva duos.
 Ille leget; bibe tu: nolis licet, ille sonabit:
 Et cum, jam sat̃s est, dixeris; ille leget.

Ad Auctum. XLIV.

Gratum est, quòd Celeri nostros legis, Aucte, libellos,
 Si tamen & Celerem quod legis, Aucte, juvat.
 Ille meas gentes, & Celtas rexit Iberos,
 Nec fuit in nostro certior orbe fides.
 Major me tanti reverentia turbat; & aures
 Non auditoris, judicis esse puto.

In Umbrum. XLV.

Omnia misisti mihi Saturnalibus, Umber,
 Munera, contulerant quæ tibi quinque dies;
 Bis senos triplices, & dentiscalpia septem:
 His comes accessit spongia, mappa, calix;
 Semodiusque fabæ cum vimine Picenarum,
 Et Laletanæ nigra lagena sapæ:
 Parvaque cum canis venerunt coctana prunis,
 Et Lybicæ fici pondere testa gravis.
 Vix puto triginta nummorum tota fuisse
 Munera, quæ grandes octo tulere Syri.
 Quanto commodius nullo mihi ferre labore
 Argenti potuit pondera quinque puer?

In Nasidianum. XLVI.

Semper manè mihi de me mera somnia narras,
 Quæ moveant animum sollicitentque meum.
 Jam prior ad facem, sed & hæc vindemia venit ;
 Exorat noctes dum mihi saga tuas.
 Consumpsi falsasque molas, & thuris acervos :
 Decrevere greges, dum cadit agna frequens.
 Non porcus, non cortis aves, non ova supersunt.
 Aut vigila, aut dormi, Nasidiane, tibi.

Ad Rabirium. XLVII.

Astra polumque tuâ cepisti mente, Rabiri,
 Parrhasiam mirâ qui struis arte domum.
 Phidiaco si digna Jovi dare templa parabit,
 Has petat à nostro Pisa Tonante manus.

Ad Titum, de Cæciliano. XLVIII.

Non coenat sine apro noster, Tite, Cæcilianus :
 Bellum convivam Cæcilianus habet.

Ad Jovem. XLIX.

Tarpeiz venerande rector aulae,
 Quem salvo duce credimus Tonantem,
 Cùm votis sibi quisque te fatiget,
 Et poscat dare, quæ dei potestas :
 Nil pro me mihi, Jupiter, petenti
 Ne succensueris, velut superbo.
 Te pro Cæsare debeo rogare.
 Pro me debeo Cæsarem rogare.

Ad Domitianum. L.

Abstulerat totam temerarius institor urbem,
 Inque suo nullum liminae limen erat.
 Jussisti tenues, Germanice, crescere vicos ;
 Et, modo quæ fuerat semita, facta via est.
 Nulla catenatis pila est præcincta lagenis :
 Nec prætor medio cogitur ire luto.
 Stringitur in densa nec cæca novacula turba :
 Occupat aut totas nigra popina vias.

Tonsor, caupo, coquus, lanus sua limina servant :
Nunc Roma est, nuper magna taberna fuit.

De Silio. LI.

Perpetui nunquam moritura volumina Silii
Qui legis, & Latina carmina digna togâ ;
Pierios tantum vati placuisse recessus
Credis, & Aoniae Bacchica festa comae ?
Sacra cothurnati non attigit ante Maronis,
Implevit magni quam Ciceronis opus.
Hunc miratur adhuc centum gravis hasta virorum ;
Hunc loquitur grato plurimus ore cliens.
Postquam bis senis ingentem fascibus annum
Rexerat, asserto qui sacer orbe fuit ;
Emeritos Musis & Phoebus tradidit annos :
Proque suo celebrat nunc Helicon foro.

In Cinnamum. LII.

Qui tonsor fueras tota notissimus urbe,
Et posthac dominae munere factus eques ;
Sicanias urbes, Aetnaeque regna petisti,
Cinname, cum fugeres tristia jura fori.
Qua nunc arte graves tolerabis inutilis annos ?
Quid facit infelix & fugitiva quies ?
Non rhetor, non grammaticus, ludive magister,
Non Cynicus, non tu Stoicus esse potes.
Vendere nec vocem Siculis plausumque theatri.
Quod superest, iterum, Cinname, tonsor eris.

In Gargilianum. LIII.

Lis te bis decimae numerantem frigora brumae
Conterit una tribus, Gargiliane, foris.
Ah miser, & demens ! viginti litigat annis
Quisquam, cui vinci, Gargiliane, licet ?

De Labieno. LIV.

Haeredem Fabius Labienum ex aere reliquit ?
Plus meruisse tamen se Labienus ait.

Ad Instantium Rufum. LV.

Commendare meas, Instanti Rufe, Camoenas
Parce precor socero : seria forsân amat.
Quod si nugaces admittit & ille libellos,
Haec ego vel Curio Fabricioque legam.

De

De Theophila, ad Caxium. LVI.

HÆc est illa tibi promissa Theophila, Cani,
 Cujus Cecropiâ pectora dote madent.
 Hanc sibi jure petat magni senis Atticus hortus,
 Nec minùs esse suum Stoica turba velit.
 Vivet opus, quodcunque per istas miseris aures;
 Tam non fãmineum nec populare sapit.
 Non tua Panrænis nimium se præferat illi,
 Quamvis Pierio sit bene nota choro.
 Carmina fingentem Sappho laudavit amatrix:
 Castior hæc, & non doctior illa fuit.

De familia ficosa. LVII.

Ficosa est uxor, ficosus & ipse maritus:
 Filia ficosa est, & gener, atque nepos.
 Nec dispensator, nec villicus ulcere turpi;
 Nec rigidus fossor, sed nec arator eget.
 Cùm sint ficosi pariter juvenesque senesque,
 Res mira est; ficos non habet unus ager.

Ad Paullum. LVIII.

GRatus sic tibi, Paulle, sit December:
 Nec vani triplices, brevesque mappæ,
 Nec thuris veniant leves selibræ;
 Sed lances ferat; aut scyphos avorum,
 Aut grandis reus, aut potens amicus:
 Seu, quod te potius juvat capitque,
 Sic vincas Noviumque Publiumque
 Mandris & vitreo latrone clausos:
 Sic palmam tibi de trigone nudo
 Unctæ det favor arbiter coronæ;
 Nec laudet Polybi magis sinistras:
 Si quisquam mea dixerit malignus
 Atro carmina quæ madent veneno,
 Ut vocem mihi commodas patronam,
 Et, quantum poteris, sed usque, clames;
 Non scripsit meus ista Martialis.

Ad Maximum. LIX.

ESquillis domus est, domus est tibi colle Dianæ,
 Et tua patricius culmina vicus habet:; Hinc

Hinc viduæ Cybeles, illinc sacrarum Vestæ ;

Inde novum, veterem prospicis inde Jovem.

Dic, ubi conveniam : dic, quâ te parte requiram.

Quisquis ubique habitat, Maxime, nusquam habitat.

Ad Philomusum. LX.

Quod te diripiunt potentiores

Per convivia, porticus, theatra,

Et tecum, quoties ita incidisti,

Gestari juvat, & juvat lavari :

Nolito nimium tibi placere.

Delectas, Philomusè : non amaris.

In Tuccam. LXI.

Exigis ut nostros donem tibi, Tucca, libellos.

Non faciam : nam vis vendere, non legere.

In Papilum. LXII.

Dum Saxetani ponatur cauda lacerti ;

Et bene si coenas, conchis inuncta tibi est :

Sumen, aprum, leporem, boletos, ostrea, mullos,

Mittis : habes nec cor, Papile, nec genium.

Ad Severum. LXIII.

Potavi modò consulare vinum.

Quæris quàm vetus atque liberale ?

Ipso consule conditum : sed ipse

Qui ponebat, erat, Severe, consul.

Ad Faustinum. LXIV.

Quatenus Odrysios jam pax Romana Triones

Temperat, & tetricæ conticuere tubæ,

Hunc Marcellino poteris, Faustine, libellum

Mittere ; jam chartis, jam vacat ille jocus.

Sed si parva tui munuscula quæris amici

Commendare, ferat carmina nostra puer.

At tibi captivo famulus mittetur ab Istro,

Qui Tiburtinas pascere possit oves.

Ad Lausum. LXV.

Triginta toto mala sunt epigrammata libro :

Si totidem bona sunt, Lause ; liber bonus est.

De

De Eutrapelo. LXVI.

Eutrapelus tonsor dum circuit ora Luperci,
Expungitque genas; altera barba subit.

Ad Librum. LXVII.

Dum mea Cæcilio formatur imago Secundo,
Spirat & argutâ picta tabella manu:
I, liber, ad Geticam Peucen, Istrumque tacentem;
Hæc loca perdomitis gentibus ille tenet.
Parva dabis charo, sed dulcia dona, sodali:
Certior in nostro carmine vultus erit.
Casibus hic nullis, nullis delebilis annis
Vivet, Apelleum cum morietur opus.

Ad Sabellum. LXVIII.

Quòd non insulsè scribis tetrasticha quædam;
Disticha quod bellè pauca, Sabelle, facis:
Laudo, nec admiror: facile est epigrammata bellè
Scribere; sed librum scribere difficile est.

In Sextum. LXIX.

Ad natalitias dapes vocabar,
Essem cum tibi, Sexte, non amicus.
Quid factum est, rogo, quid repentè factum,
Post tot pignora nostra, post tot annos,
Quòd sum præteritus vetus sodalis?
Sed causam scio; nulla venit à me
Argenti tibi libra pustulati,
Nec levis toga, nec rudes lacernæ;
Non est sportula, quæ negociatur:
Poscis munera, Sexte, non amicos.
Jam dices mihi, vapulet vocator.

De Amoribus absurdis. LXX.

Si meus auritâ gaudet glaucopide Flaccus;
Si fruitur tristi Canius Æthiope:
Publius exiguæ si flagrat amore catellæ;
Si Cronus similem cercopithecon amat:
Delectat Marium si perniciosus ichneumon;
Pica salutatrix si tibi, Lause, placet.

Si gelidum collo nectit Glacilla draconem ;
 Luscinia tumulum si Thelesina dedit :
 Cæca Cupidinei cur non amet ora Labycæ,
 Qui videt hæc dominis monstra placere suis ?

Ad Lausum, de suis libris. LXXI.

Fertur habere meos, si vera est fama, libellos
 Inter delicias pulchra Vienna suas.
 Me legit omnis ibi senior, juvenisque, puerque,
 Et coram tetrico casta puella viro.
 Hoc ego maluerim, quàm si mea carmina cantent
 Qui Nilum ex ipso protinus ore bibunt :
 Quàm meus Hispano si me Tagus impleat auro,
 Pascat & Hybla meas, pascat Hymettos apes.
 Nonnihil ergo sumus, nec blandæ munere linguæ
 Decipimur: credam jam puto, Lause, tibi.

Apollinari mittit coronam roseam. LXXII.

I, Felix rosa, mollibusque sertis
 Nostri cinge comas Apollinaris,
 Quas tu nectere candidas, sed olim,
 Sic te semper amet Venus, memento.

Ad Creticum. LXXIII.

Iæquat inæqualem Matho me fecisse libellum :
 Si verum est, laudat carmina nostra Matho.
 Æquales scribit libros Calvinus & UMBER:
 Æqualis liber est, Cretice, qui malus est.

In Baccaram. LXXIV.

Si quid opus fuerit, scis me non esse rogandum,
 Bis nobis dicis, Baccara, terque dic.
 Appellat rigidâ tristis me voce Secundus :
 Audis, sed nescis, Baccara, quid sit opus.
 Pensio te coram petitur clareque, palamque :
 Audis, sed nescis, Baccara, quid sit opus.
 Esse queror gelidasque mihi tritasque lacernas :
 Audis, sed nescis, Baccara, quid sit opus.
 Hoc opus est, subito fias ut sidere mutus ;
 Dicere ne possis, Baccara, quid sit opus.

Ad Narniam. LXXV.

N Arnia, sulphureo quam gurgite candidus amnis
 Circuit, ancipiti vix adeunda jugo;
 Quid tam sæpe meum nobis abducere Quinctum
 Te juvat, & lentâ detinuisse morâ?
 Quid Nomentani causam mihi perdis agelli,
 Propter vicinum qui pretiosus erat?
 Sed jam parce mihi, nec abutere, Narnia, Quincto;
 Perpetuo liceat sic tibi ponte frui.

De Papilo. LXXVI.

U Nguentum fuerat, quod onyx modò parva ge-
 rebat:
 Olfecit postquam Papilus, ecce garum est.

In Linum. LXXVII.

B Ruma est, & riget horridus Decembris;
 Audes tu tamen osculo nivali
 Omnes obuius hinc & hinc tenere,
 Et totam, Line, basiare Romam.
 Quid possis graviusque, sæuiusque
 Percussus facere, atque verberatus?
 Hoc me frigore basiet nec uxor,
 Blandis filia nec rudis labellis.
 Sed tu dulcior, elegantiorque;
 Cujus livida naribus caninis
 Dependet glaciés, rigetque barba;
 Qualem forficibus metit supinis
 Tonfor Cinyphio Cilix marito.
 Quare si tibi sensus est, pudorque;
 Hybernas, Line, basiationes
 In mensem, rogo, differas Aprilem.

Epitaphium Urbici pueri. LXXVIII.

C Onditus hîc ego sum Bassi dolor Urbicus infans:
 Cui genus, & nomen maxima Roma dedit.

Sex

Sex mihi de prima deerant trieteride menses,
 Ruperunt tetricæ cùm mala pensa deæ.
 Quid species, quid lingua mihi, quid profuit ætas?
 Da lacrymas tumulo, qui legis ista, meo.
 Sic ad Lethæas, nisi Nestore ferior, undas
 Non eat, optabis quem superesse tibi.

Ad Librum, de Cæsio Sabino. LXXIX.

Nosti si bene Cæsum, libelle,
 Montanæ decus Umbriæ Sabinum,
 Auli municipem mei Pudentis;
 Illi tu dabis hæc vel occupato.
 Instent mille licèt premantque curæ,
 Nostris carminibus tamen vacabit:
 Nam me diligit ille, proximumque
 Turni nobilibus leget libellis.
 O quantum tibi nominis paratur!
 O quæ gloria, quàm frequens amator!
 Te convivla, te forum sonabit,
 Ædes, compita, porticus, tabernæ.
 Uni mitteris, omnibus legèris.

Ad Castorem. LXXX.

Omnia, Castor, emis: sic fiet, ut omnia vendas.

Ad Crispinum. LXXXI.

Sic placidum videas semper, Crispine, Tonantem;
 Nec te Roma minùs, quàm tua Memphis amet;
 Carmina Parrhasia si nostra legentur in aula,
 (Namque solent sacra Cæsaris aure frui.)
 Dicere de nobis, ut lector candidus, aude:
 Temporibus præstat nonnihil iste tuis.
 Nec Marso nimium minor est, doctoque Catullo,
 Hoc satis est: ipsi cætera mando Deo.

Ad Ponticum. LXXXII.

Pontice, per reges discurre, & omnia iustras :
Magna quidem sequeris, Pontice ; magnus homo es.

Pontice, si qua facis, sine teste facis, sine turba :

Non adhibes multos, Pontice ; cautus homo es.

Pontice, te celebrem formâ natura creavit :

Dignus eras Helenâ, Pontice ; pulcher homo es.

Pontice, voce tuâ posses adamanta movere :

Vox tua dulce sonat, Pontice ; dulcis homo es.

Pontice, sic alios, sic te quoque decipit error :

Vis dicam verum, Pontice ? nullus homo es.

M. VAL.

M. VAL. MARTIALIS EPIGRAMMATUM

LIBER VIII.

Imperatori Domitiano, Cæsari Augusto, Germanico-
Dacico, Valerius Martialis salutem.

O Mnes quidem libelli mei, Domine, quibus tu sa-
mam, id est, vitam dedisti, tibi supplicant: &
puto, propter hoc leguntur. Hic tamen, qui ope-
ris nostri octavus inscribitur, occasione pietatis frequen-
tius fruitur. Minus itaque ingenio laborandum fuit, in
cujus locum materia successerat; quam quidem subinde
aliquâ jocorum mistura variare tentavimus, ne cœlesti
verecundiæ tuæ laudes suas, quæ facilius te fatigare pos-
sunt, quàm nos sariare, omnis versus ingereret. Quamvis
autem epigrammata severissimis quoque, & supremæ for-
tunæ viris ita scripta sint, ut mimicam verborum licen-
tiam affectâsse videantur: ego tamen illis non permisi tam
lascivè loqui, quam vulgò solent. Cum pars libri & ma-
jor & melior ad majestatem sacri nominis tui allegata
sit meminerit, non nisi religionis purificatione lustratus,
accedere ad templa debere. Quod ut custoditurum me-
lecturi sciant, in ipso libelli hujus limine profiteri bre-
vissimo placuit epigrammate.

Ad librum suum. I.

L Aurigeros Domini liber intrature penates,
Disce verecundo sanctiùs ore loqui.
Nuda recede Venus: non est tuus iste libellus.

Tu mihi, tu Pallas Cæsariana veni.

Ad Janum. II.

F Astorum genitor parensque Janus.
Victorem modò cum videret Istri,
Tot vultus sibi non satès putavit;
Optavitque oculos habere plures,
Et linguâ pariter locutus omni;
Terrarum Domino, Deoque rerum:

Pro-

Promisit Pyliam quater senectam.
Addas, Jane pater, tuam rogamus.

Ad Musam. III.

Quinq̃ue satis fuerant, vel sex, septemve libelli;
Et nimium: quid adhuc ludere, Musa, iuvat?
Sit pudor, & finis. Jam plus nihil addere nobis
Fama potest: teritur noster ubique liber.
Et cū rupta situ Messalæ saxa jacebunt,
Altaque cū Licinī marmora pulvis erunt:
Me tamen ora legent, & secum plurimus hospes
Ad patrias sedes carmina nostra feret.
Finieram; cū sic respondit nona sororum,
Cui coma, & unguento sordida vestis erat:
Tune potes dulces, ingrata, relinquere nugas?
Dic mihi, quid melius desidiosus ages?
An iuvat ad tragicos soccum transferre cothurnos,
Aspera vel paribus bella tonare modis;
Prælegat ut tumidus raucā te voce magister,
Oderit & grandis virgo, bonusque puer?
Scribant ista graves nimium, nimiumque severi,
Quos mediā miseros nocte lucerna videt.
At tu Romano lepidos sale tinge libellos:
Agnoscat mores vita legatque suos:
Angustā cantare licet videaris avenā,
Dum tua multorum vincat avena tubas.

Ad Domitianum. IV.

Quantus, io, Latias mundi conventus ad aras
Suscipit, & solvit pro duce vota suo!
Nam non hæc hominum, Germanice, gaudia tantum,
Sed faciunt ipsi nunc, puto, sacra dei.

Ad Macrum. V.

Dum donas, Macer, annulos puellis;
Desisti, Macer, annulos habere.

In Euctum. VI.

Archetypis vetuli nihil est odiosius Eucti,
Ficta Saguntino cymbia malo luto.

Argen-

Argenti furiosa sui cùm stemmata narrat
 Garrulus, & verbis mucida vina facit.
 Laomedontæ fuerant hæc pocula mensæ :
 Ferret ut hæc, muros struxit Apollo lyrâ.
 Hoc cratere ferox commisit prælia Rhæcus
 Cum Lapithis ; pugnâ debile cernis opus.
 Hi duo longævo censentur Nestore fundi :
 Pollice de Pylio trita columna nitet.
 Hic scyphus est, in quo misceri iussit amicis
 Largius Æacides, & bibit ipse merum.
 Hac propinavit Bytiæ pulcherrima Dido
 In patera, Phrygio cùm data coena viro est.
 Miratus fueris cùm prisca toreumata multùm,
 In Priami cyathis Astryanacta bibes.

In Cinnam. VII.

Hoc agere est causas, hoc dicere, Cinna, disertè,
 Horis, Cinna, decem dicere verba novem?
 Sed modò clepsydram ingenti voce petisti
 Quatuor : ô quantum, Cinna, tacere potes !

Ad Janum, de reditu Caesaris. VIII.

Pincipium des, Jane, licèt velocibus annis,
 Et revoces vultu secula longa tuo :
 Te primum pia thura rogent, te vota saluent :
 Purpura te felix, te colat omnis honos :
 Tu tamen hoc mavis, Latiae quod contigit urbi,
 Mense tuo reducem, Jane, videre deum.

Ad Quintum. IX.

Solvere dodrantem nuper tibi, Quinte, volebat
 Lippus Hylas : luscus vult dare dimidium.
 Accipe quamprimum : brevis est occasio lucri.
 Si fuerit cæcus, nil tibi solvet Hylas.

De Basso. X.

Emit lacernas millibus decem Bassus
 Tyrias coloris optimi : lucri fecit.
 Adeò bene emit ? inquis : immò non solvit.

Ad Domitianum. XI.

Pervenisse tuam jam te scit Rhenus in urbem :
 Nam populi voces audit & ille tui. Sar-

Sarmaticas etiam gentes, Istrumque, Getasque
 Lætitiæ clamor terruit ipse novæ.
 Dum te longa sacro venerantur gaudia Circo,
 Nemo quater missos currere sensit equos.
 Nullum Roma ducem, nec te sic, Cæsar, amavit :
 Te quoque jam non plus, ut velit ipsa, potest.

Ad Priscum. XII.

UXorem quare locupletem ducere nolim,
 Quæritis? uxori nubere nolo meæ.
 Inferior matrona suo fit, Prisce, marito :
 Non aliter fuerint fœmina virque pares.

Ad Gargilianum. XIII.

Morio dictus erat : viginti millibus eml.
 Redde mihi nummos, Gargiliane : sapit.

In crudelem amicum. XIV.

Pallida ne Cilicum timeant pomaria brumam,
 Mordeat & tenerum fortior aura nemus :
 Hybernæ objecta notis specularia pueros
 Admittunt soles, & sine face diem.
 At mihi cella datur, non totâ clausa fenestrâ,
 In qua nec Boreas ipse manere velit.
 Sic habitare jubes veterem crudelis amicum ?
 Arboris ergo tuæ tutior hospes ero.

Ad Domitianum. XV.

Dum nova Pannonici numeratur gloria belli,
 Omnis & ad reducem dum litat ara Jovem ;
 Dat Populus, dat gratus Eques, dat thura Senatus,
 Et ditant Latias tertia dona tribus ;
 Hos quoque secretos memorabit Roma triumphos,
 Nec minor ista tuæ laurea pacis erit,
 Quòd tibi de sancta credis pietate tuorum :
 Principis est virtus maxima, nôsse suos.

In Ciperum. XVI.

Pistor qui fueras diu, Cipere,
 Nunc causas agis, & ducenta quæris.
 Sed consumis, & usque mutuaris.

A pistore, Cipere, non recedis ;
Et panem facis, & facis farinam.

Ad Sextum. XVII.

E Gi, Sexte, tuam, pactus duo millia, causam.
Misiſti nummos quot mihi? mille: quid est?
Narrâſti nihil, inquis, & à te prodita cauſa eſt.
Tantò plus debes, Sexte, quòd erubui.

Ad Cirinium. XVIII.

S Ic tua, Cirini, promas epigrammata vulgo,
Ut mecum possis, vel prior ipſe legi:
Sed tibi tantus ineſt veteris reſpectus amici,
Charior ut mea ſit, quam tua fama tibi.
Sic Maro nec Calabri tentavit carmina Flacci,
Pindaricos poſſet cùm ſuperare modos:
Et Varro ceſſit Romani laude cothurni,
Cùm poſſet tragico fortius ore loqui.
Aurum, & opes, & rura frequens donabit amicus:
Qui velit ingenio cedere, rarus erit.

De Cinna. XIX.

P auper videri Cinna vult; & eſt pauper.

Ad Varum. XX.

C um facias verſus nullâ non luce ducenos,
Vare, nihil recitas: non ſapis, atque ſapis.
De reditu Domitiani, ad Phoſphorum. XXI.

P hoſphore, redde diem; quid gaudia noſtra morariſ?
Cæſare venturo, Phoſphore, redde diem.
Roma rogat: placidi numquid te pigra Bootæ
Plauſtra vehunt, lento quòd nimis igne veniſ?
Ledæo poteras abducere Cyllaron aſtro:
Ipſe ſuo cedit nunc tibi Caſtor equo.
Quid cupidum Titana tenes? jam Xanthus & Æthon
Fræna volunt: vigilat Memnonis alma parens.
Tarda tamen nitidæ non cedunt ſidera luci;
Et cupit Auſonium Luna videre ducem.
Jam, Cæſar, vel nocte veni: ſtent aſtra licebit,
Non deerit populo, te veniente, dies.

In Gallicum. XXII.

INvitas ad aprum; ponis mihi, Gallice, porcum:
Hybrida sum, si das, Gallice, verba mihi.

Ad Rusticum. XXIII.

ESse tibi videor sævus, nimiumque gulosus,
Qui propter coenam, Rustice, cædo cocum?
Si levis ista tibi flagrorum causa videtur,
Ex qua vis causa vapulet ergo cocus?

Ad Domitianum. XXIV.

SI quid fortè petam timido gracilique libello,
Improba non fuerit si mea charta; dato.
Et si non dederis, Cæsar, permitte rogari:
Offendunt nunquam thura precesque Jovem.
Qui fingit sacros auro vel marmore vultus,
Non facit ille deos: qui rogat, ille facit.

In Oppianum. XXV.

Vidisti semel, Oppiane, tantum
Ægrum me male: sæpe te videbo.

Ad Domitianum. XXVI.

Non tot in Eòis timuit Gangeticus arvis
Raptor, in Hyrcano qui fugit albus equo,
Quot tua Roma novas vidit, Germanice, tigres:
Delicias potuit nec numerare suas.
Vincit Erythræos tua, Cæsar, arena triumphos,
Et victoris opes divitiasque dei.
Nam cùm captivos ageret sub curribus Indos,
Contentus geminâ tigride Bacchus erat.

Ad Gaurum. XXVII.

Munera qui tibi dat locupleti, Gaure, senique;
Si sapias & sentis, hic tibi ait, morere.

De toga sibi à Parthenio donata. XXVIII.

Dic toga, facundi gratum mihi munus amici,
Esse velis cujus fama decusque gregis?
Appula Ledæi tibi floruit herba Phalanti,
Quâ saturat Calabris culta Galesus aquis?

An Tarteſſiacus ſtabuli nutritor Iberi
 Bætis in Hesperia te quoque lavit ove ?
 An tua multifidum numeravit lana Timavum,
 Quem prius aſtrifero Cyllarus ore bibit ?
 Te nec Amyclæo decuit vivere veneno :
 Nec Miletus erat vellere digna tuo.
 Lilia tu vincis, nec adhuc delapſa liguſtra,
 Et Tiburtino monte quod albet ebur.
 Spartanus tibi cedit olor, Paphiæque columbæ ;
 Cedit Erythræis eruta gemma vadis..
 Sed, licet hæc primis nivibus ſint æmula dona,
 Non ſunt Parthenio candidiora ſuo.
 Non ego prætulærim Babylonica picta ſuperbè
 Texta, Semiramidæ quæ variantur acu.
 Non Athamanteo potius me mirer in auro ;
 Æolium dones ſi mihi, Phryxe, pecus.
 O quantos riſus pariter ſpectata movebit
 Cum Pallatina noſtra lacerna toga !

De Diſtichis. XXIX.

Diſticha qui ſcribit, puto, vult brevitate placere.
 Quid prædeſt brevitæ, dic mihi, ſi liber eſt ?

De ſpectaculo Scævole. XXX.

Qui nunc Cæſaræ lufus ſpectatur arenæ,
 Temporibus Bruti gloria ſumma fuit :
 Aſpicias, ut teneat flammas, poenæque fruatur
 Fortis, & attonito regnet in igne manus !
 Ipſe ſui ſpectator adeſt, & nobile dextræ
 Funus amat : totis paſcitur illa ſacris.

Quod niſi rapta foret nolenti poena, parabat
 Sævior in laſſos ire ſiniſtra focos.

Scire piget, poſt tale decus, quid fecerit ante :
 Quam vidi, ſatis eſt hanc mihi noſſe manum.

De columba Aretulle, XXXI.

Aera per tacitum delapſa ſedentis in ipſos
 Fluxit Aretullæ blanda columba ſinus.
 Luſerat hoc caſus, niſi inobſervata maneret,
 Permiſſæque diu nollæt abire fugâ.

Si meliora piæ fas est sperare sorori,
 Et dominum mundi flectere vota valent:
 Hæc à Sardôis tibi forsitan exsulis oris,
 Fratре reversuro, nuncia venit avis.

Ad Paullum, de phiala. XXXII.

DE prætoria folium mihi, Paulle, corona
 Mittis, & hoc phialæ nomen habere jubes.
 Hâc fuerat nuper nebulâ tibi pegma perunctum,
 Pallida quam rubri diluit unda croci.
 An magis astuti derafa est ungue ministri
 Bractea de fulcro (quod reor esse) tuo?
 Illa potest culicem longè sentire volentem,
 Et minimi pennâ papilionis agi.
 Exiguæ volitat suspensâ vapore lucernæ,
 Et leviter fuso rumpitur iستا mero.
 Hoc linitur sputo Jani caryota Calendis,
 Quam fert cum parvo sordidus asse cliens:
 Lenta minùs gracili crescunt colocasia filo:
 Plena magis nimio lilia Sole cadunt:
 Nec vaga tam tenui discursat aranea tela;
 Tam leve nec bombyx pendulus urget opus.
 Crassior in facie vetulæ stat creta Fabullæ:
 Crassior offensæ bulla tumescit aquæ:
 Fortior & tortos servat vesica capillos,
 Et mutat Latias spuma Batava comas.
 Hâc cute Ledæo vestitur pullus in ovo:
 Talia lunatâ splenia fronte sedent.
 Quid tibi cum phiala, ligulam cum mittere posses?
 Mittere cum posses vel cochleare mihi?
 Magna nimis loquimur, cochleam cum mittere posses?
 Denique cum posses mittere, Paulle, nihil.

In factatorem. XXXIII.

Archetypum Myos argentum te dicis habere:
 Quod sine te factum est, hoc magis archetypum est.

In pessimos conjuges. XXXVI.

Cum sitis similes, pareſque vitâ,
 Uxor peſſima, peſſimus maritus;
 Miror, non bene convenire vobis.

Ad Domitianum. XXXV.

Regia Pyramidum, Cæſar, miracula ride:
 Jam tacet Eðum barbara Memphis opus.
 Pars quota Parrhæſiæ labor eſt Mareoticus aula?
 Clarius in toto nil videt orbe dies.
 Septenos pariter credas adſurgere montes:
 Theſſalicum brevior Pelion Oſſa tulit.
 Æthera fic intrat, nitidis ut conditus aſtris,
 Inferiore tonet nube ſerenus apex.
 Et prius arcano ſatietur lumine Phœbi,
 Naſcentis Circe quàm videt ora patris.
 Hæc, Auguſte, tamen, quæ vertice ſidera pulſat,
 Par domus eſt coelo: ſed minor eſt domino.

Ad Polycarum. XXXVI.

Quod Cajetano reddis, Polycarme, tabellas,
 Millia te centum num tribuiſſe putas?
 Debuît hæc, inquis: tibi habe, Polycarme, tabellas,
 Et Cajetano millia crede duo.

Ad Meliorem. XXXVII.

Qui præſtat pietate pertinaci
 Senſuro bona liberalitatis,
 Capet forſitan, aut vicem reſcat.
 At ſi quis dare nomini relicto
 Poſt manes, tumulumque perſeveret,
 Quærit quid niſi parcius dolere?
 Refert ſis bonus, an velis videri.
 Præſtas hoc, Melior, ſciente famâ:
 Qui ſolem nibus anxius ſepulti
 Nomen non ſinis interire Blæſi;
 Et de munifica profuſus arca
 Ad natalitium diem colendum,
 Scribarum memori piæque turbæ

Quod

Quòd donas, facis ipse Blæfianum.
Hoc longùm tibi vita dum manebit,
Hoc & post cineres erit tributum.

Ad Domitianum. XXXVIII.

Qui Pallatinæ caperet convivia mensæ,
Ambrosiasque dapes, non erat antè locus.
Hic haurire decet sacrum, Germanice, nectar,
Et Ganymedeâ pocula mixta manu.
Esse velis, oro, serus conviva Tonantis :
At tu si properas Jupiter, ipse veni.

Ad Priapum. XXXIX.

Non horti, neque palmitis beati,
Sed rari nemoris, Priape, custos,
Ex quo natus es, & potes renasci,
Furaces, moneo, manus repellas,
Et sylvam domini focus reserves.
Si defecerit hæc, & ipse lignum es.

Ad Faustinum. XL.

Tristis Athenagoras non misit munera nobis,
Quæ medio brumæ mittere mense solet.
An sit Athenagoras tristis, Faustine, videbo :
Me certè tristem fecit Athenagoras.

Ad Mathonem. XLI.

Si te sportula major ad beatos
Non corruperit, ut solet : licebit
De nostro, Matho, centies laveris.

In Fabium & Christillam. XLII.

Effert uxores Fabius, Christilla maritos;
Funereamque toris quassat uterque facem.
Victores committe Venus : quos iste manebit
Exitus, una duos ut Libitina ferat.

Ad Titullum. XXIII.

Titulle, moneo, vive semper ; hoc serum est :
Sub pædagogo coeperis licet, serum est,
At tu, miser Titulle, nec senex vivis :
Sed omne limen conteris salutator,
Et manè sudas urbis osculis nudus,

Foroque triplici sparsus ante equos omnes,
 Ædemque Martis, & colosson Augusti,
 Curris per omnes tertiasque, quintasque.
 Rape, congere, aufer, posside : relinquendum est.
 Superba densis arca palleat nummis,
 Centum explicentur paginæ Kalendarum :
 Jurabit hæres, te nihil reliquisse ;
 Supraque pluteum te jacente, vel saxum,
 Fartus papyro dum tibi torus crescit,
 Ridebit omnes hic superbior flentes.

Ad Flaccum, de reditu Pr. Terentii. XLIV.

PRiscus ab Ætnæis mihi, Flacce, Terentius oris
 Redditur : hanc lucem lactea gemma notet.
 Defluat, & le^s splendescat turbida limo
 Amphora ceno consule facta minor.
 Continget nox quando meis tam candida mensis ?
 Tam justo dabitur quando calere ... ?
 Cum te, Flacce, mihi reddet Cythereia Cypros,
 Luxuriæ fiet tam bona causa meæ.

In varie se tondentem. XLV.

PArs maxillarum tonsa est tibi, pars tibi rasa est,
 Pars vulsa est : unum quis putet esse caput ?

De abollâ Crispini. XLVI.

Nescit cui dederit Tyriam Crispinus abollam,
 Dum mutat cultus, induiturque togam.
 Quisquis habes, humeris sua munera redde, precamur :
 Non hoc Crispinus, te sed abolla rogat.
 Non quicumque capit saturatas murice vestes,
 Nec nisi deliciis convenit iste color.
 Si te præda juvat, foedique insania lucri,
 Quò possis melius fallere, sume togam.

De Aspro. XLVII.

Formosam planè, sed cæcus diligit Asper.
 Plus ergo, ut res est, quàm videt, Asper amat.

Ad Domitianum. XLVIII.

Quanta Gigantei memoratur mensa triumphi,
 Quantaque nox superis omnibus illa fuit ;
 Quâ

Quâ bonus accubuit genitor cum plebe deorum,
 Et licuit Faunis poscere vina Jovem :
 Tanta tuas, Cæsar, celebrant convivia laurus :
 Exhilarant ipsos gaudia nostra deos.
 Vescitur omnis eques tecum, populusque, patresque ;
 Et capit ambrosias cum duce Roma dapes.
 Grandia pollicitus, quanto majora dedisti ;
 Promissa est nobis sportula, recta data est.

De phiala Instantii Rufi. XLIX.

Quis labor in phiala ? docti Myos, anne Myronis ?
 Mentoris hæc manus est, an, Polyclete, tua ?
 Livescit nullâ caligine fusca, nec odit
 Exploratores nubila massa focos.
 Vera minùs flavo radiant electra metallo,
 Et niveum felix pustula vincit eburnum.
 Materiæ non cedit opus : sic alligat orbem,
 Plurima ~~can-~~ tota lampade Luna nitet.
 Stat caper Æolio Thebani vellere Phryxi
 Cultus : ab hoc mallet vecta fuisse soror.
 Hunc nec Cinyphius tonsor violaverit, & tu
 Ipse tua pasci vite, Lyæ, velis.

Terga premit pecoris geminis Amor aureus alis :
 Palladius tenero lotos ab ore sonat.
 Sic Methymnæo gavissus Arione delphin
 Languida non tacitum per freta vexit onus.
 Imbuat egregium digno mihi nectare munus
 Non grege de domini, sed tua, Ceste, manus:
 Ceste decus mensæ, misce Setina : videtur
 Ipse puer nobis, ipse sitire caper.
 Det numerum cyathis Instanti litera Rufi :
 Auctor enim tanti muneris ille mihi.

Ad Ceditianum, de puero tonsore suo. L.

Tonsorem puerum, sed arte talem,
 Qualis nec Thalamus fuit Neronis,
 Drusorum cui contigere barbæ,
 Æquandas semel in genas rogatus,
 Rufo, Ceditiane, commodavi.

Dum iussus repetit pilos eosdem,
 Censurâ speculi manum regente ;
 Expingitque cutem, facitque longam
 Detonsis epaphæresim capillis ;
 Barbatus mihi tonsor est reversus.

In Catullam. LI.

Formosissima quæ fuere, vel sunt,
 Sed vilissima quæ fuere, vel sunt ;
 O quam te fieri, Catulla, vellem
 Formosam minùs, aut magis pudicam !

Ad Domitianum. LII.

Magna licèt toties tribuas, majora daturus
 Dona, ducum victor, victor & ipse tui :
 Diligeris populo non propter præmia, Cæsar ;
 Propter te populus præmia, Cæsar, amat.

Ad eundem de leone. LIII.

Auditur quantum Massyla per avia murmur,
 Innumero quoties sylva leone furit ;
 Pallidus attonitos ad Poena mapalia pastor
 Cum revocat tauros, & sine mente pecus :
 Tantus in Ausonia fremuit modò terror arena.
 Quis non esse gregem crederet ? unus erat :
 Sed cujus tremarent ipsi quoque jura leones,
 Cui diadema daret marmore picta Nomas.
 O quantum per colla decus, quem spargit honorem,
 Aurea lunatæ cùm stetit unda jubæ !
 Grandia quàm deceuit latum venabula pectus,
 Quantaque de magna gaudia morte tulit !
 Unde tuis, Libye, tam felix gloria sylvis ?
 A Cybeles numquid venerat ille jugis ?
 An magis Herculeo, Garmanice, misit ab astro
 Hanc tibi vel frater, vel pater ipse, feram ?

Ad Flaccum. LIV.

Temporibus nostris ætas cùm cedat avorum,
 Creverit & major cum duce Roma suo :
 Ingenium sacri miraris abesse Maronis,
 Nec quemquam tantâ bella sonare tubâ.

Sint

Sint Mecænates, non deerunt, Flacce, Marones,
 Virgiliūque tibi vel tua rura dabunt.
 Jugera perdiderat miseræ vicina Cremonæ,
 Flebat & abductas Tityrus æger oves:
 Risit Tuscus eques, paupertatemque malignam
 Reppulit, & celeri jussit abire fugâ.
 Protinus Italiam concepit, & *Arma Virumque*,
 Qui modò vix Culicem flevrat ore rudi.
 Quid Varos, Marfosque loquar, ditataque vatum
 Nomina, magnus erit quos numerare labor?
 Ergo ero Virgilius, si munera Mecænatis
 Des mihi? Virgilius non ero, Marsus ero.

De Picente. LV.

T Res habuit dentes, pariter quos expuit omnes,
 Ad tumulum Picens dum sedet ipse suum.
 Collegitque sinu fragmenta novissima laxi
 Oris, & aggestâ contumulavit humo.
 Ossa licet quondam defuncti non legat hæres:
 Hoc sibi jam Picens præstitit officium.

In Artemidorum. LVI.

C Um tibi tam crassæ sint, Artemidore, lacernæ,
 Possim te Sagarum jure vocare meum.

In luscum furem. LVII.

A Dspicis hunc uno contentum lumine, cujus
 Lippa sub attrita fronte lacuna patet?
 Ne contemne caput; nihil est furacius illo:
 Non fuit Autolyçi tam piceata manus.
 Hunc tu convivam cautus vitare memento:
 Tunc furit, atque oculo luscus utroque videt.
 Pocula solliciti perdunt ligulasque ministri,
 Et latet in tepido plurima mappa sinu.
 Lapsa nec à cubito subducere pallia nescit,
 Et tectus lænis sæpe duabus abit.
 Nec dormitantem vernam fraudare lucernâ
 Erubuit fallax, ardeat illa licet.
 Si nihil invasit, puerum tunc arte dolosâ
 Circuit, & soleas surripit ipse suas.

In Claudiam. LVIII.

Summa Palatini poteras æquare Colossi,
Si fieres brevior, Claudia, sesquipede.

In Carinum. LIX.

Livet Carinus, rumpitur, furit, plorat,
Et quærit altos, unde pendeat, ramos ;
Non jam quòd orbe cantor & legor toto,
Nec umbilicis quòd decorus & cedro
Spargor per omnes, Roma quas tenet, gentes :
Sed quòd sub urbe rus habemus æstivum,
Vehimurque mulis, non ut ante, conductis.
Quid imprecabor, ô Severe, liventi ?
Hoc opto : mulas habeat, & suburbanum.

De Picente. LX.

Scribit in aversâ Picens epigrammata chartâ :
Et dolet, averso quòd facit ille deo.

In Clytum. LXI.

UT poscas, Clyte, munus, exigasque,
Uno nasceris octies in anno ;
Et solas, puto, tresve, quatuorve
Non natalitias habes Calendas.
Sit vultus tibi lævior licebit
Tritis littoris aridi lapillis.
Sit moro coma nigrior caduco,
Vincas mollitie albicante plumas,
Aut massam modò lactis alligati ;
Tu nobis, Clyte, jam senex videris.
Tam multos quis enim fuisse credat,
Natales Priamive, Nestorisve ?
Sit tandem pudor, & modus rapinis.
Quòd si ludis adhuc, semelque nasci
Uno jam tibi non sat est in anno ;
Natum te, Clyte, nec semel putabo.

Ad Domitianum. LXII.

Hic ubi Fortunæ Reducis fulgentia latè
Templa nitent, felix area nuper erat :

Hic stetit Arctoi formosus pulvere belli
 Purpureum fundens Cæsar ab ore jubar.
 Hic lauro redimita comas, & candida cultu
 Roma salutavit voce manuque ducem.
 Grande loci meritum testantur & altera dona :
 Stat sacer edomitis gentibus arcus ovans.
 Hic gemini currus numerant elephanta frequentem :
 Sufficit immensis aureus ipse jugis.
 Hæc est digna tuis, Germanice, porta triumphis :
 Hos aditus urbem Martis habere decet.

De Consulatu Silii. LXIII.

Augusto pia thura, victimasque
 Pro nostro date Silio, Camoenæ.
 Bis senos jubet en redire fasces
 Nato consule, nobilique virgâ
 Vatis Castaliam domum sonare,
 Rerum prima salus & una Cæsar,
 Gaudenti superest adhuc quod optet
 Felix purpura, tertiusque consul.
 Pompeio dederit licet senatus,
 Et Cæsar genero sacros honores;
 Quorum pacificus ter ampliavit
 Janus nomina, Silius frequentes
 Mavult sic numerare consulatus.

In Cæcilianum. LXIV.

Horas quinque puer nondum tibi nunciat, & tu
 Jam conviva mihi, Cæciliane, venis.
 Cum modò distulerint raucæ vadimonia quartæ,
 Et Floralicias lassæt arena feras.
 Curre, age, & illotos revoca, Calliste, ministros :
 Sternantur lecti : Cæciliane, sede.
 Caldam poscis aquam ; sed nondum frigida venit :
 Alget adhuc nudo clausa culina foco.
 Manè veni potius : nam cur te quinta moretur ?
 Aut cur non serò, Cæciliane, venis ?

Ad Entellum. LXV.

Qui Corcyraei vidit pomaria regis,
 Rus, Entelle, tuæ preferat ille domus.
 Invida purpureos urat ne bruma racemos,
 Et gelidum Bacchi munera frigus edat ;
 Condita perspicuâ vivit vindemia gemmâ,
 Et tegitur felix, nec tamen uva latet.
 Velatum lucet sic per bombycina corpus :
 Calculus in nitida sic numeratur aqua.
 Quid non ingenio voluit natura licere ?
 Autumnum sterilis ferre jubetur hyems.

In Vacerram. LXVI.

Miraris veteres, Vacerra, solos,
 Nec laudas nisi mortuos poëtas.
 Ignoscas petimus, Vacerra : tanti
 Non est, ut placeam tibi, perire.

De Nerva. LXVII.

Quanta quies, placidi tanta est facundia Nervæ ;
 Sed cohibet vires ingeniumque pudor.
 Cum ficcare sacrum largo Permessida posset
 Ore, verecundam maluit esse sitim ;
 Pieriam tenui frontem redimire coronâ
 Contentus, famæ nec dare vela suæ.
 Sed tamen hunc nostri scit temporis esse Tibullum,
 Carmina qui docti nota Neronis habet.

In Postumianum. LXVIII.

Quatuor argenti libras mihi tempore brumæ
 Misisti ante annos, Postumiane, decem.
 Speranti plures (nam stare, aut crescere debent
 Munera) venerunt plûsve minûsve duæ.
 Tertius & quartus multò inferiora tulerunt.
 Libra fuit quinto Septitiana: quid est ?
 Bessalem ad scutulam sexto pervenimus anno.
 Post hunc in corula rasa selibra data est.
 Octavus ligulam misit sextante minorem :
 Nonus acu levius vix cochleare tulit.

Quod

Quod mittat nobis decimus jam non habet annus,
Quatuor ad libras, Postumiane, redi.

Librum suum Artano mittit. LXXIX.

Nondum murice cultus, asperoque
Morsu pumicis aridi politus,
Artanum properas sequi, libelle:
Quem pulcherrima jam redire Narbo,
Docti patria Narbo Votieni,
Ad leges jubet, annuosque fasces:
Votis quod paribus tibi petendum est,
Continget locus ille, & hic amicus.
Quàm vellem fieri meus libellus!

In malum medicum. LXX.

Hoplomachus nunc es, fueras ophthalmicus ante:
Fecisti medicus, quod facis hoplomachus.

De Gallo Lingono, ad Lucanum. LXXI.

Dum repetit serâ conductos nocte penates
Lingonus à Tecta, Flaminiaque recens;
Expulit offenso vitiatum pollice talem,
Et jacuit toto corpore fusus humi.
Quid faceret Gallus? quâ se ratione moveret?
Ingenti domino servulus unus erat,
Tam macer, ut minimam posset vix ferre lacernam:
Succurrit misero casus, opemque tulit.
Quatuor inscripti portabant vile cadaver,
Accipit infelix qualia mille rogos.
Hos comes invalidus submissâ voce precatur,
Ut quæcunque velint corpus inane ferant.
Permutatur onus, stipataque tollitur altè
Grandis in angusta sarcina sandapila.
Hic mihi de multis unus, Lucane, videtur,
Cui meritò dici, mortue Galle, potest.

In Gallicum. LXXII.

Dic verum mihi, Marce, dic amabò;
Nil est, quod magis audiam libenter:
Sic & cùm recitas tuos libellos,
Et causam quoties agis clientis,

Oras, Gallice, me rogasque semper.
 Durum est me tibi, quod petis, negare.
 Vero verius ergo quid sit, audi:
 Verum, Gallice, non libenter audis.

Ad Liberum amicum. LXXIII.

Liber, amicorum dulcissima cura tuorum,
 Liber, in æterna vivere digne rosa:
 Si sapis, Assyrio semper tibi crinis amomo
 Splendeat, & cingant florea ferta caput.
 Qui sic vel medio finitus vixerit ævo,
 Longior huic facta est, quàm data vita fuit.

De ludis Stellæ ad Cæsarem. LXXIV.

Quos cuperet Phlegræa suos victoria ludos,
 Indica quos cuperet pompa, Lyæ, tuos;
 Fecit Hyperborei celebrator Stella triumphi:

O pudor! ô pietas! & putat esse parum.
 Non illi satis est turbato sordidus auro
 Hermus, & Hesperio qui sonat orbe Tagus.
 Omnis habet sua dona dies, nec linea dives
 Cessat; & in populum multa rapina cadit.
 Nunc veniunt subitis lasciva numismata nimbis:
 Nunc dat spectatas tessera larga feras.
 Nunc implere sinus securos gaudet, & absens
 Sortitur dominos, ne laceretur avis.
 Quid numerem curius, ter denaque præmia palmæ,
 Quæ dare non semper consul uterque solet?
 Omnia sed, Cæsar, tanto superantur honore,
 Quod spectatorem te tua laurus habet.

In Fabullam. LXXV.

Omnes aut vetulas habes amicas,
 Aut turpes, vetulisque foediores:
 Has ducis comites, trahisque tecum
 Per convivia, porticus, theatra.
 Sic formosa, Fabulla, sic puella es.

Ad Domitianum. LXXVI.

Sanctorum nobis miracula reddis avorum,
 Nec pateris, Cæsar, secula cana mori:

Cum

Cum veteres Latiae ritus renovantur arenae,
 Et pugnat virtus simpliciore manu.
 Sic priscis servatur honos, te praeside, templis,
 Et casa tam culto sub Jove numen habet.
 Sic nova dum condis, revocas, Auguste, priora :
 Debentur quae sunt, quaeque fuere, tibi.

De Gellia, ad Papirianum. LXXVII.

Non per mystica sacra Dindymenes,
 Nec per Niliacae bovem juvencae,
 Nullos denique per deos deasque
 Jurat Gellia : sed per uniones.
 Hos amplectitur, hos deosculatur :
 Hos fratres vocat, hos vocat sorores :
 Hos natis amat acrius duobus.
 His si quo careat misella casu,
 Victuram negat esse se nec horam.
 Eheu, quam bene nunc, Papiriane,
 Annæi faceret manus Sereni !

Ad Domitianum. LXXVIII.

Dante tibi turba querulos, Auguste libellos,
 Nos quoque qui domino carmina parva damus,
 Posse deum rebus pariter Musisque vacare
 Scimus ; & hæc etiam ferta placere tibi.
 Fer vates, Auguste, tuos : nos gloria dulcis,
 Nos tua cura prior, deliciæque sumus.
 Non quercus te sola decet, nec laurea Phœbi :
 Fiat & ex edera civica nostra tibi.

Thomas Cooke est
 unus possessor
 hujus libri. M. VAL.
 1697

M. VAL. MARTIALIS
EPIGRAMMATUM
LIBER IX.

Ad Avitum. I.

Non te celabis, sublimi pectore vates,
Cui referet serus premia digna cinis.
Hoc tibi sub nostra breve carmen imagine vivat,
Quam non obscuris jungis, Avite, viris.
Ille ego sum nulli nugarum laude secundus :
Quem non miraris, sed, puto, lector, amas.
Majores majora sonent : mihi parva locuto,
Sufficit in vestras saepe redire manus.

Martialis Turanio suo S.

AVe, mi Turani, frater charissime. Epigramma,
quod extra ordinem paginarum est, ad Sterti-
nium clarissimum virum scripsimus, qui imaginem meam
ponere in bibliotheca sua voluit. De quo scribendam tibi
putavi, ne ignorares Avitus iste quis vocaretur. Vale,
& para hospitium.

De templo Flaviae gentis. II.

Dum Janus hyemes, Domitianus autumnos,
Augustus annis commodabit aestates ;
Dum grande famuli nomen adferet Rheni
Germanicarum magna lux Calendarum :
Tarpeia summi saxa dum patris stabunt :
Dum voce supplex, dumque thure placabit
Matrona dives dulce Julium numen :
Manebit altum Flaviae decus gentis,
Cum sole, & astris, cumque luce Romana.
Invicta quicquid condidit manus, coelum est.

Ad Domitianum. III.

Quam jam superis, Caesar, coeloque dedisti,
Si repetas, & si creditor esse velis ;

Grandis

Grandis in æthereo licet auctio fiat Olympo,
 Coganturque Dei vendere quicquid habent :
 Conturbabit Atlas, & non erit uncia tota,
 Decidat tecum qua pater ipse deum.
 Pro Capitolinis quid enim tibi solvere templis ?
 Quid pro Tarpeïæ frondis honore potest ?
 Quid pro culminibus geminis matrona Tonantis ?
 Pallada prætereo : res agit illa tuas.
 Quid loquar Alciden, Phœbumque, pioſque Laconas ?
 Addita quid Latio Flavia templa polo ?
 Exspectes, & sustineas, Auguste, necesse est :
 Nam tibi quod solvat, non habet arca Jovis.

In Paullam. IV.

Nubere vis Prisco, non miror, Paulla : sapisti.
 Ducere te non vult Priscus : & ille sapit.

Ad Domitianum. V.

Tibi, summe Rheni domitor, & parens orbis,
 Pudice princeps, gratias agunt urbes ;
 Populos habebunt : parere jam scelus non est.
 Qui nec cubili fuerat ante te quondam.
 Pudor, esse per te coepit & lupanari.

In Afrum. VI.

Dicere de Libycis reduci tibi gentibus, Afer,
 Continuis volui quinque diebus Ave.
 Non vacat, aut dormit, dictum bis terque reverso :
 Jam satis est. non vis, Afer, avere : vale.

Ad Bithynicum. VII.

Nil tibi legavit Fabius, Bithynice, cui tu
 Annua, si memini, millia sena dabas.
 Pius nulli dedit ille : queri, Bithynice, noli :
 Annua legavit millia sena tibi.

In Cantharum. VIII.

Coenes, Canthare, cum foris libenter :
 Clamas, & maledicis, & minaris.
 Deponas animos truces, monemus ;
 Liber non potes, & gulosus esse.

De Earino Domitiani. IX.

NOmen cum violis rosisque natum,
 Quo pars optima nuncupatur anni;
 Hyblam quod sapit, Atticosque flores,
 Quod nidos olet alitis superbæ:
 Nomen nectare dulcius beato,
 Quo mallet Cybeles puer vocari,
 Et qui pocula temperat Tonanti:
 Quod si Parrhasia sonet in aula;
 Respondent Veneres, Cupidinesque:
 Nomen nobile, molle, delicatum
 Versu dicere non rudi volebam:
 Sed tu syllaba contumax repugnas.
 Dicunt Earinon tamen Poëtæ,
 Sed Græci, quibus est nihil negatum,
 Et quos ἀπὲς ἀπὲς decet sonare;
 Nobis non licet esse tam disertis,
 Qui Musas colimus severiores.

De eodem. X.

SI daret autumnus mihi nomen, ὀπώριον ἦν ἔσμεν:
 Horrida si brumæ sidera, χειμῆριον
 Dictus ab æstivo θεῖον ἔσσι tibi mense vocarer.
 Tempora cui nomen verna dedere, quis est?

De eodem. XI.

NOmen habes, teneri quod tempora nuncupat
 anni,
 Cum breve Cecropiæ ver populantur apes.
 Nomen, Acidalia meruit quod arundine pingi,
 Quod Cytherea suâ scribere gaudet acu.
 Nomen, Erythræis quod litera facta lapillis,
 Gemma quod Heliadum pollice trita notet:
 Quod penna scribente grues ad sidera tollant;
 Quod decet in sola Cæsaris esse domo.

In amicum canipetam. XII.

HUnc, quem coena tibi, quem mensa paravit amicū,
 Esse putas fidæ pectus amicitiae?

Aprum

Aprum amat, & mullos, & fumen, & ostrea; non te.
 Tam bene si coenem, noster amicus erit.

De Chloë. XIII.

Inscripsit tumulo septem celebrata virorum,
 Se fecisse, Chloë: quid pote simplicius?

De coma Earini. XIV.

Consilium formæ speculum, dulcesque capillos
 Pergameo posuit dona sacrata deo
 Ille puer tota domino gratissimus aula,
 Nomine qui signat tempora verna suo.
 Felix, quæ tali censetur munere, tellus!
 Nec Ganymedeas mallet habere comas.

De eadem ad Æsculapium. XV.

Latonæ venerande nepos, qui mitibus herbis
 Parcarum exoras pensa, brevesque colos:
 Hos tibi laudatos domino sua vota capillos
 Ille tuus Latia misit ab urbe puer.
 Addidit & nitidum sacratis crinibus orbem,
 Quo felix facies iudice tota fuit.
 Tu juvenile decus serva, ne pulchrior ille
 In longa fuerit, quàm brevior coma.

Ad Domitianum. XVI.

Est mihi, sitque precor longum te præside, Cæsar,
 Rus minimum: parvi sunt & in urbe Lares.
 Sed de valle brevi, quas det sitientibus hortis,
 Curva laboratas antlia tollit aquas.
 Sicca domus queritur nullo se rore foveri,
 Cùm mihi vicino Martia fonte sonet.
 Quam dederis nostris, Auguste. Penatibus undam,
 Castalis hæc nobis, aut Jovis imber erit.

In Sabellum. XVII.

Laudas balnea versibus trecentis
 Coenantis bene Pontici, Sabelle.
 Vis coenare, Sabelle, non lavari.

Ad Domitianum. XVIII.

Hæc quæ tota patet, tegiturq; & marmore, & auro,
 Infantis domini conscia terra fuit.

Felix

Felix quæ tantis sonuit vagitibus, & quæ
 Vidit reptantes, sustinuitque manus !
 Hic steterat veneranda domus, quæ præstitit orbi,
 Quod Rhodos, astringero quod pia Creta polo.
 Curetes texere Jovem crepitantibus armis,
 Semiviri poterant qualia ferre Phryges.
 At te protexit Superum pater, & tibi, Cæsar,
 Pro jaculo & parma, fulmen & ægis erat.

Ad Pastorem. XIX.

CRedis ob hoc me, Pastor, opes fortasse rogare,
 Propter quod vulgus, crassaque turba rogat :
 Ut Serina meos consumat gleba ligones,
 Et sonet innumerâ compede Tusculus ager :
 Ut Mauri Libycis centum stent dentibus orbes,
 Et crepet in nostris aurea lamina toris ;
 Nec labris nisi magna meis chrystalla terantur,
 Et faciant nigras nostra Falerna nives :
 Ut Canusinatus nostro Syrus assere fudet,
 Et mea sit culto sella cliente frequens :
 Ut lutulenta linat Tyrias mihi mula lacernas,
 Et Massyleum virga gubernet equum.
 Est nihil ex istis : superos ac sidera testor.
 Ergo quid ? ut donem, Pastor, & ædificem.

Ad Carum. XX.

OCui virgineo flavescente contigit auro,
 Dic, ubi Palladium sit tibi, Care, decus ?
 Adspicis (en) domini fulgentes marmore vultus,
 Venit ad has ultro nostra corona comas.
 Albanæ livere potest pia quercus olivæ,
 Cinxerit invictum quod prior illa caput.

Ad eundem. XXI.

Quis Pallatinos imitatus imagine vultus
 Phidiacum Latio marmore vicit ebur ?
 Hæc mundi facies ; hæc sunt Jovis ora sereni :
 Sic tonat ille deus, cum sine nube tonat.
 Non solam tribuit Pallas tibi, Care, coronam :
 Effigiem domini, quam colis, illa dedit.

De Nerva. XXII.

Audet facundo qui carmina mittere Nervæ,
 Pallia donabit glaucina, Cosme, tibi :
 Pæstano violas, & cana ligustra colono,
 Hyblæis apibus Corsica mella dabit.
 Sed tamen & parvæ nonnulla est gratia Musæ :
 Appetitur posito vilis oliva lupo.
 Nec tibi sit mirum, modici quòd conscia vatis
 Judicium metuat nostra Thalia tuum.
 Ipse tuas etiam veritus Nero dicitur aures,
 Lascivum juvenis cùm tibi lussit opus.

Epitaphium Latini. XXIII.

Dulce decus scenæ, ludorum fama, Latinus
 Ille ego sum ; plausus, deliciæque tuæ :
 Qui spectatorem potui fecisse Catonem,
 Solvere qui Curios, Fabriciosque graves.
 Sed nihil à nostro sumpsit mea vita theatro,
 Et solâ tantùm scenicus arte feror.
 Nec poteram gratus domino sine moribus esse :
 Interiùs mentes inspicit ille deus.
 Vos me laurigeri parasitum dicite Phœbi,
 Roma sui famulum dum sciat esse Jovis.

Epitaphium Phlani. XXIV.

Secula Nestoræ permensa, Philæni, senectæ,
 Rapta es ad infernas tam citò Ditis aquas ?
 Euboicæ nondum numerabas longa Sibyllæ
 Tempora : major erat mensibus illa tribus.
 Heu quæ lingua filet ! non illam mille catastæ
 Vincebant, nec quæ turba Serapin amat :
 Nec matutini cirrata caterva magistri,
 Nec quæ Strymonio de grege ripa sonat.
 Quæ nuuc Thessalico Lunam deducere rhombo,
 Quæ sciet hos illos vendere lena toros ?
 Sit tibi terra levis, mollique tegaris arenâ,
 Ne tua non possint eruere ossa canes.

In pietatem Nigrina. XXV.

C Appadocum sævis Antistius occidit oris
 Rusticus: & tristi crimine terra nocens!
 Rettulit ossa sinu chari Nigrina mariti,
 Et quæsta est longas non satis esse vias:
 Cumq; daret sanctam tumulis, quibus invidet, urnam,
 Visa sibi est raptò bis viduata viro.

De Velii votivo anser, ad Cæsarem. XXVI.

D Um comes Arctoïs hæreret Cæsaris armis
 Velius, hanc Marti pro duce vovit avem.
 Luna quater binos non tota peregerat orbes,
 Debita poscebat jam sibi vota deus.
 Ipse suas anser properavit lætus ad aras;
 Et cecidit sanctis hostia parva focis.
 Octo vides patulo pendere numismata rostro
 Alitis? hæc extis condita nuper erant.
 Quæ litat argento pro te, non sanguine, Cæsar,
 Victima, jam ferro non opus esse docet.

De templo gentis Flavia. XXVII.

Jupiter Idæi risit mendacia busti,
 Dum videt Augusti Flavia templa poli:
 Atque inter mensas largo jam nectare fusus,
 Pocula cùm Marti traderet ipse suo;
 Respiciens Phœbum pariter Phœbique sororem,
 Cum quibus Alcides, & pius Arcas erat;
 Cnossia vos, inquit, nobis monumenta dedistis:
 Cernite quàm plus sit Cæsaris esse patrem.

In Philomusum. XXVIII.

Artibus his semper coenam, Philomuse, mereris,
 Plurima dum fingis, sed quasi vera refers.
 Scis quid in Arfacia Pacorus deliberat aula;
 Rhenanam numeras, Sarmaticamque manum.
 Verba ducis Daci chartis mandata resignas;
 Victtricem laurum quàm venit antè vides.
 Scis quoties Phario madeat Jove fusca Syene:
 Scis quota de Libyco littore puppis eat:

Cujus

Cujus Iuleæ capiti nascantur olivæ ;
Destinet æthereus cui sua ferta pater.
Tolle tuas artes, hodie cœnabis apud me ;
Hâc lege : ut narres nil, Philomuse, novi.

In Gallam. XXIX.

CUm sis ipsa domi, mediâ exornare Suburrâ,
Fiunt absentes & tibi, Galla, comæ :
Nec dentes aliter quàm Serica nocte reponis ;
Atque jaces centum condita pyxidibus :
Nec tecum facies tua dormit, ut innuis illò,
Quod tibi prolatum est manè, supercilio.

Ad Agathinum. XXX.

Summa licèt velox, Agathine, pericula ludas,
Non tamen efficles, ut tibi parma cadat.
Nolentem sequitur, tenuesque reversa per auras,
Vel pede, vel tergo, clune, vel ungue sedet.
Lubrica Corycio quamvis sint pulpita nimbo,
Et rapiant celeres vela negata Noti :
Securos pueri neglecta perambulat artus,
Et nocet artifici ventus & unda nihil.
Ut peccare velis, cùm feceris omnia, falli
Non potes : arte opus est, ut tibi parma cadat.

De Natali Cæsonia. XXXI.

Prima Palatino lux est hæc orta Tonanti,
Optasset Cybele quâ peperisse Jovem.
Hac & sancta mei genita est Cæsonia Rufi :
Plus debet matri nulla puella suæ.
Lætatur geminâ votorum sorte maritus,
Contigit hunc illi quòd bis amare diem.

Ad Apollinem pro Stella. XXXII.

Campis dives Apollo sic Myrinis,
Sic semper senibus fruarè cynis ;
Doctæ sic tibi serviant sorores,
Nec Delphis tua mentiatur ulli ;
Sic Pallatia te colant, amentque :
Bis senos citò te rogante fasces

Det Stellæ bonus annuatque Cæsar.
 Felix tunc ego, debitorque voti
 Casurum tibi rusticas ad aras
 Ducam cornibus aureis juvencum.
 Nata est hostia, Phœbe, quid moraris?

De statua Herculis juxta mensam Vindiciis. XXXIII.

Hic, qui dura sedens porrecto saxa leone
 Mitigat, exiguo magnus in ære deus,
 Quæque tulit, spectat resupino sidera vultu,
 Cujus læva calet robore, dextra mero:
 Non est fama recens, nec nostri gloria cœli:
 Nobile Lysippi munus opusque vides.
 Hoc habuit numen Pellæi mensa tyranni,
 Qui citò perdomito victor in orbe jacet.
 Hunc puer ad Libycas juraverat Hannibal aras:
 Jussierat hic Syllam ponere regna trucem.
 Offensus variæ tumidis terroribus aula,
 Privatos gaudet nunc habitare lares.
 Utque fuit quondam placidi conviva Molorchi,
 Sic voluit docti Vindicis esse deus.

De eadem statua. XXXIV.

Alciden modò Vindicis rogabam,
 Effet cujus opus laborque felix.
 Risit (nam solet hoc) levique nutu,
 Græcè numquid, ait, poëta, nescis?
 Inscripta est basis, indicatque nomen.
 Λυσίππου lego, Phidiæ putavi.

Ad Marcellinum. XXXV.

Milles Hyperboreos modò, Marcelline, Triones,
 Et Getici tuleris sidera pigra poli;
 Ecce Prometheæ rupes & fabula montis
 Quàm propè sunt oculis nunc adeunda tuis.
 Videris immensis cùm conclamata querelis
 Saxa senis, dices: durior ille fuit.
 Et licet hoc addas: potuit qui talia ferre.
 Humanum meritò finxerat ille genus.

In Gellium. XXXVI.

Gellius ædificat semper : modò limina ponit,
 Nunc foribus claves aptat, emitque seras :
 Nunc has nunc illas mutat, reficitque fenestras.
 Dum tamem ædificet, quidlibet ille facit.
 Oranti nummos ut dicere possit amico
 Unum illud verbum Gellius, *adifiso*.

In Pannicum. XXXVII.

Democritos, Zenonas, inexplicitosque Platonas,
 Quicquid & hirsutis squalet imaginibus,
 Sic quasi Pythagoræ loqueris successor, & hæres ;
 Præpendet mento nec tibi barba minor.
 Tu qui sectarum causas & pondera nōsti,
 Dic mihi, scortari, Pannice, dogma quod est ?

In Gallicum. XXXVIII.

Hæredem cū me partis tibi, Gallice, quartæ
 Per tua jurares sacra, caputque tuum,
 Credidimus, (quis enim damnet sua vota libenter ?)
 Et spem muneribus fovimus usque datis :
 Inter quæ rari Laurentem ponderis aprum
 Misimus, Ætola de Calydone putes.
 At tu continuo populumque, patresque vocasti :
 Ruçtat adhuc aprum callida Roma meum.
 Ipse ego (quis credat ?) conviva nec ultimus hæsi :
 Sed nec costa data est, caudave missa mihi.
 De quadrante tuo quid sperem, Gallice ? nulla
 De nostro nobis uncia venit apro.

De toga à Parthenio sibi donata. XXXIX.

Hæc est illa meis multum cantata libellis,
 Quam meus edidicit lector amatque togam.
 Partheniana fuit, quondam memorabile vatis
 Munus : in hac ibam conspiciendus eques ;
 Dum nova, dum nitidâ fulgebat splendida lanâ,
 Dumque erat auctoris nomine digna sui.
 Nunc anus, & tremulo vix accipienda tribuli,
 Quam possis niveam dicere jure togam.

Quid

Quid non longa dies, quid non consumitis anni?
Hæc toga jam non est Partheniana : mea est.

Ad Gaurum. XL.

Ingenium mihi, Gaure, probas sic esse pusillum ;
Carmina quòd faciam, quæ brevitæ placent.
Confiteor : sed tu bis denis grandia libris
Qui scribis Priami prælia, magnus homo es.
Nos facinus Bruti puerum, nos Lagona vivum :
Tu magnus luteum, Gaure, Giganta facis.

De Lucano & Tullo. XLI.

Quòd semper superos invito fratre rogâsti,
Hoc, Lucane, tibi contigit, antè mori.
Invidet ille tibi : Stygias nam Tullus ad undas
Optabat, quamvis sit minor, ire prior.
Tu colis Elysios, nemorisque habitator amoeni
Esse tuo primùm nunc sine fratre cupis.
Et si jam nitidis alternus venit ab astris ;
Pro Polluce mones Castora, ne redeat.

Ad Quintum Ovidium. XLII.

Si credis mihi, Quinte (quòd mereris)
Natales, Ovidi, tuos Apriles,
Ut nostras amo Martias Kalendas.
Felix utraque lux ; diesque nobis
Signandi melioribus lapillis.
Hic vitam tribuit, sed hic amicum:
Plus dant, Quinte, mihi tuæ Kalendæ.

Ad eundem. XLIII.

Natali tibi, Quinte, tuo dare parva volebam
Munera: tu prohibes ; imperiosus homo es.
Parendum est monitis. fiat quod uterque jubemus :
Et quod utrumque juvat, tu mihi, Quinte, dato.

Ad cognatum. XLIV.

Si mihi Picenâ turdus palleret olivâ,
Tenderet aut nostras sylvæ Sabina plagas,
Aut crescente levis traheretur arundine præda,
Pinguis & implicitas virga teneret aves :

Eara darat solenne tibi cognatio munus,
 Nec frater nobis, nec prior esset avus.
 Nunc sturnos inopes, fringillarumque querelas
 Audit, & arguto passere vernat ager.
 Inde salutatus picæ respondet arator:

Hinc propè summa rapax milvus in astra volat.
 Mittimus ergo tibi parvæ munuscula cortis,
 Qualia si recipis, sæpe propinquus eris.

Ad Flaccum, de Caristiis. XLV.

Luce propinquorum, quâ plurima mittitur ales;
 Dum Stellæ turdos, dum tibi, Flacce, paro:
 Succurrit nobis ingens onerosaque turba;
 In qua se primum quisque meumque putat.
 Demeruisse duos, votum est: offendere plures,
 Vix tutum: multis mittere dona, grave est.
 Quâ possum solâ veniam ratione merebor:
 Nec Stellæ turdos, nec tibi, Flacce, dabo.

In Hedylium. XLVI.

Nil est tritius Hedyli lacernis:
 Non ansæ veterum Corinthiorum,
 Nec crus compede lubricum decenni,
 Non ruptæ recutita colla mulæ,
 Nec quæ Flaminiam secant salebræ,
 Nec qui littoribus nitent lapilli,
 Nec Tuscâ ligo vineâ politus,
 Nec pallens roga mortui tribulis,
 Nec pigri rota quassa mulionis,
 Nec rasum cavea latus bisontis,
 Nec dens jam senior ferocis apri.
 Res una est tamen, (ipse non negabit)
 Frons est tritior Hedyli lacernis.

Ad Nympham Sabini. XLVII.

Nympa sacri regina lacus, cui grata Sabinus
 Et mansura pio munere templa dedit;
 Sic montana tuos semper colat Umbria fontes,
 Nec tua Baianas Sarfina malit aquas:
 Excipe sollicitos placidè, mea dona, libellos:
 Tu fueris Musis Pegasis unda meis.

Nym-

Nympharum templis quisquis sua carmina donat,
Quid fieri libris debeat, ipse monet.

In Mamurram. XLVIII.

IN septis Mamurra diu multumque vagatus,
Hic ubi Roma suas aurea vexat opes,
Inspicit Illyricos grandes, oculisque pererrat
Non hos, quos primæ prostituere casæ,
Sed quos arcanæ servant tabulata catastæ,
Et quos non populus, nec mea turba videt.
Inde satur mentas, & opertos exuit orbes,
Expositumque altè pingue poposcit ebur :
Et testudineum mensus quater hexaclinon,
Ingemuit citro non satis esse suo.
Consuluit nares, an olerent æra Corinthon :
Culpavit statuas, & Polyclete, tuas.
Et turbata brevi questus crystallina vitro,
Myrrhina signavit seposuitque decem.
Expendit veteres calathos, & si qua fuerunt
Pocula Mentoreâ nobilitata manu.
Et virides picto gemmas numeravit in auro,
Quicquid & in nivea grandius aure sonat.
Sardonychas veros mensa quæsit in omni,
Et pretium magnis fecit iaspidibus.
Undecimâ lassus cum jam discederet horâ,
Assè duos calices emit; & Ipse tulit.

Sabino mittit coronam roseam. XLIX.

Seu tu Pæstani genita es, seu Tiburis arvis,
Seu rubuit tellus Tuscula flore tuo :
Seu Prænestino te villica legit in horto ;
Seu modò Campani gloria ruris eras :
Pulchrior ut nostro videre corona Sabino ;
De Nomentano te putet esse meo.

De platano Caesaris. L.

IN Tartessiacis domus est notissima terris,
Quà dives placidum Corduba Bætini amat ;
Vellera nativo pallent ubi flava metallo,
Et linit Hesperium bractea viva pecus :

Ædibus

Ædibus in mediis totos amplexa Penates
Stat platanus densis Cæsariana comis :
Hospitis invicti posuit quam dextera felix,
Coepit & ex illa crescere virga manu,
Auctorem dominumque nemus sentire videtur :
Sic viret, & ramis sidera celsa petit.
Sæpe sub hac madidi luserunt arbore Fauni :
Sæpe sub hac latuit rustica fronde Dryas.
Dumque fugit solos nocturnum Pana per agros,
Terruit & tacitam fistula sera domum :
Atque oluere lares commissatore Lyæo,
Crevit & effuso lætior umbra mero :
Hesternisque rubens dejecta est herba coronis,
Atque suas potuit dicere nemo rosas.
O dilecta deis, ô magni Cæsaris arbor,
Ne metuas ferrum, sacrilegosque focos.
Perpetuos sperare licet tibi frondis honores :
Non Pompeianæ te posuere manus.

De Philani. LI.

Tinctis murice vestibus quod omni
Et nocte utitur, & die Philænis,
Non est ambitiosa, nec superba :
Delectatur odore, non colore.

De statua Domitiani. LII.

Herculis in magni vultus descendere Cæsar
Dignatus, Latiae dat nova templa viæ :
Qua, Triviæ nemorosa petit dum regna, viator
Octavum domina marmor ab urbe legit.
Antè colebatur votis, & sanguine largo :
Majorem Alciden nunc minor ipse colit.
Hunc magnas rogat alter opes, rogat alter honores :
Illi securus vota minora facit.

Ad Herculem, de eadem statua. LIII.

Alcide Latio nunc agnoscende Tonanti,
Postquam pulchra dei Cæsaris ora geris,
Si tibi tunc isti vultus habitusque fuissent,
Cesserunt manibus cum fera monstra tuis ;

Argolico famulum non te servire tyranno
 Vidissent gentes, sævaque regna pati:
 Sed tu iussisses Eurysthea, nec tibi fallax
 Portâsset Nessi perfida dona Lichas.
 Oetæi sine lege rogi securus adisses
 Astra patris summi, quæ tibi pœna dedit.
 Lydia nec dominæ traxisses pensa superbæ:
 Nec Styga vidisses, Tartareumque canem.

In magistrum ludi. LIV.

Quid tibi nobiscum est, ludi scelerate magister,
 Invisum pueris virginibusque caput?
 Nondum cristati rupere silentia galli:
 Murmure jam sævo verberibusque tonas.
 Tam gravè percussis incudibus æra resultant,
 Causidicum medio cùm faber aptat equo.
 Mitior in magno clamor fuit amphitheatro,
 Vincenti palmæ cùm sua turba favet.
 Vicini somnum non totâ nocte rogamus:
 Nam vigilare leve est, pervigilare grave.
 Discipulos dimitte tuos: vis, garrule, quantum
 Accipis ut clames, accipere ut taceas?

In Cæcilianum. LV.

Dixerat, *O mores! O tempora!* Tullius olim,
 Sacrilegum strueret cùm Catilina nefas:
 Cùm gener atque focer diris concurreret armis,
 Mœstaque civili cæde maderet humus.
 Cur nunc *O mores!* cur nunc *O tempora!* dicis?
 Quod tibi non placeat, Cæciliane, quid est?
 Nulla ducum feritas, nulla est insania ferri:
 Pace frui certâ, lætitiâque licet.
 Non nostri faciunt, tua quòd tibi tempora sordent;
 Sed faciunt mores, Cæciliane, tui.

De leone & ariete. LVI.

MAssyli leo fama jugi, pecorisque maritus
 Lanigeri, mirum, quâ coiere fide.
 Ipse licet videas, cavea stabulantur in una,
 Et pariter socias carpit uterque dapes.

Nec foetu nemorum gaudent, nec mitibus herbis:
 Concordem satiat sed rudis agna famem.
 Quid meruit terror Nemees, quid proditor Helles,
 Ut niteant celsi lucida signa poli?
 Sidera si possent pecudesque feræque mereri;
 Hic aries astris, hic leo dignus erat.

Ad Liberum. LVII.

L Iber, Amyclæâ frontem redimite coronâ,
 Qui quatis Ausoniâ verbera Graia manu,
 Clausa mihi texto cùm prandia vimine mittas,
 Cur comitata dapes nulla lagena venit?
 Atqui digna tuo si nomine munera ferres,
 Scis, puto, debuerint quæ mihi dona dari.

In sutorem. LVIII.

D Entibus antiquas solitus producere pelles,
 Et mordere luto putre vetusque solum,
 Prænestina tenes defuncti rura patroni;
 In quibus, indignor, si tibi cella fuit.
 At me literulas stulti docuere parentes:
 Quid cum grammaticis, rhetoribusque mihi?
 Frange leves calamos, & scinde, Thalia, libellos:
 Si dare sutori calceus ista potest.

De effigie Camoni. LIX.

E ffigiem tantùm pueri pictura Camoni
 Servat, & infantis prima figura manet.
 Florentes nullâ signavit imagine vultus,
 Dum timet ora pius muta videre pater.

De balneo Tuccæ. LX.

N On filice duro, struclilive cæmento,
 Nec latere cocto, quo Semiramis longam
 Babylona cinxit, Tucca balneum fecit:
 Sed strage nemorum, pineaque compage,
 Ut navigare Tucca balneo possit.
 Idem beatas lautus extruit thermas
 De marmore omni, quod Carystos invenit,
 Quod Phrygia Synas, Afra quod Nomas mittit,

Et quod virenti fronte lavit Eurotas.
Sed ligna defunt : subice balneum thermis.

De Effigie Camoni. LXI.

Hæc sunt illa mei quæ cernitis ora Camoni;
Hæc pueri facies, primaque forma fuit.
Creverat hic vultus bis denis fortior annis;
Gaudebatque suas pingere barba genas :
Et libata semel summos modò purpura cultus
Sparserat : invidit de tribus una soror :
Et festinatis incidit stamina pensis ;
Absentemque patri rettulit urna rogam.
Sed ne sola tamen puerum pictura loquatur,
Hæc erit in chartis major imago meis.

De convivio Prisci. LXII.

Quod optimum sit disputat convivium
Facunda Prisci pagina :
Et multa dulci, multa sublimi refert,
Sed cuncta docto pectore.
Quod optimum sit quæritis convivium ?
In quod chœraules non venit.

Ad Picentinum. LXIII.

Funera post septem nupsit tibi Galla virorum,
Picentine: sequi vult, puto, Galla viros.

Ad Domitianum. LXIV.

Oderat antè ducum famulos turbamq; minorem,
Et Pallatinum Roma supercilium :
At nunc tantus amor cunctis, Auguste, tuorum ;
Ut sit cuique suæ cura secunda domûs.
Tam placidæ mentes, tanta est reverentia nostri,
Tam pacata quies, tantus in ore pudor.
Nemo suos, (hæc est aulæ natura potentis,)
Sed domini mores Cæsarianus habet.

Ad Aulum. LXV.

Lector & auditor nostros probat, Aule, libellos:
Sed quidam exactos esse poëta negat.
Non nimium curo : nam cœnæ fercula nostræ
Malim convivis, quàm placuisse cocis.

In Cinnam. LXVI.

Dixerat astrologus periturum te citò, Cinna:
 Nec, puto, mentitus dixerat ille tibi.
 Nam tu dum metuis, ne quid post fata relinquas,
 Hauisti patrias luxuriosus opes.

Bisque tuum decies non uno tabuit anno:
 Dic mihi, non hoc est, Cinna, perire citò?

Ad Domitianum. LXVII.

Inter tanta tuæ miracula, Cæsar, arenæ,
 Quæ vincit veterum munera clara ducum,
 Multum oculi, sed plus aures debere fatentur
 Se tibi, quòd spectant, qui recitare solent.

Ad Norbanum. LXVIII.

Cum tua sacrilegos contra, Norbane, furores
 Staret pro domino Cæsare sancta fides:
 Hæc ego Pieria ludebam tutus in umbra,
 Ille tuæ cultor notus amicitiae.

Me tibi Vindelicis raptum narrabat in oris,
 Nescia nec nostri nominis Arctos erat,
 O quoties veterem non inficiatus amicum
 Dixisti; meus est iste poeta, meus!
 Omne tibi nostrum, quod bis trieteride juncta
 Antè dabat lector, nunc dabit auctor opus.

Ad Atilium, de Paulo. LXIX.

Languidior noster si quando est Paullus Atili;
 Non se convivis abstinet ille suis.
 Tu languore quidem subito fictoque laboras,
 Sed mea porrexit sportula, Paulle, pedes.

De filio Silii mortuo. LXX.

Festinata sui gemeret cum fata Severi
 Silius, Ausonio non semel ore potens:
 Cum grege Pierio moestus Phoeboque querebar,
 Ipse meum flevi, dixit Apollo, Linon.
 Respexitque suam, quæ stabat proxima fratri,
 Calliopen, & ait, tu quoque vulnus habes.

Adspice Tarpeium, Pallatinumque Tonantem:
 Ausa nefas Lachesis læsit utrumque Jovem:

Numina cùm videas duris obnoxia fati,
Invidiâ possis exonerare deos.

Ad Luperum. LXXI.

Septem post calices Opimiani
Denso cùm jaceam triente blæsus,
Adfers nescio quas mihi tabèllas,
Et dicis, modò liberum esse jussi
Nastam ; (servulus est mihi paternus,)
Signa: cras meliùs, Luperce, fiet ;
Nunc signat meus annulus lagenam.

Ad Rufum. LXXII.

Dum me captares, mittebas munera nobis :
Postquam cepisti, das mihi, Rufe, nihil.
Ut captum teneas, capto quoque munera mitte,
De cavea fugiat ne malè pastus aper.

Ad Stellam. LXXIII.

LEge nimis durâ convivam scribere versus
Cogis, Stella : licet scribere, nempe malos.

Ad Flaccum. LXXIV.

Sic in gramine floreo reclinis,
Quâ gemmantibus hinc & inde rivis
Curvâ calculus excitatur undâ,
Exclusis procul omnibus molestis,
Perfundas glaciem triente nigro,
Frontem sutilibus ruber coronis :
Infamem nimio calore Cypron
Observes, moneo, precorque, Flacce,
Messes area cùm teret crepantes,
Et fulvi juba sæviet leonis.
At tu, diva Paphi, remitte, nostris
Illæsum juvenem remitte votis.
Sic Martis tibi serviant Kalendæ,
Et cum thure, meroque, victimaque
Libetur tibi candidas ad aras
Secta plurima quadra de placenta.

Adulatur Domitiano. LXXV.

AD coenam si me diversa vocaret in astra
 Hinc invitator Cæsaris, inde Jovis:
 Astra licèt propius, pallatia longius essent,
 Responsa ad superos hæc referenda darem:
 Quærite, qui malit fieri conviva Tonantis;
 Me meus in terris Jupiter, ecce, tenet.

Ad Condylum. LXXVI.

QUæ mala sunt domini, quæ servi commoda nescis,
 Condyle, qui servum te gemis esse diu.
 Dat tibi secures vilis tegeticula somnos:
 Pervigil in pluma Caius, ecce, jacet.
 Caius à prima tremebundus luce salutat
 Tot dominos: at tu, Condyle, nec dominum.
 Quod debes, Cai, redde, inquit Phœbus, & illinc
 Cinnamus: hoc dicit, Condyle, nemo tibi.
 Tortorem metuis? podagrâ, chiragrâque secatur
 Caius; & mallet verbera mille pati.
 Quod nec manè vomis, nec morbo, Condyle, foetes;
 Non mavis, quàm ter Calus esse tuus.

Ad Calocissum. LXXVII.

ADDERE quid cessas, puer, immortale Falernum?
 Quadrantem duplica de seniore cado.
 Nunc mihi dic, quis erit, cui te, Calocisse, deoram
 Sex jubeo cyathos fundere? Cæsar erit.
 Sutilis aptetur decies rosa crinibus, ut sit
 Qui posuit sacræ nobile gentis opus.
 Nunc bis quina mihi da pocula, fiat ut illud
 Nomen, ab Odrysio quod deus orbe tulit.

De Hippocrate. LXXVIII.

SANTONICÂ medicata dedit mihi pocula virgâ:
 Os hominis! mulsam me rogat Hippocrates.
 Tam stupidus nunquam nec tu, puto, Glauce, fuisti,
 Χάλκισι donanti χρύσεια qui dederas.
 Dulce aliquis munus pro munere poscit amaro?
 Accipiat; sed si potat in elleboro.

De Herode. LXXIX.

Clinicus Herodes trullam subduxerat agro :
Deprensus dixit ; stulte, quid ergo bibis ?

Ad Julium. LXXX.

Rumpitur invidiâ quidam, carissime Juli,
Quod me Roma legit ; rumpitur invidiâ.
Rumpitur invidiâ, quod turba semper in omni
Monstramur digito ; rumpitur invidiâ.
Rumpitur invidiâ, tribuit quod Cæsar uterque
Jus mihi natorum ; rumpitur invidiâ.
Rumpitur invidiâ, quod rus mihi dulce sub urbe est,
Parvaque in urbe domus ; rumpitur invidiâ.
Rumpitur invidiâ, quod sum jucundus amicis,
Quod conviva frequens ; rumpitur invidiâ.
Rumpitur invidiâ, quod amamur, quodq; probamur :
Rumpatur, quisquis rumpitur invidiâ.

Ad Quintum Ovidium. LXXXI.

Vindemiæ non ubique proventus
Cessavit, Ovidi : pluvia profuit grandis.
Centum Coranus amphoras aquæ fecit.

Ad Atticum, de M. Antonio. LXXXII.

Marcus amat nostras Antonius, Attice, Musas,
Charta salutatrix si modò vera refert :
Marcus Palladiæ non inficianda Tolosæ
Gloria, quem genuit pacis alumna quies.

Ad librum. LXXXIII.

Tu, qui longa potes dispendia ferre viarum,
I, liber, absentis pignus amicitiae.
Vilis eras, fateor, si te nunc mitteret emptor :
Grande tui pretium muneris auctor erit.
Multum, crede mihi, refert, à fonte bibatur,
Quæ fluit, an pigro quæ stupet unda lacu.

In Bassum. LXXXIV.

Denariis tribus invitas, & manè togatum
Observare jubes atria, Basse, tua :
Deinde hæere tuo lateri, præcedere sellam ;
Ad vetulas tecum plùs minus ire decem.

Trita quidem nobis togula est, vilisque, putrisque :
Denariis tamen hanc non emo, Basse, tribus.

Adulatur Domitiano. LXXXV.

Appia, quam simili venerandus in Hercule Cæsar
Consecrat, Ausoniæ maxima fama viæ ;
Si cupis Alcidiæ cognoscere facta prioris,
Disce. Libyn domuit : aurea poma tulit.
Pelratam Scythico discinxit Amazona nodo :
Addidit Arcadio terga leonis apro.
Æripedem sylvis cervum, Stymphalidas undis
Abstulit : à Stygia cum cane venit aqua.
Fœcundam vêtuit reparari mortibus Hydram :
Hesperias Tusco lavit in amne boves.
Hæc minor Alcides. major quæ gesserit, audi,
Sextus ab Albana quem colit arce lapis.
Afferuit possessa malis Pallatia regnis :
Prima suo gessit pro Jove bella puer.
Solutus Iuleas cum jam retineret habenas,
Tradidit, inque suo tertius orbe fuit.
Cornua Sarmatici ter perfida contudit Istri :
Sudantem Geticâ ter nive lavit equum.
Sæpe recusato Parthos duxisse triumphos,
Victor Hyperboreo nomen ab orbe tulit.
Tempia deis, mores populis dedit, otia ferro,
Astra suis, cœlo sidera, ferta Jovi.
Herculeum tantis numen non sufficit actis :
Tarpeio deus hic comodet ora patri.

Ad Phœbum. LXXXVI.

Quadringentorum reddis mihi, Phœbe, tabellas :
Centum da potiùs mutua, Phœbe, mihi.
Quære alium; cui te tam vano munere jactes :
Quod tibi non possum solvere, Phœbe, meum est.

M. VAL. MARTIALIS EPIGRAMMATUM

LIBER X.

Liber ad lectorem. I.

Si nimius videor, serâque coronide longus.
Esse liber : legito pauca, libellus ero.
Terque quaterque mihi finitur carmine parvo
Pagina: fac tibi me, quàm cupis esse, brevem.

Ad eundem. II.

Festinata prior decimi mihi cura libelli
Elapsum manibus nunc revocavit opus.
Nota leges quædam, sed limâ rafa recenti :
Pars nova major erit : lector, utrique fave :
Lector, opes nostræ; quem cùm mihi Roma dedisset,
Nil tibi quod demus majus habemus, ait.
Pigra per hunc fugies ingrata flumina Lethes,
Et meliore tui parte superstes eris.
Marmora Messalæ findit caprificus, & audax
Dimidios Crispi mulio rideat equos.
At chartis nec furta nocent, nec sæcula præsumunt;
Solaque non nōrunt hæc monumenta mori.

Ad Priscum. III.

Vernaculorum dicta, sordidum dentem,
Et foeda linguæ probra circulatricis,
Quæ sulphurato nolit emptâ ramento,
Vatiniorum proxeneta fractorum,
Poëta quidam clancularius spargit;
Et vult videri nostra : credis hoc, Prisce,
Voce ut loquatur psittacus coturnicis,
Et concupiscat esse Canus ascaules ?
Procul à libellis nigra sit meis fama,
Quos rumor albâ gemmeus vehit pennâ.
Cur ego laborem notus esse tam pravè,
Constare gratis cùm silentium possit ?

Ad Mamurram. IV.

Qui legis Oedipodem, caligantemque Thyesten,
 Colchidas, & Scyllas; quid nisi monstra legis?
 Quid tibi raptus Hylas, quid Parthenopæus, & Atys?
 Quid tibi dormitor proderit Endymion?
 Exutusve puer pennis labentibus? aut qui
 Odit amatrices Hermaphroditus aquas?
 Quid te vana juvant miseræ ludibria chartæ?
 Hoc lege, quod possis dicere jure, Meum est.
 Non hic Centauros, non Gorgonas, Harpyiasque
 Invenies: hominem pagina nostra sapit.
 Sed non vis, Mamurra, tuos cognoscere mores,
 Nec te scire: legas *aina* Callimachi.

In maledicum Poetam. V.

Quiscunque stolæve purpuræve contemptor,
 Quos colere debet, læsit impio versu;
 Erret per urbem pontis exsul & clivi,
 Interque raucos ultimus rogatores
 Oret caninas panis improbi buccas.
 Illi December longus, & madens bruma,
 Claususque fornix triste frigus extendat:
 Vocet beatos, clamitetque felices,
 Orciniana qui feruntur in sponda:
 Et, cum supremæ fila venerint horæ,
 Diesque tardus; sentiat canum litem,
 Abigatque moto noxias aves panno.
 Nec finiantur morte simplices poenæ:
 Sed modò severi sectus Æaci loris,
 Nunc inquieti monte Sisyphi pressus,
 Nunc inter undas garruli senis fectus,
 Delasset omnes fabulas poetarum:
 Et cum fateri Furia jussit verum,
 Prodeunte clamet conscientia, *scripsi*.

De adventu Trajani. VI.

Felices, quibus urna dedit spectare coruscum,
 Solibus Arctoïis, sideribusque ducem!
 Quando erit ille dies, quo campus, & arbor, & omnis
 Lucebit Latia culta fenestra nuru? Quan-

Quando moræ dulces, longusque à Cæsare pulvis,
Totaque Flaminia Roma videnda viâ?

Quando eques, & picti tunicâ Nilotide Mauri
Ibitis, & populi vox erit una, Venit?

Ad Rhenum, de eodem. VII.

Nympharum pater amniumque Rhene,
Quicumque Odrysiæ bibunt pruinas,
Sic semper liquidis fruaris undis,
Nec te barbara contumeliosi
Calcatum rota conterat bubulci;
Sic & cornibus aureus receptis,
Et Romanus eas utraque ripa:
Trajanum populis suis, & urbi,
Tibris te dominus rogat, remittas.

De Paulla. VIII.

Nubere Paulla cupit nobis; ego ducere Paulam
Nolo; anus est: vellem, si magis esset anus.

De se. IX.

Undenis pedibusque, syllabisque,
Et multo sale, nec tamen protervo,
Notus gentibus ille Martialis,
Et notus populis: quid invidetis?
Non sum Andremonē notior Caballo.

In Paullum. X.

Cum tu, laurigeris annum qui fascibus intras,
Manē saluator limina mille teras:
Hic ego quid faciam? quid nobis, Paulle, relinquis,
Qui de plebe Numæ, densaque turba sumus?
Qui me respiciat, dominum regemque vocabo?
Hoc tu (sed quāto blandius!) ipse facis.
Lecticam, sellamque sequar? nec ferre recusō:
Per medium pugnas sed prior ire lutum.
Sæpius adsurgam recitanti carmina? tu stas,
Et pariter geminas tendis in ora manus.
Quid faciet pauper, cui non licet esse clienti?
Divisit nostras purpura vestra togas.

In Calliodorum. XI.

Nil aliud loqueris, quam Thesea Perithoumque;
 Teque putas Pyladi, Calliodore, parem.
 Dispeream, si tu Pyladi præstare matellam
 Dignus es, aut porcos pascere Perithoi.
 Donavi tamen, inquis, amico millia quinque,
 Et lotam (ut multum) terque quaterque togam.
 Quid? quòd nil unquam Pyladi donavit Orestes?
 Qui donat, quamvis plurima, plura negat.

Ad Domitium. XII.

Amilie gentes, & Apollineas Vercellas,
 Et Phaëtontei qui petis arva Padi;
 Ne vivam, nisi te, Domiti, permitto libenter,
 Grata licèt sine te sit mihi nulla dies.
 Sed desiderium tanti est, ut messe vel unâ
 Urbano releves colla perusta iugo.
 I, precor, & rotos avidâ cute combibe soles.
 Quàm formosus eris, dum peregrinus eris!
 Et venies albis non cognoscendus amicis,
 Libabitque tuas pallida turba genas!
 Sed via quem dederat, rapiet citò Roma colorem,
 Niliaco redeas tu licèt ore niger.

Ad Tuccam. XIII.

Cum cathedralicios portet tibi rheda ministros,
 Et Libys in longo pulvere sudet eques;
 Strataque non unas cingant triclinia Baias,
 Et Thetis unguento palleat uncta tuo;
 Candida Setini rumpant crystalla trientes,
 Dormiat in pluma nec meliore Venus:
 Urere non miserum cessant suspiria pectus.
 Vis dicam, malè sit cur tibi, Tucca? bene est.

Ad Crispum. XIV.

Cedere de nostris nulli te dicis amicis.
 Sed sit ut hoc verum, quid, rogo, Crispe, facis?
 Mutua cùm peterem sestertia quinque, negasti;
 Non caperet nummos cùm gravis arca tuos.

Quan-

Quando fabæ nobis modium farrisve dedisti,
 Cùm tua Niliacus rura colonus aret ?
 Quando brevis gelidæ missa est toga tempore brumæ?
 Argenti venit quando selibra mihi ?
 Nil aliud video, quo te credamus amicum,
 Quàm quòd me coram pedere, Crispe, soles.

De Apro. XV.

DOtata uxori cor arundine fixit acuta,
 Sed dum ludit Aper; ludere novit Aper.

In Caium. XVI.

SI donare vocas promittere, nec dare, Cai;
 Vincam te donis, muneribusque meis.
 Accipe Callaïcis quicquid fodit Astur in arvis,
 Aurea quicquid habet divitis unda Tagi;
 Quicquid Erithræa niger invenit Indus in alga,
 Quicquid & in nidis unica servat avis;
 Quicquid Agenoreo Tyros improba cogit aëno:
 Quicquid habent omnes, accipe quomodo das.

De Macro, ad Musam. XVII.

Saturnalicio Macrum fraudare tributo
 Frustra, Musa, cupis: non licet, ipse petit:
 Solenneisque jocos, nec tristia carmina poscit;
 Et queritur nugas obticuisse meas:
 Menforum longis sed nunc vacat ille libellis.
 Appia, quid facies, si leget ista Macer?

De Mario. XVIII.

NEc vocat ad coenam Marius, nec munera mittit,
 Nec spondet, nec vult credere; sed nec habet.
 Turba tamen non deest, sterilem quæ curet amicum.
 Eheu, quàm fatuæ sunt tibi, Roma, togæ!

Mittit librum suum ad Plinium. XIX.

NEc doctum satis, & parùm severum,
 Sed non rusticulum nimis libellum,
 Facundo mea Plinio Thalia,
 I perfer: brevis est labor peractæ
 Altum vincere tramitem Suburæ.
 Illic Orphea protinus videbis

Udi vertice lubricum theatri;
 Mirantesque feras, avemque regem,
 Raptum quæ Phryga pertulit Tonanti.
 Illic parva tui domus Pedonis
 Coelata est aquilæ minore pennâ.
 Sed ne tempore non tuo disertam
 Pulses ebria januam, videto.
 Totos dat tetricæ dies Minervæ,
 Dum centum studet auribus virorum;
 Hoc quod secula, posterique possint
 Arpinis quoque comparare chartis.
 Seras tutior ibis ad lucernas:
 Hæc hora est tua, cùm furit Lyæus,
 Cùm regnat rosa, cùm madent capilli:
 Tunc me vel rigidi legant Catones.

Ad Manium. XX.

Ducit ad auriferas quòd me Salo Celtiber oras;
 Pendula quòd patriæ visere testa libet,
 Tu mihi simplicibus, Mani, dilectus ab annis,
 Et prætextata cultus amicitia,
 Tu facis; in terris quo non est alter Iberis
 Dulcior, & vero dignus amore magis.
 Tecum ego vel ficci Gætula mapalia Poeni,
 Et poteram Scythicas hospes amare casas.
 Si tibi mens eadem, si nostri mutua cura est,
 In quocunque loco Roma duobus erit.

Ad Sextum. XXI.

Scribere te, quæ vix intelligat ipse Modestus,
 Et vix Claranus, quid, rogo, Sexte, juvat?
 Non lectore tuis opus est, sed Apolline, libris:
 Judice te major Cinna Marone fuit.
 Sic tua laudentur: sanè mea carmina, Sexte,
 Grammaticis placeant, & sine Grammaticis.

In Philanimum. XXII.

Cur spleniato sæpe prodeam mento,
 Albave pictus sana labra cerussa,
 Philani, quæris? basiare te nolo.

De M. Antonio. XXIII.

JAm numerat placido felix Antonius ævo
 Quindecies actas primus Olympiadas :
 Præteritosque dies, & tutos respicit annos ;
 Nec metuit Lethes jam propioris aquas.
 Nulla recordanti lux est ingrata, gravisque :
 Nulla fuit, cujus non meminisse velit.
 Ampliat ætatis spatium sibi vir bonus : hoc est
 Vivere bis, vitâ posse priore frui.

Ad Kalend. Martias. XXIV.

NAtales mihi Martiæ Kalendæ,
 (Lux formosior omnibus Kalendis),
 Quinquagesima liba, septimamque
 Vestris addimus hanc focis acerram.
 His vos, (si tamen expedit roganti) ;
 Annos addite bis, precor, novenos,
 Ut nōdum nimia piger senectâ,
 Sed vitæ tribus areis peractis,
 Lucos Elysiæ peram puellæ.
 Post hæc tempora, nec diem rogabo.

De Mucio. XXV.

IN matutina nuper spectatus arena
 Mucius, imposuit qui sua membra focis,
 Si patiens, fortisque, tibi durusque videtur,
 Ab teritanæ pectora plebis habes.
 Nam cūm dicatur, tunicâ presente molestâ,
 Ure manum : plus est dicere, non facio.

De morte Vari. XXVI.

VAre, Parætonias Latia modò vite per urbes
 Nobilis, & centum dux memorande viris :
 At nunc Aufonio frustra promisse Quirino,
 Hospita Lagæi littoris umbra jaces.
 Spargere non licuit frigentia fletibus ora,
 Pingua nec mœstis addere thura rogis :
 Sed datur æterno victurum carmine nomen.
 Numquid & hoc, fallax Nile, negare potes?

Ad Diodorum. XXVII.

Natali, Diodore, tuo conviva senatus
 Accubat, & rarus non adhibetur eques;
 Et tua tricenos largitur sportula nummos.
 Nemo tamen natum te. Diodore, putat.

Ad Janum. XXVIII.

Annorum, nitidique fator pulcherrime mundi,
 Publica quem primum vota precesq; vocant,
 Pervius exiguos habitabas antè Penates,
 Plurima quàm medium Roma terebat iter:
 Nunc tua Cæsareis cingantur limina donis;
 Et fora tot numeras, Jane, quot ora geris.
 At tu, sancte pater, tanto pro munere gratus,
 Ferrea perpetua claustra tuere sera.

De Apollinaris littore Formiano. XXIX.

O Temperatæ dulce Formiæ litus,
 Vos, cùm severi fugit oppidum Martis,
 Et inquietas fessus exuit curas,
 Apollinaris omnibus locis præfert.
 Non ille sanctæ dulce Tibur uxoris,
 Nec Tusculanos, Algidosve secessus,
 Præneste nec sic, Antiumve miratur.
 Non blanda Circe, Dardanisve Cajeta
 Desiderantur, nec Marica, nec Liris,
 Nec in Lucrina lota Salmacis vena.
 Hic summa leni stringitur Thetis vento;
 Nec languet æquor: viva sed quies ponti
 Pictam phaselon adjuvante fert aura:
 Sicut puellæ non amantis æstatem
 Mota salubre purpura venit frigus.
 Nec seta longo quærit in mari prædam;
 Sed à cubili lectuloque jactatam
 Spectatus alte lineam trahit piscis.
 Si quando Nereus sentit Æoli regnum,
 Ridet procellas tuta de suo mensa.
 Piscina rhombum pascit, & lupos vernas;
 Natat ad magistrum delicata muræna.

Nomen-

Nomenclator mugilem citat notum,
 Et adesse jussi prodeunt senes nulli.
 Frui sed istis quando, Roma, permittis ?
 Quot Formianos imputat dies annus
 Negotiosis rebus urbis hærenti ?
 O janitores, villicique felices !
 Dominis parantur ista ; serviunt vobis.

In Calliodorum. XXX.

Addixi servum nummis herè mille trecentis,
 Ut bene coenares, Calliodore, semel :
 Nec bene coenâsti. nullus tibi quatuor emptus
 Librarum coenæ pompa caputque fuit.
 Exclamare libet ; non est hic, improbe, non est
 Piscis : homo est. hominem, Calliodore, voras.

De imagine M. Antonii, ad Cædicianum. XXXI.

Hæc mihi quæ colitur violis pictura, rosisque,
 Quos referat vultus, Cæditiane, rogas ?
 Talis erat Marcus mediis Antonius annis
 Primus : in hoc juvenem se videt ore senex.
 Ars utinam mores, animumque effingere posset :
 Pulchrior in terris nulla tabella foret.

Ad Munatium Gallum. XXXII.

Simplicior priscis, Munati Galle, Sabinis,
 Cecropium superas qui bonitate senem ;
 Sic tibi consoceri claros retinere Penates
 Perpetuâ natæ det face casta Venus :
 Ut tu, si viridi tinctos ærugine versus
 Fortè malus livor dixerit esse meos,
 Ut facis, à nobis abigas : nec scribere quemquam
 Talia contendas carmina, qui legitur.
 Hunc servare modum nostri novere libelli ;
 Parcere personis, dicere de vitiis.

Ad Trajanum. XXXIII.

Di tibi dent quicquid, princeps Trajane, mereris ;
 Et rata perpetuò, quæ tribuere, velint :
 Qui sua restituis spoliato jura patrono ;
 Libertis exsul non erit ille suis.

Dignus

Dignus es, ut possis totum servare clientem :
Et (liceat tantum vera probare) potes.

De Sulpitia. XXXIV.

OMnes Sulpitiam legant puellæ,
Uni quæ cupiunt viro placere.
Omnes Sulpitiam legant mariti,
Uni qui cupiunt placere nuptæ.
Non hæc Colchidos adferit furorem,
Diri prandia nec refert Thyestæ ;
Scyllam, Byblida nec fuisse credit :
Sed castos docet, & pios amores,
Lusus, delicias, facetiasque.
Cujus carmina qui bene æstimârit,
Nullam dixerit esse sanctiorem.
Hac condiscipulâ, vel hac magistrâ
Effes doctior & pudica Sappho.
Sed tecum pariter simulque visam
Durus Sulpitiam Phaon amaret.
Frustra : namque ea nec Tonantis uxor,
Nec Bacchi, nec Apollinis puella
Erepto sibi viveret Caleno.

In Munnam. XXXV.

Improba Massiliæ quicquid fumaria cogunt,
Accipit ætatem quisquis ab igne cadus ;
A te, Munna, venit : miseris tu mittis amicis
Per freta, per longas toxica sæva vias :
Nec facili pretio, sed quo contenta Falerni
Testa sit, aut cellis Setia cara suis.
Non venias quare tam longo tempore Romam,
Hæc, puto, causa tibi est ; ne tua vina bibas.

Ad Maternum. XXXVI.

Juris, & æquarum cultor sanctissime legum,
Veridico Latium qui regis ore forum ;
Municipi, Materne, tuo veterique sodali
Callaicum mandas si quid ad Oceanum.
An Laurentino turpes in littore ranas,
Et satius tenues ducere credis acos ;

Ad sua captivum quàm saxa remittere mullum,
 Visus erit libris qui minor esse tribus ?
 Et fatuam summa coenare pelorida mensa,
 Quosque tegit lævi cortice concha brevis ;
 Ostrea Baianis quam non liventia testis,
 Quæ pueri domino non prohibente vorent ?
 Hic olidam clamosus ages in retia vulpem,
 Mordebitque tuos sordida præda canes.
 Illic pisces modo vix educta profundo
 Impedient lepores humida lina meos.
 Dum loquor, ecce,redit sporta piscator inani :
 Venator capta mele superbus adest.
 Omnis ab urbano venit ad mare coena macello,
 Callaicum mandas si quid ad Oceanum.

Ad Calenum. XXXVII.

O Molles tibi quindecim, Calene;
 Quos cum Sulpitia tua jugales
 Indulfit deus & peregit annos !
 O nox omnis, & hora, quæ notata est
 Charis littoris Indici lapillis !
 Vixisti tribus, ô Calene, lustris.
 Ætas hæc tibi tota computatur ;
 Et solos numeras dies mariti.
 Ex illis tibi si diu rogatam
 Lucem redderet Atropos vel unam,
 Malles quàm Pyliam quater senectam.

In Lesbiam. XXXVIII.

Consule te Bruto quid juras, Lesbia, natam ?
 Mentiris : nata es, Lesbia, rege Numâ.
 Sic quoque mentiris : namque, ut tua secula narrant,
 Ficta Prometheo diceris esse luto.

In Proculeiam. XXXIX.

Mense novo Jani veterem, Proculeia, maritum
 Deferis, atque jubes res sibi habere suas.
 Quid, rogo, quid factum est ? subiti quæ causa doloris ?
 Nil mihi respondes ? dicam ego : prætor erat.

Con-

Constatura fuit Megalensis purpura centum
Millibus, ut nimium munera parca dares :
Et populare sacrum bis millia dena tulisset.
Discidium non est hoc, Proculeia ; lucrum est.

Ad Dindymum. XL.

TAm dubia est lanugo tibi, tam mollis, ut illam
Halicus, & soles, & levis aura terat.
Celantur simili ventura Cydonia lana,
Pollice virginéo quæ spoliata nitent.

Ad Philerothem. XLI.

SEptima jam, Phileros, tibi conditur uxor in agro.
Plus nulli, Phileros, quàm tibi reddit ager.

Ad Q. Ovidium. XLII

Quincte Caledonios Ovidi visure Britannos,
Et viridem Tethyn, Oceanumque patrem ;
Ergo Numæ colles, & Nomentana relinques

Otia ? nec retinet rusque focusque senem ?
Gaudia tu differs : at non & stamina differt
Atropos ; atque omnis scribitur hora tibi.
Præstiteris caro (quis non hoc laudet ?) amico,
Ut potior vita sit tibi sancta fides.

Sed reddare tuis tandem mansure Sabinis,
Teque tuas numeres inter amicitias.

In delicatum lectorem. XLIII.

SI quid lene mei dicunt & dulce libelli,
Si quid honorificum pagina blanda sonat ;
Hoc tu pingue putas, & costam rodere mavis,
Ilia Laurentis cum tibi demus apri.

Vaticana bibas, si delectaris aceto :

Non facit ad stomachum nostra lagena tuum.

In Mathonem. XLIV.

OMnia vis belle Matho dicere : dic aliquando
Et bene : dic neutrum : dic aliquando male.

Ad Iulium Martialem. XLV.

Vitam quæ faciunt beatiorum,
Jucundissime Martialis, hæc sunt :
Res non parva labore, sed relicta ;

Non

Non ingratus ager ; focus perennis ;
 Lis nunquam ; toga rara ; mens quieta ;
 Vires ingenuæ ; salubre corpus ;
 Prudens simplicitas ; pares amici ;
 Convictus facilis ; sine arte mensa ;
 Nox non ebria, sed soluta curis ;
 Non tristis torus, & tamen pudicus ;
 Somnus qui faciat breves tenebras ;
 Quod sis, esse velis, nihilque malis :
 Summum nec metuas diem, nec optes.

Convivium. XLVI.

Nunciat octavam Phariæ sua turba juvenæ,
 Et sistrata redit calva subitque cohors.
 Temperat hæc thermas, nimios prior hora vapores
 Halat, & immodico sexta Nerone calet.
 Stella, Nepos, Cani, Cerealis, Flacce, venitis ?
 Septem signa capit, sex sumus ; adde Lupum.
 Exoneraturas ventrem mihi villica malvas
 Attulit, & varias, quas habet hortus, opes.
 In quibus est lactuca sedens, & sectile porrum :
 Nec deest ructatrix mentha, nec herba salax.
 Secta coronabunt rutatos ova lacertos,
 Et madidum thynni de sale lumen erit.
 Parvus in his, unâ ponetur coenula mensâ,
 Hoedus inhumani raptus ab ore lupi.
 Et, quæ non egeant ferro structoris, ofellæ,
 Et faba fabrorum, prototomique rudes.
 Pullus ad hæc, coenisque tribus jam perna superstes
 Addetur : saturis mitia poma dabo.
 De Nomentana vinum sine sæce lagena,
 Quæ bis Frontino consule plena fuit.
 Accedent sine felle joci, nec manè timenda
 Libertas, & nil quod tacuisse velis.
 De Prasino conviva meus, Venetoque loquatur :
 Nec facient quemquam pocula nostra reum.

In Cottam. XLVII.

Cum potes amethystinos trientes,
 Et nigro madeas Optimiano ;

Pro-

Propinas modò conditum Sabinum.

Et dicis mihi Cotta, *vis in auro?*

Quisquam plumbea vina vult in auro?

De Scorpo. XLVIII.

FRangat Idumæas tristis Victoria palmas:

Plange, Favor, sævâ pectora nuda manu.

Mutet Honor cultus, & iniquis munera flammis:

Mitte coronatas, Gloria mœsta, comas.

Heu facinus! primâ fraudatus, Scorpe, juventâ

Occidis, & nigros tam cito jungis equos.

Curribus illa tuis semper properata, brevisque

Cur fuit, & vitæ tam propè meta tuæ?

Ad Faustinum. XLIX.

Sidera jam Tyrius Phryxei respicit agni

Taurus, & alternum Castora fugit hyems.

Ridet ager, vestitur humus, vestitur & arbos:

Ismarium pellex Attica plorat Ityn.

Quos, Faustine, dies, qualem tibi Roma Ravennam

Abstulit? ô soles, ô tunicata quies!

O nemus, ô frontes, solidumque madentis arenæ

Litus, & æquoreis splendidus Anxur aquis,

Et non unius spectator lectulus undæ,

Qui videt hinc puppes fluminis, inde maris!

Sed nec Marcelli, Pompeianumque, nec illic

Sunt triplices thermæ, nec fora juncta quater:

Nec Capitolini summum penetrale Tonantis,

Quæque nitent coelo proxima templa suo.

Dicere te lassum quoties ego credo Quirino?

Quæ tua sunt, tibi habe: quæ mea, redde mihi.

Epitaphium Scorpi. L

Ille ego sum Scorpis, clamosi gloria Circi,

Plausus, Roma, tui, deliciæque breves:

Invida quem Lachesis raptum trieteride nonâ,

Dum numerat palmas, credidit esse senem.

In Olum. LI.

Menas, Ole, bonas ponis: sed ponis opertas.

Ridiculum est: possum sic ego habere bonas.

In

In Gallum. LII.

TOtis, Galle, jubes tibi me servire diebus,
 Et per Aventinum ter quater ire tuum.
 Eximit, aut reficit dentem Cascellius ægrum;
 Infestos oculis uris, Hicine, pilos.
 Non secatur & tollit stillantem Fannius uvam:
 Tristia fervorum stigmata delet Eros.
 Enterocelarum fertur Podalirius Hermes.
 Qui sanat ruptos, dic mihi, Galle, quis est?

Ad Sextum. LIII.

ARgenti libram mittebas: facta selibra est,
 Sed piperis. tanti non emo, Sexte, piper.

Ad Frontinum. LIV.

ANxuris æquorei placidos, Frontine, recessus,
 Et propius Baias, littoreamque domum,
 Et quod inhumanæ, Cancro fervente, cicadæ
 Non novere nemus; flumineosque lacus,
 Dum colui; doctas tecum celebrare vacabat
 Pieridas: nunc nos maxima Roma terit.
 Hic mihi quando dies meus est? jactamur in alto
 Urbis, & in sterili vita labore perit;
 Dura suburbani dum jugera pascimus agri,
 Vicinosque tibi, sancte Quirine, Lares.
 Sed non solus amat, qui nocte dieque frequentat
 Limina, nec vatem talia damna decent.
 Per veneranda mihi Musarum sacra, per omnes
 Juro deos, & non officiosus amo.

In delicatum lectorem. LV.

Consumpta est uno si lemmate pagina, transis,
 Et breviora tibi, non meliora placent.
 Dives, & ex omni posita est instructa macello
 Coena tibi; sed te mattya sola juvant.
 Non opus est nobis nimium lectore guloso:
 Hunc volo, qui fiat non sine pane satur.

De Munna. LVI.

Jura trium petiit à Cæsare discipulorum,
 Adfuetus semper Munna docere duos.

Epitaphium Erotii. LVII.

Hic festinatâ requiescit Erotion umbrâ,
Crimine quam fati sexta peremit hyems.
Quisquis eris nostri post me regnator agelli,
Manibus exiguis annua iusta dato.
Sic Lare perpetuo, sic, turba sospite, solus
Flebilis in terra sit lapis iste tua.

Ad magistrum ludi. LVIII.

Ludi magister, parce simplici turbæ :
Sic te frequentes audiant capillati,
Et delicatæ diligat chorus mensæ :
Nec calculator, nec notarius velox
Majore quisquam circulo coronetur.
Albæ leone flammeo calent luces,
Tostamque fervens Julius coquit messem.
Scuticaque loris horridis Scythæ pellis,
Quâ vapulavit Marfyas Celæneus,
Ferulæque tristes, sceptrâ pædagogorum,
Cessent, & Idus dormiant in Octobres :
Æstate pueri si valent, satis discunt.

Epitaphium nobilis matronæ. LIX.

MArmorâ parvâ quidem, sed non cessura, viator,
Mausoli saxi Pyramidumque legis.
Bis mea Romano spectata est vita Terento,
Et nihil extremos perdidit ante rogos.
Quinque dedit pueros, totidem mihi Juno puellas :
Clauserunt omnes lumina nostra manus.
Contigit & thalami mihi gloria rara, fuitque
Una pudicitia copula nota meæ.

Ad Pollam. LX.

Contigeris regina meos si Polla libellos,
Non tetricâ nostros excipe fronte jocos.
Ille, tuus vates, Heliconis gloria nostri,
Pieria caneret cum fera bella tuba.
Non tamen erubuit ludenti dicere versu :
Si nec rideo, mi Cotta, quid hic facio ?

In Carmenionem. LXI.

Cum te municipem Corinthiorum
 Jactes, Carmenion, negante nullo;
 Cur frater tibi dicor ex Iberis
 Et Celtis genitus, Tagique civis?
 An vultu similes videmur esse?
 Tu flexa nitidus coma vagaris:
 Hispanis ego contumax capillis.
 Levis dropace tu quotidiano:
 Hirsutis ego cruribus, genisque.
 Os blæsum tibi, debillisque lingua est:
 Nobis filia fortiùs loquetur.
 Tam dispar aquilæ columba non est,
 Nec dorcas rigido fugax leoni.
 Quare define me vocare fratrem,
 Ne te, Carmenion, vocem sororem.

De Theopompo. LXII.

Quis, rogo, tam durus, quis tam fuit ille superbus
 Qui jussit fieri te, Theopompe, cocum?
 Hanc aliquis faciem nigrâ violare culinâ
 Sustinet? has uncto polluit ungue comas?
 Quis potiùs cyathos, aut quis crySTALLA tenebit?
 Quâ sapient meliùs mixta Falerna manu?
 Si tam fidereos manet exitus iste ministros,
 Jupiter utatur jam Ganymede coco.

Epitaphium vetula. LXIII.

PYrrhæ filia, Nestoris noverca,
 Quam vidit Niobe puella canam,
 Lærtes aviam senex vocavit,
 Nutricem Priamus, socrum Thyestes;
 Jam cornicibus omnibus superstes,
 Hoc tantum sita durat in sepulchro
 Calvo Plotia cum Melanthione.

In Laliam. LXIV.

Cum tibi non Ephesus, nec sit Rhodus, aut Mitylene,
 Sed domus in vico, Lælia, patricio,

Deque

Deque coloratis nunquam lita mater Etruscis,
 Durus Aricina de regione pater ;
 Ζῶν & Ψυχὴ lascivum congeris usque,
 Pro pudor ! Herfiliæ civis, & Egeriæ.
 Tu licet edifcas totam referasque Corinthon,
 Non tamen omnino, Lælia, Thais eris.

De Polla. LXV.

Custodes das, Polla, viro ; non accipis ipsa :
 Hoc est uxorem ducere, Polla, virum.

Ad Potitum. LXVI.

Quòd mihi vix unus toto liber exeat anno,
 Desidiæ tibi sum, docte Potite, reus.
 Justius at quantò mirere, quòd exeat unus,
 Labantur toti cùm mihi sæpe dies ?
 Nunc resalutantes video nocturnus amicos :
 Gratulor & multis ; nemo, Potite, mihi.
 Nunc ad luciferam signat mea gemma Dianam :
 Nunc me prima sibi, nunc sibi quinta rapit.
 Nunc consul, prætorve tenet, reducesque choreæ :
 Auditur toto sæpe poeta die.
 Sed nec causidico possis impunè negare,
 Nec si te rhetor grammaticusve rogent.
 Balnea post decimam lasso, centumque petuntur
 Quadrantes: fiet quando, Potite, liber ?

De Rabirio. LXVII.

Quisquis læta tuis & sera parentibus optas
 Fata, brevem titulum marmoris hujus ama.
 Condidit hæc caras tellure Rabirius umbras :
 Nulli forte jacent candidiore senes.
 Bis sex lustra tori nox mitis & ultima clusit :
 Arserunt uno funera bina rogo.
 Hos tamen ut primis raptos sibi quærit in annis.
 Improbius nihil his fletibus esse potest.

De Nerva, adulationibus inimico. LXVIII.

Frustra Blanditiæ venitis ad me
 Attritis miserabiles labellis:
 Dicturus dominum deumque non sum.
 Jam non est locus hac in urbe vobis:
 Ad Parthos procul ite pileatos,
 Et turpes, humilesque, supplicesque
 Pictorum sola basiate regum.
 Non est hic dominus, sed imperator,
 Sed justissimus omnium senator:
 Per quem de Stygia domo reducta est
 Siccis rustica Veritas capillis.
 Hoc sub principe, si sapis, caveto
 Verbis, Roma, prioribus loquaris.

Ad Marcum. LXIX.

Litera facundi gratum mihi pignus amici
 Pertulit, Ausoniæ dona severa togæ:
 Quâ non Fabricius, sed vellet Apicius uti,
 Vellet Mecœnas Cæsarianus eques.
 Viliior hæc nobis alio mittente fuisset:
 Non quâcunque manu victima cæsa litat.
 A te missa venit: possem nisi munus amare,
 Marce, tuum; poteram nomen amare meum.
 Munere sed plus est, & nomine gratius ipso,
 Officium docti iudiciumque viri.

Ad Romam. LXX.

Jam parce lassio, Roma, gratulatori,
 Lassio clienti: quamdiu saluator
 Anteambulones, & rogatulos inter
 Centum merebor plumbeos die toto;
 Cùm Scôrpis una quindecim graves hora
 Ferventis auri victor auferat saccos?
 Non ego meorum præmium libellorum,
 (Quid enim merentur?) Apulos velim campos.
 Non Hybla, non me spicifer capit Nilus;

Nec quæ paludes delicata Pomptinas
 Ex arce clivi spectat uva Setini.
 Quid concupiscam, quæris ergo? dormire.

De Cotta amico mercenario. LXXI.

M Illia viginti quondam me Cotta poposcit;
 Et, fateor, magni non erat ille nimis.
 Annus abit: bis quina dabis sestertia? dixit.
 Poscere plus vitus, quàm prius, ille mihi.
 Jam duo poscenti post sextum millia mensëm,
 Mille dabam nummos: noluit accipere.
 Transierant binæ forsan trinæve Kalendæ,
 Aureolos ultro quatuor ipse petit:
 Non dedimus. centum iussit me mittere nummos:
 Sed visa est nobis hæc quoque summa gravis:
 Sportula nos iunxit quadrantibus arida centum:
 Hanc voluit: puero diximus esse datam.
 Inferius numquid potuit descendere? fecit.
 Vilior hic gratis coepit amare: nego.

De Mævio. LXXII.

H Oc, fortuna, tibi videtur æquum?
 Civis non Syriæve Parthiæve,
 Nec de Cappadocis eques catastis,
 Sed de plebe Remi, Numæque verna,
 Jucundus, probus, innocens, amicus,
 Linguâ doctus utrâque, cujus unum est,
 Sed magnum vitium, quòd est poeta,
 Pullo Mævius alget in cucullo:
 Cocco mulio fulget Incitatus.

De Caro medico defuncto, ad Maximum. LXXIII.

N Equius à Caro nihil unquâ, Maxime, factum est,
 Quàm quòd febre perit: fecit & illa nefas.
 Sæva, nocens febris saltem quartana fuisset:
 Servari medico debuit illa suo.

Ad Macrum. LXXIV.

I Bis litoreas, Macer, Salonas:
 Ibit rara fides, amorque recti,

Et secum comitem trahet pudorem.
 Semper pauperior redit potestas.
 Felix auriferæ colone terræ,
 Rectorem vacuo sinu remittes,
 Optabilisque moras, & exeuntem
 Udo, Dalmata, gaudio sequêris.
 Nos Celtas, Macer, & truces Iberos
 Cum desiderio tui petemus.
 Sed quæcunque tamen feretur illic
 Piscosi calamo Tagi notata,
 Macrum pagina nostra nominabit.
 Sic inter veteres legar poetas,
 Nec multos mihi præferas priores;
 Uno sed tibi sim minor Catullo.

De Torquato & Otacilio. LXXV.

Ad lapidem Torquatus habet prætoria quartum:
 Ad quartum breve rus emit Otacilius.
 Torquatus nitidas vario de marmore thermas
 Extruxit: cucumam fecit Otacilius.
 Disposuit daphnona suo Torquatus in agro:
 Castaneas centum sevit Otacilius.
 Consul Torquatus, vici fuit ille magister;
 Nec minor in tanto visus honore sibi.
 Grandis ut exiguum bos ranam ruperat olim;
 Sic, puto, Torquatus rumpet Otacilium.

De Erote. LXXVI.

Plorat Eros, quoties maculosæ pocula myrrhæ
 Inspicit, aut pueros, nobiliusve citrum:
 Et gemitus imo promit de pectore, quod non
 Tota miser coemat septa, feratque domum.
 Quàm multi faciunt, quod Eros, sed lumine sicco!
 Pars major lacrymas ridet, & intus habet.

Ad Gallum. LXXVII.

Si quid nostra tuis adicit vexatio rebus,
 Manè, vel à media nocte togatus ero;

Stridentefque feram flatus Aquilonis iniqui,
 Et patiar nimbos, excipiamque nives.
 Sed fi non fias quadrante beator uno
 Per gemitus nostros, ingenuasque crices;
 Parce precor lasso, vanosque remitte labores,
 Qui tibi non profunt, & mihi, Galle, nocent.

Ad Marinum. LXXVIII.

Raros colligis hinc & hinc capillos,
 Et latum nitidæ, Marine, calvæ
 Campum temporibus tegis comatis:
 Sed moti redeunt jubente vento,
 Reddunturque sibi, caputque nudum
 Cirris grandibus hinc & inde cingunt.
 Inter Splendophorum Telephorumque,
 Cidæ stare putabis Hermeroten.
 Vis tu simplicius senem fateri?
 Ut tandem videaris unus esse,
 Tonfor jam reliquos metat capillos.
 Calvo turpius est nihil comato.

De Ladonte nauta. LXXIX.

Jam senior Ladon Tiberinæ nauta carinæ
 Proxima dilectis rura paravit aquis.
 Quæ cum sæpe vagus premeret torrentibus undis
 Tibris, & hyberno rumperet arva lacu:
 Emeritam puppim, ripa quæ stabat in alta,
 Implevit faxis, opposuitque vadis.
 Sic nimias avertit aquas. quis credere posset?
 Auxilium domino merfa carina tulit.

De Lauro. LXXX.

Nemo nova caluit sic inflammatus amica,
 Flagravit quanto Laurus amore pilæ.
 Sed qui primus erat lufor, dum floruit ætas;
 Nunc postquam desit ludere, prima pila est.

De natali Restituti. LXXXI.

Octobres age sentiat Kalendas
 Facundi pia Roma Restituti.

Linguis omnibus & favete votis ;
 Natalem colimus, tacete lites.
 Absit cereus aridi clientis,
 Et vani triplices, brevesque mappæ
 Exspectent gelidi jocos Decembris.
 Certent maneribus beatiores.
 Agrippæ tumidus negotiator
 Cadmi municipes ferat lacernas.
 Pugnorum reus ebriæque noctis
 Coenatoria mittat advocato.
 Infamata virum puella vicit ?
 Veros sardonychas, sed ipsa, tradat.
 Mirator veterum senex avorum
 Donet Phidiaci toreuma cœli.
 Venator leporem, colonus hœdum,
 Piscator ferat æquorum rapinas.
 Si mittit sua quisque, quid poetam
 Missurum tibi, Restitute, credis ?

Ad Cottam. LXXXII.

OMnes persequeris prætorum, Cotta, locellos,
 Accipis & ceras : officiosus homo es.

De statua Junonis. LXXXIII.

Juno labor, Polyclete, tuus, & gloria felix,
 Phidiacæ cuperent quam meruisse manus,
 Ore nitet tanto, quanto superâisset in Ida
 Judice convictas non dubitante deas.
 Junonem, Polyclete, suam nisi frater amaret,
 Junonem poterat frater amare tuam.

Ad Marium. LXXXIV.

MAri, quietæ cultor & comes vitæ,
 Quo cive prisca gloriatur Atina ;
 Has tibi gemellas, barbari decus luci,
 Commendo pinus, ilicesque Faunorum,
 Et semidocta villici manu structas
 Tonantis aras, horridique Silvani,
 Quas tinxit agni sæpe sanguis, aut hœdi,

Domi-

Dominamque sancti virginem deam templi,
 Et quem sororis hospitem vides castæ
 Martem mearum principem Kalendarum,
 Et delicatæ laureum nemus Floræ.

Hoc omne agelli mite parvuli numen
 Seu tu cruore, sive thure placabis :
 Ubicunque noster Martialis est, dices,
 Hac, ecce, mecum dextera litat vobis
 Absens sacerdos ; vos putate præsentem ;
 Et date duobus, quicquid alter optârît.

Ad Clementem. LXXXV.

SI prior Euganeas, Clemens, Helicaonis oras,
 Pictaque pampineis videris arva jugis ;
 Perfer Atestinæ nondum vulgata Sabinæ
 Carmina, purpureâ sed modò culta togâ.
 Ut rosa delectat, metitur quæ pollice primo :
 Sic nova nec mento fordida charta juvat.

Munusculum pomorum. LXXXVI.

NON mea Massylus servat pomaria serpens,
 Regius Alcinoi nec mihi servit ager :
 Sed Nomentanâ securus germinat hortus
 Arbore, nec furem plumbea mala timent.
 Hæc igitur, media quæ sunt mihi nata Suburrâ,
 Mittimus autumnî cerea poma mei.

Ad Avitum. LXXXVII.

SÆpe loquar nimium gentes quòd, Avite, remotas,
 Miraris, Latia factus in urbe senex ;
 Auriferumque Tagum sitiam, patriumque Salonem,
 Et repetam saturæ sordida rura casæ.
 Illa placet tellus, in qua res parva beatum
 Me facit, & tenues luxuriantur opes.
 Pascitur hîc, ibi pascit ager : tepet igne maligno
 Hîc focus, ingenti lumine lucet ibi.
 Hîc pretiosa fames, conturbatorque macellus :
 Mensa ibi divitiis ruris operta sui.
 Quatuor hîc æstate togæ pluresque teruntur :
 Autumnis ibi me quatuor una tegit.

I, cole nunc reges : quicquid non præstat amicus;
Cum præstare tibi possit, Avite, locus.

De Numa. LXXXVIII.

Dum levis arsurâ struitur libitina papyro,
Dum myrrham & casiam flebilis uxor emit :
Jam scrobe, jam lecto, jam pollinctore parato
Hæredem scripsit me Numa : convaluit.

De figura Socratis. LXXXIX.

SI Romana forent hæc Socratis ora, fuissent
Julius in Satyris qualia Rufus habet.

In plagiarium. XC.

Quid, stulte, nostris versibus tuos misces ?
Cum ligitante quid tibi, miser, libro ?
Quid congregare cum leonibus vulpes,
Aquilisque similes facere noctuas quæris ?
Habeas licebit alterum pedem Ladæ,
Inepte, frustra crure ligneo cures.

De Capitolino. XCI.

Elysis redeat si fortè remissus ab agro
Ille suo felix Cæsare Galba vetus ;
Qui Capitolinum pariter Galbamque jocantes
Audierit, dicet ; rustice Galba, tace.

Ad Avitum, de Gaditano pseudo-poeta. XCII.

Gaditanus, Avite, (dic, quid istud ?)
Qui scribit nihil, attamen poeta est.

Ad municipales suos Bilbilitanos. XCIII.

Municipes, Augusta mihi quos Bilbilis acris
Monte creat, rapidis quos Salo cingit aquis;
Ecquid læta juvat vestri vos gloria vatis ?

Nam decus, & nomen, famaue vestra sumus.
Nec sua plus debet tenui Verona Catullo :

Meque velit dici non minùs illa suum.
Quatuor accessit tricesima messibus æstas,

Ut sine me Cereri rustica liba datis.
Moenia dum colimus dominæ pulcherrima Romæ,
Mutavere meas Italæ regna comas.

Excipitis reducem placidâ si mente, venimus:
Aspera si geritis corda, redire licet.

Ad librum. XCIV.

I Nostro comes, i, libelle, Flacco
Longum per mare, sed faventis undæ;
Et cursu facili, tuisque ventis
Hispanæ pete Tarraconis arces.
Illinc te rota tollet, & citatus
Altam Bilbilin, & tuum Salonem
Quinto forsitan effedo videbis.
Quid mandem tibi quæris? ut sodales
Paucos, & veteres, & ante brumas
Triginta mihi quatuorque viros
Ipsa protinus à via salutes;
Et nostrum admoneas subinde Flaccum,
Jucundos mihi nec laboriosos
Secessus spatium paret salubri,
Qui pigrum faciant tuum parentem.
Hæc sunt. jam tumidus vocat magister,
Castigatque moras, & aura portum
Laxavit melior. vale, libelle:
Navem, scis puto, non moratur unus.

M. VAL. MARTIALIS EPIGRAMMATUM

LIBER XI.

Ad librum. I.

Quò tu, quò, liber ociose, tendis,
Cultus sindone non quotidianâ ?
Num quid Parthenium videre tentas ?
Vadas, & redeas inevolutus.
Libros non legit ille, sed libellos :
Nec musis vacat, aut suis vacaret.
Ecquid te satis æstimas beatum,
Contingunt tibi si manus minores ?
Vicini pete porticum Quirini :
Turbam non habet ociosiore
Pompeius, vel Agenoris puella,
Vel primus dominus levis carinæ.
Sunt illic duo tresve qui revolvant
Nostrarum tineas ineptiarum :
Sed cùm sponsio, fabulæque lassæ
De Scorpo fuerint & Incitato.

Ad lectores. II.

Triste supercilium, durique severa Catonis
Frons, & aratoris filia Fabricii,
Et personati fastus, & regula morum,
Quicquid & in ludis non sumus, ite foras.
Clamant ecce mei, iò Saturnalia, versus,
Et licet, & sub te præside, Nerva, libet.

Ad lectores. III.

Lectores tetrici, salebrosum ediscite Sanctram :
Nil mihi vobiscum est : iste liber meus est.

De suis libellis. IV.

Non urbana meâ tantum Pimpleide gaudent
Ocia, nec vacuis auribus ista damus :
Sed meus in Geticis ad Martia signa pruinis
A rigido teritur centurione liber.

Dici-

Dicitur & nostros cantare Britannia versus.

Quid prodest? nescit sacculus ista meus.

At quàm victuras poteramus pangere chartas,

Quantaque Pieriâ praelia flare tubâ;

Cùm pia reddiderint Augustum numina terris,

Et Meccœnatem si mihi Roma daret!

Votum pro Nervæ. V.

S Acra, Larésq; Phrygum, quos Trojæ maluit hæres,

Quàm rapere arsuras Laomedontis opes;

Scriptus & æterno nunc primùm Jupiter auro,

Et soror, & summi filia tota patris;

Et qui purpureis jam tertia nomina fastis,

Jane, refers Nervæ; vos precor ore pio:

Hunc omnes servate ducem, servate senatum:

Moribus hic vivat prinœpis, ille suis.

In laudem Nervæ. VI.

T Anta tibi est recti reverentia, Cæsar, & æqui,

Quanta Numæ fuerat: sed Numa pauper erat.

Ardua res hæc est, opibus non tradere mores,

Et cùm tot Croesos viceris, esse Numam.

Si redeant veteres, ingentia nomina, patres,

Elysium liceat si vacuare nemus:

Te volet invictus pro libertate Camillus;

Aurum Fabricius te tribuente volet.

Te duce gaudebit Brutus; tibi Sylla cruentus

Imperium tradet, cùm positurus erit.

Et te privato cum Cæsare Magnus amabit:

Donabit totas & tibi Crassus opes.

Ipse quoque infernis revocatus Ditis ab umbris,

Si Cato reddatur, Cæsarianus erit.

Saturnalia. VII.

U Nctis falciferi senis diebus,

Regnator quibus imperat fritillus,

Versu ludere non laborioso

Permittis, puto, pileata Roma.

Risisti: licet ergo, nec vetamur.

Pallentes procul hinc abite curæ;

Quic.

Quicquid venerit obvium loquamur,
Morosa sine cogitatione.

Misce dimidios, puer, trientes,
Quales Pythagoras dabat Neroni :
Misce, Dindyme, sed frequentiores.
Possum nil ego sobrius : bibenti
Succurrent mihi quindecim poetæ.

De horto suo. VIII.

Lassa quod externi spirant opobalsama Glauci,
Ultima Corvicio quæ cadit aura croco,
Poma quod hybernâ maturescentia capsâ,
Arbore quod vernâ luxuriosus ager,
De Pallatinis dominæ quod serica prelis,
Succina virgineâ quod regelata manu,
Amphora quod nigri, sed longè fracta Falerni,
Quod qui Sicanias detinet hortus apes,
Quod Cosmi redolent alabastra, focique deorum,
Quod modo divitibus lapsa corona comis ;
Singula quid dicam ? non sunt satis, omnia misce :
Hoc fragrant horti lilia manè mel.

De statua Memorii. IX.

Clarus fronde Jovis, Romani fama cothurni,
Spirat Apelleâ redditus arte Memor.

De Turno. X

Contulit ad Satyras ingentia pectora Turnus :
Cur non ad Memoris carmina ? frater erat.

Ad puerum suum. XL.

Tolle puer calices, tepidique toreumata Nili,
Et mihi securâ pocula trade manu,
Trita patrum labris, & tonso pura ministro ;
Antiquus mensis restitatur honor.
Te potare decet gemmâ, qui Mentora frangis
In scaphium faci, Sardanapale, tuæ.

In Zoilum. XII.

Jus tibi natorum vel septem, Zoile, detur :
Dum matrem nemo det tibi, nemo patrem.

Epitaphium Paridis. XIII.

Quisquis Flaminiam teris, vltor,
Noli nobile præterire marmor.
Urbis deliciæ, salesque Nili,
Ars & gratia, lusus & voluptas,
Romani decus & dolor theatri,
Atque omnes Veneres Cupidinesque,
Hoc sunt condita, quo Paris, sepulcro.

De colono. XIV.

Hæredes, nolite brevem sepelire colonum:
Nam terra est illi quantulacunque gravis.

Ad Sabinum. XV.

Non omnis nostri nocturna est pagina libri:
Invenies & quod manè, Sabine, legas.

Ad Lupum. XVI.

Donâsti, Lupe, rus sub urbe nobis:
Sed rus est mihi majus in fenestra.
Rus hoc dicere, rus potes vocare?
In quo ruta facit nemus Dianæ,
Argutæ tegit ala quod cicadæ,
Quod formica die comedit uno,
Clausæ cui folium rosæ corona est:
In quo non magis invenitur herba
Quàm costi folium, piperve crudum:
In quo nec cucumis jacere rectus,
Nec serpens habitare tota possit.
Erucam malè pascit hortus unam:
Consumpto moritur culex salicto;
Et talpa est mihi fossor, atque arator.
Non boletus hiare, non mariscæ
Ridere, aut violæ patere possunt.
Fines mus populatur, & colono
Tanquam fus Calydonius timetur;
Et sublata volantis ungue Procnes
In nido seges est hirundinino.
Vix implet cochleam peracta messis,
Et mustum nuce condimus picatâ.

Errâsti, Lupe, literâ sed unâ ;
 Nam quo tempore *pradium* dedisti,
 Mallem tu mihi *prandium* dedisses.

Ad Labullum. XVII.

Dum te prosequor, & domum reduco,
 Aurem dum tibi præsto garrienti,
 Et quicquid loqueris facisque laudo,
 Quot versus poterant, Labullè, nasci ?
 Hoc damnum tibi non videtur esse,
 Si quid Roma legit, requirit hospes,
 Non deridet eques, tenet senator,
 Laudat caufidicus, poëta carpit,
 Propter te perit: hoc, Labulle, verum est ?
 Hoc quisquam ferat, ut tibi tuorum
 Sit major numerus togatulorum,
 Librorum mihi sit minor meorum ?
 Triginta propè jam diebus una est:
 Nobis pagina vix peracta: sic fit,
 Cum cœnare domi poëta non vult.

In Zoilum. XVIII.

Os malè caufidicis, & dicis olere poetis:
 Obrectatori, Zoile, pejus olet.

In Cæcilium. XIX.

Atreus Cæcilius cucurbitarum,
 Sic illas quasi filios Thyestæ
 In partes lacerat secatque mille.
 Gustu protinus has edes in ipso,
 Has prima feret, alterave cœna,
 Has cœna tibi tertia reponet.
 Hinc seras epidipnidas parabit,
 Hinc pistor fatuas facit placentas,
 Hinc & multiplices struit tabellas,
 Et notas caryotidas theatris:
 Hinc exit varium coco minutal,
 Ut lentem positam, fabamque credas:
 Boletos imitatur, & botellos,
 Et caudam cybii, brevesque mœnas:

Hinc

Hinc cellarius experitur artes,
 Ut condat vario vaser sapore
 In rutæ folium capellianæ.
 Sic implet gabatas, paropsidasque,
 Et leves scutulas, cavaque lances.
 Hoc lautum vocat, hoc putat venustum,
 Unum ponere ferculis tot assen.

In Nestorem. XX.

Nec toga, nec focus est, nec tritus cimice lectus,
 Nec tibi de bibula facta palude teges:
 Nec puer, aut senior, nulla est ancilla, nec infans,
 Nec sera, nec clavis, nec canis, atque calix.
 Tu tamen affectas, Nestor, dici atque videri
 Pauper, & in populo quæris habere locum.
 Mentiris, vanoque tibi blandiris honore:
 Non est paupertas, Nestor, habere nihil.

De Prasino. XXI.

Sæpius ad palmam Prasinus post fata Neronis
 Pervenit, & victor præmia plura refert.
 I nunc, livor edax, dic te cessisse Neroni:
 Vicit nimirum non Nero, sed Prasinus.

De Apro. XXII.

Ædes emit Aper, sed quas nec noctua vellet
 Esse suas: adeò nigra vetusque casa est.
 Vicinos illi nitidus Maro possidet hortos.
 Coenabit bellè, non habitabit Aper.

Ad Fabullum. XXIII.

Ignotos mihi cùm voces trecentos,
 Quare non veniam vocatus à te
 Miraris, quererisque, litigasque.
 Solus coeno, Fabulle, non libenter.

De Caio Proculo. XXIV.

Caius hanc lucem gemmâ mihi Julius albâ
 Signat, iò, votis redditus ecce meis.
 Desperasse juvat, veluti jam rupta sororum
 Fila; minùs gaudent, qui timuere nihil.

Hypne,

Hypne, quid exspectas piger? immortale Falernum
Funde; fenem poscunt talia vota cadum.

Quincunces, & sex cyathos, bessèmq; bibamus,
Caius ut fiat, Julius, & Proculus.

In Zoilum. XXV.

ZOile, quid tota gemmam præcingere libra
Te juvat, & miserum perdere sardonicha?
Annulus iste tuis fuerat modò cruribus aptus:

Non eadem digitis pondera conveniunt.

De mulione surdo. XXVI.

Mulio viginti venit modò millibus, Aule.
Miraris pretium tam grave? surdus erat.

In Charidemum. XXVII.

Cunarum fueras motor, Charideme, mearum,
Et pueri custos, assiduusque comes.

Jam mihi nigrescunt tonsa sudaria barba,

Et queritur labris dextera puncta meis.

Sed tibi non crevi: te noster villicus horret;

Te dispensator, te domus ipsa pavet.

Ludere nec nobis, nec tu permittis amare:

Nil mihi vis, & vis cuncta licere tibi.

Corripis, observas, quereris, suspiria ducis;

Et vix à ferulis abstinet ira manum.

Si Tyrios sumpsi cultus, unxive capillos;

Exclamas, Nunquam fecerat ista pater.

Et numeras nostros adstrictâ fronte trientes,

Tanquam de cella sit cadus ille tua.

Desine: non possum libertum ferre Catonem.

Musa virum jam me dicet adulta tibi.

Ad Lygdum, de Amynta. XXVIII.

Indulget pecori nimiùm dum pastor Amyntas,
Et gaudet fama luxuriaque gregis;

Cedentes oneri ramos, sylvamque fluentem

Vicit, concussas ipse secutus opes.

Triste nemus diræ vetuit superesse rapinæ,

Damnavitque rogis noxia ligna pater.

Pingues, Lygde, fues habeat vicinus Iolas:

Te satis est nobis annumerare pecus.

In

In Cæcilianum. XXIX.

Vivida cùm poscas epigrammata, mortua ponis
Lemmata, quì fieri, Cæciliane, potest?
Mella jubes Hyblæa tibi, vel Hymettia nasci,
Et thyma Cecropiæ Corfica ponis api?

Ad senem orbem. XXX.

Orbus es, & locuples, & Bruto consule natus:
Esse tibi veras credis amicitias?
Sunt veræ: sed quas juvenis, quas pauper habebas.
Qui novus est, mortem diligit ille tuam.

In Silium. XXXI

Silius hæc magni celebrat monumenta Maronis,
Jugera facundi qui Ciceronis habet.
Hæredem, dominumque sui tumulique Larisque
Non alium mallet, nec Maro, nec Cicero.

De eodem. XXXII.

Jam propè desertos cineres, & sancta Maronis
Nomina qui colerat pauper, & unus erat.
Silius Andino tandem succurrit agello,
Silius & vatem, non minor ipse, colit.

Ad Fulium Cerealem. XXXIII.

Coenabis bellè, Juli Cerealis, apud me:
Conditio est melior si tibi nulla, veni.
Octavam poteris servare: lavabimur unà.
Scis quàm sint Stephani balnea juncta mihi.
Prima tibi dabitur ventri lactuca movendo
Utilis, & porris fila resecta suis.
Mox vetus, & tenui major cordylla lacerto:
Sed quam cum rutæ frondibus ova tegant.
Altera non deerunt tenui versata favillâ,
Et Velabrensi massa recocta foco:
Et quæ Picenum senserunt frigus olivæ.
Hæc satis in gustu. cætera nôsse cupis?
Mentiar ut venias, pisces, conchylia, sumen,
Et cortis saturas, atque paludis aves:
Quæ nec Stella solet rara nisi ponere coena.
Plus ego polliceor: nil recitabo tibi.

Ipse tuos nobis relegas licet usque Gigantes,
Rura vel æterno proxima Virgilio.

De Claudia Rufina. XXXIV.

Claudia coeruleis cum sit Rufina Britannis
Edita, cur Latine pectora plebis habet ?
Quale decus formæ ! Romanam credere matres
Italides possunt, Atthides esse suam.
Di bene, quod sancto peperit foecunda marito,
Quod sperat generos, quodque puella nurus.
Sic placeat superis, ut conjugæ gaudeat uno,
Et semper natis gaudeat illa tribus.

In Zoilum. XXXV.

Unguenta, & casias, & olentem funera myrrham,
Thuraque de medio semicremata rogo,
Et quæ de Stygio rapuisti cinnama lecto,
Improbe, de turpi, Zoile, redde sinu.
A pedibus didicere manus peccare protervæ:
Non miror furem, qui fugitivus erat.

De Lupo, ad Urbicum. XXXVI.

Hortatur fieri quod te Lupus, Urbice, patrem,
Ne credas : nihil est quod minus ille velit.
Ars est captandi, quod nolis velle videri :
Ne facias optat, quod rogat ut facias.
Dicat prægnantem tua se Cosconia tantum :
Pallidior fiet jam pariente Lupus.
At tu consilio videaris ut usus amici,
Sic morere, ut factum te putet esse patrem.

In Chæremone. XXXVII.

Quod nimium laudas, Chæremone Stoice, mortem,
Vis animum mirer suspiciamque tuum.
Hanc tibi virtutem fracta facit urceus ansæ,
Et tristis nullo qui tepet igne focus ;
Et teges, & cimex, & nudi sponda grabati,
Et brevis, atque eadem nocte dieque toga.
O quam magnus homo es, qui facie rubentis aceti,
Et stipulæ, & nigro pane carere potes !
Leuconicis agetum tumeat tibi culcitra lanis,
Constringatque tuos purpura texta toros :

O quàm tu cupias ter vivere Nestoris annos,
 Et nihil ex ulla perdere luce voles !
 Rebus in angustiis facile est contemnere vitam :
 Fortiter ille facit, qui miser esse potest.

Ad Severum. XXXVIII.

M Iraris, docto quòd carmina mitto Severo ;
 Ad coenam quòd te, docte Severe, vocem.
 Jupiter ambrosiâ satur est, & nectare vivit :
 Nos tamen exta Jovi, thura, merumque damus.
 Omnia cùm tibi sint dono concessa deorum :
 Si quod habes, non vis ; ergo quid accipies ?

In tonsorem. XXXIX.

Quid si me tonsor, cùm stricta novacula suprâ est,
 Tunc libertatem divitiasque roget ?
 Promittam : nec enim rogat illo tempore tonsor,
 Latro rogat : res est imperiosa timor.
 Sed fuerit curvâ cùm tuta novacula thecâ,
 Frangam tonsori crura manusque simul.

De Charino. XL.

Senos Charinus omnibus digitis gerit,
 Nec nocte ponit annulos,
 Nec cùm lavatur : causa quæ sit, quæritis ?
 Dactyliothecam non habet.

In Faustum. XLI.

Nescio tam multis quid scribas, Fauste, puellis :
 Hoc scio, quòd scribit nulla puella tibi.

In Justinum. XLII.

Sexcenti coenant à te, Justine, vocati
 Lucis ad officium quæ tibi prima fuit :
 Inter quos, memini, non ultimus esse solebam :
 Nec locus hic nobis invidiosus erat.
 Postera sed festæ reddis solennia mensæ :
 Sexcentis hodie, cras mihi natus eris.

In Vacerram. XLIII.

ET delator es, & calumniator :
 Et fraudator es, & negotiator :

Et

Et bellator es, & lanista: miror
Quare non habeas, Vacerra, nummos.

In Maronem. XLIV.

Nil mihi das vivus: dicis post fata daturum.
Si non es stultus, scis, Maro, quid cupiam.

Ad Mathonem. XLV.

Parya rogas magnos; sed non dant hæc quoq; magni.
Ut pudeat leviùs te, Matho, magna roga.

Epitaphium canis Lydia. XLVI.

Amphitheatrales inter nutrita magistros
Venatrix, sylvis aspera, blanda domi,
Lydia dicebar, domino fidissima dextra,
Qui non Erigones mallet habere canem;
Nec qui Dictæa Cephalum de gente secutus,
Luciferæ pariter venit ad astra deæ.
Non me longa dies, nec inutilis abstulit ætas,
Qualia Dulichio fata fuere cani:
Fulmineo spumantis apri sum dente perempta,
Quantus erat Calydon, aut, Erymanthe, tuus.
Nec queror, infernas quamvis citò rapta sub umbras:
Non potui fato nobiliore mori.

Ad Patum. XLVII.

Solvere, Pæte, decem tibi me sestertia cogis:
Perdiderat quoniam Bucco ducenta tibi.
Ne noceant, oro, mihi non mea crimina: tu qui
Bis centena potes perdere, perde decem.

In Vacerram. XLVIII.

IN omnibus Vacerra quòd conclavibus
Consumit horas, & die tota sedet:
Coenaturit Vacerra, non cacaturit.

Ad Patum. XLIX.

AD primum decima lapidem quòd venimus hora,
Arguitur lentæ crimine pigritiæ.
Non est ista viæ, non est mea, sed tua culpa;
Misiisti mulas qui mihi, Pæte, tuas.

Ad

Ad Flaccum, de Baiis. L.

L Ittus beatæ Veneris aureum Baias,
 Baias superbæ blanda dona naturæ,
 Ut mille laudem, Flacce, versibus Baias.
 Laudabo dignè non satis tamen Baias,
 Sed Martialem malo, Flacce, quàm Baias.
 Optare utrumque pariter, improbi votum est.
 Quòd si deorum munere hoc tibi detur :
 Quid gaudiorum est Martialis & Baiæ !

De Philostrato. LI.

A Sinuessanis conviva Philostratus undis
 Conductum repetens nocte iubente larem,
 Penè imitatus obit sævis Elpenora fatis,
 Præceps per longos dum ruit usque gradus.
 Non esset, nymphæ, tam magna pericula passus,
 Si potius vestras ille bibisset aquas.

Ad Sossianum. LII.

Nemo habitat gratis, nisi dives & orbis, apud te.
 Nemo domum pluris, Sossiane, locat.

De Antiocho tonsore. LIII.

Qui nondum Stygias descendere quærit ad undas,
 Tonsorem fugiat, si sapit, Antiochum.
 Alba minùs sævis lacerantur brachia cultris,
 Cùm furit ad Phrygios enthea turba modos.
 Mitior implicitas Alcon lecat enterocelas,
 Fractaque fabrili dedolat ossa manu.
 Tondeat hic inopes Cynicos, & Stoica menta,
 Collaque pulvereâ nudet equina jubâ.
 Hic miserum Scythica sub rupe Promethea radat :
 Carnificem nudo pectore poscet avem.
 Ad matrem fugiet Pentheus, ad Mænadas Orpheus :
 Antiochi tantùm barbara tela sonent.
 Hæc quæcunque meo numeratis stigmata mento,
 In vetuli picta qualia fronte sedent,
 Non iracundis fecit gravis unguibus uxor :
 Antiochi ferrum est, & scelerata manus.
 Unus de cunctis animalibus hircus habet cor :
 Barbatus vivit, ne ferat Antiochum.

In Parthenopæum. LIV.

L Eniat ut fauces medicus, quas aspera vexat
 Assiduè tussis, Parthenopæ, tibi ;
 Mella dari, nucleosque jubet, dulcesque placentas,
 Et quicquid pueros non finit esse truces.
 At tu non cessas totis tussire diebus.
 Non est hæc tussis, Parthenopæ ; gula est.

Ad Pollam. LV.

I Ntactas quare mittis mihi, Polla, coronas ?
 A te vexatas malo tenere rosas.

In Chrestillum. LVI.

C Armina nulla probas molli quæ limite currunt,
 Sed quæ per salebras altaque saxa cadunt.
 Et tibi Mæonio quid carmine majus habetur,
 Lucili columella hic situs Metrophanes.
 Attonitusque legis terræ frugiferæ ;
 Accius & quicquid Pacuviusque vomunt.
 Vis imiter veteres, Chrestille, tuosque poetas ?
 Dispeream, si scis quid sapuere sales.

Epitaphium Canaces. LVII.

Æ Olis heu Canace jacet hoc tumulata sepulchro,
 Ultima cui parvæ septima venit hyems.
 Ah scelus ! ah facinus ! properas quid flere, viator ?
 Non licet hîc vitæ de brevitate queri.
 Tristius est leto leti genus : horrida vultus
 Abstulit, & tenero sedit in ore lues :
 Ipsaque crudeles ederunt oscula morbi,
 Nec data sunt nigris tota labella rogis.
 Si tam præcipiti fuerant ventura volatu,
 Debuerant alia fata venire via.
 Sed mors vocis iter properavit cludere blandæ,
 Ne posset duras flectere lingua deas.

In Zoilum. LVIII.

M Entitur, qui te vitiosum, Zoile, dixit.
 Non vitiosus homo es, Zoile ; sed vitium.

De Theodoro. LIX.

Pierios vatis Theodori flamma Penates
 Abstulit; hoc Musis, hoc tibi, Phoebe, placet?
 O scelus, ô magnum facinus, crimenque deorum,
 Non arsit pariter quòd domus & dominus!

In verpum amulum. LX.

Quòd nimium lives, nostris & ubique libellis
 Detrahis, ignosco: verpe poëta, sapi.
 Hoc quoque non curo, quòd tu mea carmina carpas,
 Corripias: & sic, verpe poeta, sapi.
 Illud me cruciat; Solymis quòd natus in ipsis,
 Sustuleris porcum, verpe poeta, meum.
 Ecce negas, jurasque mihi per templa Tonantis.
 Non credo: jura, verpe, per Anchialum.

Ad Germanum. LXI.

Martia, non Rhenus salit hîc, Germane; quid obstas,
 Et puerum prohibes divitis imbre lacus?
 Barbare, non debet, submoto cive, ministro
 Captivam victrix unda levare sitim.

Ad Bassum. LXII.

Effugere non est, Basse, basiatores:
 Instant, morantur, persequuntur, occurrunt,
 Et hinc, & illinc, usquequaque, quacunque.
 Non ulcus acre, pustulæve lucentes,
 Nec triste mentum, sordidique lichenés,
 Nec labra pingui delibuta ceroto,
 Nec congelati gutta proderit nasi.
 Et æstuantem basiant, & algentem,
 Et nuptiale basium reservantem.
 Non te cucullis afferet caput tectum,
 Lætica nec te tuta pelle veloque,
 Nec vindicabit sella sæpius clausa.
 Rimas per omnes basiator intrabit.
 Non consulatus ipse, non tribunatus,
 Sæviq; fascés, nec superba clamosi
 Licetoris abiget virga basiatorem.
 Sedeas in alto tu licet tribunali,

Et è curuli jura gentibus reddas :
 Adscendet illà bafiator, atque illà.
 Febricitantem bafsiabit & flentem:
 Dabit oscitanti bafium, natantique;
 Dabit & vomenti. remedium mali solum est ;
 Facias amicum, bafiare quem nolis.

Ad Flaccum. LXIII.

H Abere amicum nolo, Flacce, subtilem,
 Cujus lacertos annuli mel cingant :
 Sed idem amicum nolo mille librarum.
 Carnarius sum, pinguiarius non sum.

Ad Flaccum. LXIV.

T Haida tam tenuem potuisti, Flacce, videre ?
 Tu puto, quod non est, Flacce, videre potes.

In Lydiam. LXV.

N On est mentitus qui te mihi dixit habere
 Formosam carnem, Lydia, non faciem.
 Est ita, si taceas, & si tam muta recumbas,
 Quàm filet in cera vultus, & in tabula.
 Sed quoties loqueris, carnem quoque, Lydia, perdis ;
 Et sua plùs nulli, quàm tibi lingua nocet.
 Audiat ædilis ne te, videatque, caveto.
 Portentum est, quoties coepit imago loqui.

Ad Sophronium. LXVI.

T Anta tibi est animi probitas orisque, Sophroni,
 Ut mirer fieri te potuisse patrem.

Ad Garricum. LXVII.

M ittebas libram : quadrantem, Garrice, mittis.
 Saltem semissem, Garrice, solve mihi.

Ad Albium Maximum. LXVIII.

A lbi Maxime, si vacabit hora,
 Hoc tantùm lege : namque & occupatus,
 Et non es nimium laboriosus.
 Transis hos quoque quatuor ? sapisti.

Ad Septicianum. LXIX.

Explicitum nobis usque ad sua cornua librum,
 Et quasi perlectum, Septiciane, refers.
 Omnia legisti : credo, scio, gaudeo, verum est.
 Perlegi libros sic ego quinque tuos.

Ad lectorem. LXX.

Quamvis tam longo possis satur esse libello,
 Lector, adhuc à me disticha pauca petis.
 Sed Lupus usuram, puerique diaria poscunt.
 Lector, solve: taces, dissimulasque ? Vale.

M. VAL. MARTIALIS EPIGRAMMATUM LIBER XII.

M. Val. Martialis Prisco suo salutem.

SCio me patrocinium debere contumacissima triennii desidia: quæ absolvenda non esset inter illas quoque occupationes urbanas, quibus facilius consequimur, ut molesti potius quàm officiosi esse videamur; nedum in hac provinciali solitudine, ubi nisi etiam intemperanter studeamus, & sine solatio, & sine excusatione secessimus. Accipe ergo rationem, in qua hoc maximum & primum est, quod civitatis aures, quibus adsueveram, quæro; & videor mihi in alieno foro litigare. Si quid est enim in libellis meis quod placeat, distavit auditor. Illam judiciorum subtilitatem, illud materialium ingenium, bibliothecas, theatra, conventus, in quibus studere se voluptatibus non sentiunt; ad summam omnium, ea quæ delicate reliquimus, quasi destituti desideramus. Accedit his municipalium rubigo dentium, & iudicis loco livor, & unus aut alter mali, in pusillo loco multi: adversus quos difficile est habere quotidie bonum stomachum. Ne mireris igitur abjecta ab indignante, quæ à gestiente fieri solent. Ne quid tamen & adveniienti tibi ab urbe, & exigenti negarem, cui non refero gratiam, si tantum ea præsto quæ possim, imperabo mihi, cui indulgere consueveram; & statui paucissimis diebus, ut familiarissimas mihi aures tuas exciperem adventoriâ suâ. Tu velim ista quæ tantum apud te non periclitantur, diligenter æstimare, & excutere non graveris; & quod tibi difficillimum est, de nugis nostris iudices nitore seposito, ne Romam, si ita decreveris, non Hispaniensem librum mittamus, sed Hispanum.

Ad eundem. I.

Retia dum cessant, latratoresque Molossi,
Et non invento sylva quiescit apro;
Otia, Prisce, brevi poteris donare libello.
Hora nec æstiva est, nec tibi tota perit.

Ad

Ad sua carmina. II.

Quæ modò litoreos ibatis carmina Pyrgos;
Ite sacrâ, jam non pulverulenta via est.

Ad librum suum. III.

AD populos mitti qui nuper ab urbe solebas,
Ibis tu Romam nunc, peregrine liber,
Auriferi de gente Tagi, tetricique Salonis,
Dat patrios Manes quæ mihi terra potens.
Non tamen hospes eris, nec jam potes advena dici,
Cujus habet fratres tot domus alta Remi.
Jure tuo veneranda novi pete limina templi,
Reddita Pierio sunt ubi templa choro.
Vel si malueris, primâ gradiere Suburrâ :
Atria sunt illic consulis alta mei.
Laurigeros habitat facundus Stella Penates,
Clarus Hiantæ Stella petitor aquæ.
Fons ibi Castalius vitreo torrente superbit,
Unde novem dominas sæpe bibisse ferunt.
Ille dabit populo, patribusque; equitique legendum:
Nec nimium siccis perleget ipse genis.
Quid titulum poscis? versus duo, tresve legantur;
Clamabunt omnes te, liber, esse meum.

Ad Priscum. IV.

Quod Flacco, Varioque fuit, summoque Maroni;
Mecœnas atavis regibus ortus eques;
Gentibus & populis hoc te mihi, Prisce Terenti,
Fama fuisse loquax, chartaque dicet anus.
Tu facis ingenium, tu, si quid posse videmur,
Tu das ingenuæ munera pigritiæ.

Ad Cæsarem. V.

Longior undecimi nobis decimique libelli
Arctatus labor est, & breve rasis opus.
Plura legant vacui, quibus ocia tuta dedisti:
Hæc lege tu, Cæsar : forsan & illa leges.

In commendationem Nervæ. VI.

Contigit Ausoniæ procerum mitissimus aula:
Nervæ : licet toto nunc Helicone frui.

Recta fides, hilaris clementia, cauta potestas
 Jam redeunt : longi terga dedere metus.
 Hoc populi gentesque tuæ, pia Roma, precantur :
 Læx tibi sit semper talis, & iste diu.
 Maeste animi, quem rarus habet, mortumque tuorum,
 Quos Numa, quos hilaris posset habere Cato.
 Largiri, præstare, breves extendere census,
 Et dare quæ faciles vix tribuere dei;
 Nunc licet & fas est. sed tu sub principe duro,
 Temporibusque malis ausus es esse bonus.

De Ligeia. VII.

Toto vertice quot gerit capillos,
 Annos si tot habet Ligeia, trima est.

In commendationem Trajani. VIII.

Terrarum dea, gentiumque Roma,
 Cui par est nihil, & nihil secundum,
 Trajani modò læta cùm futuros
 Tot per secula computaret annos,
 Et fortem, juvenemque, Martiumque
 In tanto duce militem videret :
 Dixit præside gloriosa tali ;
 Parthorum proceres, ducesque Serum,
 Thraces, Sauromatæ, Getæ, Britanni,
 Possum ostendere Cæsarem ; Venite.

Ad Cæsarem. IX.

Palma regit nostros, mitissime Cæsar, Iberos,
 Et placido fruitur pax peregrina jugo.
 Ergo agimus læti tanto pro munere grates :
 Misisti mores in loca nostra tuos.

De Africano. X.

Habet Africanus millies, tamen captar.
 Fortuna multis dar nimis, satis nulli.

Mittit librum ad Parthenium. XI.

Parthenio dic, Musa, tuo nostroque salutem :
 Nam quis ab Aonio largiùs amne bibit ?
 Cujus Pimplæo lyra clarior exit ab antro ?
 Quem plus Pierio de grege Phœbus amat ?

Et si fortè, sed hoc vix est sperare, vacabit,
 Tradat ut ipse duci carmina nostra, roga ;
 Quatuor & tantùm timidumque brevemq; libellum
 Commendet verbis ; hunc tua Roma legit.

In Posthumum. XII.

OMnia promittis, cùm totâ nocte bibisti :
 Manè nihil præstas, Posthume: manè bibe.

Ad Auctum. XIII.

Genus, Aucte, lucri divites habent iram :
 Odissè quàm donare vilius constat.

Ad Priscum. XIV.

Parcius utaris, moneo, rapiente veredo,
 Prisce, nec in lepores tam violentus eas.
 Sæpe satisfecit prædæ venator, & acri
 Decidit excussus, nec rediturus equo.

Insidias & campus habet : nec fossa, nec agger,
 Nec sint saxa licèt, fallere plana solent.

Non deerunt qui tanta tibi spectacula præstent,
 Invidia fati sed levioze cadant.

Si te delectant animosa pericula ; Tuscis,

Tutior est virtus, infidiamur apris :

Quid te frena juvant temeraria ? sapius illis,

Prisce, datum est equitem rumpere, quàm leporem.

Adulatorium. XV.

Quicquid Parrhasiâ nitebat aulâ,
 Donatum est oculis, deisque nostris.

Miratur Scythicas virentis auri

Flammas Jupiter, & stupet superbas

Regis delicias, gravesque luxus.

Hæc sunt pocula, quæ decent Tonantem :

Hæc sunt, quæ Phrygium decent ministrum.

Omnes cum Jove nunc sumus beati :

At nuper, (pudet, ah ! pudet fateri,)

Omnès cum Jove pauperes eramus.

In Lentinum. XVI.

Quare tam multis à te, Lentine, diebus
 Non abeat febris, quæris, & usque gemis.

Gesta-

Gestatur tecum sella, pariterque lavatur :

Coenat boletos, ostrea, fumen, aprum.

Ebria Setino fit sæpe, & sæpe Falerno :

Nec nisi per niveam Cæcuba potat aquam.

Curcumfusa rosis, & nigra recumbit amomo :

Dormit & in pluma, purpureoque toro.

Cùm sit tam pulchrè, tam bellè vivat apud te,

Ad Damam potiùs vis tua febris eat ?

Ad Juvenalem. XVII.

Dum tu forsitan inquietus erras
Clamofa, Juvenalis, in Suburra,

Aut collem dominæ teris Dianæ :

Dum per limina te potentiorum

Sudatrix toga ventilat, vagumque

Major Coelius & minor fatigant :

Me multos repetita post Decembres

Accepit mea, rusticumque fecit

Auro Bilbillis & superba ferro.

Hic pigri colimus labore dulci

Botrodum, Plateamque : Celtiberis.

Hæc sunt nomina crassiora terris.

Ingenti fruor improbòque somno,

Quem nec tertia sæpe rumpit hora.

Et totum mihi nunc repono, quicquid

Ter denos vigilaveram per annos.

Ignota est toga : sed datur petenti

Rupta proxima vestis à cathedra.

Surgentem focus excipit superbâ

Vicini strue cultus iliceti,

Multâ villica quem coronat ollâ.

Sic me vivere, sic juvat perire.

De Æmilio. XVIII.

IN thermis sumit lactucas, ova, lacertum ;

Et coenare foris te negat Æmilius.

Ad Marcellam. XIX.

Municipem rigidi quis te, Marcella, Salonis,

Et genitam nostris quis putet esse locis ?

Tam rarū, tam dulce sapis : Pallatia dicent, Au-

Audierint si te vel semel, esse suam :
 Nulla nec in media certabit nata Suburra,
 Nec Capitolini collis alumna tibi.
 Nec citò ridebit peregrini gloria partus,
 Romanam ducat quam magis esse nurum.
 Tu desiderium dominæ mihi mitius urbis
 Esse jubes : Romam tu mihi sola facis.

De Philænide. XX.

Quàm sit lusca Philænis indecenter,
 Vis dicam breviter tibi, Fabulle?
 Effet cæca decentior Philænis.

In Læliam. XXI.

Entibus atque comis, nec te pudet, uteris emptis.
 Quid facies oculo, Lælia? non emitur.
Ad Juvencum de covino curru. XXII.

O Jucunda, covine, solitudo,
 Carrucâ magis effedoque gratum
 Facundi mihi munus Heliani.
 Hic mecum licet, hic, Juvence, quicquid
 In buccam tibi venerit, loquaris.
 Non vector Libyci niger caballi,
 Succinctus neque cursor antecedit :
 Nusquam est mulio : manuli tacebunt.
 O si conscius esset hîc Avitus!
 Aurem non ego tertiam timerem.
 Totus quàm bene sic dies abiret!

In Thelesinum. XXIII.

Cum rogo te nummos sine pignore, nō habeo, inquis.
 Idem, si pro me spondet agellus, habes.
 Quod mihi non credis veteri, Thelesine, sodali,
 Credis colliculis arboribusque meis.
 Ecce reum Carus te detulit : adsit agellus.
 Exfilii comitem quæris? agellus eat.

In avarum amicum. XXIV.

Sexaginta teras cum lumina manè senator,
 Esse tibi videor desidiotus eques,
 Quòd non à primâ discurram luce per urbem,
 Et referam. lassus basia mille domum.

Sed

Sed tu purpureis ut des nova nomina fastis,
 Aut Numidum gentes, Cappadocúmve petas :
 At mihi, quem cogis medios abrumpere somnos,
 Et matutinum ferre patique lutum,
 Quid petitur ? ruptâ cum pes vagus exit alutâ,
 Et subitus crassæ decedit imber aquæ,
 Nec venit ablatis clamatus verna lacernis,
 Accedit gelidam servus ad auriculam,
 Et, rogat ut cænes secum Lætorius, inquit.
 Viginti nummis non ego malo famem ?
 Quod sit coena mihi, tibi sit provincia merces ;
 Et faciamus idem, nec mereamur idem.

In Cinnam. XXV.

POto ego sextantes ; tu potas, Cinna, deunces :
 Et quereris, quòd non, Cinna, bibamus idem.

Ad Ponticum, de Hermogene fure. XXVI.

Hermogenes tantus mapparum, Pontice, fur est,
 Quantus nummorum vix, puto, Massa fuit.
 Tu licèt observes dextram, teneasque sinistram ;
 Inveniet, mappam qua ratione trahat.
 Cervinus gelidum sorbet sic halitus anguem :
 Casuras altè sic rapit Iris aquas.
 Nuper cum Myrino peteretur missio læso ;
 Subduxit mappas quatuor Hermogenes.
 Cretatam prætor cum vellet mittere mappam ;
 Prætori mappam furripit Hermogenes.
 Attulerat mappam nemo, dum furta timentur ;
 Mantile è mensa furripit Hermogenes.
 Hoc quoque si deerit ; medios distringere lectos,
 Mensarumque pedes, non timet Hermogenes.
 Quamvis non modico caleant spectacula sole ;
 Vela reducuntur, cum venit Hermogenes.
 Festinant trepidi substringere carbasa nautæ,
 Ad portum quoties paruit Hermogenes.
 Linigeri fugiunt calvi, fistrataque turba,
 Inter adorantes cum stetit Hermogenes.
 Ad coenam Hermogenes mappam non attulit unquā :
 A coena semper rettulit Hermogenes.

Ad

Ad Aprum. XXVII.

Siccus, sobrius est Aper : quid ad me?
 Servum sic ego laudo, non amicum.

De hortis Marcellæ uxoris. XXVIII.

Hoc nemus, hi fontes, hæc textilis umbra supini
 Palmitis, hoc riguæ ductile flumen aquæ,
 Prataque, nec bifero cessura rosaria Pæsto,
 Quodque viret Jani mense, nec alget olus,
 Quæque natat clusis anguilla domestica lymphis,
 Quæque gerit similes candida turris aves;
 Munera sunt dominæ post septima lustra reverso :
 Has Marcella domos, parvæque regna dedit.
 Si mihi Nausicaë patrios concederet hortos,
 Alcinoos possem dicere, malo meos.

In Vacerram. XXIX.

O Juliarum dedecus Kalendarum,
 Vidi, Vacerra, sarcinas tuas; vidi :
 Quas non retentas pensione pro bima
 Portabat uxor rufa crinibus septem,
 Et cum sorore cana mater ingenti.
 Furias putavi nocte Ditis emerfas.
 Has tu priores frigore & fame siccus,
 Et non recenti pallidus magis buxo,
 Ius tuorum temporum sequebaris.
 Migrare clivum crederes Aricinum.
 Ibat tripes grabatus, & bipes mensa,
 Et cum lucerna, corneoque cratere,
 Matella curto rupta latere meiebat.
 Focum ferentis suberat amphoræ cervix.
 Fuisse gerres, aut inutiles mænas
 Odor impudicus urcei fatebatur,
 Qualem marinæ misit aura piscinæ.
 Nec quadra deerat casei Tholosatis,
 Quadrima nigri nec corona pulei,
 Calvæque restes allioque cepisque,
 Nec plena turpi matris olla refinâ.
 Quid quæris ædes, villicotque derides,

Habi-

Habitare gratis, ô Vacerra, cùm possis?
Hæc sarcinarum pompa convenit ponti.

Ad Julium Martialem. XXX.

TRiginta mihi quatuorque messes
Tecum, si memini, fuere, Juli;
Quarum dulcia mixta sunt amaris,
Sed jucunda tamen fuere plura.
Et si calculus omnis huc & illuc
Diversus bicolorque digeratur,
Vincet candida turba nigriorem.
Si vitare velis acerba quædam,
Et tristes animi cavere morsus,
Nulli te facias nimis sodalem.
Gaudebis minùs, & minùs dolebis.

Ad Callistratum. XXXI.

TAnquam simpliciter mecum, Callistrate, vivas:
Dicere sani animi te mihi sæpe soles.
Non es tam simplex, quàm vis, Callistrate, credi:
Nam quisquis garrit talia, plura tacet.

In Labullum. XXXII.

Libras quatuor aut duas amico,
Argentemque togam, brevemque lænam,
Interdum aureolos manu crepanteis,
Possint ducere qui duas Kalendas,
Quòd nemo, nisi tu, Labulle, donas;
Non es, crede mihi, bonus. quid ergo?
Ut verum loquar, optimus malorum.
Pisones, Senecasque, Memmiosque,
Et Crispos mihi redde, sed priores:
Fies protinus ultimus bonorum.
Vis cursu pedibusque gloriari?
Tigrim vince, levemque Passerinum.
Nulla est gloria præterire asellos.

In scurram. XXXIII.

Nasutus nimiùm cupis videri.
Nasutum volo, nolo polyposum.

In Sabellum. XXXIV.

O Di te, quia bellus es, Sabelle.
 Res est putida bellus, & Sabellus.
 Bellum denique malo, quàm Sabellum,
 Tabescas utinam, Sabelle, belle.

In Pontilianum. XXXV.

Mentiris, credo: recitas mala carmina, laudo:
 Cantas, canto: bibis, Pontiliane, bibo.
 Pedis, dissimulo: gemmâ vis ludere, vincer.
 Res una est sine me quam facis, & taceo.
 Nil tamen omnino præstas mihi. mortuus, inquis,
 Accipiam bene te. nil volo: sed morere.

In Tucam. XXXVI.

Non est, Tucca, satis, quòd es gulosus:
 Et dici cupis, & cupis videri.

Ad M. Unicum. XXXVII.

UNice, cognato junctum mihi sanguine nomen,
 Quique geris studiis corda propinqua meis;
 Carmina cum facias soli cedentia fratri,
 Pectore non minor es, sed pietate prior.
 Lesbia cum tenero te possit amare Catullo,
 Te post Nasonem blanda Corinna sequi.
 Nec deerant Zephyri, si te dare vela juvaret:
 Sed tu litus amas. hoc quoque fratris habes.

Ad Phœbum. XXXVIII.

HOedinâ tibi pelle contegenti
 Nudæ tempora verticemque calvæ,
 Festivè tibi, Phœbe, dixit ille,
 Qui dixit, caput esse calceatum.

Ad Classicum. XXXIX.

VEndunt carmina Gallus & Lupercus.
 Sanos, Classicè, nunc nega poëtas.

In inconstantem. XL.

Difficilis, facilis, jucundus, acerbus es idem:
 Nec tecum possum vivere, nec sine te.

In lautum invitatore. XLI.

BOletos & aprum si tanquam vilia ponis,
 Et non esse putas hæc mea vota : volo.
 Si fortunatum fieri me credis, & hæres
 Vis scribi propter quinque Lucrina : vale.
 Lautæ tamen coena est ; fateor, lautissima : sed cras
 Nil erit, immo hodie, protinus immo nihil ;
 Quod sciat infelix damnatæ spongia virgæ,
 Vel quicumque canes, junctæque testa viæ.
 Mullorum, leporumque, & fuminis exitus hic est,
 Sulphureusque calor, carnificesque pedes.
 Non Albana mihi sit commestatio tanti ;
 Nec Capitolinæ, pontificumque dapes.
 Imputet ipse deus nectar mihi, fiet acetum,
 Et Vaticanæ perfida vappa cadi.
 Convivas alios coenarum quære magister,
 Quos capiant mensæ regna superba tuæ.
 Me meus ad subitas invitet amicus ofellas :
 Hæc mihi, quam possum reddere, coena placet.

In amœnas ades, sed incommodas. XLII.

DAphnonas, platononas, & aërias cyparissos,
 Et non unius balnea solus habes :
 Et tua centenis stat porticus alta columnis,
 Calcatuque tuo sub pede lucet onyx :
 Pulvereumque fugax hippodromon ungula plaudit,
 Et pereuntis aquæ fluctus ubique sonat :
 Atria longa patent : sed nec coenantibus usquam,
 Nec somno locus est. quàm bene non habitas !

De Fabullo. XLIII.

TAm sæpe nostrum decipi Fabullum, quid
 Miraris, Aule ? semper bonus homo tiro est.

Ad Semproniam, de Ruso. XLIV.

TEmpora Pieriâ solitus redimire coronâ,
 Nec minus attonitis vox celebrata reis,
 Hic situs est, hic ille tuus, Sempronia, Rufus :
 Cujus & ipse tui flagrat amore cinis.
 Dulcis in Elysio narraris fabula campo,
 Et stupet ad raptus Tyndaris ipsa tuos.

Tu

Tu melior, quæ deserto raptore redisti ;
 Illa virum voluit nec repetita sequi.
 Ridet, & Iliacos audit Menelaus amores :
 Absolvit Phrygium vestra rapina Parim.
 Accipient olim cùm te loca læta piorum,
 Non erit in Stygia notior umbra domo.
 Non aliena videt, sed amat Proserpina raptas ;
 Iste tibi dominam conciliabit amor.

In avarum. XLV.

Nummi cùm tibi sint, opesque tantæ,
 Quantas civis habet, patèrve rarus :
 Largiris nihil, incubasque gazæ,
 Ut magnus draco, quem canunt poetæ
 Custodem Scythici fuisse luci.
 Sed causa, ut memoras, & ipse jactas,
 Diræ filius est rapacitatis.
 Et quid tu fatuos, rudesque quæris,
 Illudas quibus, auferasque mentem ?
 Huic semper vitio pater fuisti.

In Zoilum. XLVI.

CRine ruber, niger ore, brevis pede, lumine læsus :
 Rem magnam præstas, Zoile, si bonus es.

In Polycarmum. XLVII.

ÆGrotas uno decies aut sæpius anno ;
 Nec tibi, sed nobis hoc, Polycarme, nocet.
 Nam quoties surgis, foteria poscis amicos.
 Sit pudor : ægrota jam, Polycarme, semel.

Ad Sparsum. XLIII.

Cur sæpe sicci parva rura Nomenti,
 Laremque villæ sordidum petam, quæris ?
 Nec cogitandi, Sparse, nec quiescendi
 In urbe locus est pauperi : negant vitam
 Ludimagistri manè, nocte pistores,
 Ærariorum marculi die toto.
 Hinc ociosus sordidam quatit mensam
 Neroniana nummularius massa :
 Illinc paludis malleator Hispanæ.

Tritum nitenti fuste verberat saxum.
 Nec turba cessat entheata Bellonæ,
 Nec fasciato naufragus loquax trunco,
 A matre doctus nec rogare Judæus,
 Nec sulfuratæ lippus institor mercis.
 Numerare pigri damna qui potest somni,
 Dicet quot æra verberent manus urbis,
 Cùm secta Colcho Luna vapulat rhombo.
 Tu, Sparse, nescis ista, nec potes scire,
 Petilianis delicatus in regnis;
 Cui plana summos despicit domus montes,
 Et rus in urbe est, vinitorque Romanus:
 Nec in Falerno colle major autumnus;
 Intraque limen clausus essedo cursus,
 Et in profundo somnus, & quies nullis
 Offensa linguis, nec dies nisi admissus.
 Nos transeuntis risus excitat turbæ,
 Et ad cubile est Roma. tædio fessis
 Dormire quoties libuit, imus ad villam.

De importunis basiatoribus. XLIX.

Quantum dat tibi Roma basiorum
 Post annos modò quindecim reverso!
 Te vicinia tota, te pilosus
 Hircoſo premit osculo colonus.
 Hinc instat tibi textor, inde fullo;
 Hinc futor modò pelle basiatâ,
 Hinc menti dominus pediculosi,
 Hinc defioculus, & inde lippus.
 Jam tanti tibi non fuit redire.

Ad suum natalem. L.

MArtis alumne dies, roseam quo lampadaprimû,
 Magnaque fiderei vidimus ora dei:
 Si te rure coli, viridesque pigebit ad aras,
 Qui fueras Latîâ cultus in urbe mihi;
 Da veniam, servire meis quòd nolò Kalendis,
 Et quâ sum genitus, vivere luce volo.

In nimis anxie celebransem suos natales. LI.

NAtali pallere suo, ne calda Sabello
 Desit, & ut liquidum potet Alauda merum;
 Turbida sollicito transmittere Cæcuba sacco,
 Atque inter mensas ire redire suas;
 Excipere hos, illos, & totâ surgere coenâ
 Marmora calcantem frigidiora gelu:
 Quæ ratio est, hæc sponte tuâ perferre patique,
 Quæ te si jubeat rex dominusve, neges?

De Liguria. LII.

Versus, & breve vividumque carmen
 In te ne faciam times, Liguria,
 Et dignus cupis hoc metu videri:
 Sed frustra metuis, cupisque frustra.
 In tauros Lybici ruunt leones;
 Non sunt papilionibus molesti.
 Quæras, censeo, si legi laboras,
 Nigri fornicis ebrium poetam;
 Qui carbone rudi, putrique cretâ
 Scribit carmina, quæ legunt bibones.
 Frons hæc stigmate non meo notanda est.

Ad Saturnum pro Prisco Terentio. LIII.

Antiqui rex magne poli, mundique prioris,
 Sub quo pigra quies, nec labor ullus erat,
 Nec regale nimis fulmen, nec fulmine digna,
 Scissa nec ad Manes, sed sita dives humus;
 Lætus ad hæc facilisque veni sollennia Prisci
 Gaudia: cum sacris te decet esse tuis.
 Tu reducem patriæ sextâ, pater optime, brumâ
 Pacifici Latîâ reddis ab urbe Numæ,
 Cernis ut Ausonio similis tibi pompa macello
 Pendeat, & quantus luxurietur honos?
 Quàm non parca manus, largæque nomismata mensæ,
 Quæ, Saturne, tibi pernumerentur opes!
 Utque sit his pretium meritis & gratia major,
 Et pater, & frugi sic tua sacra colit.

At

At tu, sancte, tuo sic semper amere Decembri :
Hos illi jubeas sæpe redire dies.

Ad Cordubam. LIV.

UNcto Corduba lætior Venafro,
Histriâ nec minùs absoluta testâ,
Albi quæ superas oves Galeffi,
Nullo murice, nec cruore mendax,
Sed tinctis gregibus colore vivo :
Dic vestro, rogo, sit pudor poetæ,
Ne gratis recitet meos libellos.
Ferrem, si faceret bonus poeta,
Cui possem dare mutuos honores.
Cæcus perdere non potest, quod aufert.
Nil est deterius latrone nudo :
Nil securius est malo poeta.

Ad Amœnum. LV.

BIs quinquagenis domus est tibi millibus empta,
Vendere quam summâ vel brevior cupis.
Arte sed emptorem vastrâ corrumpis, Amœne,
Et casa divitiis ambitiosa latet.
Gemmanes primâ fulgent testudine lecti,
Et Maurusiaci pondera rara citri.
Deinde ducenta sonas, & ais, non esse minoris :
Instructam vili vendis, Amœne, domum.

In natalem Maronis. LVI.

MAiæ Mercurium creâstis Idus.
Augustis redit Idibus Diana.
Octobres Maro consecravit Idus.
Idus sæpe colas & has, & illas,
Qui magni celebras Maronis Idus.

Ad clientes. LVII.

Matutine cliens, urbis mihi causa relicta,
Atria, si sapias, ambitiosa colas.
Non sum ego causidicus, nec amaris litibus aptus :
Sed piger, & senior, Pieridumque comes.
Ocia me somnusque juvant, quæ magna negavit
Roma mihi : redeo, si vigilatur & hîc.

Ad Paulum. LVIII.

Sic tanquam tabulas scyphosque, Paulle,
Omnes archetypos habes amicos.

De Apro. LIX.

LIntea ferret Apro vatius cū vernula nuper,
Et supra togulam lusca federet anus,
Atque olei stillam donaret Opelicus unctor;
Udorum tetricus censor & asper erat:
Frangendos calices, effundendumque Falernum
Clamabat, biberet quod modò lotus eques.
A fene sed postquam patruo venere trecenta;
Sobrius à thermis nescit abire domum.
O quantum diacrete valent, & quinque comati!
Tunc, cū pauper erat, non sitlebat Aper.

Ad Lygdum. LX.

Nil non, Lygde, mihi negas roganti:
At quondam mihi, Lygde, nil negabas.

Ad Pannicum. LXI.

Jugera mercatus prope busta latentis agelli,
Et malè compactæ culmina fulta casæ,
Deferis urbanas, tua prædia, Pannice, lites,
Parvaque, sed tritæ præmia certa togæ.
Fruementum, milium, ptisanamque, fabamq; solebas
Vendere pragmaticus: nunc emis agricola.

Ad Catullum. LXII.

Hæredem tibi me, Catulle, dicis.
Non credam, nisi legero, Catulle.

Ad Flaccum. LXIII.

Cum tibi Niliacus portet crysalla cataplas,
Accipe de circo pocula Flaminio.
Hi magis audaces, an sunt qui talia mittunt
Munera? sed geminus vilibus usus inest.
Nullum sollicitant hæc, Flacce, toreumata furem,
Et nimium calidis non vitiantur aquis.
Quid? quod securo potat conviva ministro,
Et calum tremulæ non timuere manus.

Hoc

Hoc quoque nonnihil est, quòd propinabis in istis,
Frangendus fuerit si tibi, Flacce, calix.

De Agricola. LXIV.

Amphora vigessi, modius datur ære quaterno.
Ebrius & crudus nil habet agricola.

Ad Bithynicum. LXV.

Nil in te scripsi, Bithynice: credere non vis,
Et jurare jubes: malo satisfacere.

De Callistrato. LXVI.

Ne laudet dignos, laudat Callistratus omnes.
Cui malus est nemo, quis bonus esse potest?

De Umbro. LXVII.

Brumæ diebus, feriisque Saturni
Mittebat Uñber aliculam mihi pauper.
Nunc mittit alicam: factus est enim dives.

De Menogene. LXVIII.

Effugere è thermis & circa balnea non est
Menogenen, omni tu licèt arte velis.
Captabit tepidum dextrâ lævâque trigonem,
Imputet exceptas ut tibi sæpe pilas.
Colliget, & referet lapsum de pulvere sollem:
Et si jam lotus, jam soleatus erit.
Lintea si fumas, nive candidiora loquetur;
Sint licèt infantis sordidiora sinu.
Exiguos secto comentem dente capillos,
Dicet Achilleas disposuisse comas.
Fumosa feret ipse tropin de sæce lagenæ,
Frontis & humorem colliget usque tuæ.
Omnia laudabit, mirabitur omnia, donec
Perpeßus dicas tædia mille, *veni*.

Ad Polytimum. LXIX.

Nolueram, Polytime, tuos violare capillos:
Sed juvat hoc precibus me tribuisse tuis.
Talis eras modò tonse Pelops, positisque nitebas
Crinibus, ut totum sponsa videret ebur.

De Cotta. LXX.

BIs Cotta soleas perdidisse se questus,
Dum negligentem ducit ad pedes vernam,
Qui solus inopi præstat, & facit turbam;
Excogitavit homo sagax & astutus,
Ne facere posset tale sæpius damnum:
Excalceatus ire coepit ad coenam.

De Tongiliano. LXXI.

Tongilianus habet nasum: scio, non nego: sed jam
Nil præter nasum Tongilianus habet.

Ad Charinum. LXXII.

Quod lanâ caput alligas, Charine,
Non aures tibi, sed dolent capilli.

De Marone. LXXIII.

Pro sene, sed clarè, votum Maro fecit amico,
Cui gravis & fervens hemitritæus erat:
Si Stygias æger non iret missus ad undas,
Ut caderet magno victima grata Jovi.
Coeperunt certam medici spondere salutem,
Ne votum solvat, nunc Maro vota facit.

Ad Priscum. LXXIV.

Sæpe rogare soles qualis sim, Prisce, futurus,
Si fiam locuples, sinque repente potens.
Quemquam posse putas mores narrare futuros?
Dic mihi, si fias tu leo, qualis eris?

In Tuccam. LXXV.

Scribebamus epos: coepisti scribere: cessi,
Æmula ne starent carmina nostra tuis.
Transfuit ad tragicos se nostra Thalia cothurnos:
Aptâsti longum tu quoque syrma tibi.
Fila lyræ movi doctis exulta camœnis:
Plectra rapis nobis ambitione nova.
Audemus satyras: Lucilius esse laboras.
Ludo leves elegos: tu quoque ludis idem.
Quid minus esse potest? epigrammata fingere coepi:
Hinc etiam petitur jam mea fama tibi.

Elige

Elige quid nolis ; quis enim pudor omnia velle ?
Et siquid non vis, Tucca, relinque mihi.

Ad Batim. LXXVI.

Bætis oliviferâ crinem redimite coronâ,
Aurea qui nitidis vellera tingis aquis ;
Quem Bromius, quem Pallas amat, cui rector aquarū
Albula navigerum per freta pandit iter ;
Ominibus lætis vestras Instantius oras
Intret, & hic populis, ut prior, annus eat.
Non ignorat, onus quod sit, succedere Macro.
Qui sua metitur pondera, ferre potest.

In effrontem. LXXVII.

Os atavi, patrui nasum, duo lumina patris,
Et matris gestus dicis habere tuæ.
Cum referas priscos, nullamque in corpore partem
Mentiris ; frontem, dic mihi, cujus habes ?

Ad Matrum. LXXVIII.

Qui negat esse domi se tunc, cum limina pulsas,
Quid dicat, nescis ? dormio, Matte, tibi.

M. VAL. MARTIALIS EPIGRAMMATUM

LIBER. XIII.

XENIA.

De libro. I.

NE toga cordylis, ne penula desit olivis,
Aut inopem metuat sordida blatta famem;
Perdite Niliacas, Musæ, mea damna papyros:
Postulat ecce novos ebria bruma sales.
Non mea magnanimo depugnat tessera talo,
Senio nec nostrum cum cane quassat ebur.
Hæc mihi charta nuces, hæc est mihi charta fritillus;
Alea nec damnum, nec facit ista lucrum,

In detractorem. II.

NAsutus sis usque licèt, sis denique nasus,
Quantum noverit ferre rogatus Atlas,
Et possis ipsum tu deridere Latinum;
Non potes in nugas dicere plura meas,
Ipse ego quàm dixi. quid dentem dente juvabit
Rodere? carne opus est, si satur esse velis.
Ne perdas operam: qui se mirentur, in illos
Virus habe; nos hæc novimus esse nihil.
Nec tamen hoc nimium nihil est, si candidus aure,
Nec matutinâ si mihi fronte venis.

Ad lectorem. III.

OMnis in hoc gracili xeniorum turba libello
Constabit nummis quatuor empta tibi.
Quatuor est nimium; poterit constare duobus,
Et faciet lucrum bibliopola Tryphon.
Hæc licet hospitibus pro munere disticha mittas,
Si tibi tam rarus, quàm mihi, nummus erit.
Addita per titulos sua nomina rebus habebis:
Prætereas, si quid non facit ad stomachum.

Tbms.

Thus. IV.

Serus ut æthereæ Germanicus imperet aulæ,
Utque diu terris; da pia thura Jovi.

Piper. V.

Cerea quæ patulo lucet ficedula lumbo,
Cum tibi sorte datur, si sapias, adde piper.

Alica. VI.

Nos alicam, mulsum poterit tibi mittere dives:
Si tibi noluerit mittere dives, eme.

Conchis fabâ. VII.

Si spumet rubrâ conchis tibi pallida testâ,
Lautorum coenis sæpe negare potes.

Fay. VIII.

Imbue plebeas Clusinis pultibus ollas,
Ut satur in vacuis dulcia musta bibas.

Lens. IX.

Accipe Nilivæ, Pelusîa munera, lentem:
Vilior est alicâ, carior illa fabâ.

Simila. X.

Nec poteris similæ dotes numerare, nec usus,
Pistori toties cum sit & apta coco.

Ordeum. XI.

Mulio quod non det taciturnis, accipe, mulis.
Hæc ego cauponi, non tibi dona dedi.

Fru mentum Libycum. XII.

Tercentum Libyci modios de messe coloni
Sume, suburbanus ne moriatur ager.

Betæ. XIII.

Ut sapiant fatuæ fabrorum prandia betæ,
O quam sæpe petet vina piperque cocus!

Lactuca. XIV.

Claudere quæ coenas lactuca solebat avorum,
Dic mihi, cur nostras inchoat illa dapes?

Ligna acapna. XV.

Si vicina tibi Nomento rura coluntur,
Ad villam, moneo, rustice, ligna feras.

Rapa. XVI.

HÆc tibi brumali gaudentia frigore rapa
Quæ damus, in cœlo Romulus esse solet.

Coliculi. XVII.

NE tibi pallentes moveant fastidia caules,
Nitrata viridis brassica fiat aqua.

Porri sectivi. XVIII.

FIlia Tarentini graviter redolentia porri
Edisti quoties, oscula clausa dato.

Porri capitati. XIX.

MIttit præcipuos nemoralis Aricia porros:
In niveo virides stipite cerne comas.

Napi. XX.

NOs Amiternus ager felicibus educat hortis:
Nursinas poteris parcius esse pilas.

Asparagi. XXI.

MOllis in æquorea quæ crevit spina Ravenna,
Non erit incultis gratior asparagis.

Uva duracina. XXII.

NOn habilis cyathis, & inutilis uva Lyæo:
Sed non potanti me, tibi nectar ero.

Chia ficus. XXIII.

CHia feni similis Baccho, quem Setia misit;
Ipsa merum secum portat, & ipsa salem.

Cydonia. XXIV.

SI tibi Cecropio saturata Cydonia melle
Ponentur; dicas hæc melimela licet.

Nuces pineæ. XXV.

POma sumus Cybeles: procul hinc discede, viator,
Ne cadat in miserum nostra ruina caput.

Sorba. XXVI.

SOrba sumus, molles nimium durantia ventres:
Aptius hæc puero, quàm tibi poma dabis.

Spathalion caryotarum. XXVII.

AUrea porrigitur Jani caryota Kalendis:
Sed tamen hoc munus pauperis esse solet.

Coctana. XXVIII.

HÆc tibi quæ tortâ venerunt condita metâ,
Si majora forent coctana, ficus erant.

Pruna Damascena. XXIX.

PRuna peregrinæ carie rugosa senectæ
Sume: solent duri solvere ventris onus.

Caseus Lunensis. XXX.

CAseus Etruscæ signatus imagine Lunæ
Præstabit pueris prandia mille tuis.

Caseus Vestinus. XXXI.

SI sine carne voles jentacula sumere frugi:
Hæc tibi Vestino de grege massa venit.

Caseus Velabrensis. XXXII.

Non quemcunq; focum, nec fumum caseus omnem,
Sed Velabrensem qui bibit, ipse sapit.

Casei Trebulani. XXXIII.

Trebula nos genuit; commendat gratia duplex,
Sive levi flammâ, sive domamur aquâ.

Lucanica. XXXIV.

Filia Picenæ venio Lucanica porcæ:
Pultibus hinc niveis grata corona datur.

Oliua. XXXV.

HÆc quæ Picenis venit subducta trapetis;
Inchoat atque eadem finit oliua dapes.

Mala citrea. XXXVI.

Aut Corcyræi sunt hæc de frondibus horti,
Aut hæc Massyli poma draconis erant.

Colostrum. XXXVII.

Surripuit pastor quæ nondum stantibus hoedis,
De primo matrum lacte colostrum damus.

Hædi. XXXVIII.

Lascivum pecus, & viridi non utile Baccho
Det poenas: nocuit jam tener ille deo.

Ova. XXXIX.

Candida si croceis circumfluit unda vitellos,
Hesperius scombri temperet ova liquor.

Porcellus lactens. XL.

Lacte mero pastum pigrae mihi matris alumnus
Ponat, & Aetolo de sue dives edat.

Apyrina & tuberes. XLI.

Non tibi de Libycis tuberes & apyrina ramis,
De Nomentanis sed damus arboribus.

Idem. XLII.

Lecta suburbanis mittuntur apyrina ramis,
Et vernae tuberes: quid tibi cum Libycis?

Sumen. XLIII.

Esse putes nondum sumen: sic ubere largo
Effluit, & vivo lacte papilla tumet.

Pulli gallinacei. XLIV.

Si Libycae nobis volucres, & phasides essent,
Acciperes: at nunc accipe cortis aves.

Perfica, Nuciperfica. XLV.

Vilia maternis fueramus praecoqua ramis:
Nunc in adoptivis Perfica cara sumus.

Panes Picentini. XLVI.

Picentina Ceres niveo sic nectare crescit,
Ut levis accepta spongia turget aqua.

Boleti. XLVII.

Argentum atq; aurum facile est, lanaeque togaeque;
Mittere: boletos mittere difficile est.

Ficedula. XLVIII.

Cum me ficus alat, cum pascar dulcibus uvis,
Cur potius nomen non dedit uva mihi?

Tubera. XLIX.

Rumpimus altricem tenero de vertice terram
Tubera: boletis poma secunda sumus.

Turdorum corona. L.

Texta rosis fortasse tibi, vel divite nardo,
At mihi de turdis facta corona placet.

Anas. LI.

Tota quidem ponatur anas: sed pectore tantum,
Et cervice sapit: caetera redde coco.

Turtur. LII.

DUm pinguis mihi turtur erit; lactuca valebis,
Et cochleas tibi habe. perdere nolo famem.

Perna. LIII.

CÆretana mihi fiet, vel massa licebit
De Menapis: lauti de petasone vorent.

Petaſo. LIV.

Muſteus eſt: propera, caros nec differ amicos:
Nam mihi cum vetulo ſit petasone nihil.

Colocaſia. LV.

Niliacum ridebis olus, lanaſque ſequaces,
Improba cum morſu ſila manuque trahes.

Jecur anſeris. LVI.

Adſpice quàm tumeat magno jecur anſere majus!
Miratus dices, hoc, rogo, crevit ubi?

Glires. LVII.

TOra mihi dormitur hyems, & pinguior illo
Tempore ſum, quo me nil niſi ſomnus alit.

Cuniculus. LVIII.

GAudet in effoſſis habitare cuniculus antris:
Monſtravit tacitas hoſtibus ille vias.

Atagenæ. LIX.

INter ſapores fertur alitum primus
Ionicarum guſtus atagenarum.

Gallina altilis. LX.

PAſcitur & dulci facilis gallina farinâ,
Paſcitur & tenebris. ingenioſa gula eſt.

Perdix. LXI.

POnitur Auſoniis avis hæc rariffima menſis:
Hanc in lautorum mandere sæpe ſoles.

Columbini. LXII.

NE violes teneras perjuro dente columbas,
Tradita ſi Cnidia ſunt tibi ſacra deæ.

Galbula. LXIII.

GAlbula decipitur calamis & retibus ales,
Turget adhuc viridi cùm rudis uva mero.

Catta. LXIV.

Pannonicas nobis nunquam dedit Umbria cattas :
Mavult hæc domino mittere dona Pudens.

Pavo. LXV.

Miraris quoties gemma ites explicat alas ;
Et potes hunc sævo tradere, dure, coco?

Phœnicopterus. LXVI.

DAt mihi penna rubens nomen; sed lingua gulosis
Nostra sapit: quid si garula lingua foret?

Phasianus. LXVII.

Argivâ primùm sum transportata carinâ :
Antè mihi notum nil, nisi Phasis, erat.

Numidicæ. LXVIII.

Ansere Romano quamvis satur Hannibal effet :
Ipse suas nunquam barbarus edit aves.

Anser. LXIX.

Hæc servavit avis Tarpeii templa Tonantis.
Miraris? nondum fecerat illa deus.

Grues. LXX.

Turbabis versus, nec litera tota volabit,
Unam perdideris si Palamedis avem.

Rusticula. LXXI.

Rustica sum, an perdix, quid refert, si sapor idem est?
Carior est perdix: sic sapit illa magis.

Cycnus. LXXII.

Dulcia defectâ modulatur carmina linguâ.
Cantator cycnus funeris ipse sui.

Porphyriones. LXXIII.

Nomen habet magni volucris tam parva gigantis :
Et nomen Prasini Porphyrionis habet.

Mullus. LXXIV.

Spirat in advecto, sed jam piger æquore mullus
Languescit: vivum da mare, fortis erit.

Murena. LXXV.

Quæ natat in Siculo grandis murena profundo,
Non valet exustam mergere sole cutem.

Rhombus. LXXVI.

Quamvis lata gerat patella rhombum :
Rhombus latior est tamen patellâ.

Ostrea. LXXVII.

EBria Bajano veni modo concha Lucrino :
Nobile nunc sitio luxuriosa garum.

Squilla. LXXVIII.

Cœruleus nos Liris amat, quem sylva Maricæ
Protegit : hinc squillæ maxima turba sumus.

Scarus. LXXIX.

Hic scarus, æquoreis qui venit obesus ab undis,
Visceribus bonus est, cætera vile sapit.

Coracinus. LXXX.

Princeps Niliaci raperis, coracine, macelli :
Pellæ prior est gloria nulla gulæ.

Echinus. LXXXI.

Iste licet digitos testudine pungat acutâ,
Cortice deposito mollis echinus erit.

Murices. LXXXII.

Sanguine de nostro tinctas, ingrate, lacernas
Induis ; &, non est hoc satis, esca sumus.

Gobius. LXXXIII.

IN Veneris sint lauta licet convivia terris,
Principium coenæ gobius esse solet.

Lupus. LXXXIV.

LAneus Euganei lupus excipit ora Timavi,
Æquoreo dulces-cum sale pastus aquas.

Aurata. LXXXV.

Non omnis laudem pretiumque aurata meretur ;
Sed cui solus erit concha Lucrina cibus.

Acipensis. LXXXVI.

AD Pallatinas acipensem mittite mensas :
Ambrosias ornent munera rara dapes.

Lepus. LXXXVII.

INter aves turdus, si quis me iudice certet,
Inter quadrupedes gloria prima lepus.

Aper. LXXXVIII.

Qui Diomedæis metuendus setiger agris
Ætola cecidit cuspidè, talis erat.

Damæ. LXXXIX.

Dente timentur apri : defendunt cornua cervos.
Imbelles damæ quid nisi præda sumus ?

Oryx. XC.

Matutinarum non ultima præda ferarum
Sævus oryx, constat quot mihi morte canum !

Cervus. XCI.

Hic erat ille tuo domitus, Cyparisse, capistro ?
An magis iste tuus, Silvia, cervus erat ?

Lalifio. XCII.

Cum tener est onager, solâque lalifio matre
Pascitur ; hoc infans, sed breve nomen habet.

Dorca. XCIII.

Delicium parvo donabis dorcada nato :
Jactatis solet hanc mittere turba togis.

Caprea. XCIV.

Pendentem summa capream de rupe videbis :
Casurum speres ; decipit illa canes.

Onager. XCV.

Pulcher adest onager : mitti venatio debet
Dentis Erythræi : jam removete sinus.

Oleum Venafranum. XCVI.

Hoc tibi Campani sudavit bacca Venafri
Unguentum ; quoties sumis, & istud oles.

Garum scombrom. XCVII.

Exspirantis adhuc scombri de sanguine primo
Accipe sæcosum, munera cara, garum.

Muria. XCVIII.

Antipolitani fateor sum filia thynni :
Effem si scombri, non tibi missa forem.

Met Articum. XCIX.

Hoc tibi Thesei populatrix misit Hymetti
Pallados à sylvis nobile nectar apis.

Favi Siculi. C.

CUm dederis Siculos mediis de collibus Hyblæ,
Cecropios dicas tu licet esse favos.

Passum. CI.

CNossia Minoæ genuit vindemia Cretæ
Hoc tibi, quod mulsum pauperis esse solet.

Picatum vinum. CII.

HÆc de vitifera venisse picata Vienna
Ne dubites: misit Romulus ipse mihi.

Mulsum. CIII.

ATtica nectareum turbatis mella Falernum:
Misceri decet hoc à Ganymede merum.

Albanum. CIV.

HOc de Cæsareis mitis vindemia cellis
Misit, Iuleo quæ sibi monte placet.

Surrentinum. CV.

Surrentina bibis: nec murrhina picta, nec aurum
Sume: dabunt calices hæc tibi vina suos.

Falernum. CVI.

DE Sinuessanis venerunt Massica prelis.
Condita quo quæris consule? nullus erat.

Setinum. CVII.

Pendula Pomptinus quæ spectat Setia campos,
Exigua vetulos misit ab urbe cados.

Fundanum. CVIII.

HÆc Fundana tulit felix autumnus Opimî:
Expressit mustum consul, & ipse bibit.

Trifolinum. CIX.

Non sum de primo, fateor, trifolina Lyæo:
Inter vina tamen septima vitis ero.

Cacubum. CX.

CÆcuba Fundanis generosa coquuntur Amyclis:
Vitis & in media nata palude viret.

Signinum. CXI.

Potabis liquidum Signina morantia ventrem:
Ne nimium sistant, sit tibi parca sitis.

Mamertinum. CXII.

AMphora Nestoreâ tibi Mamertina senectâ
Si detur, quodvis nomen habere potest.

Tarracnense. CXIII.

TArraco, Campano tantùm cessura Lyæo;
Hæc genuit Tuscis æmula vina cadis.

Nomentanum. CXIV.

NOmentana meum tibi dat vindemia Bacchum :
Si te Quinctus amat, commodiora bibes.

Spoletinum. CXV.

DE Spoletinis quæ sunt cariola lagenis
Malueris, quàm si musta Falerna bibas.

Pelignum. CXVI.

MArfica Peligni mittunt turbata coloni.
Non tu, libertus sed bibat illa tuus.

Acetum. CXVII.

AMphora Niliaci non sit tibi vilis aceti :
Esset cùm vinum, vilior illa fuit.

Massilianum. CXVIII.

Cum tua centenos expugnet sportula cives,
Fumea Massiliæ ponere vina potes.

Cæretanum. CXIX.

CÆretana Nepos ponat, Setina putabis :
Non ponit turbæ, cum tribus illa bibit.

Tarentinum. CXX.

Nobilis & lanis, & felix vitibus Aulon
Det pretiosa tibi vellera, vina mihi.

Unguentum. CXXI.

Unguentum hæredi nunquam, nec vina relinquo :
Ille habeat nummos, hæc tibi tota dato.

Corona rosea. CXXII.

DAt festinatas, Cæsar, tibi bruma coronas.
Quondam veris erant, nunc tua facta rosa est.

M. VAL. MARTIALIS
EPIGRAMMATUM

LIBER XIV.

APOPHORETA.

De libro. I.

Synthesibus dum gaudet eques, dominusq; senatus,
Dumque decent nostrum pilea sumpta Jovem;
Nec timet ædilem moto spectare fritillo,

Cùm videat gelidos tam propè verna lacus;
Divitis alternas, & pauperis accipe sortes:

Præmia convivæ det sua quisque suo.

Sunt apinæ tricæque, & si quid vilius istis.

Quis nescit? vel quis tam manifesta negat?

Sed quid agam potiùs madidis, Saturne, diebus,

Quos tibi pro cœlo filius ipse dedit?

Vis scribam Thebas, Trojamque, malasque Mycenæ?

Lude, inquis, nucibus: perdere nolo nuces.

Quo vis cumque loco potes hunc finire libellum:

Verbis explicatum est omne duobus opus.

Ad lectorem. II.

Lemmata si quæris cur sint adscripta, docebo:

Ut, si malueris, lemmata sola legas.

Pugillares citrei. III.

Secta nisi in tenues essemus ligna tabellas,

Essemus Libyci nobile dentis onus.

Quincuplices. IV.

Cæde juvencorum domini calet area felix,

Quincuplici cerâ cùm datur altus honor.

Pugillares eburnei. V.

Languida ne tristes obscurant lumina ceræ,

Nigra tibi niveum litera pingat ebur.

Triplices. VI.

Tunc triplices vestros non vilia dona putabo,
Cum te venturum scribis, amice, mihi.

Pugillares membranei. VII.

Esse puta ceras, licet hæc membrana vocetur:
Delebis, quoties scripta novare voles.

Vitelliani. VIII.

Nondum legerit hos licet patronus,
Novit quid cupiant Vitelliani.

Idem. IX.

Quod minimos cernis, mitti nos credis amico:
Falleris, & nummos ista tabella rogat.

Charta majores. X.

Non sunt munera, quæ putas, amice;
Cum donat vacuas poeta chartas.

Charta epistolares. XI.

Seu leviter noto, seu caro missa sodali,
Omnes ista solet charta vocare suos.

Loculi eburnei. XII.

Hos nisi de flava loculos implere moneta
Non decet: argentum vilia ligna ferant.

Loculi lignei. XIII.

Si quid adhuc superest in nostri facie locelli,
Munus erit: nihil est, ipse locellus erit.

Tali eburnei. XIV.

Cum steterit nullus vultu tibi talus eodem,
Munera me dices magna dedisse tibi.

Tessera. XV.

Non sim talorum numero par tessera, dum sit
Major, quàm talis, alea sæpe mihi.

Turricula. XVI.

Quæ scit compositos manus improba mittere talos,
Si per me misit, nil nisi vota facit.

Tabula lusoria. XVII.

Hic mihi bis seno numeratur tessera puncto:
Calculus hic gemino discolor hoste petit.

Nuces. XVIII.

Alea parva nuces, & non damnosa videntur :
Sæpe tamen pueris abstulit illa nates.

Theca calamaria. XIX.

Sortitus thecam calamis armare memento :
Cætera nos dedimus, tu leviora para.

Calculi. XX.

Insidiosorum si ludis bella latronum,
Gemmeus iste tibi miles & hostis erit.

Graphiarium. XXI.

Hæc tibi erunt armata suo graphiaria ferro :
Si puero dones, non leve munus erit.

Dentiscalpium. XXII.

Lentiscum melius : sed si tibi frondea cuspis
Defuerit, dentes penna levare potest.

Auriscalpium. XXIII.

Si tibi morosâ prurigne verminat auris,
Arma damus tantis apta libidinibus.

Acus aurea. XXIV.

Tenuia ne madidi violent bombycina crines,
Figat acus tortas sustineatque comas.

Pecten ad calvam. XXV.

Quid faciet nullos hîc inventura capillos
Multifido buxus quæ tibi dente datur ?

Sapo. XXVI.

C-Austica Teutonicos accendit spuma capillos :
Captivis poteris cultior esse comis.

Muttiacæ pilæ. XXVII.

Si mutare paras longævos cana capillos :
Accipe Mattiacas (quò tibi calva ?) pilas.

Umbella. XXVIII.

Accipe quæ nimios vincant umbracula soles :
Sit licet & ventus, te tua vela regent.

Causia. XXIX.

IN Pompeiano tectus spectabo theatro ;
Nam ventus populo vela negare solet.

Venabula. XXX.

EXcipient apros, exspectabuntque leones;
Intrabunt ursos, sit modò firma manus.

Culter venatorius. XXXI.

SI dejecta gemes longo venabula rostro,
Hic brevis iam grandem cominus ibit aprum.

Parazonium. XXXII.

Militiæ decus hoc, & grati nomen honoris,
Arma tribuniciū cingere digna latus.

Pugio. XXXIII.

Pugio, quem curvis signat brevis orbita venis,
Stridentem gelidis hunc Salo tinxit aquis.

Falx ex ense. XXXIV.

Pax me certa ducis placidos curvavit in usus,
Agricolæ nunc sum, militis antè fui.

Securicula. XXXV.

Cum fieret tristis solvendis auctio nummis,
Hæc quadringentis millibus emptā fuit.

Ferramenta tonsoria. XXXVI.

Tondendis hæc arma tibi sunt apta capillis:
Unguibus hæc longis, utilis illa genis.

Scrinium. XXXVII.

Constrictos nisi das mihi libellos,
Admittam tineas trucesque blattas.

Fasces calamorum. XXXVIII.

Dat chartis habiles calamos Memphitica tellus:
Texantur reliquâ tecta palude tibi.

Candela. XXXIX.

Ancillam tibi fors dedit lucernæ,
Tutas quæ vigil exigit tenebras.

Lucerna polymyxos. XL.

Illustrem cum tota meis convivia flammis,
Totque geram myxas, una lucerna vocor.

Cereus. XLI.

Hic tibi nocturnos præstabit cereus ignes:
Subducta est puero namque lucerna tuo.

Candelabrum Corinthium. XLII.

N Omina candelæ nobis antiqua dederunt :
Non nōrat parcos uncta lucerna patres.

Candelabrum ligneum. XLIII.

E Sse vides lignum : serves nisi lumina, fiet
De candelabro magna lucerna tibi.

Pila paganica. XLIV.

H Æc quæ difficili turget paganica plumâ,
Folle minùs laxa est, & minùs arcta pilâ.

Pila trigonalis. XLV.

S I me nobilibus scis expulsare sinistris,
Sum tua : si nescis, rustice, redde pilam.

Follis. XLVI.

I Te procul, juvenes : mitis mihi convenit ætas :
Folle decet pueros ludere, folle senes.

Harpasta. XLVII.

H Æc rapit Antæi velox in pulvere draçtes,
Grandia qui vano colla labore facit.

Halteres. XLVIII.

Q Uid pereunt stulto fortes haltere lacerti ?
Exercet meliùs vinea fossa viros.

Galericulum. XLIX.

N E lutet immundum nitidos ceroma capillos,
Hâc poteris madidas condere pelle comas.

Strigiles. L.

P Ergamus has misit : curvo distringere ferro,
Non tam sæpe teret lintea fullo tibi.

Guttus corneus. LI.

G Estavit modò fronte me juvencus,
Verùm rhinoceros me putabis.

Idem ex rhinoceros. LII.

N Uper in Ausonia domini spectatus arena,
Hic erit ille tibi, cui pila taurus erat.

Crepitaculum. LIII.

S I quis plorator collo tibi vernula pendet,
Hæc quatiat tenerâ garrula sinistra manu.

Flagellum. LIV.

Proficies nihil, hoc cædas licet usque flagello,
Si tibi purpureo de grege currit equus.

Dentifricium. LV.

Quid mecum est tibi? me puella sumat.
Emptos non soleo polire dentes.

Myrobalanum. LVI.

Quod nec Virgilius, nec carmine dixit Homerus,
Hoc ex unguento constat, & ex balano.

Aphronitrum. LVII.

Rusticus es? nescis quid Græco nomine dicar.
Spuma vocor nitri. Græcus es? Ἀφρόνιτρον.

Opobalsama. LVIII.

Balsama me capiunt, hæc sunt unguenta virorum.
Delicias Nini vos redolet nurus.

Lomentum. LIX.

Gratum munus erit, fissis nec inutile rugis,
Si clara Stephani balnea luce petes.

Laterna cornea. LX.

Dux laterna viæ clausis feror aurea flammis,
Et tuta est gremio parva lucerna meo.

Laterna ex vesica. LXI.

Cornea si non sum, numquid sum fuscior? aut me
Vesicam contra qui venit esse putat?

Fistula. LXII.

Quid me compactam ceris & arundine rides?
Quæ primùm exstructa est fistula, talis erat.

Tibia. LXIII.

Ebria nos madidis iumpit tibia buccis:
Sæpe duas pariter, sæpe monaulon habet.

Soleæ lanatæ. LXIV.

Detuerit si fortè puer, soleasque libebit
Sumere; pro puero pes erit ipse sibi.

Mamillare. LXV.

Taurino poteras pectus constringere tergo:
Nam pellis mammas non capit ista tuas.

Muscaria pavonina. LXVI.

Lambere quæ turpes prohibet tua prandia muscas,
Alitis eximix cauda superba fuit.

Copta Rhodia. LXVII.

Peccantis famuli pugno ne percute dentes :
Clara Rhodos coptam, quam tibi misit, edat.

Porcus. LXVIII.

Iste tibi faciet bona Saturnalia porcus,
Inter spumantes ilice pastus apros.

Muscarium bubulum. LXIX.

Sordida si flavo fuerit tibi pulvere vestis,
Colligat hunc tenui verbere cauda levis.

Botulus. LXX.

Qui venit botulus medio tibi tempore brumæ,
Saturni septem venerat ante dies.

Psittacus. LXXI.

Psittacus à vobis aliorum nomina discam :
Hoc didici per me dicere ; Cæsar, ave.

Luscinia. LXXII.

Flet Philomela nefas incesti Tereos, & quæ
Muta puella fuit, garrula fertur avis.

Pica. LXXIII.

Pica loquax certâ dominum te voce saluto :
Si me non videas, esse negabis avem.

Cavea. LXXIV.

Si tibi talis erit, qualem dilecta Catullo
Lesbia plorabat, hîc habitare potest.

Narthecium. LXXV.

Artis ebur medicæ narthecia cernis habere
Munera, quæ cuperet Pactius esse sua.

Flagra. LXXVI.

Ludite, lascivi, sed tantum ludite, servi :
Hæc signata mihi quinque diebus erunt.

Ferula. LXXVII.

Invisæ nimium pueris, gratæque magistris,
Clara Prometheo munere ligna sumus.

Pera. LXXVIII.

NE mendica ferat barbati prandia nudi,
Dormiat & tetrico cum cane, pera rogat.

Scopa. LXXIX.

IN pretio scopas testatur palma fuisse :
Sed pretium scopis nunc analecta dabunt.

Scalptorium. LXXX.

Defendet manus hæc scapulas mordente molesto
Pulice, vel si quid pulice sordidius.

Manuale. LXXXI.

NE toga barbatos faciat, vel pænula libros,
Hæc abies chartis tempora longa dabit.

Leſtus pavoninus. LXXXII.

NOmina dat spondæ pictis pulcherrima pennis
Nunc Junonis avis : sed prius Argus erat.

Ephippium. LXXXIII.

STragula succincti, venator, sume veredi :
Nam solet à nudo surgere ficus equo.

Stibadia. LXXXIV.

ACcipe lunatâ scriptum testudine sigma :
Oſto capit : veniat, quisquis amicus erit.

Gustatorium. LXXXV.

FOemineam nobis cherſon ſi credis inſeſſe ;
Deciperis : pelagi maſcula præda ſumus.

Menſa citrea. LXXXVI.

ACcipe felices, Atlantica munera, ſylvas :
Aurea qui dederit dona, minora dabit.

Menſa acerna. LXXXVII.

NOn ſum criſpa quidem, nec ſylvæ filia Mauræ :
Sed nôrunt lautas & mea ligna dapes.

Dentes eburnei. LXXXVIII.

GRandia taurorum portant qui corpora, quæris
An Libycas poſſint ſuſtinuiſſe trabes ?

Quincupedal. LXXXIX.

PUncta notis ilex, & acutâ cuspide clauſa,
Sæpe redemptoris prodere furta ſolet.

Pocula archetypa. XC.

Non est ista recens, nec nostri gloria cœli :
Primus in his Mentor, dum facit illa, bibit.

Calices. XCI.

Nos sumus audacis plebeia toreumata vitri ;
Nostra nec ardenti gemma feritur aquâ.

Phiala aurea cœlata. XCII.

Quamvis Callaico rubeam generosa metallo,
Glorior arte magis ; nam Myos iste labor.

Calices Vatini. XCIII.

Vilia futoris calicem monumenta Vatini
Accipe; sed nasus longior ille fuit.

Lances chrysendeta. XCIV.

Grandia ne viola parvo chrysendeta mullo :
Ut minimum, libras debet habere duas.

Vasa Aretina. XCV.

ARetina nimis ne spernas vasa, monemus :
Laurus erat Tuscis Porfena fictilibus.

Bascauda. XCVI.

Barbara de pictis veni bascauda Britannis :
Sed me jam mavult dicere Roma suam.

Panaca. XCVII.

Si non ignota est docti tibi terra Catulli,
Potâsti testâ Rhætica vina meâ.

Boletaria. XCVIII.

Cum mihi boleti dederint tam nobile nomen,
Prototomis, (pudet, heu !) fervio coliculis.

Calices Surrentini. XCIX.

Accipe non vili calices de pulvere natos :
Sed Surrentinæ læve toreuma rotæ.

Colum nivarium. C.

Setinos, moneo, nostrâ nive frange trientes :
Pauperiore mero tingere lina potes.

Saccus nivarius. CI.

Atenuare nives nōrunt & lintea nostra :
Frigidior colo non salit unda tuo.

Urceoli ministratorii. CII.

F Rigida non deerit, non deerit calda petenti :
Sed tu morosâ ludere parce siti.

Urceus fictilis. CIII.

H Ic tibi donatur pandâ ruber urceus ansâ :
Stoicus hoc gelidam Fronto petebat aquam.

Calathi. CIV.

N Os Satyri, nos Bacchus amat, nos ebria tigris
Perfusus domini lambere docta pedes.

Calices Saguntini. CV.

Quæ non sollicitus teneat servetque minister,
Same Saguntino pocula ficta luto.

Calices gemmati. CVI.

G Emmatum Scythicis ut luceat ignibus aurum,
Adspice quot digitos exuit iste calix.

Ampulla potoria. CVII.

H Ac licet in gemma, quæ servat nomina Cosmi,
Luxuriose bibas, si foliata sitis.

Crystallina. CVIII.

F Rangere dum metuis, frangis crystallina: peccant
Securæ nimium, sollicitæque manus.

Nimbus vitreus. CIX.

A B Jove qui veniet miscenda ad pocula, largas
Fundet nimbus aquas; hic tibi vina dabit.

Murrhina. CX.

S I calidum potas, ardenti myrrha Falerno
Convenit, & melior fit sapor inde mero.

Patella Cumana. CXI.

H anc tibi Cumano rubicundam pulvere testam
Municipem misit casta Sibylla suam.

Calices vitrei. CXII.

A Dspicis ingenium Nili: quibus addere plura
Dum cupit, ah, quoties perdidit auctor opus!

Lagena nivaria. CXII.

S Poletina bibis, vel Marfis condita cellis :
Quò tibi decoctæ nobile frigus aquæ?

Nives.

Nives. CXIV.

Non potare nivem, sed aquam potare rigentem
De nive, commenta est ingeniosa sitis.

Idem. CXV.

Massiliæ fumos miscere nivalibus undis
Parce, puer, constet ne tibi pluris aqua.

Ligula argentea. CXVI.

Quamvis me ligulam dicant equitesq; patresque :
Dicor ab indoctis lingula grammaticis.

Cochleare sive ligula. CXVII.

Sum cochleis habilis, sed nec minùs utilis ovis :
Numquid scis potiùs cur cochleare vocer ?

Annuli. CXVIII.

Antè frequens, sed nunc rarus nos donat amicus :
Felix cui comes est non alienus eques.

Dactyliotheca. CXIX.

Sæpe gravis digitis elabitur annulus unctis :
Tuta meâ fiet sed tua gemma fide.

Toga. CXX.

Romanos rerum dominos, gentemque togatam
Ille facit, magno qui dedit astra patri.

Idem. CXXI.

Si matutinos facile est tibi rumpere somnos :
Attritâ veniet sportula sæpe togâ.

Endromis. CXXII.

Pauperis est munus, sed non est pauperis usus :
Hanc tibi pro togula mittimus endromida.

Canusina fusca.

Hæc tibi turbato Canusina simillima mulso
Munus erit. gaude : non citò fiet anus.

Bardocucullus. CXXIV.

Gallia Santonico vestit te bardocucullo :
Cercophithecorum penula nuper erat.

Canusina rufa. CXXV.

Roma magis fuscis vestitur, Gallia rufis :
Et placet hic pueris militibusque color.

Penula scortea. CXXVI.

Ingrediare viam coelo licet usque sereno,
Ad subitas nusquam scortea desit aquas.

Lacerna coccinea. CXXVII.

SI Veneto, Prasinove faves, quid coccina sumis ?
Ne fias ista transfuga sorte, vide.

Pileus. CXXVIII.

Si possem, totas cuperem misisse lacernas :
Nunc tantum capiti munera mitto tuo.

Lacerna Barica. CXXXIX.

Non est lana mihi mendax, nec mutor aëno :
Si placeant Tyriae, me mea tinxit ovis.

Cenatoria. CXXX.

Nec fora sunt nobis, nec sunt vadimonia nota :
Hac opus est pictis accubuisse toris.

Lana. CXXXI.

Tempore brumali non multum laevia profunt :
Calfaciunt villi pallia vestra mei.

Lacernae albae. CXXXII.

Amphitheatrales nos commendamur ad usus,
Cum tegit argentes alba lacerna togas.

Gausapa villosa, vel mantile. CXXXIII.

Nobilius villosa tegant tibi lintea citrum :
Orbibus in nostris circulus esse potest.

Cuculli Liburnici. CXXXIV.

Iungere nescisti nobis, o stulte, lacernas :
Indueras albas, exue Callaicas.

Udones Cilicii. CXXXV.

Non hos lana dedit, sed olentis barba mariti :
Cinyphio poterit planta latere sinu.

Synthesis. CXXXVI.

Dum toga per quinas gaudet requiescere luces,
Hos poteris cultus sumere jure tuo.

Focale. CXXXVII.

Si recitaturus dederò tibi fortè libellum,
Hoc focale tuas afferat auriculas.

Tunica Patavina. CXXXVIII.

V Ellera cū fumant Patavinæ multa trilices,
Vix pingues tunicas ferra secare potest.

Spongia. CXXXIX.

H Æc tibi sorte datur tergendis spongia mensis
Utilis, expresso cū levis imbre tumet.

Penula gausapina. CXL.

I S mihi candor inest, villorum gratia tanta est,
Ut me vel mediā fumere messe velis.

Cervical. CXLI.

T Inge caput nardi folio, cervical olebio:
Perdidit unguentum cū coma, plūma tenet.

Lodices. CXLII.

N Udo stragula ne toro paterent,
Junctæ nos tibi venimus sorores.

Cubicularia polymita. CXLIII.

H Æc tibi Memphitis tellus dat munera: victa est
Pectine Niliaco jam Babylonis acus.

Zona. CXLIV.

L Onga satīs nunc sum; nimio sed pondere venter
Si tumeat, fiam tunc tibi zona brevis.

Gausapa quadrata. CXLV.

L Odices mittet docti tibi terra Catulli:
Nos Helicaonia de regione sumus.

Semicinctium. CXLVI.

D Et tunicam dives, ego te præcingere possum.
Essem si locuples, munus utrumque darem.

Lana amethystina. CXLVII.

E Bria Sidoniæ cū sim de sanguine conchæ,
Non video quare sobria lana vocer.

Lana alba. CXLVIII.

V Elleribus primis Apuliā, Parma secundis
Nobilis: Alcinum tertia laudat ovis.

Lana Phrygiæ. CXLIX.

N Os Lacedæmonia pastor donavit amicæ:
Deterior Ledæ purpura matris erat.

Lana Pollentina. CL.

Non tantum pullo lugentes vellere lanas,
Sed solet & calices hæc dare terra suos.

Eadem. CLI.

Lana quidem tristis, sed confis apta ministris,
Quales non primo de grege mensa vocat.

Tomentum Lingonicum. CLII.

Oppressæ nimium vicina est fascia plumæ?
Vellera Lingonicis accipe rasa sagis.

Tomentum Circense. CLIII.

Tomentum concisa palus Circense vocatur:
Hæc pro Lingonico stramina pauper emit.

Pluma. CLIV.

Lassus Amyclæâ poteris requiescere plumâ,
Interior cycni quam tibi lana dedit.

Fœnum. CLV.

Fraudatâ tumeat frœno tibi culcita plumâ.
Non venit ad duros pallida cura toros.

Tintinnabulum. CLVI.

Redde pilam; sonat æs thermarum: ludere pergis?
Virgine vis solâ lotus abire domum.

Discus. CLVII.

Splendida cùm volitent Spartani pondera disci,
Este procul, pueri: sit semel ille nocens.

Cithara. CLVIII.

Reddidit Eurydicen vati: sed perdidit ipse,
Dum sibi non credit, nec patienter amat.

Idem. CLIX.

De Pompeiano sæpe est ejecta theatro,
Quæ duxit sylvas, detinuitque feras.

Plectra. CLX.

Fervida ne trito tibi pollice pustula surgat:
Exornent docilem garrula plectra lyram.

Trochus. CLXI.

Inducenda rota est: das nobis utile munus.
Iste trochus pueris, at mihi canthus erit.

Idem.

Idem. CLXII.

G Arrulus in laxo cur annulus orbe vagatur,
Cedat ut argutis obvia turba trochis ?

Signum victoriae. CLXIII.

H Æc illi sine sorte datur, cui nomina Rhenus
Vera dedit. decies adde Falerna, puer.

Sauroctonos Corinthius. CLXIV.

A D te reptanti, puer insidiose, lacertæ
Parce : cupit digitis illa perire tuis.

Hyacinthus in tabula pictus. CLXV.

F Lectit ab inviso morientia lumina disco
Oebalius, Phoebi culpa dolorque, puer.

Persona Germanica. CLXVI.

S Um figuli lusus rufi persona Batavi.
Quæ tu derides, hæc timet ora puer.

Hercules Corinthius. CLXVII.

E Lidit geminos infans, nec respicit, angues.
Jam poterat teneras hydra timere manus.

Hercules filius. CLXVIII.

S Um fragilis : sed tu, moneo, ne sperne sigillum.
Non pudet Alciden nomen habere meum.

Minerva argentea. CLXIX.

D Ic mihi, virgo ferox, cum sit tibi cassis & hasta,
Quare non habeas ægida ? Cæsar habet.

Sigillum Giberii fictile. CLXX.

E Brius hæc fecit terris, puto, monstra Prometheus:
Saturnalitio ludit & ipse luto.

Homeri Batrachomyomachia. CLXXI.

P Erlege Mæonio cantatas carmine ranas,
Et frontem nugis solvere disce meis.

Homerus in membranis. CLXXII.

I Lias & Priami regnis inimicus Ulysses,
Multiplici pariter condita pelle latent.

Virgilii culex. CLXXIII.

A Ccipe facundi culicem, studiose, Maronis :
Ne nugis positis Arma Virumque canas.

Virgilius

Virgilius in membrana. CLXXIV.

QUàm brevis immensū cepit membrana Maronem!
Ipsius vultus prima tabella gerit.

Cicero in membranis. CLXXV.

SI comes ista tibi fuerit membrana, putato
Carpere te longas cum Cicerone vias.

Propertius. CLXXVI.

CYNthia, facundi carmen juvenile Propertî,
Accepit famam, nec minù ipsa dedit.

Livius in membranis. CLXXVII.

PELLibus exiguis arctatur Livius ingens,
Quem mea non totum bibliotheca capit.

Sallustius. CLXXVIII.

HIC erit, ut perhibent doctorum corda virorum,
Primus Romana Crispus in historia.

Ovidii Metamorphosis in membranis. CLXXIX.

HÆc tibi multiplici quæ structa est massa tabellâ,
Carmina Nasonis quinque decemque gerit.

Lucanus. CLXXX.

SUNT quidam, qui me dicunt non esse Poëtam:
Sed qui me vendit bibliopola, putat.

Catullus. CLXXXI.

TANTum magna suo debet Verona Catullo,
Quantum parva suo Mantua Virgilio.

Calda & frigida aqua. CLXXXII.

HÆc tibi quæ fuerint caldarum nomina dicit,
Ipsa suas melius charta natabit aquas.

Mulæ pomiliæ. CLXXXIII.

HIS tibi de mulis non est metuenda ruina:
Altiùs in terra penè sedere soles.

Catella Gallicana. CLXXXIV.

DELicias parvæ si vis audire catellæ,
Narranti brevis est pagina tota mihi.

Asturco. CLXXXV.

HIC brevis, ad numerū rapidos qui colligit ungues,
Venit ab auriferis gentibus, Astur equus.

Canis vertagus. CLXXXVI.

Non sibi, sed domino venatur vertagus acer,
Illæsum leporem qui tibi dente feret.

Simius. CLXXXVII.

Callidus emissas eludere similis hastas,
Si mihi cauda foret, cercopithecus eram.

Cymbala. CLXXXVIII.

ÆRa Celænæos lugentia matris amores
Esuriens Gallus vendere sæpe solet.

Notarius. CLXXXIX.

Currant verba licèt, manus est velocior illis:
Nondum lingua suum, dextra peregit opus.

Concha. CXC.

Lævis ab æquorea cortex Mareotica concha
Fiat; inoffensâ curret arundo viâ.

Morio. CXCI.

Non mendax stupor est, nec fingitur arte dolosâ:
Quisquis plûs iusto non sapit, ille sapit.

Caput arietinum. CXCII.

Mollia Phryxei secuisti colla mariti.
Hoc meruit, tunicam qui tibi sæpe dedit?

Pumilio. CXCIII.

Si solum spectes hominis caput, Hæctora credes:
Si stantem videas, Astyanacta putes.

Parma. CXCV.

Hæc quæ sæpe solet vinci, quæ vincere rarò,
Parma tibi, scutum pumilionis erat.

Accipiter. CXCV.

Prædo fuit volucrum, famulus nunc aucupis: Idem
Decipit, & captas non sibi moeret aves.

Obsonator. CXCVI.

Dic quotus, & quanti cupias coenare, nec unum
Addideris verbum: coena parata tibi est.

Calami aucupatorii. CXCVII.

Non tantum calamis, sed cantu fallitur ales,
Pallida dum tacitâ crescit arundo manu.

Cor bubulum. CXCVIII.

PAuper caufidicus nullos referencia nummos
Carmina cùm scribas, accipe cor quod habes.

Cocus. CXCIX.

NOn satis est ars sola coco, servire palato :
Namque cocus domini debet habere gulam.

Craticula cum veru. CC.

PArva tibi curvâ craticula sudet ofellâ ;
Spumeus in longa cusplde fumet aper.

Pistor dulciarius. CCI.

MIlle tibi dulces operum manus ista figuras
Exstruit : huic uni parca laborat apis.

Jentacula. CCII.

Surgite, jam vendit pueris jentacula pistor,
Cristatæque sonant undique lucis aves.

M. VAL. MARTIALIS
DE
SPECTACULIS
LIBELLUS.

In amphitheatrum Cæsaris. I.

B Arbara Pyramidum fileat miracula Memphis;
Assiduus jactet nec Babylona labor;
Nec Triviæ templo molles laudentur Iones;
Dissimuletque deum cornibus ara frequens;
Aëre nec vacuo pendentia Mausolea
Laudibus immodicis Cares in astra ferant.
Omnis Cæsareo cedat labor amphitheatro:
Unum pro cunctis famâ loquatur opus.

Ad Cæsarem, de publicis ipsius operibus. II.

H Ic, ubi fidereus propius videt astra colossus,
Et crescunt mediâ pegmata celsa viâ,
Invidiosa feri radiabant atria Regis,
Unaque jam tota stabat in Urbe domus.
Hic, ubi conspicui venerabilis amphitheatri
Erigitur moles, stagna Neronis erant.
Hic, ubi miramur velocia munera thermas,
Abstulerat miseris tecta superbus ager.
Claudia diffusas ubi porticus explicat umbras,
Ultima pars aulae deficientis erat.
Reddita Roma sibi est; & sunt, te præside, Cæsar,
Deliciæ populi, quæ fuerant Domini.

Ad eundem, de gentium congratulatione. III.

Q Uæ tam seposita est, quæ gens tam barbara, Cæsar,
Ex qua spectator non sit in urbe tua?
Venit ab Orpheo cultor Rhodopeius Æmo,
Venit & epoto Sarmata pastus equo:
Et qui prima bibit deprensi flumina Nili,
Et quem supremæ Tethyos unda ferit.
Festinauit Arabs, festinavêre Sabæi,
Et Cilices nimbis hîc maduere suis.

Crinibus in nodum tortis venère Sicambri,
 Atque aliter tortis crinibus Æthiopes.
 Vox diversa sonat : populorum est vox tamen una,
 Cum verus patriæ diceris esse pater.

De expulsis à Cesare delatoribus. IV.

Turba gravis paci, placidæque inimica quieti,
 Quæ semper miseras sollicitabat opes,
 Traducta est Gyaris : nec cepit arena nocentes ;
 Et delator habet, quod dabat, exsilium.
 Exulat Ausonia profugus delator ab urbe :
 Impensis vitam principis annumeres.

De naumachia. V.

Si quis ades longis serus spectator ab oris,
 Cui lux prima sacri muneris ista fuit :
 Ne te decipiat ratibus navalis Enyo,
 Et par unda fretis : hîc modò terra fuit.
 Non credis ? spectes, dum laxent æquora Martem,
 Parva mora est ; dices, hîc modò pontus erat.

De eadem. VI.

Augusti laudes fuerant, committere classes,
 Et freta navali sollicitare tubâ.
 Cæsaris hæc nostri pars est quota ? vidit in undis
 Et Thetis ignotas, & Galatea feras :
 Vidit in æquoreo ferventes pulvere currus,
 Et domini Triton ipse putavit equos.
 Dumque parat sævis ratibus fera prælia Nereus,
 Abnuît in liquidis ire pedester aquis.
 Quicquid & in Circo spectatur, & Amphitheatro,
 Dives Cæsarea præstitit unda tibi.
 Fucinus, & pigri taceantur stagna Neronis:
 Hanc nôrint unam secula Naumachiam.

De natatoribus. VII.

Lusit Nereidum docilis chorus æquore toto,
 Et vario faciles ordine pinxit aquas.
 Fuscina dente minax, nexu fuit anchora curvo :
 Credidimus remum, credidimusque ratem :

Et gratum nautis sidus fulgere Laconum,
 Lataque perspicuo vela tumere sinu.
 Quis tantas liquidis artes invenit in undis?
 Aut docuit lusus hos Thetis, aut didicit?

*De tauro personatum Herculem sursum
 vebente. VIII.*

R Aptus abit mediâ quòd ad æthera taurus arenâ;
 Non fuit hoc artis, sed pietatis opus.
 Vexerat Europen fraterna per æquora taurus;
 At nunc Alciden taurus in astra tulit.
 Cæsaris atque Jovis confer nunc, Roma, juvencos:
 Par onus ut tulerint, altiùs iste tulit.

Pœna personati Laureoli. IX

Qualiter in Scythica religatus rupe Prometheus
 Assiduam nimio pectore pavit avem:
 Nuda Caledonio sic pectora præbuit urso
 Non falsa pendens in cruce Laureolus.
 Vivebant laceri membris stillantibus artus,
 Inque omni nusquam corpore corpus erat.
 Denique supplicium dederat necis ille paternæ,
 Vel domini jugulum foderat ense nocens;
 Tempa vel arcano demens spoliaverat auro,
 Subdiderat sævas vel tibi, Roma, faces.
 Vicerat antiquæ sceleratus crimina famæ,
 In quo, quæ fuerat fabula, pœna fuit.

Pœna personati Dadali. X.

Dædale, Lucano cum sic lacereris ab urso,
 Quàm cuperes pennas nunc habuisse tuas!

Pœna personati Orphei. XI.

Quicquid in Orpheo Rhodope spectâsse theatro
 Dicitur; exhibuit, Cæsar, arena tibi.
 Resperunt scopuli, mirandaque sylva cucurrit,
 Quale fuisse nemus creditur Hesperidum.
 Adfuit immixtum pecori genus omne ferarum,
 Et supra vatem multa pendit avis.
 Ipse sed ingrato jacuit laceratus ab urso:
 Hæc tamen ut res est facta, ita ficta alia est.

Nec

Nec se miretur, Cæsar, longæva vetustas :
Quicquid fama canit, donat arena tibi.

Pugna rhinocerotis & tauri. XII.

Praestitit exhibitus totâ tibi, Cæsar, arenâ,
Quæ non promisit, prælia rhinoceros.
O quam terribiles exarsit pronus in iras !
Quantus erat cornu, cui pila taurus erat !

Pugna rhinocerotis & ursi. XIII.

Sollicitant pavidum rhinocerotâ magistri,
Seque diu magnæ colligit ira feræ,
Desperabantur promissi prælia Martis :
Sed tamen is rediit cognitus antè furor.
Namque gravem gemino cornu sic extulit ursum,
Jactat ut impositas taurus in astra pilas.

Pugna tauri & elephantis. XIV.

Qui modo per totam, flammis stimulatus, arenam :
Sustulerat raptas taurus in astra pilas ;
Occubuit tandem cornuto ardore petitus,
Dum facilem tolli sic elephantâ putat.

Pugna tigridis & leonis. XV.

L Ambere securi dextram consueta magistri
Tigris, ab Hyrcano gloria rara iugo,
Sæva ferum rabido laceravit dente leonem :
Res nova, non ullis cognita temporibus.
Ausâ est tale nihil, sylvis dum vixit in altis ;
Postquam inter nos est, plus feritatis habet.

De leone qui læserat magistrum. XVI.

Læserat ingrato leo perfidus ore magistrum,
Aulus tam notas contemnerare manus :
Sed dignas tanto persolvit crimine poenas,
Et qui non tulerat verbera, tela tulit.
Quos decet esse hominum tali sub Principe mores,
Qui jubet ingenium mitius esse feris ?

Dama supplex. XVII.

Concita veloces fugeret cum dama molossos,
Et varia obliquas necteret arte moras,

Cæsaris antè pedes supplex, similisque roganti
 Constitit ; & prædàm non tetigere canes.
 Numen habet Cæsar: sacra est vis, sacra potestas;
 Credite : mentiri non didicere feræ.

Elephas supplex. XVIII.

Quòd pius & supplex elephas te, Cæsar, adorat ;
 Hic modò qui tauro tam metuendus erat ;
 Non facit hoc iussus, nulloque docente magistro ;
 Crede mihi, numen sentit & ille tuum.

Ursus visco implicitus. XIX.

Præceps sanguineâ dum se rotat ursus arenâ,
 Implicitam visco perdidit ille fugam.
 Splendida jam tecto cessent venabula ferro,
 Nec volet excussâ lancea torta manu.
 Deprêndat vacuo venator in aëre prædàm,
 Si captare feras aucupis arte placet.

De sue quæ ex vulnere peperit. XX.

Inter Cæsareæ discrimina sæva Dianæ
 Fixisset gravidam cùm levis hasta suam,
 Exsiliit partus miseræ de vulnere matris.
 O Lucina ferox, hoc peperisse fuit ?
 Pluribus illa mori voluisset sauciâ telis,
 Omnibus ut natis triste pateret iter.
 Quis negat esse satum materno funere Bacchum ?
 Sic genitum numen credite : nata fera est.

De eadem. XXI.

ICTA gravi telo, confossaque vulnere mater
 Sus pariter vitam perdidit, atque dedit.
 O quàm certa fuit librato dextera ferro !
 Hanc ego Lucinæ credo fuisse manum.
 Experta est numen moriens utriusque Dianæ ?
 Quâque soluta parens, quâque perempta fera est.

De eadem. XXII.

SUS fera jam gravior maturi pignora ventris
 Emisit foetum, vulnere facta parens.
 Nec jacuit partus, sed matre cadente cucurrit.
 O quantum est subitis casibus ingenium !

De Carpophoro venatore. XXIII.

Summa tuæ, Meleagre, fuit quæ gloria famæ ;
 Quantula Carpophori portio, fusus aper !
 Ille & præcipiti venabula condidit urso,
 Primus in Arctoi qui fuit axe poli :
 Stravit & ignotâ spectandum mole leonem,
 Herculeas potuit qui decuisse manus :
 Et volucrem longo porrexit vulnere pardum.
 Præmia cùm laudis ferret, adhuc poterat.

De eodem. XXIV.

Dorica quàm certo venabula dirigit ictu
 Fortis adhuc teneri dextera Carpophori !
 Ille tulit geminos facili cervice juvencos ;
 Illi cessit atrox bubalus atque bison.
 Hunc leo cùm fugeret, præceps in tela cucurrit.
 I nunc, & lentas corripe, turba, moras.

De eodem. XXV.

Secula Carpophorum, Cæsar, si prisca tulissent,
 Jam nullum in monstris orbe fuisset opus.
 Non Marathon taurum, Nemeæ frondosa leonem,
 Arcas Mænalium non timuisset aprum.
 Hæc armata manus Hydræ mois una fuisset,
 Huic percussa foret tota Chimæra semel.
 Ignipedes posset sine Colchide vincere tauros :
 Solvere & Hesionem solus, & Andromeden,
 Herculeæ laudis numeretur gloria : plus est,
 Bis denas pariter perdoimuisse feras.

Pugna scæminarum cum bestiis. XXVI.

Belliger invictis quòd Mars tibi sævit in armis,
 Non satis est, Cæsar : sævit & ipsa Venus.
 Prostratum Nemees in vasta valle leonem,
 Nobile & Herculeum fama canebat opus.
 Prisca fides taceat : nam post tua munera, Cæsar,
 Hæc jam scæmineâ vidimus acta manu.

Gladiatorum paria : Myrinus & Triumphus. XXVII.

Dum peteret pars hæc Myrinum, pars illa Trium-
 Promisit pariter Cæsar utrâq; manu. (phum:
 Non

Non potuit meliùs litem finire jocosam.

O dulce invicti Principis ingenium !

Priscus & Verus. XXVIII.

Cum traheret Priscus, traheret certamina Verus,
Effet & æqualis Mars utriusque diu :

Missio sæpe viris magno clamore petita est.

Sed Cæsar legi paruit ipse suæ.

Lex erat, ad digitum positâ concurrere palmâ ;

Quod licuit, lances donaque sæpe dedit.

Inventus tamen est finis discriminis æqui.

Pugnare pares : succubere pares.

Misit utrique rudes, & palmas Cæsar utrique.

Hoc pretium virtus ingeniosa tulit.

Contigit hoc, nullo nisi te sub principe, Cæsar :

Cum duo pugnarent, victor uterque fuit.

Cedere majori, virtutis fama secunda est.
Illa gravis palma est, quam minor hostis habet.

Ad Casarem, libelli dedicatio. XXIX.

DA veniam subitis : non displicuisse meretur,
Festinat, Cæsar, qui placuisse tibi.

Ad eundem. XXX.

FLavia gens, quantum tibi tertius abstulit hæres !
Penè fuit tanti, non habuisse duos.

F I N I S

E R R A T A.

P Ag. 8 l. 6 lege ne. l. 7 urbe. l. 27 dictis. p. 9 l. 5 exires
 p. 21 l. 29 tabida. p. 37 l. 35 *χοιρὰ* ult. p. 43 l. 8 de-
 bilitate. l. 10 petauri. p. 49 l. 15 tibi. l. 35 pudor. p. 55 l. 28
 cerdo. p. 56 l. 12 pluris. p. 57 l. 31 *λεως*. p. 61 l. 6 cultus
 in auro. p. 63 l. 29 reside. p. 77 l. 21. sudare. p. 83 l. 5 Mas-
 chlion. p. 101 l. 37 pejerat. p. 112 l. 12 semitatus. p. 122 l.
 17 sordidus. p. 190 l. 17 sigma.

School-books Printed by E. Redmayne.

An Introduction to the Latin Tongue,
for the use of *Westminster School*.

Rudimentum Grammaticæ Latinæ Me-
tricum, in usum NOBILIUM puerulorum
in Scholâ REGIA *Westmonasterii*.

Græcæ Grammatices Rudimenta, in
usum Scholæ *Westmonasteriensis*.

Nomenclatura brevis, reformata &c. in
usum Scholæ *Westmonasteriensis*.

Apollodorus (Ἀπολλοδωρὸς Βιβλίου) in usum
Scholæ *Westmonasteriensis*.

Græcorum Epigrammatum Florilegium
novum, in usum Scholæ *Westmonasteriensis*.

Juvenalis & Persii Satyræ, in usum Scho-
læ *Westmonasteriensis*.

Dionysii Poemation de Situ Orbis, in
usum Scholæ *Etonensis*.

Demosthenis selectæ Orationes.

Q. Curtius. Val. Maximus.

Chr. Helvici Colloquia.

Xenophon de Cyri &c.

Esop Greek. Esop Greek & Latin.

Janua Trilinguis. à Jo. Amos-Comenio.
as also in Latin & Greek. & Latin only.

Ger. Jo. Vossi Elementa Rhetorica.

Syntaxis Erasmi.

Owenii Epigrammata.

Ferrarii Orationes.

Senecæ Tragœdiæ cum notis Farnæ

